

# نكيتا بقولك كده

إسعاد يونس



# زكيا بقولك كده

إسعاد يونس

كريبتيف: إياد صالح  
تأليف: محمد حربي - إسلام صالحين  
إشراف عام: داليا محمد إبراهيم

جميع الحقوق محفوظة © لدار نهضة مصر للنشر

يحظر طبع أو نشر أو تصوير أو تخزين  
أي جزء من هذا الكتاب أية وسيلة إلكترونية أو ميكانيكية  
أو بالتصوير أو خلاف ذلك إلا بإذن كتابي صريح من الناشر.

الترقيم الدولي: 978-977-14-5467-0  
رقم الإيداع: 2016/ 22042  
طبعة: يناير 2017



أسسها أحمد محمد إبراهيم سنة 1958

21 شارع أحمد عرابي - المهندسين - الجيزة  
تليفون: 33466434 - 02 33472864  
فاكس: 02 33462576  
خدمة العملاء: 16766  
Website: [www.nahdetmisr.com](http://www.nahdetmisr.com)  
E-mail: [publishing@nahdetmisr.com](mailto:publishing@nahdetmisr.com)



بدأ كبرنامج إذاعي تقدمه «إسعاد يونس» من إنتاج شركة «ليوميديا»، ويذاع على راديو 9090 يومياً من بداية 2016.. تم اختيار أفضل الحلقات التي أذيعت لتنشرها دار نهضة مصر للنشر بنفس الاسم.

## مقدمة

إذا كنت من الناس اللي شايفين الدنيا سواد، وحاشر نفسك في نفق اخترت إنه يكون مِضْلَم، وواحد قرار إنه يفضل مِضْلَم لدرجة إنك مستعد تنفخ فتطفي أي شمعة تنور أو ترمي بصيص ضوء، وارتحت نفسياً لإنك تتحول لكائن شكّاء بكّاء نَوّاح لطّام من باب إن كده أريح يا عم، ده حتى الأمل معناه إني لازم أقوم من عالكنبة أو كرسي السايبر أو القهوة و اشتغل والواحد ما فيهوش حيل، إذا كنت واحد من دول فبلاش تقرا الكتاب ده!

«إياد صالح» شاب لابس نضارة، وراها عينين هي اللي بتصح النظر، وبتوجه عدسات النضاره عشان تشوف الحقيقة، لا بتقولها سوديها ولا جمليها، بتقولها شوفي منابع الخير فين، نقبي عن المناجم ومصادر الطاقة البشرية اللي بيها لوحدها نقدر نعدي وننصف نفسنا، لا نجلدها ولا نلبسها السلطانية، حط خطة وترتيب ورسم خطاوي وبدأ البحث عن الشباب اللي حايقوا نواة لكتيبة التنوير، وبعد البحث رسي على الشابين دول «محمد حربي» و«إسلام صالحين».

ومع بعض هما الثلاثة، قرروا إنهم يحلوا محل المحررات اللي بيحرت الأرض ويقلبها عشان ترجع تطرح زرعة، أو قوس المنجّد اللي بينفض القطن المكلّك المعطن ويرجعه ببيرق و يصحصحه من جديد.

قرروا ينكّتوا الواقع ويطلعوا حقايقه و ينفضوا عنه التراب وينقوا الدودة ويورونا احنا فين فعلاً، حاكم احنا ساعات بنبص لبلدنا من أضيق فتحة مناخير وأغشلق نضارة.

محمد حربي الكومي وإسلام صالحين، مع إياد صالح، ثلاثة من «عيالي» اللي بعتر بيهم وبشوف فيهم أمل ليكره، واطمئن أكثر على بلدي لو بقى فيه منهم مليون، شبان أباهي بيهم في أي مكان.

وللصدفة الجميلة بقى إن الشابين اللي استقر عليهم إياد من النوبة الجميلة أرض الخير في مصر.

إسعاد يونس



كده برضه محتاجة ندور على أسبابهم ودوافعهم، يعني هو مين أول واحد كذب الكذبة بتاعت «5 دقائق واوصل» ولا بتاعت «اعتبره حصل خلاص».

أقولك حاجه أنا هموت واعرف مين أول واحد قال «كل سنة وانت طيب» مش عشان في مناسبة.. لا، عشان عايز ياخذ منك الحلاوة، صحيح هو مين أول واحد سمى الإكرامية «حلاوة»؟

طب هو مين اللي قال إن الفرغ لازم يبقى فيه «أوبن بوفيه» وفيرست دانس وساكند دانس؟

طب هو مين اللي بيحط التماثيل الغربية في الميادين؟ بص الموضوع كبير زي ما بقولك، وهنروح فيه للآخر، ونشوف بقى مين أول واحد ضرب نار في فرح، وعمل زفة عربيات في الشارع وقعد يكلكس تيت تيت تيببت وفي حاجات مبهرة ومحتاجة فعلاً بحث دقيق، زي مين اللي حط العمود اللي في نص نفق الهرم، أو قرر إنه يعمل نزلة المحور في أصغر ميدان في مصر... ميدان لبنان.

بص أنا بحاول بس ألاقي تفسير، يعني لا بهاجم ولا بدافع، أنا عايزة أعرف الحقيقة ورا الشخص ده والفعل ده، يمكن يكون عنده منطق يقنعني أو يقنعك زي ما هو شاغلنا كده وبنفكر فيه عمومًا.. ورزقنا ورزقكم على الله.

# المطبات

مصر فيها بحرين ونيل وكمان 1/3 آثار العالم... و75% من مطبات الكون.. آه والله زي ما بقولك كده، المطبات دي علامات في طرق مصر، يعني لو انت راكب ميكروباص ودماعك خبطت في السقف وانت على الدائري هتتعرف إن السواق ده غشيم وجديد على الخط وأكل الكولكيعة اللي في نص الدائري قبل نزلة المعادي.. على إيدك الشمال.. أيوه هي دي.. صلحوا الدائري 100 مرة وكل مرة تصعب عليهم الكولكيعة دي ويقوموا ساينها من باب إنهم بيعلموا بيها الطريق ويعلموا السواقين الأدب بالمره، ولو انت بقى سكتك على طريق مصر السويس يا معلمي.. الطريق ده ليه مطبات علامات.. آه والله بعد مدخل مدينة الشروق هتلاقي مطب هتحس إن تحته مقبرة الإسكندر اللي بيدوروا عليها.. ده لو أكلته يعني بالشفا إنسى العفشة.. إنسى الجنوط.. إنسى أي حاجة.. إنسى حتى اسمك.. آه والله زي ما بقولك كده.

مطبات طريق مصر السويس شعارها الأساسي «الأذية فينا.. وربنا مش ناوي يهدينا» مطبات مالهاش كتالوج ولا مسكة ولا أي ابن ستين في سبعين.. مطبات تحس إن الأجانب لو اتفرجوا عليها هيقولوا إن المطبات دي بالذات سابتها الكائنات الفضائية علشان تعلم بيها كوكب الأرض.. علشان ليلة الغزو الفضائي يعرفوا هينزلوا فين.. آه بجد.. زي ما بقولك كده.

ولو انت بقى سكتك الطريق الزراعي.. أي طريق زراعي... تعالى ما أقولكش... مطب قصاد كل بيت وقصاد كل فتحة شارع.. مطبات إيفري وير.. منين ما تروح.. الصراحة ده خلاني أسرح كده في لحظة تجلي وأفكر مين أول واحد فكر يعمل مطب، مين صاحب الفكرة النميسة دي والاختراع اللولبي الجهنمي ده؟

الأسطورة بتقول إن أول واحد عمل كده كان في أحد العصور المجهولة، اللي كان الناس فيها مش لاقين أي إنجاز يعملوه.. قوم إيه واحد قام عامل حاجه كده قدام بيتهم زي المصطبة بس عالطريق، قالوله ده إيه قالهم هرم صغير بيعبر عن عيلتنا، قوم الفكرة انتشرت وكل واحد عمل زيه وبقى كل واحد يزود عالتاني.

الصراحة الأساطير نصها مش حقيقي والنص الثاني شيء لا يصدقه عكل على رأي الست شويكار..

واحد معرفة قاللي أنا أقولك مين أول واحد عمل مطب، ده كان أول ما العربيات دخلت مصر، وكان في واحد من الـ 200 اللي عندهم عربيات في البلد، والطرق كانت كلها ناعمة زي الحرير، بس صاحبنا كان لا مؤاخذة نظره ضعيف، فما بيعرفش مكان بيتهم في الشارع، فقام مخلي الحي معليه الحته دي عشان أول ما العربية تتهدد يعرف أنه وصل فيطلع ينام.

بص أنا حسيتها واسعة حبة، زي قصة إن أول مطب تزامن مع أول إعلان في الشارع، فاللي عمل الإعلان عمل مطب عشان العربيات تهدي تقرا الإعلان اللي عمله.

صديق بقى من بتوع نظرية المؤامرة والإمبريالية الشريرة قاللي إن ده اختراع ماسوني، اتعمل عشان مصانع المساعدين والكبالن بتاعتهم تشتغل وتبيع قطع غيار.

أنا مابحبش نظرية المؤامرة الصراحة، بس ما هو برة في مطبات في بعض الطرق، بس حاجه كده تخليك تهدي من غير ما تزعلك، المطب المصري بقى معاييره مختلفة عن أي مطب في العالم.. تحس في المطب المصري بالشموخ والعزة كده.. تحسه بيقولك أنا هنا ولازم تقف وهتعددي على جثتي أنا المطب.. تحاول تاخده من النص، من الجنب، تعدي بالعربية شمال.. يمين.. إنسى.. المطب هيحك العربية يعني هيحك فيها.. مطب مصري مش أي كلام في حين إن المطبات برة تحسها كده كيوت.. غلبانة.. ملهاش منظر ولا شموخ.. وكمان المطب المصري بيحب المفاجآت... تلاقيه في وشك فجأة كده زي مطبات الطرق السريعة، يعني لا إشارة ولا أي لون بيقولك خلي بالك.. تلاقيهم في وشك كده على غفلة.. وكمان المطب المصري بيحب العزوة واللمة.. تلاقي ثلاثة اربعة ورا بعض.. عيلة مطبات صغيرة.

سامعة حد بيقولي.. المطب ده شيء أساسي علشان الناس المتهورة اللي بتجري بالعربيات ومش بتراعي لا حارات سير ولا ناس بتعددي على رجليها.. أه المطب هنا مهم.. بس نعمل مطب إنساني.. مطب بالأصول.. مش نعمل مطب يبوظ العربية ويكون أحيانًا سبب في حوادث..



بس الحق يتقال.. المطبات في مصر خلقت حالة عشرة معانا.. يعني تسافر  
برة.. ترجع جوة تحس إن المطب اللي في أول طريق المطار بيرحب بيك،  
وأول ما راسك تخبط في سقف العربية.. قلبك يقولك مصر بتضمن عليك  
بالمطب.. وبتقولك وحشتني يا ابني.

الصراحة أول واحد عمل مطب.. ده مكانش راجل فاضي  
ولا زهقان ولا هو من العصر الفرعوني ولا من العصر الإسلامي ولا من أيام  
المماليك حتى.. ده نموذج لشخصية «أعداء النجاح».. إنسان قرر إنه يفرملك  
بالعافية.. يحط في طريقك اللي يعطلك.. وياريت بيفرملك بالذوق.. بالراحة..  
بالأدب.. لا ده بيفرملك على غفلة وساعات كتير غدر.. آه.. زي ما بقولك كده.

## تماثيل الميادين

صلوا بينا عالنبى. فايته من كام يوم في ميدان ما في محافظة ما وإذ فجأة ألتقيلكم دوشة وكهارب وتعاليق وورد أبيض واحمر وسيادة البيه رئيس الحي ومعاه لفيف بهوات كلهم بيدل بني وياقات منشية وعيال حلوبن مغرقين لهم شعرهم فازلين وفارقين لهم من النص وملبسينهم لبس العيد واقفين صفين وبيغنوا أو بيجعروا (يا حبيبتى أمثر يا مثر) ومزيكا القرب بتصدح في كل مكان وحاجة فرح بنت اخت العمدة عالاخر، وابصلك في النص ألتقيلك ملاية بيضا كبيرة ملفوفة على حاجة كبيرة كده قلت استنى يا بت ليكون مقام جديد ولا اكتشفوا بير بترول في نص الشارع.

شوية والمزيكا عليت واشرايت الأعناق والعيال بطلوا جعير وتقدم البيه المنشي واثق الخطى.. وهوب راح شادد الحبل ووقعت الملاية والكل سقف والنسوان تزغرط والرجالة تهتف الله أكبر والعيال تنتنطط.  
وأنا ازاحم بين أمواج البشر وحلفت لازم أشوف الحدث الضخم بعيني بأه ما هو مش اسمه كلام.

القصد بلاد تشيلني وبلاد تحطني وأخيرًا سلام قولًا من رب رحيم!!! يا ساتر يا رب؟ ليه كده؟ دي الملاية كانت ساترة بلاوي.

داري يا عم الحج غطي إلهي يسترك إذا بليتم فاستتروا!! حد يحتفل بوضع تمثال لعزيزة ألمونيا في ميدان عام؟!

اضرب بعيني اتأكد ألتقيلك كائن حي له عينين وحنك ودماع كبيبيبييرة ولابس قمطة وكاتيين الملكة كليوباترا.

كليوباترا!!! هو الفنان البوهيمي اللي قرر ينحت للغبانة -الله يرحمها- تمثال ماعداش ناحية متاحف بالغلط؟ بلاش.. ماشافش تلفزيونات؟ قطعة بلاش.. ده كله ماجبش سجارتين فرط حتى وبص عالعلبة في حياته وعرف سحنة الست؟

دي المرحومة كانت طيبة ولا تستاهلش منا كده، أبدًا المشكلة مش في كليوباترا لوحدھا.. قبل منها بكام يوم حد عمل العملة السوداء دي مع الست نفرتيني طيب الله تراها راخرة.

نفرتيني اللي العالم بيحلف بجمالها عاديك اتحولت على إيد فنان تماثيل  
الميادين لرجل كنية طالع لها مناخير بعيد عن السامعين لأوفين في مسقط  
رأس المرحومة ويرجعوا يشتكوا من لعنة الفراعنة ويقولك أساطير.

لا وربنا ما أساطير، أنا لو مكان الناس اللي نائمة في أمان الله في  
الأهرامات ولا في وادي الملوك لاطلع أقطع خلفهم نفر نفر.

والمشكلة ماوقفتش بالمناسبة عند ملوك الفراعنة، الموضوع اتطور وطال  
عرايس البحر، ده غير الأشكال السريالية اللي أغلبها بيكرف على أجنة غير  
مكتملة النمو أو كائنات فضائية أو مخلوقات حيوانية، لدرجة لازم نتساءل  
معاها: هل فيه مشكلة في الذوق العام؟ ولا ده اتجاه جديد في فنون النحت  
والعمارة بيعتمد على إعطاء الفرصة للعيال أقل من 7 سنين في وضع  
إبداعاتهم في الميادين؟

ما هو لما النسب والأبعاد تبقى رايحة في داهية والألوان متمخمطة فرشة  
كده وفرشة كده لدرجة إن رسومات حج مبرور والجميلين والطيارة عاليوت  
تبقى إبداع راقى بالمقارنة بالبلاوي اللي بتتحط في الميادين اليومين دول...

يبقى لازم نشوفلنا حل زي ما بقولك كده نجري على دكاترة فنون جميلة  
وهندسة يلحقونا نشوف عندهم خبر بالمصايب اللي بتجرى في البلد دي، ولا  
اللي بيعملوها ما عدوش عليهم أصلاً.

## فوت علينا بكره

مصر مليانة ثوابت.. ثوابت مش ممكن تتزعزع ولا يهزها ريح.  
ثوابت تاريخية.. زي الأهرامات وأبو الهول وزحمة ميدان لبنان.. من الثوابت دي «فوت علينا بكره».

فيه إحصائيات بتقول إن من كل عشر مصريين فيه تسعة على الأقل سمعوا الجملة دي مرتين في حياتهم على الأقل، وإحصائية تانية بتقول إن الجملة دي بتتقال في مصر يومياً مش أقل من 150 مرة في الساعة.

وإحصائية تالته بتقول إن الموظف اللي بيقول الجملة دي بتتحول مع الوقت لأسلوب حياة حتى جوه بيته.

أنا بقى الصراحة مصدقتش الإحصائيات دي.. آه والله زي ما بقولك كده، حسيت إنني لازم أعرف إيه أصل «فوت علينا بكره» مين أول واحد قالها؟ وليه؟ وإزاي فضلت ثابتة ما اتغيرتش مع تغيير الظروف في مصر من ملكية لجمهورية.. من خديوية لسلطنة؟  
أطول عليكم في الكلام!! قُلي طولي.

قريت في كتاب كتبه مؤرخ من العصر المملوكي.. المؤرخ ده بيقول إيه؟ بيقول إن رئيس الديوان السلطاني اللي المفروض يعني يقعد كده في أوضة واسعة يستقبل شكاوي المواطنين المصريين وطلباتهم علشان يرفعها للسلطان علشان يسهر على مصالح الرعية وكدهون يعني، الراجل ده كان اسمه «بكر» قوم بقى «بكر» كان عنده ظروف.. فرح ما نعرف.. طهور الله أعلم.. المهم «بكر» قعد فترة غايب مش بيروح، وكل ما الناس تروح علشان ترفع مظالمها وشكاويها متلاقيش «بكر» والحرس اللي على باب الديوان السلطاني يقولولهم «فوت على بكر بكره»، «بكر» ده طول!!! واضح إنه طول في غيبته وكعادتنا كمصريين هوايتنا الاختصار والاختزال في كل حاجة، الحرس زهق من سؤال الناس عن «بكر»، ومع الوقت العقلية المصرية بتاعت الاختزال والاختصار اشتغلت وبدل ما يقولوا «فوت على بكر بكره» بقت.. «فوت علينا بكره».

طبعًا أنا كإسعاد مصدقتش كلام المؤرخ اللي أنا شخصيًا معرفهوش ولا قريت له، الناس بتوع أي حاجه في الكون أصلها فرعوني طلغوا بنظرية حلوة بتقول إن الفراعنة أول ناس قالوا «فوت علينا بكره»!!! طيب إزاي يا اخوانا؟ مين؟ فيه أي أدلة؟ وثائق؟ تماثيل؟ قالوا آه فيه.. تمثال الكاتب المصري الشهير، اللي ايدين اللي عمله تتلف في حرير، لما تبص على عينين الكاتب المصري وكرشه المدور الجميل، وقعدته المترع فيها ومرتاح ومستريح تحسه بيقولك: يا سيدي فكك فوت علينا بكره، الدنيا مش هتطير، الصراحة حاولت أشتري النظرية بتاعت أي حاجه في الكون فرعونية بس معرفتش، ولأن الحضارة الفرعونية أكبر وأهم من إننا نلرزق فيها أي حاجه والسلام.

طيب وبعدين.. أسكت!!! قلبي مطاوعنيش.. سألت كثير ودورت والصراحة كل سؤال بيفتح باب لألف سؤال ثاني.. وكل إجابة بتفتح باب مش للسكوت.. لا.. للكلام.. قلت مبدعهاش بقى لازم أدلي بدلوي أنا كمان ويكون ليا نظرية في حدوتة مين اللي قال «فوت علينا بكره» والنظرية دي كالتالي:

ده موظف مصري أصيل.. آه والله موظف أصلي من النوع البيور مفيهوش ذرة تقليد، ولا فيه منه تاواني ولا صيني، مفيش منه غير في مصر وبس، موظف عايز يمضي ويجري، يلطع إمصته الشريفة في دفتر الحضور وياخد باقي اليوم أجازة، عايز يقبض من غير ما يشتغل، الموظف ده موجود من زمان.. من زمان أوووي، وعلشان محدش يقوله إنتوا مش شغالين انتوا تنابله، اخترعوا حدوتة «فوت علينا بكره»، بس للأمانة الموظف المصري اتطور أووي عن زمان.. قليل دلوقتي لما تسمع «فوت علينا بكره».. بقينا نسمع «السيستم واقع»، «مفيش حبر في البرنطر» أيوه بتتقال برنطر.. كده خبط لرزق، أو «مفيش نموذج 19 خلص».

عمومًا.. هو واضح إن فكرة الوصول لأول واحد قال «فوت علينا بكره» هيفضل دمها متوزع بين العصور، لكن السهل والأكيد إننا نقفش آخر واحد هيقلها وساعتها نحتفل بقى كلنا بآخر مرة نسمع كلمة «فوت علينا بكره»... ولا إيه؟

## تشتري كلب

في واحدة من جلسات التصفح الإلكتروني غير الهادف، ودي الحالة اللي الواحد بيوصلها بعد يوم طويل من الشغل، فتلاقي نفسك مستفرد بالتليفون وقاعد عمال تسكرول لتحت بدون هدف واضح وكأنك مُصِرُّ تنزل البدروم بتاع الفيسبوك وتشوف فيه إيه في آخر دور تحت فتفضل نازل نازل لا بيك ولا عليك، إذ فجأة يصدمني إعلان في دولة ما من دول ما عبر المحيطات حاطين صورة قطة في متجر إلكتروني لبيع الحيوانات الأليفة.

قطة عادية المفروض إنها كيوت ويا روعي يا لولو وكده.. بس بما إن مفيش عمار بيني وبين أي حاحه بأربع رجلين فمهتمتش أوي يعني شوية، وعيني جات عالسر يا نهار كحلي كاروهاتة بني ومنطور عليه ترتر أخضر جنزاري.

مين ده؟؟

400 دولار في الكائن ده؟؟

دي البعيدة أكثر من الهم عالقلب في الشوارع!!

الموضوع تقريبًا لأنه مركز مع القطط صحى كل الفيران اللي في عبي عنها، ورفعت سماعة التليفون واتصلت بصديقة مضروبة بالقطط والسحالي والأبراص وكل حاحه بتزحف وتنط وتحجل، والأكادة إنها عايشة في بلاد الفرنجة وحكيتهلها الحكاية تقوم ترد بدون أي اندهاش، أووه يبيس بيبي القطط دي اسمها ماوي مصري دي أعلى حيوان أليف في أمريكا وأوربا!

الناس هنا بيحبوها موت علشان ذكية ومش بتسبب حساسية للأطفال، علشان فروها مش غزير وطبعها هادي مقارنة بالقطط السيامي، وفي نفس الوقت بتحب اللعب والحركة، مش بروطة زي الشيرازي وألوانها كتير وتمنها مايقفش عن 200 دولار.

200 دولار في الكائن المدهول ده؟ ونط في عقل بالي مذبحه القطط اللي كانت في النادي الفلاني، وموقعة البسة اللي كانت في المحافظة العلانية، والفضايح اللي أول بأول عالجرايد والميديا العالمية عن عمايلنا في الكائنات الأليفة، ومخلوقات ربنا اللي يا نسيبها تسرع في العيال الصغيرة وتربي

الرعب للكبار، يا نسمهم ونضربهم بالكراييج وبالنار ونفرج علينا اللي يسوى  
واللي مايسواش وتتجرس جرسة العربيات الـ27 في مطالع الكباري.

حدش فكر يلم وينصف ويفتح سوق ويصدر ويرزق؟ دي كده ثروة ماشية  
على الأرض ومرمية في صفايح الزبالة.. آه والنعمة لما الحتة واقفة بـ200  
دولار، يا عم اضرب السوق واديلهم الـ10 حنت بـ5 جنيه، والنبي تعمل  
ملايين.

واهو تضرب 300 عصفور بحجر واحد، تريحنا من الزن والنونوة وقطع خلف  
العيال في الجنابين والنوادي والشوارع، وتكسب وترزق، وبقى بنصدر حاجه  
من نفسنا.

بس إني ابقوا سيبوا شوية سارحين في الشوارع برضو علشان الفيران،  
ولا استنوا ده فيه بلاد بيعزوا الفيران زي عندهم.. آه زمبؤلك كده.. بيجبوا  
الفيران ومش عايزه أقولكم بيعملوا بيها إيه لتكون حصة غدا ولا حاجه وانتوا  
مش ناقصين سدة نفس... المهم أهو يبقى حد يشوفلنا سكة معاهم برضو.

## بره الصندوق

بسمع من كام يوم الفنان الجميل محمد منير لاقيته بيقول أخرج من البيان الحر الضيقة، جه في بالي كمية البيان الحر الضيقة اللي عايشين جواها ولا عاوزينش نخرج منها، باب القاهرة الحر الضيق اللي كاتم على أنفاس 15 مليون نفر في مساحة أقل من واحد على 12 من مساحة مصر. والكل مُصر يفضل حاطط راسه في بؤ اللي جنبه والناس كلها ماشيين راس ورجل جنب بعض.

طب يجرى إيه لو خرجنا من الباب الحر الضيق لبراح أوسع! بس إزاي ونسب الأملة؟! نسب الحلاوة واللطافة المطلقة والأريحية اللي في القاهرة المعز؟ لأ ما يصحش لازم نكمكم كلنا جنب بعض وننبر ونشكي الزحمة والخنقة والكتمة وقلة الحيلة وانعدام أبواب الرزق.

وده خدني للقاهرة وزحمة القاهرة لباب الزحمة، ما الزحمة راخرة باب مسدود ومكتوم وكاتم على أنفاسنا، وقلت في عقل بالي طب ليه مصرين كلتنا نمارس نفس ذات نفس الممارسات اللي بنمارسها ونرجع نشتكى.

يعني شوف كده المحور ولا كوبري أكتوبر ولا شوارع وسط البلد في ساعات الجحيم من 2 الظهر لـ 5 الوقت اللي دقن الناس بتطول من كتر قعدتها في العربيات مستنيه.

بص حواليك هتلاقي 90% من العربيات مفيهاش غير اللي سايقها!!

طب ما انتوا خرجتوا من أشغالكم مع بعض ورايحين نفس المدينة أو الحي أو المنطقة السكنية طب ما كل 3 يروحوا سوا وييجوا سوا بعربات بعض بالترتيب، يعني تلتين العربيات اللي في الشارع هيختفي.. أه زي ما بقولك كده.

ويتقفل باب من الأبواب الحر الضيقة باب ثاني من أبواب القاهرة ضيق وحر راخر، القاهرة بتعجز منا.. أه زمبؤلك كده.. بتعجز وتقدم، وحلو على فكرة المدن العتيقة دي ليها عبقها كده.

بس احنا الموضوع داخل معانا في منطقة عبط مش عبق، العشوائيات بتبلع بنت المعز وبتهمضمها وحتى شوية البيوت القديمة الحلوة ماتعرفش بقدره



قادر بيطلعلها حبة إبداعات كده تمسخها وتحولها لكائنات فاقدة معناها، زي ما تكون ست شيك أوي لابسة فستان براند سنييه بألفات وراحت واخدة فوطه المطبخ لافة بيها دماغها ونازلة!! آه والنبي زي ما بقولك كده.

ده كله كوم والتلوث اللي مابقاش باب حر وضيق بس.. ده بقى باب متربس بقفل ألماني مصدي ومفتاحه مرمي في قاع الجحيم.

نفس الهوا في قاهرة المعز بقى نادر ولَّا خلفه البغل تصحى من النوم تفضل تكح تلوث وعوادم صناعية وبشرية لحد ما ترجع تنام تاني حاجه كده زي اللي عايشين في مدخنة قمينة طوب.. زي ما بقولك كده.. ببيان القبح والزحمة والتلوث والخنقة في قاهرة المعز واخواتها عماله تقفل على مراوحنا وتكتم أنفاسنا واحنا بنفلفص بس مصرين نفضل في البيان الضيقة.

# التحرش

التحرش مش موجود في مصر بس!! صح؟؟؟

صح جدًا بس التحرش المصري حازه والتحرش في بلاد الفرنجه حازه تانيه. التحرش في مصر حماده وبره حماده تاني خالص.. هنلاقي ناس من اللي بتدافع عمّال على بطال تقولك أمريكا بلد الحريات كل يوم بيحصل فيها مش عارف حادثة اغتصاب مش تحرش وبس.. بس يا ترى ده مبرر للتحرش؟ في ظني واعتقادي لأ.. زي ما بقولك كده.. أي حد هيبيرر للتحرش وأصلها لابسه مش عارف إيه وقاله معرفش إيه.. خليك متأكد إن اللي بيقول كده جواه متحرش صغير منتظر بس الفرصة علشان يطلع المتحرش اللي جواه..

بس موضوع التحرش ده بقى غريب ومريب، مكناش كده زمان، فين زمن التحرش الجميل، زمن عبد الفتاح القصري لما كان بيقول: يا صفايح الزبدة السايحه.. يا صفايح السممه النايحه،

ولا لما كتب فكري أباطة وهو منهار إن إزاي واحد أفندي يقول لست في الشارع ميعرفهاش وبكل بجاجة وقلة ذوق: بونسوار يا هانم!! بونسوار يا هانم كده.. وش.. إيه صحيح قلة الذوق دي.. يبجي فكري باشا أباطة يشوف التحرش اللفظي في أيامنا دي اتطور إزاي وبقي حازه صعب على أمثالي يفهمها.. حكاية التحرش وتطوره من صفايح الزبدة لجملة «مزة» أو من «بونسوار يا هانم» لجملة «ماتيحي نيحي» رحلة غريبة ومريبة لتطور الذوق المصري اللي انحدر أوووي وبقي أوطى من الموس على الأرض الصراحة.. كالعادة ضربت غطس في المكتبة أدور على أصل حكاية التحرش، منين بدئت وإزاي اتطورت وليه.

فيه ناس بتقول إن التحرش قديم قدم التاريخ ومش في مصر لا في العالم كله، بس أنا مش مصدقه إن مصر اللي كانت بتقول عن المرأة: إنها مالكة أموال زوجها والمؤتمنة على خزائنه ووارثة أسرارها، إزاي مصر الفرعونية اللي كانت بتعلي من قيمة المرأة ممكن يكون فيها تحرش أساسًا؟ أنا حاولت اشتري إن مصر زمان كان فيها تحرش بس مقدرتش، قريت في تاريخ مصر الفاطمي والأيوبي والمملوكي وأيام الاحتلال العثماني مقدرتش بردو اشتري إن ولاد البلد اللي نصّبوا محمد علي والي رغم أنف العثمانيين

وقاوموا الاحتلال الفرنسي ودافعوا عن بر مصر من غزو جيوش لويس التاسع وهجمات فريزر الإنجليزي.. ولاد البلد الجدعان ممكن يكون فيهم حد متحرش، التاريخ هنا بيسكت بيكون أخرس الصراحة.. بس التاريخ بينطق ساعات.. بيقولوا إن التحرش مكانش عادة مصرية أصيلة، لا.. ده وصل مصر مع جيوش الحلفاء في الحرب العالمية الثانية، اللي انتشروا في القاهرة أكليين شاربين معاكسين، ولأننا من هواة التقليد بقينا بنقلد جوني وتشارلي في أسلوب معاكساتهم، الصراحة النظرية دي عجبتي وارتحت ليها شوية، بس النفس أمارة بالتفكير والعياذ بالله، هتلاقي حد يطلع يقولك: هو كل حاجه نلزعها في الأجانب!!! أومال نلزعها فينا بالعافية ولا نعمل إيه؟

أول واحد اتحرش بجد متأكدة إنه مش مصري لإن المصري الأصلي مش بتاع الكلام ده، المصري الأصلي كان يخاف على بنت حتته، وبنت الشارع بتاعه، وكانت بتقوم خناقات تتكسر فيها قهاوي علشان شاب من حي ثاني عاكس بنت الحي اللي هو ضيف فيه وعليه، المصري الأصلي كان بيعامل بنات جيرانه وبنات الحتة على إنهم اخواته، بنات عيلته الكبيرة، وبالتالي عقلي عاجز عن إنه يصدق أو يقبل فكرة إن أول متحرش كان مصري.. مصري أصلي، ولما بنقول تحرش أقصد اللي بنشوفه ونسمع عنه، الحاجات الغربية اللي بتحصل ومحدثش يطلع ويقوللي التحرش من أيام الفراغنة لأنني غالبًا هاخبطه بالفازة على دماغه، وكمان محدش يقوللي أصل النت بوظ دماغ الشباب، أو إن الميديا والسينما سبب فساد ذوق الجيل، لأنه مش منطقي، إن خروجة العيد اللي كان العيال والشباب بيقضوها فسح ومراجيح وسينمات تتحول لمواسم للتحرش، وإن مجرد خروج بنت في الشارع في المواسم دي معناها حفلة تحرش مالهاش معنى..

فيه أقوال بتقول إن التحرش في الفترة الأخيرة راجع لتطور في جينات المتحرشين، حاجه كده زي الرجال إكس في السينما الأمريكية، وده بقى بتوع التطور النوعي العلمي الانبعاثي للمتحرش، وساندين نظريتهم دي على إن المتحرش في الأصل مكانش إنسان طبيعي وعنده أمراض نفسية، ومنها مرض زي مرض عمى الألوان اللي عند التور لما بيشوف أي حاجه حمرا قدامه، والصراحة في النقطة دي من النظرية بدأت ارتاح ليها، بس حتى التور بيتدرب على إنه يتحاشى اللون الأحمر، يبقى الإنسان إزاي مش قادر يتحاشى فكرة التحرش، ما هو مش ممكن أبرم نظريات واحدها في الهوا علشان تلف تلف وترجع تخبط في وشنا ثاني بمنطق إن الضحية هي السبب.. مش

هنسيب الجاني ونقفش في الضحية علشان لابسة بنطلون أو تي شيرت،  
بدليل إن نفس المتحرش اللي بتدافعوا عنه هنا لما بيطلع بره مصر يبقى  
إنسان ثاني خالص ومش بيتحرش خالص ويبقى إنسان طبيعي ومتحضر يبقى  
الفكرة في إيه؟ الصراحة الفكرة في القانون.. الخوف من تطبيق القانون  
وعقوبته، الخوف ساعات يجبر الناس تمارس إنسانيتها بشكل عفوي  
وطبيعي..

أول متحرش منعرفهوش.. ولا هنعرفه.. بس ممكن بتطبيق القانون نشوف  
آخر متحرش في حياتنا.. آه زي ما بقولك كده.. بس لو طبقنا القانون.. وبجد.

## الأقنعة

تصدقوا بالله، التقيت في بلاد بره حاجه عجيبه جدًا، الناس هناك يقابلوا بعض بوش (صباح الخير).. آه والنعمة زي ما بقولك كده، الناس بيتسموا في وش بعضهم من غير سابق معرفة!!!... عينه تيجي في عينك يروح مبتسم وانت تبتسم وكل واحد يكمل طريقه، بس كده ببساطة لا بيعتبروا ده تحرش ولا دماغهم بتحدف شمال ولا يمين... لا تخرج قبل أن تقول سبحان الله.

التصرف المريب ده من المخلوقات العجيبه دي خلاني أفكر شوية في حالة البشر في بلادنا، النفر من دول يقوم من النوم يتفرد ويتمطع ويقف قصاد المراية ويمارس مهمة كل يوم، يا ترى الوش اللي هلبسه لليوم المشرق ده إيه؟

مبدئيًا وش البومة: ده الوش البيزك الأساسي اللي بيتلبس أول اليوم ونص اليوم وآخر اليوم، الوش اللي هتقابل بيه مخاليق ربنا بداية من التعساء من جيرانك اللي هيصطبحووا بيك عالسلم ولا الأسانسير مرورًا بالبواب وزمايلك في الشغل ومراتك وعيالك وكل كائن حي حظه الاسود هيحطه في طريقك لأي سبب وانت مش عاوز منه مصلحة.

وش الحلياط: ده وش ضروري مايستغناش عنه أي موظف أو عامل وش الحلياط، بيكسبك قدر من السماجة واللزوجة، يخليك أشبه بطاجن البامية باللية البايث في التلاجة من 4 أسابيع، ويكسب قفاك طول مضاعف وعرض أقرب لسيقان أشجار البلوط.

وش الحلياط يخليك تجيد الحليطة لكل من ليك مصلحة معاه أو عنده، ومسح الجوخ وإجادة فنون النفاق لمديرك وللعملا وللمدرسين وحتى للكتكوتة اللي بتمارس أزمة منتصف العمر معاه.

وش الجلياط: ولو إن الفرق نقطة إلا إن فرق التأثير كبير جدًا عن الوش اللي قبل منه.. وش الجلياط هو عكس وش الحلياط تمامًا، وده بتلبسه عادة بمجرد ما تنقضي مصلحتك مع أي كائن حي كان لك عنده مصلحة... يعني مديرك اللي كنت من خمس دقائق بتتحليطله لو طلع معاش في نفس اللحظة اسحب وش الجلياط والبسه وجيب الراجل من فوق لتحت وطجنله في الكلام واقلب بوزك وامشي عادي جدًا.

صاحبك اللي رايح تترادل عليه وتستلف منه لو اعتذرلك بأي شكل هوب نط في الجلياط وصدغله وعامله معاملة قرود البابونج.

وش الصعبانيات: وش الصعبانيات متلون كده وحاجة شغل فنادق، الوش اللي بيعمل أحلى شغل وييجيب ناس كثير سكة؛ الوش اللي تلبسه علشان تخرط بصل على قلوب الخلق وتبرك على عصفورة إحساسهم وتخليهم يحلوا الكيس ويدوك اللي لا كان لك على بال ولا خاطر.

بداية من السنيورة اللي بتتجهز وناقصها يا دوب الكيتشن ماشين والصيني والنيش ورفايع تبتدي بالمكنسة الكهريا وتنتهي بقمع الكريم شاتني، ومروًا بالفلق اللي في منتصف العشرينات وعيان بالصحة وييجيب علبة دوا إسهاال وروشتهة طفل بيسنن ويدعي أمراض الدنيا علشان تساهم في علاجه.

فيه حبة وشوش تانية بتخليهم عادة معاك في الهاند باج تستخدمهم وقت اللزوم، مش لازم تبقى لابسهم طول الوقت فوق بعض زي الحبة اللي فاتوا. وش المزايذة... وش التجرمة... وش التحرش... وش الكلاحة... وش أنا ابن اسمالله وانتوا ولاد يعلم الله... وش أنا الوحيد اللي بفهم في وسط القطيع... وش أنا أنبر إذن أنا موجود، وممكن تلبس كل الوشوش دي فوق بعضها، وبمنتهى الكلاحة تلبس وش الورع والإيمان المزيف علشان تخلي الكل ينصاع لكل بلاويك وانت البعيد ابعده ما يكون عن الوش اللي انت ضاربه.

تفتكروا لو حصل في لحظة كل الأساتك في الدنيا هرهرت ووقعت الأقنعة من على وشوش البعض، وشوفنا الكل على حقيقته لمدة خمس دقائق.. ممكن حياتنا تكمل عادي بعد اللحظة دي؟ مافتكرش والله بجد زي ما بقولك كده.

## تغير السلوكيات والذوق

من كام يوم وفي قناة فضائية ما... كان بيتعرض واحد من برامج الكاميرا الخفية، وكان واحد من أوائل إصدارات الكاميرا الخفية اللي كان بيقدمها المرحوم الأستاذ فؤاد المهندس في منتصف الثمانينات تقريبًا، المهم الفكرة في الحلقة دي كانت إن واحد بيدخل مطعم ما ويقعد على تراييزة الناس ويبتدي ياكل في أكلهم بمنتهى الهدوء والتبائة، أو مطعم وجبات سريعة يجيب ساندوتش ويقف جنب واحد ويبتدي ياكل في البطاطس ويشرب في المشروب بتاعه، قمة قلة الذوق طبعًا، وتشوف بأه ردود أفعال الناس، لاحظوا إن البرنامج مش من الخمسينات ده من حياله عشرين ثلاثين سنة بالكثير.

ردود الأفعال تباينت ما بين خجل بالنسبة للبنات والستات اللي بعضهم فضل يضحك من جرأة الراجل، أو ادوله ضهرهم وفضلوا يتهامسوا على قلة ذوقه، بالنسبة للرجالة بعضهم اتعاطف معاه وسابوله الأكل، وتهامس البعض -حرام يا عيني- واللي اتجاسر عليه راح قايله بالهداوة... بعد إذتك وراح واخذ أكله وقام غير التراييزة!! تفكيري المريض أخذني للتفكير لو إن نفس ذات نفس الموقف ده حصل النهارده ردود أفعال الناس هتكون إيه؟

ماعتقدش الموضوع هيخرج بره التشليق والردح وقلب الأكل على دماغ المتطفل وتسميعه بعض المترادفات النابية تتناول بعض أفراد عائلته حتى الجد التاسع، وبالنسبة للرجالة الموضوع مش هيزيد عن لوكشين في خلقة الراجل وربما شلوط كده أو كده مع بعض المترادفات النابية الأشد حدة، مافتكرش الموضوع يوصل للعاهات المستديمة، بس حاملي المطاوي والسلف ديفنس بيكون خلقهم ضيق حبتين ويتهوروا دايمًا.

الفكرة قادتني للتفكير في تغير السلوكيات عمومًا بين الناس وبعضها، بداية من إنك تدوس على رجل واحد بالغلط فبدل ما بيتسم زي زمان ويقولك ماحصلش حاجه وصل بينا الحال إنه ممكن يزوقك يجيبك عالأرض بعد ما يشتمك بكثير من التبيبيبييت!!

كلمة صباح الخير بقت مريبة، ووقعها على الأسماع بقى يخض، حد يقول صباح الخير عالصبح!!! سترك يا رب، يا ترى عايز إيه؟ حد يكلمك يسأل عليك

في التليفون ويتكلمه خمس دقائق عن حال البلاد والعباد من غير ما يطلب منك حاحه ولا يسألك في مصلحة ويقولك سلام سلام وتقفلوا، حاحه ممكن تخلي ميكي ماوس شخصيًّا يلعب في عبك.

تمشي تحت كوبري تلاقي العمدان عليها جداريات، ولا محطوط قصاري زرع، ولا معمولة حديقة أطفال مرجحتين على زوحلقتين على كام كورة بلاستك، وعيال بيلعبوا وضحكهم جايب الجو بدل ما تشم ريحة اليوريا إياها اللي قربت تدوب الكباري يا ولداه من فيضان الأحماض العضوية اللي ما بينتهيش.. دي حاحه ممكن تخلي النفر مننا يتحلل تلقائيًّا وهو واقف بطوله.

اتنين لأي سبب يكسروا على بعض بالعريبات، ولا يريحوا على بعض، ولا إشارة تفتح غلط، ولا عربية تنط تحك اللي قدامها، ولا اللي وراها تكسر فانوس ولا مراية، ولا تخربش اكصدام، وتلاقي الطرفين ركنوا على جنب علشان السكة تمشي، وكل واحد بص على نفسه وعلى الثاني اتأكدوا إنهم سُلام راحوا مكلمين شركات التأمين لو مأمنين أو اتفاهموا مين الغلطان أو حتى عملوا محاضر لبعض، ولا فرجوش عليهم النمل والبراغيث، منظر زي ده ممكن فعليًّا يخليك تنهار نفسيًّا وتتعالج ما تقلش عن 3 سنين بـ34 جلسة كهربا عالأقل.

أكم وأكم خيالات ممكن تخلي النفر مننا يسبح في دنيا حلوة وملونة وبسيطة، بالمناسبة ما بنتكلمش عن أليس في بلاد العجايب بنتكلم في العادي والمنطقي والمقبول، بديهيات والله زي ما بقولك كده.. بس هي المشكلة إن البديهيات قربت أوي من الأحلام، واللي مش منطقي ولا معقول هو اللي بقى عادي وطبيعي في الأيام دي. آه والله زي ما بقولك كده.



## تاكسي

سواق التاكسي في بلدنا من أمتع الكائنات البشرية اللي ممكن تتقابل معاها، وبقي محور هام جدًّا في محادثاتنا اليومية على مواقع التواصل، يعني ما حدش في البلد دي ماكتبش البوست اللي بيبدأ بـ«ركبت مع سواق تاكسي النهارده».

ويبتدي يسرد ويسهب في حاحه من اتنين يا ضحالة وسذاجة سواق التاكسي، وإزاي هو اسم النبي حارسه وصاينه وضامنه انتشل سواق التاكسي من قاع الرذيلة، وحطه على أول طريق النور والتقدم والازدهار، وفرد له من وقته الثمين يبجي 10 دقائق فهمه فيها حقايق الكون وفلسفة الوجود والحياة وغيرله آراؤه كلها بداية من منطقته عن الجواز والعلاقات الأسرية، نهاية بآرائه الكاملة في اقتصاديات تجارة الذهب في جنوب إفريقيا.

يا إما نفس البوست، بس صاحب البوست بيسهب في عمق ووعي سواق التاكسي الفطري وإزاي إنه أدهش ثقافته بأن فيه حد في الدنيا بي فهم غير الأبعد، وإن البسطاء والعامه والدهماء قادرين على التحليل وفهم واقعهم مش عايشين في فرو التابلوه.

بس المرة دي سواق التاكسي مانطقش، أي والله العظيم ما نطق ولا حط منطق، الراجل شاورتله وقف من سكات، الحتة الفلانية هز دماغه من سكات، ركبت من سكات، والراجل مشي من سكات.

ركبت من هنا راح قافل إزاز العربية، ربك والحق توجست خيفة وابتديت افتكر كل ثقافة الدفاع عن النفس، بداية من لف حزام الشنطة على رقبته بخطوات فاندامية، ونهاية بالعياط والاستسلام وتسليمه الموبايل والقرشين وكيس الفكة.

بس الحقيقة الراجل قفل الإزاز وراح مشغل التكييف!!!

الأغرب إنه ماشغلش مهرجانات في الكاسيت ولا شغلش كمان دروس عذاب القبر!!

واحد كسر عليه كسرة غبية اتفاداه بهدوء ولا طلعهش دماغه وتناول أفراد عائلته نفر نفر نهاية بتحتمس شخصيًّا. لأ، الراجل حسبن بصوت واطي وعدى

الموقف!!

ابتديت أركز شويتين مع سواق التاكسي ده، والتاكسي نفسه، التاكسي يكاد يكون عربية عادية، أي والله عربية عادية.. لا فيه قطط ولا كلاب ولا نمور فرو فاتحين حنكهم، ولا كائنات مريبة بتهز دماغها، ولا فيه 30 سبحة و40 شابة وفاسوخة، ولا صندل مقلوب، ولا فيه عبارات فلسفية من نوعية «حتى هدف حياتي طلع تسلل»، ولا أقوال مأثورة من نوعية «السواقة فن مش عن عن». عادي جدًّا عربية زي أي عربية من عربياتنا بس العربية زي الفل لا فيها كرسي مخروم، ولا فرش ملسوع بسجارة، ولا كياس نايلون فيها بواقي ساندوتشات ولا أزايز مايه ربع مليانة، لأ والأكاد مافهاش ريحة وحشة، اللي يقلق بجد إن ريحة العربية خصوصًا وإزازها مقفول وتكيفها شغال حلوة، ومعطر الجو موجود وعامل شغل.

ابتديت أركز أكثر واتأكد من المشهد العام، آه إحنا لسه، داخل الحدود المصرية ماغدرتهاش!! أمال إيه اللي بيحصل ده؟؟!!

الأغرب السواق رغم إن علبة السجاير قدامه ما ولعش ولا سيجارة، ولا ولعش أي حابه تانية شبيهة بالسجاير طول الطريق اللي ماكانش قصير بالمناسبة، والراجل لابس قميص نضيف، ياقته زي الفل، وينطلون نضيف، وحاطط على رجله فوطة علشان العرق، شوف الحلاوة، بأه الراجل هاف من ناحيته ريحة كلونيا معبأه العربية، والنبي كان فاضل عصفورتين وكام فراشة وعناقيد عنب ينزلوا من السقف علشان صورة النعيم تكتمل.

زي مايقولك كده، ولسه قبل ما ابتدي أستمتع بالوضع الإنساني النادر اللي كنت عايشه فيه، المشوار خلص، ولتكتمل الدهشة بقوله على جنب لو سمحت راح واقف على جنب في نفس المكان اللي قتلته عليه، لأ وجيت أحاسبه راح مادد إيده وبيناولني الباقي كمان.

والنبي عيني دمعت من فرط التأثر، ولولا الملامة كنت سألته إنت مرتبط يا اسطى؟؟!

# أول واحد فرش على شريط القطر

يا أخي بلدنا دي عرفت تبقى رقم واحد في حاجات كثيرة زمان، تخليك تقول فين يا اخواتي الناس الحلوة اللي فكرت وعملت كده.

يعني مثلاً مصر أول دولة في إفريقيا والشرق الأوسط تمد خطوط السكة الحديد، وتاني دولة في العالم يبقى فيها قطر أو «وابور» زي ما كانوا بيقلوا زمان، إحنا عندنا سكة حديد قبل أمريكا بزمن، مصر فيها 9000 كم سكة حديد، وفيها 705 محطات على امتداد السكة الحديد دي، وعندنا في حدود 15000 عربة نقل بضائع غير نقل الركاب وباقي التجهيزات، دنيا تانية عالم السكة الحديد، دنيا مدهشة ومبهرة وعالم قائم بذاته ولحاله، يمكن علشان كده العالم ده مغري للسينما، من فيلم «باب الحديد»، لشاهين، لغيره من الأفلام اللي دارت أحداثها حوالين أو في محطات القطارات في مختلف نواحي مصر.

عالم مدهش.. بس الأكثر إدهاشًا بقى الناس اللي بتفرش على شريط القطر وتقعّد تبّيع إشي مناديل، على فاكهة، على ساعات، وأحيانًا بيعملوا نصبة شاي في السريع، مش باتكلم عن البياعة السريعة الموجودين من أول مسمار اتدق في السكة الحديد، دول موجودين وقدام قدم السكة الحديد نفسها، لا باتكلم عن البياع اللي بيفرش على شريط القطر ذاته، يعني بيفرش في وش القطر.. إزاي أنا معرفش؟؟

إنك تبقى بياع سريح، دي لقمة عيشك بتجري عليها على قد طاقتك وعلى قد دراعك، لكن على شريط القطر!!

المشهد ده هتشوفه كثير في قطارات الضواحي أو المناشي زي ما بيقلوا عليه، هتشوفه في مداخل محطات المراكز في صعيدنا الجواني أو في محطات ريفنا الجميل في بحري، الموضوع بقى منتشر، وخطير، والدولة ساعات تمشي الناس، وساعات الكل يعمل من بنها، أنا بقى شاغلني أول بيع فكر يفرش على شريط القطر، ده يستحق جائزة نوبل للاختراع اللولبي أو أوسكار أجمد قلب، إنك تفرش فرشتك وتقف تبّيع، وأول ما تسمع صفارة القطر تلم الفرشة وتبعد عن شريط القطر، وأول ما يعدي ترجع تفرش تاني،

دي صحة جبارة وليونة ولياقة مالهاش حل ولا مثيل. وبصراحة الناس اللي بتقف تشتري..

دول ناس قلبها ميت، وإيدها مش في جيبها.. لا... دي ديلها في سنانها أول ما بتسمع صوت القطر.

الموضوع مش بسيط وكان محتاج واحد عبقرى، دماغه صاحية ويعرف يلقط القرش الطاير في السما، الراجل اللي احنا منعرفوش، وبعد ما رجعنا لسجلات البلدية وشرطة المرافق ملقناش حد اهتم بيه ولا بقصته اللي كان ممكن تبقى أشهر من قصة مارك بتاع الفيسبوك، الناس دي ابتكرت في المكاتب وهي مريحة، لكن ده ابتكر وهو بيتنطط من الشريط ده للشريط ده، الراجل اللي سقط منا سهوًا، واللي التاريخ لو كان عرفه كان وقف قدامه سنين، عمل اللي محدش عرف يعمل، ابتكر فرشاة بسيطة عبارة عن حثة خشبة مربعة متر في متر ليها رجلين من تحت سهل إنهم يتلموا بسرعة، والأهم إن الفرشة سريعة التجهيز دي، عمل عليها أماكن للبضاعة على المقاس علشان وقت الزنقة يقوم لامم الفرشة من غير ما البضاعة تقع ويبقى شقى العمر راح تحت عجلات القطر، الابتكار الرهيب ده انتشر، وكل السريحة اللي قرروا يفرشوا على قضبان سكك حديد مصر، استخدموه، بس المخترع الأول، المخترع المجهول لا طال أبيض ولا اسود على اختراعه اللي أفاد كثير من البياعة السريحة، بالعكس الأسطورة بتقول إن البياع ده بالذات ملحقش يلم فرشته والقطر كبس عليه وللأسف مات، وفيه أسطورة تانية بتقول إن عمل قرشين حلوين قبل ما كل البياعة السريحة يقلدوه وفتح شركة وبقي إمبراطور مهم في السوق، بس المؤكد إن محدش يعرفه ولا يعرف قصة كفاحه وإصراره إنه يقدم للبشرية الفرشة سريعة التحضير على شريط القطر.

وأنا من هنا أحب أقول لأول واحد فرش فرشة على شريط السكة الحديد.. أحب أقوله إنت جبار.. وهيتة السكة الحديد لازم تعملك تمثال في مدخل كل محطة سكة حديد كمثال للقلب الميت ووجع القلب.. آه والله زي ما بقولكم كده.

## التربية الحديثة

من الظواهر اللطيفة في مجتمعنا إننا بقينا بنتفرج على القنوات اللي بتجيب برامج مترجمة ونبتي نطبق اللي بيتقال فيها على حياتنا ومعطياتنا.

وماله مايضرش لما الموضوع كان واقف عند وصفات الطبخ كان مش مشكلة، وطالما عارفين نوفر أوراق الكمأة الطازجة والفطر الهش ذو القرنين، وأجنحة الدجاج الأندلسي فمايضرش، لما نقلد طبخ الخواجات بغض النظر عن النتائج.

المشكلة ظهرت لما بدينا نطبق قواعد التربية الخواجاتي اللي بتيجي في برامج السوبر ناني وبرامج دكتورة أبصر إيه ودكتور مادرك إيه، قواعد من نوعية تايم أوت والنوتي كورنر والنوتي روم!! لازم ندرك يا جماعة إن أهل مكة أدري بشعابها واللي يمشي على عيالهم مايمشيش على عيالنا.

الغيل عندنا بينزل من بطن أمه يقول (وانت مالك) ويتعلم يمد صوابه في الفيشة قبل ما يتعلم يقول ماما وبابا.. الغيل بنعلمه يتف على عمو قبل ما نقوله هم وامبو.

أذكر إن واحدة كانت رايحة تبارك لواحدة صاحبها لسه والدة، وبتدور على مسدس لعبة للغيل اللي لسه مولود بدل ما تجيب شخصيخة ولا عضاضة داخله بمدفع رشاش بينور، المصيبة إن الأم فرحت بالمدفع وحطته جنب النونو ياعيني، وقالتلها كبير عليه أوي ده يا حبيبتى.. كنتي جيتي مسدس ولا حازه صغنة، كلفتني نفسك ليه؟!!!

ترد الأولانية بمنتهى الفدائية مظهرة كرمها الحاتمي لأ يا روجي ماتقوليش كده خليه يلعب ويفرح، فلسفتنا فعلياً بنتنج أطفال عندهم استعداد بيقوا سيريال كيلرز من سن البلاي سكول، ده غير اللي بيتعلموه من الميديا.. فمش معقول نتعامل مع جيل خطواته الأولى بياخذها وهو بيسمع مهرجانات بطريقة النوتي كورنر، صعب، وربنا مابتجيش نتيجة الغيل من دول بيروح عامل الكارثة ويكمل حياته عادي، ولا يلتفت ولا يبان عليه أي أمارات إحساس بالذنب أو الندم تقوم قايله إنت نوتي بوي روح على النوتي كورنر، تلقى البعيد فرحان وبيتنطط، هيبه هيبه نوتي كورنر نوتي كورنر.

ويقف وهو يكمل تهليل وتهييص لحد ما التايم أوت يخلص ويرجع يعمل ذات نفس الكارثة بمنتهى الإصرار اللي يحسد عليه.. الحقيقة في نفس اللحظة اللي أمه بتكون مجلوطة على جنب بتصارع أنفاسها الأخيرة، صعب كمان نقول للجيل الحالي ارجعوا ربوا عيالكووا زي ما أجيال سابقة اتربت على قرص اللبايب والودان واللسع بالشمعة والتلطيش والزغد والعض، الحقيقة الأجيال السابقة تفننت في أنواع العقاب البدني بشكل كان بيوصل للسادية أحياناً... فيه جيل كامل اتربط في رجل التراييزة واتعلق عالفلكة.... . ياختيبيبي بس برضو لازم نلاقي فلسفة خاصة بينا نربي بيها العيال لأن فعلياً لا مرقعة النوتي كورنر بتجيب نتيجة ولا إرهاب الخرزانة والخرطوم والحزام منطقي ومقبول القصد، زي ما بقولكووا كده.

حبة حزم كده، وتكشيم، وزغرتين حلوين، حبة تهديد ووعيد بعظائم الأمور هيجيبوا نتيجة.

دكاترة التربية برضو محتاجين يشتغلوا حبة، ويطلعولنا بمنهج يمشي مع قطعة عيالنا، ويعملوا أي حاجة تجيب معاهم سكة.

## خميس بجمعة

إحنا ناس ما بنعرفش نأجز، آه يعني مالناش في الأجازات مش علشان اسم النبي حارسنا وصاينا مقطعين روحنا حب وهيام ودايين صباية في الشغل لأبسليوتلي، إحنا بس معندناش ثقافة الأجازة من أساسها، يمكن لأن جزء كبير الدنيا بالنسبة له أصلًا أجازة طويلة بيقطعها مرواح للشغل برو عتب كده.. يعني نوع من الواجبات الاجتماعية الثقيلة يقضيه وتنه راجع لا ضر ولا اتضر، ولا أضاف ولا قلل ولا منه ولا كفاية شره، أهو كان موجود زي النسمة كده.. المهم ده لما بييجي عليه يوم أجازة سواء أسبوعية ولا عيد ولا سنوية ولا صيف ما بتفرقش معاه أصلًا بيحس بس إن يومه ناقص لقطة دور النسمة اللي بيعيشه يوميًا، غالبيتنا يعز يقضي الأجازة ولتكن الأسبوعية مثلًا في مرازية أهل بيته، يعني يفطر وينزل يصلي الجمعة وتنه راجع يرازي في عياله شوية، ويرازي في المدام شويتين وممكن يرازي في جيرانه، يتصل بصحابه يرازي فيهم.. وهكذا مرازيات متبادلة، وينتهي يوم الأجازة في لقطة هي الألف في فنون تسويد العيشة.

مايختلفش الوضع كثير في الأجازات السنوية ولتكن المصيف بتلاقي ذات نفس المرازية بس انتقلت من البيت لواحدة من المدن الساحلية، ومايضرش كمان إن المرازية تاخد دواير أوسع، قوم بدل ما المواطن والمواطنة يرازوا في بعض وفي عيالههم يرازوا في البلد والفندق والسياح اللي في الفندق وأي كائن حي أو جماد يتصادف تواجده في دائرة نص قطرها 2 كيلو حوالين المواطن المأجز.

الأجازات راخرة في موروثنا الشعبي دايماً مرتبطة بالأكل، زيها زي أي مناسبة بنحتفل بيها، الأمر عندنا مايخرجش عن اعتبارات الأكل، فتلاقي بمجرد ما تيجي سيرة الأجازة ولا الفسحة، بتلاقي طوارئ في أفران الفينو وطوارئ عند البقالين ونقص رهيب في مخزون الدولة من الجينة الرومي والبيض واللانшон والبسطرمة.

لو الموضوع فيه بحر فمعروف إن البحر بييجوع، فالحقيقة بتلاقي اهتمام مضاعف بالدعم الغذائي، وماتفهمش أوي الارتباط الشرطي اللي بين المكرونة أم صلصة والبحر.. بس منظر الطفل البريء اللي بيضرب طبق

مكرونة بالصلصة -والصلصة كثير بالمناسبة- من أكثر المشاهد الكلاسيكية على الشواطئ المصرية، شقتين بطيخ برضو ما يضروش، كبايتين الشاي بأه نحبس وناخد بعضنا وتننا راجعين.

أجازات الأعياد وشم النسيم و6 أكتوبر وتحرير سينا وعيد العمال.. الموضوع ما يختلفش كثير، وأداؤنا في أجازاتهم بيتراوح ما بين ضرب الكحك أو اللحمية والفسيح للعودة للكنبة والأنتخة والمرازبة، بس الأجازات مش كده، ولا معمولة لكده.

الأجازات معمولة علشان تفصل فيها، قوم دماغك يهدى وجسمك راخر وتقدر عالي جاي، فمش منطقي إنك الوقت اللي تريح فيه -ده لو بتتعب يعني- تمارس فيه منغصات ومرازيات في مخاليق ربنا، يا إما تفضل تمارس رياضة البهلقة في السقف، ما يجراش حاجه من تمشية حلوة كده ساعة العصري، كبايتين شاي ولا عصير ما يضروش، نزولة كده مع العيال ولا الصحاب وماله.

القصد يعني نفهم إن الأجازة مش يوم تزود فيه من أعبائك، سواء المادية ولا الذهنية، كل بلاد ربنا بيعرفوا يشتغلوا صح علشان بيعرفوا يأجزوا صح، مش هاقولك يوم الأجازة خد المدام والكيدر واطلع اعمل سكييتنج عالتلج، ولا اتسلق الجبال، ولا اكتشف حياة قرود البابون في أواسط إفريقيا.

بس استمتع بوقتك، اعمل حاجه حلوة، اتمشى، شوف ناس واحشينك، ماتخانقش ولا تقضيها نوم عالكنبة قصاد التلفزيون.

أقولك عالكنبة السحرية.

إنبسط من غير تعقيد.

شوف سهلة إزاي؟!



# أول واحد عمل إعلان على حيطة

في التمانينات وما بعدها كده، وما أدراك ما التمانينات، بكل ما فيها وبكل ما عليها، منين ما تروح في أي حنة في مصر كنت تلاقي إعلانات مكتوبة على الحيطة، قبل ما يخترعوا البانرات والطباعة تبقى أسهل من كتابة اسمك، القاهرة تحديدًا كانت غرقانة إعلانات على كل حيطة ينفع تتكتب عليها، وكانت كلها عن كاتب، أديب، مؤلف.. الله أعلم بس كان مسمي نفسه اسم كده فخم وضخم، كان مسمي نفسه «أديب الشباب»... آه أديب الشباب كده وش، المهم الراجل ده مش أول واحد عمل إعلان على الحيطة الصراحة، لكنه أكثر واحد نزل إعلانات على كل حيطان مصر، تركب مترو الميرغني تلاقي اسمه وعناوين كتبه على كل حيطان المترو، تركب القطر رايج بحري تلاقي اسمه ناطط في وشك على كل حيطة لحد ما تخرج من نطاق القاهرة المحروسة، تقرر تروح قبلي تلاقيه في كل حيطة في سكتك لحد ما تقرب من بني سويف، كان أسطورة وعلاقته بالحيطان أعتقد إنه هيجي يوم والباحثين بتوع علم الاجتماع هيدرسوها ويدرسوها للطلبة في الجامعات في مصر وبلاد بره.. معرفش إيه اللي فكرني بالموضوع ده، يمكن علشان الإعلانات الأيام دي شكلها بقى شيك أوووي ولازم ترفع راسك لفوق علشان تشوفها، وده في حد ذاته مخاطرة كبيرة لو انت سابق على كوبري أكتوبر أو حتى كوبري قصر النيل، لأنك معرض لا قدر الله تخيش في اللي قدامك، أو تنط من فوق الكوبري ذاته، ولا كمية البوسترات اللي مفيهاش ذوق ولا إنسانية اللي غرقت حيطان مصر كلها بدون استثناء، حيطان مدارس، جوامع، مصانع، كنايس، أي حيطة ينفع يتلرزق عليها بوستر بتاع الدعاية الانتخابية، لدرجة إن حسيت إن مصر ما هي إلا عبارة عن بوستر كبير، مع إن فيه قوانين بتوضح وبحزم إن الآثار ودور العبادة ماينفعش الزق عليهم دعاية انتخابية، بس هو ده اللي صار على رأي عمنا سيد درويش، الصراحة مش فاكرة ولا مركزة إيه اللي خلاني أفكر في الحيطة وعلاقتها بالإعلان، وإزاي وصلنا للمرحلة من التعامل مع الحيطة، أي حيطة بهذا القدر من اللإنسانية، وده خلاني أفكر: مين بقى أول واحد فكر يحط إعلان على الحيطة؟ مين صاحب الفكرة النميسة دي اللي خلت كل حيطة في مصر مباحة ومستباحة؟

الصراحة بعد تفكير عميق وطويل لقيت إن المنطقي إن أول واحد كان إنسان الكهف الأول، اللي حب يصيط نفسه ويعمل لنفسه دعاية، قام راسم على جدران الكهوف رحلات صيده وانتصاراته، بس ده كان جوه الكهف ومنقدرش نعتبر الكهف حيطة في شارع؛ لأن الكهف كان بيته.

قلت يمكن الفراعنة؟ دول أكثر ناس كتبوا ورسوموا على الحيطان!! بس الفراعنة كانوا بيكتبوا ويرسموا على حيطان المعابد والمقابر كنوع من الفن والديكور والتأريخ، يعني مفيش فرعون كتب على حيطة معبد «مركز مرنتاح للدروس الخصوصية يقدم أمنون رع وحش الكيمياء ومنقورع بروفيسير الإنجليزية»، قلت يمكن أيام اليونان، الرومان، الفرس، العرب، المماليك، أو حتى العثمانيين، الصراحة لقيت إن الفرنسيين أول ناس لزقوا الإعلانات على الحيطان في القاهرة المحروسة، آه الفرنسيين هما اللي عملوا كده أيام الحملة الفرنسية كانوا بيلزقوا قرارات قادة الحملة على حيطان المحروسة، ما هو إحنا قبلهم مكناش نعرف الطباعة، يبقى هما الفرنسيين اللي علمونا الحركة دي، بس الحملة فشلت ومشيت، وكليبر اتقتل وعملنا ثورتين، وراحت الحملة بكل ما فيها وفضل لنا منها بس إننا نلزم الإعلانات على الحيطان.

أنا بصراحة، شايفه إن موضوع الإعلانات على الحيطان ده، سواء كتابة أو تعليق بوسترات، هو تعبير أصيل عن العشوائي المكبوت اللي جوه كل واحد بيعمل كده، لأنه أكيد كان طفل صغير محروم من الشخبة في الكراريس وماحضرش حصة الرسم، فقرر إنه يعاقب العالم بأنه يشخبط ويلون على الحيطان كتعبير عن الطاقة العشوائية المدفونة جواه.

عمومًا.. الموضوع في إيدينا ما هو لو بطلنا نشترى من الأرقام اللي على الحيطان وننتخب اللي مغرقينها بوسترات، هنجفف منابع العشوائيين دول.. آه.

# ألف ليلة وليلة

بلغني أيها المواطن العزيز، أنه في بلاد غير بلادنا خالص، بلاد بعيدة .. تركب المعيز و الحال عندهم ينقط ويغيظ، يصحو المواطن في يوم ملبد بالغيوم قايم من النوم مزكوم ... مضطرة اخلص أوراق حكومية من المصلحة الفلانية والإدارة العلانية يا مؤمن واتكتب عليا اتعامل مع كائنات بشرية انتهت من العصور الحجرية.

القصد، مواطني العزيز ولعت 10 شمعات للعدرا والسيدة وندرت لك لو لي ندر وطففت بكل مقام واتوكلت عالي لا يغفل ولا ينام.

شوف عزيزي المواطن اللي في القلب ساكن، موظفين الحكومة ألوان وأشكال بس أساسي في كل مصلحة تلقى مدام نوال، مدام نوال مش بتاعت أموال ولا ليها في الفصال ولا الوصال مدام نوال ست زي القطر، تمشي على سطر وتسبب سطر الست الستوتة مابتجيش من الأساس والكل عليها محتاس يافي دورة المائة يافي الإدارة الجاية ياطلعت مأمورية يافي دورة تدريبية.

مدام نوال معاها مفتاح الدرج، مدام نوال ساكنة في المرح، والمرج بعيدة مانتوا عارفين .. ابقني فوت حضرتك كمان يومين ويفوت يومين وكمان يومين، والمواطنين حبة طالعين و حبة نازلين على نوال لايصين وفي الأختام والدمغات محتاسين، بس الحق يقال... كثير فهموا الموالم واختصروا الهري والقيل والقال في الجيب اليمين مياية متقسمة عشرات وفي الشمال كبشة كوينات لزوم تليين العقبات وتفتيح الدماغات وتطرية الناشفات.

هذا وفي كل مصلحة فئة ملححة وفئة ملححة ومصححة وهي فئة المشهلانية والمخلصاتية، ودي فئة ماتلقهاش عالمكاتب مستنية، تلقاهم منتشرين في الكوريدورات وقصاد أبواب الأسانسيرات وتعرفهم من ابتسامة سمجة عالوشوش وفشخة ضب للي يستاهلوا واللي مايستاهلوش، يبتدي كلامه معاك بالجملة السحرية ودي بيقولها في الرايحة والجاية لكل عجوز وصيبة: أي خدمة يا هانم، ودي معناها لو مش فاهم، إيدك عالعملة الورقية، وتو ما يطلع البنكنوت تخلص مصلحتك في سكوت.. وأوراقك ألف مين يمضيها

والمعصلة ألف مين يعديها والناشفة تلقى اللي يطريها بس التعميم برضو  
مايصحش ومايسواش.

زي ما مدام نوال مابتلقهاش وعلى مكتبها بتستنناش، فيه الأستاذ مراد  
صاحي ومصصح للعباد لا فاتح درج شمال ولا درج يمين ومصالحك معاه  
مقضية ومايخافش في شغله غير رب العالمين، الراجل نموذج مثالي أخلاق  
زي الألمان الغالي، وزى الأستاذ مراد فيه كثير يا ولاد ما هي الدنيا على ده  
وده.

آه والنبي زي ما بقولك كده.



والست متبته في 3 شولة حفصات وبتتخانق مع جوزها بدراع ومع واحدة تانية عينها على شوال من اللي في إيدها.

وبتصرخ إنت مش سامع يا راجل بيقولك اتنين جنيه خصم؟  
شوية والميكرفون يعلن عن تخفيض خمسة شلن عالطماطم.  
ونفس منظر الحفصات يتكرر عند الطماطم.. هوب البسكوت أبو عجوة..  
شوية والكلام بقى عال تلفزيونات.. حبة والتخفيض طال الكاميرات الديجتال  
والشباشب أم صوبع والحلاوة الطحينية والأفران أم مروحة. ونفس التعليقات  
بتتكرر.

يا علوية إحنا في الشتا، مروحة إيه اللي هتجيبها؟  
يا حسين إنت نظرك على قدك، كاميرا إيه اللي هاتجيبها.  
يا راجل بدلة غطس إيه؟! ده إنت بتخاف تستحمى.  
يا أم العيال جزمة الباليه مالهاش لازمة دلوقتي خسي بس الـ80 كيلو دول  
ونفكر فيها الشهر الجاي.

يا حبيبتى هو إحنا بنربي معيز هاتجيبى 12 خساية كابوتشه ليه؟  
عليهم واحدة هدية يا حبيبي.

بس برضو ورغم الاعتراضات لا الناس بطلت شرا ولا العروض وقفت.  
فكرت في عقل بالي قلت ليه بقينا استهلاكيين كده؟  
من إمتى بقينا نشترى اللي له لازمة واللي مالهوش؟  
إيه سر سعار الشرا والاستهلاك اللي بقى عندنا؟!

ده إحنا لو طلعلنا اللي تحت السراير وجوه السحارات ومخزون النيش  
المقدس وخزين دواليب المطبخ ومحتوى كراتين البلكونات.. كل بيت هيفرش  
جنبه بيتين ويفيض، ومع ذلك مستمرين في الشرا والاستهلاك والتخزين.. زي  
ما بناكل ونشرب ونتنفس بالزبط.

أمال بنشتكي من الغلا والكوى ليه بأه؟! لأ يا جدعان مش اسمه كلام ده  
زي مايقولكوا كده نشترى اللي محتاجينه، ونفكر مرتين ثلاثة قبل ما ناخذ  
قرار الشرا عموماً.

بالإذن بقى عشان عاملين تخفيض ربع جنيه على متر مشمع الغسيل، أروح  
الحقلي مترين.

# أول واحد ضرب نار في فرح

قاعدة في أمان ربنا، ولقيت ضرب نار متواصل، نطيت من على الفوتيه ما تعرف، السرير مش فاكرة .. المهم نطيت وخذت ساتر، وحاسبت أوي احسن تيجي رصاصة طايشة كده أو كده، عدى وقت كثير، مش فاكرة الصراحة من الخضة، قلت يمكن ولاد اللذينا بيضربوا فينا؟ أو يمكن احنا اللي واقفين لهم، مبقتش فاهمة ولا عارفه.

تاني يوم وبعد ما الخضة راحت وقدرت اسيطر كده على نفسي وعلى أعصابي بدأت أسأل: هي الحرب بدأت امبارح الساعة كام؟ السؤال الصراحة كان غريب وكل الردود عليه كانت أغرب.. اللي بص في وشي وضحك.. واللي بصلي من فوق وتحت وقال: ربنا يشفي.. وفي الآخر بعد ما طلع عيني واحد ابن حلال قالي: لا دي مش الحرب ده كان فرح!!

فرح.. فرح فيه كل ضرب النار ده؟! مينين جابوا الأسلحة طيب؟ مينين جابوا الرصاص؟ يا عم أنا بتاعت سيما الحاجات دي مش بتتباع في السوبر ماركت.. الراجل بصلي تاني كده بعطف ويمكن شفقة وقال: لا ما هو فرح ثقيل، والناس كانت بتوجب بضرب النار.

بيعملوا واجب مع بعض بضرب النار؟ طيب إزاي؟

أنا الصراحة موضوع الواجب بضرب النار يصعب على أمثالي فهمه، يوم والتاني والموضوع اتنسى كنت باتفرج على فيلم «الهروب» للعظيم أحمد زكي، وفي مشهد الفرحة لقيت اخواتنا الصعايدة بيضربوا نار في الفيلم.. يا لهوي ياني بقى.. ماقولكش.. ساعتها افتكرت الفرحة اللي كان جنب البيت وقعدت أفكر.. مين صاحب فكرة ضرب النار في الفرحة؟ مين بقى صاحب حدوتة إن ضرب النار واجب في الأفراح؟ طيب مش خايفين احسن العريس يتخض وتبقى حوسة وليفة بلاك عليه وعلى أهله وبالتأكيد على عروسته؟ مش خايفين إن رصاصة كده أو رصاصة كده تيجي في حد من المعازيم وبدل ما يبقى فرح يقلب لميتم؟!

كل الأسئلة دي الصراحة وأكثر منها دارت في مخي.

طبعا قعدت افكر وافكر.. أول حاجه استبعدت الفراعنة.. ودي أول حاجه يطلع الفراعنة إنهم مش أول حد يعملها.. الحمد لله.. وحذفت نص تاريخنا من

أول الفراغنة وانت جاي من الدائري كده لحد الاحتلال العثماني من دخلة الطريق الزراعي قبل سندهور ومتسألنيش فين سندهور دي بس ليها نفق على الطريق الزراعي.. المهم جيت عند العثمانيين وفرملت.. فتحت كتب عمك الجبرتي والطهطاوي وغيرهم كثير.

الصراحة لقيت إن آخر الناس دي إنهم يضربوا طلقتين مدفع، ده الخديوي سعيد بجلالة قدره يوم تنصبيه خديوي على مصر اتضربله كام طلقة مدفع والسلام عليكو وعليكو السلام.. بلاش الخديوي سعيد، الخديوي إسماعيل، الخديوي توفيق، يا عم ده الملك فاروق يوم ما اتنازل عن العرش اتضربله كام طلقة مدفع تحية ومات الكلام على كده!!! أوَمَّال مين اللي عمل العادة دي في أفراحنا؟؟؟

قطعت عصر الملكية ودخلت على الجمهورية، الأفراح مكاتتش أكثر من حالة من الانبساط والرقص والأكل، ويمكن الأكل أهمهم، لحد ما جه يوم المؤرخين فشلوا في تحديده بالضبط.

بس ماكنش فيه تليفونات ولا موبايلات، والعريس كان هيروح يجيب عروسته من مركز بعيد ويبجي على بلدهم عشان الفرحة، فاتفق مع أهله عشان يعرفوا إنه قرب هيضرب طلقتين في الهوا أول ما يقرب، لو سمعوهم يردوا عليه بطلقتين عشان يطمنوه.

هو ضرب من هنا، سمعوه ردوا بطلقتين من هنا. والفرح عدى.

قوم إيه في ناس عجبها الموضوع وبقي أهل العريس يضربوا نار من هنا.

فأهل العروسة يردوا من هنا.

والموضوع قلب إن كل واحد يعمل واجب ويضربله خزنتين رصاص من هنا، وبقت ولا الحرب العالمية.

الموضوع اتحول مع الوقت لعادة وأسلوب للأفراح، وانتقل من الصعيد للقاهرة لوجه بحري، وبقينا نسمع ضرب النار في الأفراح عادي، لدرجة إننا الشعب الوحيد اللي عنده شعار «اللي بيحبنا ميضربش نار» مع إن ده مش بيحصل وبقي نادر لما تشوف فرح من غير ضرب نار أو شماريخ أو حتى فايروركس.. واتحول الموضوع من التباهي لشيء مزعج ومقلق.

أول واحد ضرب نار في الفرحة كان مصري أكيد مفيهاش كلام، يمكن في بعض البلاد العربية فيه العادة دي، ويمكن لا، بس ضرب النار في الأفراح بقى عادة مصرية صميمة للأسف بدون مراعاة لجيران أو أحوال وأي حاجة، كام



مرة سمعنا عن وفاة طفل أو طفلة في فرح بسبب رصاصة طائشة؟ كام  
مرة سمعنا عن مشاكل بسبب ضرب النار في الأفراح؟  
شكلنا كده هنفضل نضرب نار في أفراحنا واللي زي حالتنا هيفضل يقول:  
«اللي بيحبنا ميضربش نار».

# التوتر

ماخيش عليكوا من كام يوم كنت في زيارة للحكيم، حبة رهقان وكرشة نفس والحاجات اللي بالكوا فيها يبعدها عن السامعين أجمعين.

المهم وبعد الكشف والإشاعات والتحاليل يبجي دور الروشته اللي بتتكتب باللغة الهيراطيقية في أغلب الأوقات بمعجزة ما، الصيادلة ربك بيحط في عنينهم البركة ويفهموا النقوش البديعة دي ويستنتجوا الأدوية، القصد.. خلصت الروشته وجه ميعاد النصايح بتاعة النوم بدري وغسيل الرجلين قبل ما تنام وشرب المايه الكثير وبعدين نصايح الأكل من نوعية:

هنبعد عن المقلي والمشوي والمسلق والدهون والخضار واللحمة والبيض والسمك والنشويات والكربوهيدرات والعيش الأبيض والبنّي والأحمر والاسود والخضار والفاكهة ومنتجات الألبان والباقي ناكله زي ما احنا متعودين بس بلاش ملح وسكر وتوابل وخل ولمون وفلفل، غير كده براحتك.

آه زي ما بقولك كده.

المهم ..أستغفر واكتم واقول معلش يا بت أهو دور ويعدي ونكتفي بساندوتشات ماية الحنفيه، وربنا يطرح فيها البركة ونبقى نمضغ حبة هوا لما نجوع.

وبعدين يستطرد الحكيم المداوي:

وطبعًا نبتعد عن التوتر خالص خالص الفترة دي.

- نعم!

التوتر يا فندم لازم نبتعد عنه نهائي.

- آه اللي هو إزاي.

توتر إيه اللي نبتعد عنه؟

نبتعد عنه بمناسبة إيه؟ ده النفر بيتولد والتوتر طالعله أتب في ضهره! أبتعد عن التوتر اللي هو مانزلش الشارع؟ ماسمعش كلاكسات تخلي الواحد يصنح كأن العربيات بتمشي بالزامير مش بالبنزين؟

ولا ابتعد عن التوتر أبطل سواقة علشان العربية اللي من عهد تحتمس  
الرايع اللي هتحتل حارتين يمين وشمال وتمشي بسرعة 3 سحالي في الفدان  
بطول المحور؟!!

ولا ابتعد عن التوتر وماروحش الشغل؟

ولا ابتعد عن التوتر اللي بينط عبر السوشيال ميديا.

تفتح التليفون على غيار الريق تلاقي 400 خبر ناطين في خلقتك عبارة عن  
كوارث اجتماعية واقتصادية وثقافية وطبيعية أينعم بعد نص ساعة بيقوا بح ما  
بين إشاعات وما بين صياغة لطيفة تحسسك إن اللي بيخبط غالباً ده  
الباشمهندس فرانكشتين شخصياً بينما هو مرات عم على البواب جاية  
العيش.

بس كفاية الخضة بتاعة الصياغة لوحدها اللي مش توترك بس، دي تجيلك  
اكتئاب وهو اجس قهرية ده غير الناس اللي لوحدها كده استنتجت استنتاج ما  
وتروح رازعاه في خلقتك في صورة خبر، وقبل ما تاخذ قرار إنك تحط  
صوابك في فيشة الكهرا من هول الصدمة يجيلك هاجس ساذج إنك تسأله  
هو مصدر الخبر ده إيه؟ يقولك لأ ما فيش مصدر ده رأيي!!!

كم المحللين والمستنتجين والفقهاء العلميين والفنيين والتقنيين اللي  
بتصدرهولنا السوشيال ميديا مش يجيب توتر ده يجيب جدري.

نبعد عن توتر الأسعار ولا سعر الدولار وناس زي المنشار؟

نبعد عن توتر الإرهاب ولا بطالة الشباب ولا وجع الركاب؟

ما تقولي يا عم الحكيم البعد عن التوتر ده بيصرفوه منين وانا ابعت اجيبه  
ولو بواسطة... بدل التوتر اللي انت عملتهولي ده.

# أول واحد نط من على سور المدرسة

الشاعر السوداني شريف محبوب ليه غنوة جميلة بيقول فيها:  
المهنة بناضل باتعلم تلميذ فى مدرسة شعبية، المدرسة فاتحة على الشارع  
والشارع فاتح فى قلبي.

الغنوة حلوة وغناها محمد منير، من كام يوم كده كنت باسمعها وانا معديه  
جنب سور مدرسة وفجأة لقيت الغنوة بتتجسد قدام عيني بدون أي مقدمات..  
زي ما بقولك كده.. اشترى مني، بس الصراحة مش كل معاني الغنوة  
الجميلة كانت بتتجسد حته صغيرة من الغنوة، حته صغيرة أوووي هي اللي  
كانت بتتجسد قدام عيني «المدرسة فاتحة على الشارع» عيال كثير واقفين  
صف فوق سور المدرسة، واحد منهم عامل زي مدربين الصاعقة كده واقف  
على جنب، بيتابع ويلاحظ نطة كل واحد فيهم من فوق سور المدرسة، حاجه  
كده منظمة، حاجه كده توجع القلب ع الصبح.. ليه أطفال فى ابتدائي  
وإعدادي و ثانوي يبقى كل همهم إنهم ينطوا من فوق سور المدرسة؟ هيعملوا  
إيه بره المدرسة وليه يكونوا بره المدرسة أساسًا؟ وفين الناظر؟ المدرسين؟  
الفراشين؟ موضوع غريب وعجيب.

بعد ما رجعت كده نطت الغنوة ثاني في بالي وكمان منظر الطلبة وهما  
ينطوا من فوق السور، مين يا ترى أول طالب في تاريخنا التعليمي عمل نطة  
الثقة دي من فوق سور المدرسة؟

معندناش معلومات عن التعليم أيام الفراعنة فالمرة دي مش هنقدر نقول  
إن أول طالب نط من فوق سور المعبد كان فرعوني، لأن مكانش فيه  
مدارس مستقلة بذاتها كانت المعابد دور عبادة ومدارس ومؤسسات ليها  
حيثية في المجتمع المصري القديم.

يمكن أيام الفاطميين والمماليك؟ أيامهم كان التعليم بالاجتهاد يعني لو مش  
حاجب تتعلم مش هتتعلم، ثم الكتابيب مكانش ليها سور زي سور مدارس  
الأيام دي يعني الحدوتة لا فيها نط ولا قفز ولا أي حاجه أصلًا!

أومال إمتى وفين كانت أول نطة من فوق سور المدرسة في مصر؟

فيه كتاب لطيف كده عنوانه «تاريخ التعليم في مصر» لأحمد عزت عبد الكريم، بيحكى فيه تاريخ التعليم في عصر الأسرة العلوية، أسرة محمد علي باشا باني نهضة مصر الحديثة، قلت يمكن عنده المفيد، الصراحة الراجل كتب عناوين وأسامي مدارس مبقتش موجودة، بس كمان لاحظت إن موضوع الهروب من التعليم كان منتشر؛ لأن الأهالي أيامها كانت خايفة من فكرة التعليم والمدارس الداخلي، بس ده كان أيام محمد علي باشا الكبير، دلوقتي التعليم كالماء والهواء على رأي أستاذنا طه حسين، ثم الراجل مقالش إن فيه عدد من الطلبة بينطوا من على السور، لا كان فيه حالات هروب وخصوصًا في المدارس الحربية أو التجهيزية اللي أنشأها محمد علي علشان يقدر يأسس جيش مصري عصري وحديث، ثم كانت العيال دي أيام محمد علي ولا أيام الخديوي إسماعيل هتنط من على السور تروح فين؟ لا كان فيه إنترنت ولا بلاي ستيشن ولا يحزنون.. حطيت الكتاب على جنب والفضول قتلني.. عايزة أعرف مين أول واحد نط من على السور.. إحنا عندنا فضلة خيركم 10227 حضانة.

و17619 مدرسة ابتدائي.

وزيهم مدارس إعدادي.

و2994 مدرسة ثانوي.

و1984 مدرسة فني صناعي.

و903 مدرسة تربية فكرية.

يعني بالصلاة على النبي عندنا فوق الخمسين ألف مدرسة، لو كل مدرسة بينط منها عيلين بس، يعني فيه 100 ألف طالب في الشارع كل يوم!! رقم يخوف مش كده.. المهم قلت الموضوع ده محتاج حد خبرة وراسي كده يقدر يرسينا على أول طالب نط من فوق السور.. بعد بحث واتصالات لقيت خبير تعليمي من اللي بيقولوا كلام مهم ومكعبير يصعب على أمثالي فهمه، خلاصته إن وزارة التربية والتعليم لم تهتم بتوثيق اللحظة التاريخية لأول طالب نط من على السور ولا وزارة البحث العلمي اهتمت بكشف ملابسات اللحظة الفارقة في تاريخ التعليم المصري، ولا وسائل الإعلام أيامها الممثلة في الجرائد والمجلات اهتمت بالموضوع من أصله، ومحدث اهتم أساسًا إلا بعد ما بقى الموضوع ظاهرة وحدوتة كبيرة وليلة صعب تتلم في كلمتين أو قرارين.

أقولكم الحق نفسي اتصدت وفضولي للمعرفة راح في الوباء وفشلت أعرف  
مين أول واحد نط من على السور، بس عرفت إننا كل فترة لازم نقول إننا  
هنطور منظومة التعليم وإن التعليم في مصر مش عارف ماله، وأصلنا هنعمل  
وهنسوي وهنجيب وهنودي والصراحة لا عملنا ولا سويننا.. لأن مدارسنا يا  
سادة بقت فاتحة على الشارع.. والله زي ما بقولكم كده.

# أصل و90 مليون صورة

عندنا معزة خاصة مش مفهومة للحاجات المضروبة.  
ماتعرفش إيه السبب هل من كتر ما استخدمنا التلفان والمضروب والمتقلد  
بقينا نخاف من الأصلي مثلاً؟!  
آه والله زي ما بقولك كده.

عمرك ما تفكر تحط نسخة أصلي لأي برنامج عندك على جهاز الكمبيوتر  
بتاعك رغم إن بعض النسخ الأصلي دلوقتي بقت مجانية أصلاً، ومع ذلك برضو  
لسه نعز المضروب والمتقلد ماتعرفش ليه؟

لدرجة إننا بقينا من أكبر أسواق المضروب في مجال التكنولوجيا على  
مستوى الدنيا باللي فيها لأن أكثر من 90% من استخدامنا للبرمجيات بقى  
مضروب.

آه والنبى زي ما بقولكوا كده.

ومع الوقت ما اكتفيناش بالبرامج والتقنية.. والكمبيوتر وبس لأ توسعنا لحد  
ما الموضوع شمل كل حاجة.

تيجي تشتري هودوم ولا محافظ ولا ساعات ولا اكسسوارات حتى تبص تلقى  
ماركات مش لايقة على سعرها.

«سلام قولاً من رب رحيم» إمتى ده حصل؟! البراندات بقت بتراعي  
محدودي الدخل ولا إيه؟

تلاقي البياح يتفضل مشكورًا ويقولك لأ أصل ده الهاي كوبي بتاعها.

حتى المضروب حالياً درجات.. مضروب تحت بير السلم ومضروب على  
مستوى راقى لأصحاب الذوق الرفيع.

لما تلاقي روحك بتلف حوالين نفسك طب اللي جتته من البراند المشهور  
إياه كان أصلي ولا كان مضروب، ما داهية للجزمة اللي حاطط فيها تحويشة  
العمر تكون راخرة مضروبة، هار اسود الشبكة اللي في الدولاب بجد ولا ذهب  
صيني؟! العربية اللي راكبها حقيقي ولا توكتوك معدلينه... أنا بنت مين يا  
دادة؟!

وبرضو ماوقفش الموضوع عند حدود الهدوم والبرمجيات، ده دخل في كل حاجة.

حتى العلم والثقافة والفن.

ينزل الكتاب من هنا صاحبه منزل فيه يا ولداه عصارة إبداعه ودار النشر حاطة فيه دم قلبها وصارفة عليه تقله فلووس.

هوب يوم والتاني والكتاب يشم بس ريحة النجاح تاني يوم تلاقيه اتنسخ واتطبع على ورق لحمه، واتعمله ذات نفس الغلاف وبيع يا جدع بنص التمن.

واللي يلبس اسود من الغالي يا عيني الناشر والكاتب.

وقيس على كده كل حاجه.. الفيلم ينزل أول امبارح حاجه زي الفل ولسه، أبطاله رايعين جاين عالسينمات يعملوله افتتاح هنا وهناك وهو منسوخ بتليفون صيني ونازل على فضائيات بير السلم.

آه والنبي زي ما بقولكوا كده.

آه ما هو دلوقت بقى فيه فضائيات مخصوصوووو عرض الأفلام المنسوخة وإن مالقوش منسوخ بيلطشوا عادي من أي حته ده فيه فضائيات بتعرض أفلام بلوجو قنوات تانية وعادي ماحدث حاسس.

الأغنية ولا الألبوم، المطرب يتكحول يا عين امه ما بين مخرج ومنتج وفنيين ومؤلفين ويعمل بروفات ويسجل وفي استديوهات جوه البلد وبراها علشان يطلع بحاجة عليها الطلا وهو خارج من الاستوديو بنسخة الأغنية في جيبه لسه يسمعها عند كشك الكازوزة اللي على أول الشارع، تلاقيه يا حسرة على بابه يتقلب جنب الكشك بينازع في النفس الأخير.

آه وربنا زامبولك كده حاجه تقطع القلب.

المصيبة إن من كتر فكرة النسخ اللي عايشين فيها من الاتجاهات الأربعة ناس كتير استسلمت وبقت بتشتغل بالقصور الذاتي.

يعني الكاتب بقى بيكتب وهو عارف إن الكتاب هايتنسخ ويتسلك والمطرب يسجل الأغنية وهو بيدعي إنها تنزل أون لاين بصوته مش المزيكا لوحدها قبل ما يحط صوته عاللحن حتى والممثلين والمنتج بيقولوا يارب الفيلم يتسرق على بعضه راخر مش ناقصه مشهد في المونتاج، فكرة المنسوخ والمسروق والمتقلد بقت بتفقد الناس الرغبة حتى في الشغل والتعب أصلاً.



ماهو مين ربنا حاططله عقل في دماغه هيقوم يخبز رغيف عيش وهو عارف  
إن الغراب هيسرقه قبل ما يدور وشه عنه حتى.  
تقول الحل إيه يا مؤمن؟ أقولك والنبي ما اعرف. تقولي: إزاي؟  
أقولك: اهوزي ما بقولك كده.

# أول واحد عدى دوره في الطابور

صحيت من النوم مفزوعة... حد يقولي مالك؟ حد يحاول يهديني..؟ مفيش أمل.

حلمت، خير اللهم اجعله خير إني واقفة في طابور طويل.. طوييل أطول من ليل الشتا في القطب الجنوبي.

وكل ما دوري يقرب يبجي واحد أو واحدة يقوم حاشر نفسه في الطابور قبل مني.

قعدت كتير؟.. متعدش.. وصحيت من النوم مفزوعة على صوت شباك الموظف وهو بيقفل وبيقول: خلاص.. شطبنا يا سادة وأنا لسه في الطابور واقفة.

حلم وحش أوووي قلت أشوف تفسيره إيه، وإيه اللي بيحصلي ده؟ وليه أنا؟ مع إني مش من هواة الطوابير ولا جمع الطوايع حتى..

وشايفة إن الطابور في حد ذاته عقاب إلهي وشكلي كده عملت سيئة ولازم اكفر عنها.

المهم فتحت كتاب ابن سيرين لتفسير الأحلام لقيت ابن سيرين بيقول لا فض فوه: إن الطابور معناه الوقوف أمام ذي سلطان وإن اللي بيدخلوا في الطابور بالعافية دول ناس ليهم واسطة.. أنا قلقنت.. إن جيتم للحق قلبي اتوغوش كده ومبقتش عارفه أروح فين ولا آجي منين؟ صاحب سلطان! واسطة! ده مكانش طابور تراخيص عربيات ولا حتى طابور قدام شباك السجل المدني.. قلت لا لازم اسأل حد مجرب وعارف اللي فيها.. ابن سيرين على أيامه مكانش فيه طوابير لكل حاجة، وده اللي مش مضايقني، اللي مضايقني الناس اللي بتحشر نفسها في الطابور قدامي من غير لا إحم ولا دستور كده.. طولت عليكم.. قولوا طولي وخلوني آخذ راحتني... قعدت كده واتربعت وقعدت اعمل سيرش على جوجل يمكن ارسى على بر، واضح إن في بلاد الفرنجة مفيش طوابير ولو فيه على الأقل فيه نظام مفيش حد بيحشر نفسه ولا واحدة تدخل عليك وانت واقف في الطابور في أمان الله تقولك: معلىش الواد في المدرسة عايزة الحق اجيبه، ولا ست عجوزة تقولك مش قادرة اقف، لأن في بلاد الفرنجة فيه طوابير وأماكن مخصصة لكبار

السن، لقيت البتاع اللي اسمه جوجل ده بدل ما يرسيني زود حيرتي اكثر..  
قمت فكرت كده بالراحة يا ترى ضايقني الطابور نفسه في ذاته ولا  
الناس اللي كانت بتحشر نفسها في الطابور وتأخذ دوري؟ اكتشفت إن ده  
سبب صحيانى من النوم مفزوعة أساسًا، حسيت إن الناس دي بتأخذ حقي  
وبتجور على مصالحي وش، وانا واقفة لا عارفة اعترض ولا عارفة اشتكي  
حتى.. قلت يبقى لازم أعرف مين أول واحد عدى دوره في الطابور، مين  
البنى آدم ده؟

كنت هافتح النت واشوف جوجل، وبعدين قلت لا جوجل ولا بتاع.. الناس دي  
مش عارفة الحاجات دي زينا إحنا.. فتحت كتاب «عجائب الآثار في التراجم  
والأخبار» لعننا الجبرتي، سبع أجزاء يا مؤمن قعدت افر فيهم لحد ما لقيت  
حدوة بتحكي عن عطايا السلطان المملوكي وإزاي الناس كانت بتقف طابور  
قام واحد من الرعايا عدى دوره والناس عملت قلق قوم حرس السلطان  
جاب الراجل ده من قفاه ووقف قصاد السلطان ولما سأله ليه عديت دورك  
ومصبرتش زي الناس قام ناع بيتين شعر معرفش جابهم مينين في مدح  
السلطان وإنسانيته ورقة قلبه قام السلطان مكافؤه وش.. آه كده.. وفلت  
الراجل من العقاب وخذ عطايا قبل الناس المرصوصين من الصبح مستنيين  
دورهم... قلت يمكن الجبرتي حكى الحكاية غلط، يمكن الراجل ده قريبه ولا  
معرفة، كل شيء جاي.

بس للأمانة تاريخنا مليون ناس نطت من آخر الطابور لأوله.. كثير أوووي،  
الصراحة في تاريخنا عملوا نفس الحركة دي.. هتلاقيهم في اللحظات الحرجة  
نطوا من آخر الصورة وبقوا في صدارة المشهد.. مالهمش تاريخ ولا طلة،  
بس نطيتهم من آخر الطابور خليتهم يوصلوا للشباك قبل ناس واقفين قبلهم  
بكتير.

الصراحة موضوع الطابور والدور خد مني وقت كبير على ما افهم واعرف  
وافسر.. اللي ياخذ دورك مش احسن منك.. واللي يعدي دوره بالشطارة  
والفهلوة مش بالضرورة حد ناجح ومصحح وقادر ينجز أموره.. لأنه ببساطة  
حد بيسرق دور مش بتاعه وبيأخذ مكان مش ليه.. تبت في دورك وخلي  
النظام ياخذ مجراه.. مهما قالوك سلك نفسك يا مواطن ومشي أمورك.. آه  
اعمل كده.. زي ما بقولك كده.. بس متقولش إن أنا اللي قلت لك.

## الجاهلية المرورية

لما دورنا وبحثنا وتبحرنا في أسباب مشاكلنا الاجتماعية وسلوكياتنا لاقينا جذور تاريخية لأغلب البلاوي اللي بنعملها واحنا مش عارفين. بنعملها بعفوية كده واحنا مش حاسين.

خد عندك المرور مثلاً، التقينا ان أبا الكعكوب بن السحداني المحليزي هو أول من ركن صف ثاني بناقته وقفل على كل اللي راكبين في صحراء الوادي العميق في عصر ما قبل السلامو عليكو ودي نفس المنطقة اللي بقت شارع نوال حالياً.

وعلى نهج أبي الكعكوب الناس كلها بتركن صف ثاني وتالت ورابع أحياناً في شارع نوال وشهاب ومصداق ومصصر كلها.

أبو الكعكوب برضو كان أول واحد مشي عكس الاتجاه وده في رحلة الشتاء والصيف، القافلة كلها كانت رايحة اليمن وهو كان مُصر يروح ليبيا، لأ ومصصر يعدي في النص والناس ترفع العالي بتاع الناقة في وشه وهو ولا هنا واخذ اتجاه ليبيا وماشي في وسط النوق ولا على باله الناس اللي ممكن تروح في داهية بعملته السوداء دي.

أبو الكعكوب راخر -الله يرحمه- بأه مطرح ما راح كان سبب مأساة بنعاني منها حالياً، لأنه في عصره لقي إن بما إن الناس كلها بتستخدم الخيل والجمال في التنقل راح هو استرخص واشترى معزة وقرر يتنقل بيها، وفعلاً ركب المعزة وبقى يجري بين رجلين الجمال والخيل ويتسبب في كوارث مرورية وفزع للعيال والكبار في الجاهلية منه لله، لأ والمعيز انتشرت كوسيلة مواصلات انتشار فيروس في الجاهلية وبقى العيال المراهقين في الجاهلية يركبوها، وقلب الجاهلية سلطة بسبب العملة السوداء دي.

المشكلة إن الموضوع ما اندثرش تاريخياً ده تطور لحد ما وصلنا حالياً في صورة التكاتك اللي بتعمل نفس مصايب المعيز بين الجمال.

أبو الكعكوب راخر هو أول واحد طلع دماغه بره الناقة وراح تافف لامؤاخذة في الشارع وأول واحد حذف ورق ومناديل وعلب عصير وكانز وأعقاب سجائر في الشارع وعلى خلق الله.

أبو الكعكوب هو أول واحد بطل يهز ديل الناقة يمين وشمال وكان يقطع على مخاليق ربنا ويلبسهم يمين وشمال علشان بطل يدي إشارات. وراخر أبو الكعكوب -قطع وقطعت سيرته- هو السبب في قطع الشوارع بالعرض.

وراخر كان بينزل يسلم على مدام سلامة وحبابة وجوزها الأستاذ الحيي ابن الأخطل ويسيب الناس اللي وراه شايطين على جمالهم وهو واقف يرغي ويطق حنك في وسط الصحرا.

أبو الكعكوب كان بيمشي بالناقة متقيمة ويشرب خمر ويلعب ميسر ويؤد بنات جواها ويعلي الكاست ولا كأنه ماشي لوحده في الصحرا.

أبو الكعكوب كان بيمشي من غير نمر وبفوانيس مكسرة وياما ركب مقاطير ورا الناقة بتاعته وموت ناس بالهبل بغاوته دي.

أبو الكعكوب كان إله المرور في الجاهلية تقريبًا.

كل البلاوي اللي بنعاني منها كان هو سببها، المشكلة إننا لسه محتفظين بيها، وبنجود عليها كمان، ألا هو الجاهلية مش عدت بقالها حبة حلوين.

طب ما زي ما بقولكوا كده مش كفاية بأه؟!!

## حدقين من يومنا والله

يقولوا في الأمثال: إن العقول لما اتوزعت كل واحد عجه عقله ولما اتوزعت الأرزاق كل واحد طمع في رزق اللي جنبه.

إحنا أضفنا للمثل ده إننا كمصريين طمعنا في مخزون الحداقة بتاع كل مخاليق ربنا واقتنصناه لنفسنا.

الحداقة عندنا قناطير قناطير تتعبى في شكايير، آه والله زامبؤلك كده لأ وعندنا مخزون استراتيجي كمان يكفي المجموعة الشمسية كلها إن ما كفاش المجرة تَمَّا ومستمرين في الإنتاج، عجلة إنتاج الحداقة والفهلوة عندنا مابتوقفش مهما حصل لا بتتأثر بصعود ولا هبوط في البورصة ولا بيحوق فيها سحر ولا أعمال.

إحنا الشعب الوحيد اللي تفتح موبايله تلاقي البطارية مسنودة بقطنة وخلة سنان، والسيم كارد محشورة بعود كبريت لأ والتليفون شغال ويعمل وظايف ماتخطرش على بال مصنعه ذات نفسه.

تصدقوا بالله إحنا جينا دب قطبي في جنينة الحيوانات في التسعينات آه والله زامبؤلك كده، جينا دب قطبي في جنينة الحيوانات جه يا ولداه من سيبيريا محمول على الأعناق لحد هنا، أينعم قعدله أسبوعين ثلاثة ولو إنهم -الشهادة لله- وفروله كافة سبل العناية والرعاية وحطوله حنفيه ميه في القفص فضل قاعد تحت منها الـ3 أسابيع يعدد ويلطم ويتشحتف على قلة بخته ولحد ما الحل جه من عند الرحمن الرحيم.

القصد العيل يوم ما يتولد يتربى على ده بابا ودي ماما.. هم يا جمل... إمبو.. يوغتي... كخ ماتحطش صباغك في بوقك... ولا تخربش في فيشة الكهريا.... . ولا تقولش معرفش، حسك عينك تقول معرفش اللي يقول معرفش بيركبوه البغلة بالمقلوب ويمشوا يجرسوه في البلد.

يطلع النفر مننا كبير حلو كده، وبينه وبين قولة معرفش كراهة التحريم، تستفتيه في أيتها حاجه يا مؤمن من أول لضممة الخيط في الإبرة لنهاية ثقافة الوجودية وتناسخ الأرواح وعلوم الميتافيزيقا والأصول التاريخية لعجين الفلاحة ونوم العازب تلاقيه يفتيك ويرص معلومات ويرسم خرايط ويشاور ويشوح، وخبرات وشهادات بأم العين كمان، لدرجة إنك تبص للبنى آدم ماتبقاش

عارف البعيد طالع بكام منظر!! وتتساءل في عقل بالك الأخ خريج إيه؟ بلاش  
خريج إيه، العلام في الراس مش في الكراس... خبرات الأخ إيه... اهتماماته  
إيه؟ قاري في إيه؟ من شوية كان بيدلي بدلوه في السياسة.

ممم مش ضروري يكون سياسي يمكن قاري ومطلع، حبة وتلاقيه بيهابر في  
انهيار البورصة!!

ممم خريجين تجارة كثير أكيد خريج تجارة ما يضرش شوية وتلاقيه بيتكلم  
في صوامع الغلال.

ماشني جوز خالته مهندس زراعي وبيقعد معاه ياما.

هوب بيقولك البشاميل يتحطله 4 معالق سمنة مش 3.

يمكن كان بيركز مع الحاجة وهي في المطبخ؟!!

ينام ويقوم تلاقيه بيفسر أحلام.

آه ده متنور ومتصل بأه... بركاتك يا ابو خطوة.

حبة ويفتي في الحلال والحرام.

ياختتتيبيي!! أنا تهت منك يا عم الحاج.

على ماتهرش تلاقيه بيحلل زوايا الإضاءة في الموناليزا وبينقد شعر  
المعلقات.

تبتدي إنت تهنج منه وتطلع الصاجات من جيبيك وتمسكله الواحدة.

تعمل ساندوتش جبنة بقوطة، وترجع تلاقيه بيوشوش الذكر ويضرب الرمل  
ويبين زين؟!!

وهنا تدرك الحقيقة المرة.

الأخ أجهل من دابة والزيطة مبدأ وأسلوب حياة عنده وعند غيره

آه والنعمة زامبؤلكوا كده.

والنبي يا مؤمنين ما فيه حد ينفع يبقى فاهم في كل حاجة وملم بكل العلوم  
ومدرك لكل الخفايا وضالع في كل بحور الشعر ومدرك لكل حيل التاريخ  
ومتشعب في كل الفنون وبيتكلم كل اللغات.

عادي لو النفر جه على نفسه وشاف حاجه وسكت ولا فاتاش فيها.

عادي لو النبي آدم اتسأل سؤال ولا أدلاش بدلوه.

هو مش عادي إنك تقول معرفش... صعبة أصلها بتموع النفس وتجييب  
هرش وتقريص للبعض بس والنبي في الأول بس.  
حبة حبة كده لو اتعودنا على قولة ماعرفش بتلاقيها عادية وتنفع تتقال عادي  
كل حاجة بتبقى صعبة في أولها، بس بالتمرين كل حاجة بتيجي.  
جرب كل يوم قبل ما تنام تقول ماعرفش ماعرفش ماعرفش 40 مرة  
هتلاقوا الموضوع بقى أسهل.  
بس ما تبقوش تزودوها أوي في قولة معرفش لتحلو والموضوع يقلب  
بتناحة وتصديغ وهي مش ناقصة آه والله زي ما بؤلك كده.



# أول واحد قال خمس دقائق واوصل

إنت فين؟

- أنا في السكة؟

- قدامي خمس دقائق وابقى قدامك

كام مرة سمعنا «خمس دقائق وابقى قدامك».. «خمس دقائق واوصل».. «خمس دقائق وبقى عارف ابقى فين؟ يووووه كثير ماتعدش.. آه زي ما بقولك كده، الطفل المصري اللي المفروض إنه أذكى طفل في العالم زي ما بنسمع بقى عارف اللي فيها، وعارف إن الخمس دقائق دي ممكن توصل لساعة لو انت جاي من المحور لأن هبقى قدامك سكة سفر ولازم تقابل الوحش في ميدان لبنان وطلعة الزمالك... ولو انت جاي دائري يبقى أكيد أنك محشور قبل نزلة المنيب أو قبل نزلة المعادي.. يبقى مفيش خمس دقائق ولا ربع ساعة ولا ساعتين، حتى موضوع «خمس دقائق واوصل ده بقى أوفر ريتيد بصراحة ومع الوقت بقى العادي والطبيعي بتاعنا، لأنك لما بتكون رايح مشوار بتحسب المشوار كيني آدم طبيعي، خمس دقائق العربية تسخن، خمس دقائق أعدي أول مطب على ناصية الشارع، ربع ساعة من بيتنا في أكتوبر لميدان لبنان، وساعتين من ميدان لبنان علشان اوصل الزمالك... ده المنطقي.. بس خيالنا المريض دايمًا بيصور لنا حاجات مش هتحصل زي انك ممكن تقطع المسافة من ميدان لبنان لميدان التحرير في عشر دقائق، ده مش هيحصل إلا لو ميعادك كان الساعة اربعة الفجر مثلاً.

بس السؤال المنطقي هنا: مين أول مصري صاحب «خمس دقائق واوصل»، الحواديت هنا كثير.. يقولوا ده واحد محضرش الدائري ولا شاف المحور وفيه حدوتة تانية بتقول أول واحد قالها كان سواق أتوبيس في زمن المواصلات العامة اللذيذ، قبل التوكتوك وقبل التاكسي الأبيض وقبل خط المترو الأول والثاني وطبعًا التالت وقبل الكون ما يبقى كون بزمان، سواق الأتوبيس كان خطه طويل شوية قول شويتين، من حلوان وبالتحديد موقف التبين وآخر الخط في شبرا وتحديدًا في المظلات.. سكة سفر طويلة ومن زهق سواق الأتوبيس من واحدة ست كبيرة كل شوية تسأل من أول ما تحرك من موقف التبين: هنوصل إمتى المظلات يا ابني.. السواق مكانش

عايز يصدّمها ولا يجيّلها شلل رعاش في الأتوبيس.. كان رده دايماً: خمس دقائق ونوصل يا حاجة.. طبعاً الست مع الوقت اكتشفت إن بلاد تشيلها وبلاد تحطها وعلى ما وصلت محطة رمسيس كانت مسكت في السواق والاتنين راحوا القسم ولو عندكم وقت ممكن نزور السواق في مستشفى العباسية لأنه من يومها لسانه علق على جملة واحدة «خمس دقائق واوصل».

دي رواية لأصل «خمس دقائق واوصل».. بس كلها روايات وحواديت من زمن عدى، زمن مكانش فيه لا محور ولا دائري ولا وصلة المربوطية ولا نزلة المنصورية ولا حتى محور اللبيني.. بس للأمانة العلمية وعلشان الواحد يبقى ربح ضميره على الآخر.. فيه شوية ناس مغرضين بيقلوا إن أول واحد قال «خمس دقائق واوصل» لا كان راكب أتوبيس ولا حتى في الشارع، ده بني آدم كان نايم في أمان ربنا، وحاضن طنجر رز بلبن في أحلامه وعایش متهنّي، قوم واحد صاحبه رزل فوّقه من أحلى نومة وقاله:

- إنت فين يا عمنا

- أنا في البيت

- ليه مش فيه بينا ميعاد

- آه نسيت

- طيب إيه؟

- خمس دقائق واوصل

طبعاً صاحبنا حط سماعه التليفون من هنا ونسي الميعاد ونسي الخمس دقائق ورجع لطنجر الرز بلبن، وصاحبه من يومها واقف ماسك الساعة مستني الخمس دقائق يعدوا..

حدوتة « خمس دقائق واوصل» حدوتة قديمة، حدوتة عن عدم احترامنا للمواعيد وتقديرنا للوقت ولا للمسافات، بلد زحمة، فيها عربيات أكثر من البشر، يبقى لما يبقى عندك عزومة في التجمع الخامس عند حماتك وانت ساكن في أكتوبر يبقى قدامك حل من اتنين:

يا تبات في التجمع الخامس من بالليل.

يا تطلق المدام علشان لو قضيتها في التليفون مع مراتك خمس دقائق واوصل غالباً حماتك هتسمك على الغدا وتروح شهيد الخمس دقائق.

آه والله زي ما بقولك كده.

## صفيحة لكل مواطن

كنت رايحة أول امبارح زيارة لناس حبايبي وإذ بي أفجأ إني مش عارفة  
أوصل البيت!!!

يادي الخيبة إيه اللي حصل؟؟؟ ده انا باجيلهم من سنين، معالم المنطقة  
اتغيرت ولا البيوت اتهدت؟

أضربك بعيني شوية كده ألتقيلك كوم الزبالة اللي معلمة بيه ناصية البيت  
خاسس حبتين.

أيوه صح البيت بعد تالت كوم زبالة كبير مش بعد الثاني الخاسس.  
ووصلت الحمد لله.

آه والله زي مابؤلكوا كده وصلت الحمد لله؟!

أمال انتوا مستغربين ليه؟

آه علشان معلمة البيت بكوم الزبالة؟؟!

الله؟؟ ما ده الطبيعي يا جماعة..

أكوام الزبالة هي المعالم الثابتة على الطريق حاليًا، لو علّمت البيت بدكان  
ولا محطة أتوبيس ولا حتى باسم الشارع ورقم البيت، كل ده عرض زابل  
يتغير مع الأيام والسنين.

لكن كوم الزبالة ثابت وراسخ وأصيل في الشارع المصري لا يتأثر بالعوامل  
الجوية ولا بالتغيرات المناخية ولا بالثورات ولا بالمؤامرات الخارجية، حاه  
كده ليها قوة السحر في شوارعنا، كوم الزبالة تروح عليه عصور وتيجي قرون  
وتتغير عليه ممالك وسلطين وهو واقف عتل في مطرحه شاهد على التاريخ.

أكوام الزبالة في شوارعنا ممكن لو استنينا عليها سنتين كمان تتحول بترول  
لوحدها كده ده بغض النظر عن الغاز الطبيعي المنبعث منها حاليًا.

آه والنبى زي مابؤلكوا كده.

كام مسئولين راحوا وجم ووعدوا بالتخلص من الزبالة والقضاء على  
المشكلة من الجذور فكرك الزبالة اتهزت؟؟ خافت؟؟ تراجعت؟؟

أبدًا ثبتت على مبدئها وحافظت على كيانها واتحدت الكل وانتصرت.

ده احنا لجأنا للخبرات الدولية وجبنا ناس من آخر الدنيا يلحقونا والناس مقصروش الصراحة جم وجابوا عددهم ومكنهم وعربياتهم من بلاد ما وراء البحار والمحيطات.

وحاولوا وفضلوا يحاولوا ويحاولوا، بس الحقيقة الموضوع أكبر شكله من القدرات الدولية ذات نفسها.

زبالتنا قادرة على التحدي تحسها صاحية وبتلعب وبتقدر تصمد في الأزمات وتحولت لتراث إنساني وحضاري بعضها يرجع للعصور الحلزونية.

المهم إن الزبالة في المجمع بنظرة الناس بتوع الورقة والقلم ماهياش حاجه بطالة.

وإلا ما كانش يبقى فيه مليونيرات ومليارديرات عندنا وفي العالم كله كل أعمالهم متعلقة بالزبالة سواء جمع أو إعادة استهلاك.  
آه والله زي ما بقولكوا كده.

طب ده فيه مطاعم وشركات كبيرة سنويًا بتعمل مزايده على مين اللي هياخد زبالتها والمستثمرين بيخشوا المزايدات ويدفعوا للمطاعم والشركات دي ملايين علشان ياخدوا حقوق جمع زبالتهم.  
طب خدوا الزغولة الكبيرة بأه..

دول يا مؤمنين زبالتهم مش مكفية مصانع إعادة التدوير بتاعتهم وبيبعنوا ياخدوا زبالة الدول اللي حواليتهم علشان يلاحقوا على تشغيل مصانعهم، آه والله زي ما بقولكوا كده.

المشكلة مش في الزبالة في حد ذاتها لأن فعليًا الزبالة في حد ذاتها ثروة وإلا مكانش يبقى أصل المشكلة وأساسها النباشين اللي بيروحوا عند مكان تجميع الزبالة ويفرتكوا الكياس وهات يا جمع كارتون وبلاستيك وورق وصفح وقماش وياخدوا كل ما يمكن إعادة تدويره ويسيبوا الباقي على شكل انفجار في صندوق الزبالة.

وهنا المشكلة بأه.

أيام عم عباطي ما كان بيجي بقفته الخيش يفضي صفيحة الزبالة من قصاد باب البيت في القفة ويشيلها على ظهره وينزل يقلبها في العربية اللي بحمار مكانش فيه مشكلة من الأساس، كانت المشكلة بتنحصر في عم

عباطي والعربية والقفة والأداء اللي شكله من القرون الوسطى، بس يعني في المجلد الشارع مكانش فيه مشكلة.

بس من يوم ما عم عباطي اعتزل الملاعب والدنيا فرطت مننا.

الجمع المنزلي كان حالل مشاكل وجود الزبالة في الشارع في انتظار إن ابن الحلال يا ياخذها يا يلعب فيها البخت.

بس والنبي فكرة الفصل بتاعة اليومين دول مش بطالة يعني صندوق أخضر للحاجات العضوية اللي هي بواقي الأكل وخلافه وصندوق اسود للحاجات الصلبة البلاستيك والصفح والورق والكياس وخلافه برضو.

بس القصة محتاجة توعية ومحتاجة برضو نلاقي حل لحالة الاستقرار اللي عليها أكوام الزبالة في الشارع.

محتاجين نعلم العناوين والمناطق بحاجة تانية غير أكوام الزبالة.

آه والله زي ما بقولكوا كده.



كل سرير كراكيب وفوق كل صندرة وجوّه كل سحارة كراكيب وفوق كل سطوح المركبة الأم للكراكيب.

آه والله زي ما بقولكوا كده.

عايشين مع كراكيبنا ومعتزين بيها معزة خاصة ولا نقدر نفارقها ساعتين زمن على بعضهم عمرنا ممكن ينقص لو قللنا من كراكيبنا شوية مع إن النفر لو فكر شوية كده هيلاقى إن أي حاجة ماستخدمهاش لمدة شهر أو شهرين متواصلين تلقائيًا كده هي مالهاش أي ثلاثين لازمة في حياته.

بلاش شهر.

بلاش شهرين.

نخليهم سنة سنتين حتى.

لكن ده فيه ناس محتفظين بالتليفونات أم قرص وشرايط الفيديو والكاسيت في الوقت اللي التليفونات الزراير والفلوبى ديسك بقى حاجة تاريخية.

هل ده برضو راجع لإيماننا الراسخ بأهمية التحف والأنتيكات مثلًا وإن الحاجة بتغلى لما تعتق؟؟

بس برضو ما هو مهما قعدت أزاير الماية البلاستيك عمرها ما هتبقى أثر ولا تحفة يتدفع فيها ألفات لو ده الغرض.

ولا بلوزات التمانينات أم أوبليتات راخرة ممكن ترجع موضه!! وإن رجعت هتبقى اللي موجودة فعليًا من التمانينات شاطت ولا تنفعلش تتلبس.

آه والله زي ما بقولكوا كده.

بس لو فكرنا بشوية إنسانية هنلاقي اللي مخزنيه في بيوتنا ولا بنعمل به حاجة يمكن حد تاني محتاجة، عجلة حمادة المركونة فوق السطوح لأن حمادة شخصيًا كبر وعياله كبروا وأحفاده على وش جواز يمكن طفل تاني يلعب بيها ويفرح.

زكايب الهدوم أكيد فيه ناس هتبقى بالنسبة لها فرحة العمر لما يلبسوها، الأجهزة الخربانة يمكن فيه اللي يعرف يصلحها ويستفاد منها، بالنسبة لأزاير المايه والبرطمنات الإزاز والكراتين والبتاع البلاستيك اللي بيفرقع فده تراث ممكن تطير فيه رقاب لو حاولتوا تقنعوا أي ربة بيت تستغنى عنه بالأخص البرطمنات الإزاز.

ممکن تعملوله ريسايكل وترشوا عليه ببرق وتحطوا فيه الأقلام والمساطر  
أهو ينفع.

القصد نخف عن بيوتنا حملها واهو نفرح ناس تانية ونساعدها، وفيه جمعيات  
ومؤسسات بقت دي مهمتها دلوقتي.

لو خفينا شوية عن بيوتنا وعن سطوح بيوتنا وبلكونات بيوتنا والنبي هتلاقوا  
البيوت وسعت ورحرت وهانكتشف مساحات مكشَّاش عارفين إنها موجودة  
في حياتنا.

واهي تبقى فرصة نخزن فيها بلاوي جديدة.

آه والنبي زي ما بقولكوا كده.



# التجهيز للأفراح

كمية التفاصيل اللي لازم تتعامل معاها وانت بتتجوز واللي غير متضمنة الشقة والعفش والشبكة والشوار والسشوار وكل الحاجات اللي فيها حرف (ش)، تفاصيل لا تنتهي.

بداية من تعداد المناسبات المتعلقة بالجواز:

- قراية فاتحة.

- حنة الخطوبة.

- الخطوبة.

- كتب الكتاب.

- حنة الدخلة.

- الدخلة.

كل المناسبات دي بيعتبروها مفصلية وتتطلب إعداد وتجهيز بداية من المكان اللي بيبتي من شقة أهل العروسة نهاية بـ«نأجر (الصحرا الغربية) علشان معازيم بابا كثير شوية».

مروّرا بفستان مختلف لكل مناسبة والمعانة بين هل السيمون أحلى ولا الكورال أحلى ..... مين؟

الكورال؟ إيه ماتعرفش الكورال.

الكورال ده اللي هو السيمون المصفر شوية مش المحمر، شوف إزاي يا مؤمن !!!

غير اقتراحات لتفاصيل الزفة هتبقى زفة كمانجات، ولا زفة بالرينات، ولا زفة فيروز، ولا زفة ماجدة الرومي، ولا حاجة غربي على أنغام فيردي.

- فتقترح نخليها زفة مزينة القرب وعلى نار على نار على نار، ونرقص طانط نوال وتعمل بيرويات وكدزه.

- نعم بتقول حاجة يا بيبي؟؟؟!!

- لا بقول نخليها على أنغام تشايكوفسكي أحلى، آه لحظة ياريت مانساش تفاصيل صاحبات العروسة، اللي العروسة حاليّا بتصرف عليهم أكثر من اللي

ممکن تصرفه على عيالها في الثانوية العامة ما بين فستان لكل واحدة  
علشان لما يتصوروا معاها وهما عاملين بوز البطة يطلع شكلهم كيوت.

كل واحدة عاوزالها بوكيه ورد وتاج مكتوب عليه صاحبة العروسة وإسورة  
مدل دل منها دلالة نحاس برضو مكتوب عليها صاحبة العروسة، ووشاح على  
صدرها راخر مكتوب عليه صاحبة العروسة، ونضارة وماسك تلبسهم على  
عينها مكتوب عليهم طبعًا صاحبة العروسة وشمسية تمسكها وخاتم في إيدها  
وبروش في صدرها وعيل يسحبها من إيدها وكلهم مكتوب عليهم صاحبة  
العروسة، قوم لما تشوف صاحبة العروسة تحس إنها تايهة من أهلها ومش  
عارفة هي مين فيأكدوا على فكرة إنها صاحبة العروسة، بحيث اللي يلاقيها  
يرجعها لأهلها.

نفس الأداء ده أحيانًا يبلجأوا ليه مع صحاب العريس طواقي وكرافات  
ودبايس بدلة وماسكات وبدل شبه بعض.

- تفصيلة كمان ماننسهاش وهي عربية الزفة اللي بتنوع من بداية الفيرنا  
المجنطة بتاعة ابن خالة العريس نهاية بليموزين 17 متر جواها بار بتأجر بتمن  
شقة إسكان متوسط، وفيه اللي بيخلصوها ويجيبوا عربية سندريلا وعربية  
الملك رمسيس الحربية...ومتسألونيش بيحبوهم منين.

أخيرًا وليس آخرًا العروسة تروح تبات خميس بجمعة عند الكوافير، بحيث  
يرجعها لك واحدة غير اللي انت اتفقت عليها مع أهلها، لفة الطرحة لواحد  
بيعملوا عليها بروفات، والبادي الكارينا اللي هيتضرب تحت الفستان علشان  
الأناقة تكمل بيقاله حوار خاص بيه.

نفس الشيء بيحصل مع العريس اللي الحلاق بيوصله لمرحلة إن كل اللي  
يشوفه يحس انه أول مرة يستحمى فيها فحياته.

تسألني يا مؤمن كل التفاصيل دي ليه يقولوك علشان تبقى مناسبة مميزة  
ولا تتنسيش.

مميزة ؟ ما حدش عمل كده قبل كده يعني.

- لا كتير عملوا نفس التفاصيل دي آمال فين التميز؟

- عادي أصل بنت عمه العروسة كانت عاملة كده في فرجها فهي مش أقل  
من بنت عمته.

مهمم تقليد يعني ولا مكايده.

المهم التفاصيل الكثير دي بتخلي الدنيا ملخبطة، ولما حاجة بتفلت منها  
ممکن تعکنن علیکم، بینما انتوا أصلاً المفروض رایحین تفرحوا.  
بسطوها ماتجعلصوهاش.. آه البساطة بتخلي كل حاجة حلوة ومزبونة  
وبنت خالة العروسة وجيران صاحب العريس ربنا أدري كانوا سعدا بكل الهري  
اللي عملوه ده ولا كانوا جايين شواشي بعض ولا شמוש ريحة الفرحة.  
دوروا عالفرحة مش عال تفاصيل ووجع الدماغ.  
صدقوني زي ما بقولكوا كده.

# الفرح المصري

الأفراح في كل الدنيا طقوسها مختلفة من مكان لمكان، في الغرب مثلاً ربنا يستر على عبيده الناس بتتجوز وبعدين يبقوا يعملوا الفرحة ده لو عملوه لو قرروا يكملوا في الجواز.

في بلاد تركب الأفيال الفرحة بالجهاز بالمهر بالشقة بكل حاجة-اللهم احفظنا - بيبقى عالعروسة مش عالعريس... العريس عليه يوافق بس على التفاصيل دي لو عجبته أصلاً... إِيَّيْ ما تحكم علينا

بس خلونا نركز حبتين في الفرحة المصري الحلو بتاعنا بتاع اليومين دول. تبدأ فقرات الفرحة اللطيفة بداية من الزفة مروراً بفقرة عاوزين صاحبات العروسة يقفوا صف وصحاب العريس يقفوا صف.

وفقرة الرقص على أنغام أنا قلبي ديلي من منطلق انها حاجه جديدة والأجدد بأه هو رقصة البطريق. آه وربنا البطريق زي ما بقولك كده.

هوب العريس ياخذ ديل العروسة في سنانه وصحاب العريس يشبكوا في ديله ورا منهم صاحبات العروسة والجيران والأحباب والعيال الصغيرين كله ورا بعضه زي حبل الممبار.

وكله على نطة واحدة نطة قدام ونطة ورا وواحدة يمين وواحدة شمال وتلاقي القاعة بتتمخبط بيك من فرط اللذة!!!

هوب تلاقي الكهارب خفت ووطيت ومزيكا قدرية بتعلى شوية شوية في أرجاء المكان وإذ فجأة بلاك لايت في القاعة كلها يحول الموجودات لأشباح سنانها بتلمع والمزيكا القدرية عمالة تعلا تعلا وباب يتفتح فجأة يطلع منه دخان كتير والمزيكا عمالة تعلا تعلا وهوب يدخل كائن زاحف بيطلع نار وشرار وغضب الجبار من كل أركانه يتمركز في نص القاعة وهوب ينوروا النور الطبيعي.

تطلع التورته!!

تقولش قفشوها بتهرب مثلاً ولا التورته دي طقس وثني يلزمه كم التشويق والساسبنس ده قبل ما ندبح العريس ونضحى بيه على أول دور من أدوارها

مثلاً.

تيجي بأه فقرة الساحر المتمثلة في الجارسون اللي هيمسك الشوكة وبحط فيها حته تورتة ويشدها فجأة علشان قال إيه هيبوسوا بعض وهما مش واخدين بالهم... .. ياختييييييييييييييييييييييييي.

طبغاً في فقرة العروسة وهيا بترمي البوكيه، قال إيه اللي هتقفشه هتتجوز وتبقى محظوظة، ياختي ماشفتش واحدة قفشته وحالها مشي إلا لو كانت أصلاً متفقة مع العروسة لأنها أصلاً مكتوب كتابها.

وبعدين نط إيه وبوكيه إيه، ما زمان كان الموضوع أسهل، كان المثل يقول « إقرصيا في ركبتها تحصليا في جمعتها » مش فطي ونطي والكلام ده. تيجي أهم فقرة ومحور الأحداث وهدف الأهداف ومركز الأرض البوفيه. بس دي محتاجة يوم من أوله فخلونا نحكيها بكره بقى.

## البوفيه

إمبارح خدنا الكلام وكنا بنتكلم عن الفرح المصري، لحد ما وصلنا عند اللحظة الأهم في الفرح، يعني أهميتها من نفس أهمية لحظة ما لاعب بيحط جون في الدقيقة الخامسة من الوقت الضائع من الشوط الإضافي الثاني في نهائي كأس العالم، اللحظة اللي بيستغنى فيها أكثر الناس عن وقارهم وكياستهم ويركبوا في رجليهم قباقيب سكييتج ويطلعوا يجروا، وكل واحد ياخذ طبقه تحت باطه ويبتدي يركز عالحمه والرومي وسيمون فيميه، وكل أم واخده العيلين ومشيلة كل واحد طبق واللي منهم شيطانه يهفه عالفكهة ولا السلطة ولا الرز يتزغد في ظهره ويتبصله بصة من نوعية.. ركز في البروتين الحيواني يا ساذج يابن الساذجة.

ده في حالة ما إذا سعدك زمانك وزعق لك نبي ودعيتك الحاجة في ليلة القدر وكان البوفيه مفتوح.

إنما إذا كان البوفيه من نوعية الاطباق اللي هتنزل عالترابيزة، فالأداء بيختلف كل واحد في مكانه يبص نظرات هادئة من تحت لتحت يشوف الجارسونات وصلوا لحد فين مع معاينة للأطباق اللي نزلت وحساب الكميات وتقدير الاحتياجات.... مكتب محاسبة كامل بيشتغل بسرعة الفموتوثانية بيكون في دماغك، والواحد في اللحظة دي يخلص البوفيه من هنا وكل واحد ياخذ ديل الفستان السواريه في سنانه ويطلع يجري يروح وكل الناس عادة بتبقى حجتهم أصل حماده عنده امتحانات إنتي عارفة ياروحي معلش هنضطر نستأذن، إنتي عارفة الشغل الصبح.

مع إن عادة الفرح بيكون في الصيف ويوم خميس يعني لا حمادة بيمتحن ولا فيه شغل الصبح بس هو كلمتين تطيب خواطر.

يتبقى عادة صحاب العريس القريبين واللي مسحولين معاه من أول اليوم ولسه هيروحوه (هو الصاحب له عند صاحبه إيه ) وكام واحدة من صاحبات العروسة إضافة لأهلها وينتهي الفرح بفقرة يا سهر الليالي راخرة مقدسة من غير سبب واضح برضو.

المهم الفرح حدث مهم صحيح في حياة كل اتنين قرروا يتوجوا قصة حبههم بالجواز بس لازم نركز في فكرة إنه بداية لحياة وكل ما الحياة بتكون بسيطة

كل ما بتكون مريحة عما تبتدو حياتكم بتفاصيل مريكة لإن كتر التفاصيل  
عمره ما بيخلق فرحة حقيقية، الفرحة الحقيقية بتخلقوها لما تكونوا فعلاً  
فرحانيين والناس فرحانة لكم.

الفرحة مكانها القلوب مش الجيوب وما فيش فرحة بتجيب وجع الدماغ آه  
والنعمة زي ما بقولك كده.

# أول واحد كسر الإشارة

يوسف شاهين الله يرحمه في أول مشاهد فيلم حدوتة مصرية، واقف بوجه منير للحركة في المشهد، منير راكب عربية وشاهين يقول:

- أول ما أقولك اتحرك تدخل على طول.

- منير بيرد عليه: أدخل يمينا يا أستاذ.

- شاهين بيستعجب ويقول: يمينا.. هتخش في الديكور يعني يا منير. المشهد ده بيلخص واقعنا المروري وبشدة مع إن شاهين مكانش قصده، ويمكن قصده ومنعرفش، ما هي أفلام شاهين فيها حاجات تتفهم بعد سنين.. آه والله زي ما بقولك كده.

المهم أنا كنت قاعدة كده سارحة في الملكوت لا تقدر تقول الدنيا ليل ولا هي نهار، الجو مغيم كده، شتا بقى وما أدراك ما شتاء مصر، اللي شوية يقلب على أجواء أوروبا الشرقية وشوية يعمل فيها انه صيف بس متنكر، الفصول في مصر بقت ملخبطة زي حاجات كتير بس ما علينا.. نرجع ثاني لموضوعنا.. كنت قاعدة وباتفرج على فيلم «حدوتة مصرية» وحسيت إن منير هنا كسر الإشارة، أيوه كسر إشارة المخرج.. شاهين عايزة يدخل طوالي ومنير عايز يدخل يمينا يعني يكسر عليه، يكسر كلامه، دماغه قعدت تروح وتيجي، شوية شمال وشوية يمينا، لقيت ان موضوع كسر الإشارة ده وراه حدوتة وأكد وراه قصة، وانتوا عارفين لازم ادور واعرف واجيب الزيتونة.. المهم.. رفعت سماعة التليفون كلمت حد معرفة قاري كده وعارف وسألته بشكل مباشر:

تعرف مين أول حد كسر الإشارة؟

الراجل سهم شوية كده وقاله أنهى إشارة؟

قلت له: ليه هي هتفرق كل الإشارات واحدة؟

قاله: لا، تفرق.. تكسري إشارة قصر النيل غير ما تكسري إشارة في شارع الشيخ ريحان.. تكسري إشارة على المحور عند هايبير غير لما تكسري إشارة في مصر الجديدة، ما هو كل إشارة وليها تفاصيلها.

الصراحة محبتش أسرح في التفاصيل وإيه اللي هيفرق بين إشارة على ناصية شارع صغير في طنطا أو إشارة في قلب ميدان روكسي.. كلها



إشارات زي بعض، رجعت عليه ثاني بالسؤال: مين أول واحد كسر الإشارة؟  
سكت وانتحنج وقال: الموضوع ده قديم أوووي لدرجة إن المؤرخين تعبوا  
أوووي على ما عرفوا بأصلوه ويأسسوا حواديته ويسندوا رواياته، فيه شبه  
إجماع إن أول واحد كسر الإشارة كان كوماستابل في الشرطة؟

أنا اتخصيت.. الصراحة ازبھليت.. يا راجل قول كلام غير ده مش ممكن!  
رد عليا وقال: آه والله زي ما بقولك كده، أول واحد كسر الإشارة في  
التاريخ المصري كان كوموستابل في الشرطة، كان مستعجل ومتأخر على  
ميعاد دفتر الحضور، كسر الإشارة بعريته الزستافا، زميله أمين الشرطة  
محبش يعمله مخالفة وعدت الحدوتة على خير، بس كان فيه مواطن لئيم..  
سوسة واقف في الإشارة لما شاف الأمين كسر الإشارة وعدت الحدوتة على  
خير عمل زيها بس الأمين اللي واقف خدمة لسعه مخالفة وكانت خناقة على  
طريقة: إشمعنا هو وانا لأ.. ومن يومها الشعب كله بقى في حالة كسر  
الإشارة، أنا مصدقتش.. حاولت أشتري ما ابعش.. بس لا اشتريت ولا بعث  
الحدوتة دي، قلت يمكن صاحبي ده مغرض!! مش فاهم!! ضحكوا عليه!! كل  
شيء جاي.. قلت ادور على حد ثاني يرسيني ويخليني اشتري.. قلت واحدة  
صاحبتني من ذوات المال والجاه والحسب، والنسب.. ست شيك.. مأصلة أبا  
عن جد، سألت دوغري من غير لف ولا دوران.. تعرفي يا مون شيري مين أول  
واحد كسر الإشارة في مصر؟

الست ما شاء الله.. لغة إيه.. ثقافة إيه.. قالت لي ببساطة وعفوية: أول  
واحد كسغ الإشاعة في مصر كان باشا كيغ أوووي أيام الملك فاعوق.. ولأنه  
كان صاحب الملك وبيسهغوا سوا في الكلوب.. الموضوع عدى بس كان فيه  
واحد من الغعاع الأفندية شاف الباشا كسغ الإشاعة قام عمل زي، كان فاكغ  
إن ابن الجنيني هيبقى زي الباشا!

حاولت استوعب.. باشا وملك وكلوب محمد علي!! إيه ده هو الموضوع قديم  
أوووي كده، الفار اتنطط كده قدامي، والشك كبر جوايا، مش ممكن، قلت لا  
مبدهاش بقى، لازم نسأل حد متخصص، صديقي عالم التاريخ واللسانيات  
والإنسانيات كمان كان رده مقنع ومفحم وقاطع ومانع لأي شك، قالي:

كسر الإشارة قديم أوووي في مصر، قدم الأهرامات والتاريخ، فيه لوحة  
جدارية على معبد مش فاكربن اسمه لأنه اتهد زمان، اللوحة دي اللي محدش  
شافها ولا حد لحق يصورها كانت بتصور أمير من أسرة الفرعون وهو راكب

عربيته الحربية وكسر الإشارة الموجودة في طريق الكباش ولإن ليه ناس مهمين.. الموضوع عدى والفرعون عمل من بنها والمعبد اتهد بعد كده بسنين والموضوع اتنسى خالص واتمسح من ذاكرة التاريخ بأستيكة ماركة « النسيان مفيد للإنسان»..

شوف هو واضح إن كل واحد هيقول إن أول واحد كسر الإشارة من الناس اللي هو عايز يلبسهالهم.

وعشان كده مش مهم مين أول واحد عمل كده.

المهم ليه بنعمل كده.

ليه بنكسر الإشارة مستعجلين ولا مش خايفين؟

بنكسر الإشارة لأننا مهمين وحاسين إننا فوق القانون ولا شطارة وفهلوة واشمعنا انا؟

الصراحة بعد تفكير قررت إنني أكسر إشارة.

# أول واحد قال (كل سنة وانت طيب)

كل سنة وانت طيب؟

كلمة ممكن تسمعها في أي مصلحة حكومية أو حتى محل بتشتري منه مستلزمات البيت أو لو انت في المناصرة بتشتري عفش قفص الزوجية.. قصدي عش الزوجية.واللي جايه دي إوعى تستغريها.. إوعى.. لو بتخلص شهادة وفاة.. هتسمع بردو كل سنة وانت طيب في ديلها البقاء لله، مش عارف ازاي بس بتحصل والله.

خلينا ناخذ الحدوتة بطريقة إخوانا بتوع السينما.. تخيل معايا كده.. نهار داخلي.. داخلي في أي حطة أو مصلحة أو محل... داخل إنت بابتسامة مقاس 45 ومادد إيدك بالورق بتاعك ولا كأنك بتقدم ورق اعتمادك كسفير للنوايا الحسنة.

يقوم الواحد من دول بعد ما يبص في الورق بتاعك وهيبدا يشتغل فيه أهو وبعد ما يكون عدل النضارة 100 مرة ولا كأنه بيعدل ميزان الكون.. يقوم قايلك وعلى وشه ابتسامة مقاسها أكبر من مقاس ابتسامتك.. مشيها ابتسامتك:

كل سنة وانت طيب؟

الطبيعي ترد: وانت طيب.

يقوم هو ضاحك كده بعد ما يلاقي البعيد – اللي هو حضرتك- معندوش نظر ويقوم قايلك: كل سنة وانت طيب.

إوعى تقوله تاني، إياك.. صدقني.. ساعتها ورقك هيجتاج يتختم من كوكب المريخ أو تجيب ريشة ديل ديك شركسي مواليد التسعينات.. وساعتها مش هتلمو غير نفسك.

ولو حضرتك أصريت على غيابك الحيثي هيقوم هو متطوع بصبر ما يخلصش وموسع الابتسامة وقايل: فين الحلاوة بتاعتي؟ وعامل حركة سينمائية ميقدرش سيلبرج أو سكوت شخصيًا يقدموها بالشكل المبهر ده.. يقوم فاتح الدرج أو الدوسيه اللي فيه الورق بطريقة: فتح يا ابني فتح.. شوف مين بيكلمك.

ودي اللحظة اللي الابتسامات ما بينكم بتوقف لمدة ثواني.. ثواني طويلة جدًا... حازه كده زي الليل وآخره اللي كلنا بنسمع عنه.. واللي هيحصل بعد كده هيكون حسب مفهوميتك وذوقك وكل سنة وانت طيب بقى.....

كل سنة وانت طيب بتاعت الموظفين أو أي حد رايح تخلص منه مصلحة قديمة قدم التاريخ، قرئت في كتاب «الأوائل».. لا.. مش بتاع الفيزيا بتاع، الثانوية العامة.. كتاب تاني فيه منه نسخة يتيمة لقيتها أنا في ظروف غامضة.. الكتاب بيقول إن أول واحد قال «كل سنة وانت طيب» كان موظف فرعوني مسئول عن مخازن الكوسة الفرعونية اللي كانت أكبر من دلوقتي بكتبير، يعني بيقلوا إن حباية الكوسة الواحدة كان فيها بركة كده وممكن تعشي عيلة بحالها، المهم الموظف الفرعوني ده كان لما بيحي حد ياخذ كوسة كان يسأله لمين؟ لو قاله للقصر أو حد من النبلاء أيامها كان يقوله: كو - سة - طيبة.. يعني كوسة حلوة.. بالهنا والشفاء.. مع السلامة يا حاج... كده يعني.. لكن لو واحد عادي هو اللي جاي ياخذ الكوسة كان الموظف اللي معاه المفاتيح بتاعت المخزن وقاعد بيعد كل حازه كان يقوله: كو - سة - ولا قته... طبقًا للمواطن من دول كان يقوله «قته» ويقوم غامزه باللي فيه النصيب علشان يخلع بالكوسة اللي كانت ممنوعة على عامة الشعب في زمن الفراعنة.. الغريب بقى يا أخي إن الموظف الفرعوني ده كان اسمه «آكر - مي» وفي أقوال أخرى إنه واحدة واسمها «إكر - ام - ية».. زي مابؤلك كده.

## طواير ياما

معروف عننا إنا شعب حميم أوي يحب اللمة والصحة واللحمة، لأ اللحمة اللي جاية من الالتحام مش اللحمة اللي بالك فيها، آه والله زي ما بؤلكوا كده.

عشرين ونحب نتلم كده ويبقى نفسنا في بؤ بعض والمساحات الخاصة دي دايماً منتهكة يعني ماينفعش ندي لكل بني آدم ربع متر حوالين منه يتحرك فيه من غير ما يخبط في مناخير حد ثاني.. وده السبب الحقيقي إن معندناش ثقافة الطابور.. آه والله الطواير ثقافة.

فكرة الناس اللي ورا بعضها وكل واحد سايب يجي 10 سم بحالهم بينه وبين اللي قدامه واللي وراه علشان تخلص أي حاجه دي ثقافة حقيقية والله زي ما بؤلكوا كده بس ماينلاقيهاش عندنا، وإن حصل ولاقيناها فبنلاقيها واكلها البارومة ومعدي عليها قطر مرتين رايح جاي.

فتلاقي الطابور إن لاقيته يعني واخذ شكل التعبان أكثر من شكل الخط ومش لأنه ملتوي أو لافف على بعضه لأن دي ماهياش أكبر مشاكل الطابور، لكن تعبنا له راس عبارة عن حونكيشة بشر متزاحمين وبعدين ليها ديل عبارة عن بشر برضو ورا بعض ينتاب الديل ده برضو حبة تورمات ودول عبارة عن بشر تانيين مصرين يمارسوا دروب الحداقة والطرمخة في الدخول في دور مش بتاعهم فيبواجهاوا اعتراضات من باقي جسم التعبان ممكن تتحول الاعتراضات لخناقات تنتهي بفشكلة محاولة الطابور اليائسة دي من أساسها، أهوزي ما بؤلكوا كده.

المهم إن ثقافة الطابور دي في العادي جات كإبداع إنساني لتسهيل مهام الحياة في البلاد الزحمة واللي مطلوب فيها الحصول على خدمات بيقدمها عدد محدود من البشر.

قوم الغلبان اللي بيقدم الخدمة يعرف يتعامل مع نفر نفر من غير ما يتشتت، قوم يقدم الخدمة أسرع.

وكمان معمولة علشان أكبر عدد ممكن من الناس يدخل لمكان واحد مساحته محدودة وله بوابات زي المواصلات أو المحلات الزحمة أو حتى الأسانسيرات.

فكرة إننا نحذف نفسنا جوه الأماكن دي زغط كده زي أكل البط مش بس ممكن يسبب مشاكل، ده ممكن يسبب مصايب وكوارث لولا ستر ربنا. آه والله زي ما بؤلك كده.

وأكم مصايب حصلت بسبب حشرتنا في حنت ماتساعناش وأكم مصالح مابتنقزيش علشان مصرين نتكلم كلنا في نفس واحد مع اللي بيقدم الخدمة أو بيخلص المصلحة.

ماحدش ينكر إن الطابور حاجه ممله، وقفة وانتظار وجايز يكون فيه حر أو برد أو تعب وزهق وفيه مؤسسات اعتمدت دلوقتي على فكرة الرقم اللي تاخده وتروح تستريح أو تعمل أي حاجه ولما بييجي دورك نبقى نندهلك ودي حاجه حلوه والنبي بس برضو ماهياش متوفرة في كل حنة ومضطرين نتعامل مع الطابور التقليدي

واحنا عندنا مشكلة مع الطابور التقليدي.

هل ده له علاقة بأزمة تاريخية مع الطوابير؟!

هل مثلاً وقفنا في طوابير المدرسة زمان كانت نوع من التكدير الإنساني لدرجة تكريهنا في كل أشكال الطوابير وتعمدنا إفسادها وبذل كل رخيص وغالي في سبيل الهدف السامي ده؟

جايز مين عارف!!

هل ذكريات طوابير الجمعية وطوابير العيش وطوابير الغاز وطوابير البنزين اللي كانت بتستمر بالساعات والأيام في بعض الأوقات خلت الطابور بالنسبة لنا شبه وحوش أساطير أمنا الغولة وأبو رجل مسلوخة والنداهة وبقت الفكرة بتعملنا فوبيا، فبقينا نخوف بيها العيال على طريقة لو ماكلتش البامية هاجيبلك الطابور ياكل عمرك ويمتص أحلامك!!

جايز برضو!

أهو فيه سبب محتاج بحث وتمحيص وحد كبير وراسي كده يقولنا ليه فيه تار بايت بينا وبين الطوابير رغم إنها حاجه مهما كانت ممله وسخيفة إلا إنه سلوك آدمي بيوفر وقت ويدي كل واحد حقه ويحمي أرواح الناس.. ولا إيه؟!!

# أحمد زكي

للأمانة ومن الأول كده مكانش أول حد يمثل، سبقه أجيال كثير في التمثيل، أجيال فيها ناس مميزة ونجوم منورة، لكن أحمد زكي كان مختلف، مختلف لدرجة إنك صعب تحط إيدك هو مختلف ليه؟

يا ترى علشان معجون موهبة وحضور!

مختلف إنه أسمراني والسمار كل الجمال!

مختلف لأنه كان مركز دايمًا في فنه وفي تقديم فن بيحبه حتى لما كان بيعمل أفلام هو مش راضي عنها.

كان بردو مختلف.

لأنه كان بيمثل فيها بجد وبحق وحقيقي.

النهارده مش عايزه أقلب عليا وعليكم مواجع غيابه؛ لأنه مش غايب والله يا جماعة، ده موجود وحاضر بأفلامه وأعماله.

بس عايزه أفكر نفسي وأفكركم إنه مكانش الفنان الأول اللي الزقازيق تقدمه لينا.

سبقه عبد الحليم حافظ الأسمراني.

جمع ما بينهم محل الميلاد وحالة اليتيم والإصرار على الحلم

وهو النجاح إيه غير معادلة..

معادلة بتجمع ما بين الإصرار والاجتهاد مقسومة على القسمة والنصيب ومجموع عليها شوية حظ.

وللأمانة ثاني حظه في الأول مكانش معاه.

باين وقع منه في السكة من الزقازيق للقاهرة.

لكنه عوض الحظ بالموهبة.

اتأخر نجمه في الظهور علشان كان اسمراني!!! فيه ناس بتقول كده لكن نجمه ظهر في وقته، ظهر يوم ما بقى فيه جيل من المخرجين مؤمن بالتغيير وبالتطوير وبتقديم شيء مختلف، وهو كان جاهز لأنه حرفيًا مختلف، الناس بتقول إن منتج فيلم الكرنك رفضه يبقى بطل قصاد سعاد حسني، حقيقة

مش مهمة ، لأن الأهم منها إنه قدم مع سعاد «هو وهي» و«موعد على العشاء» و«الراعي والنساء».

يبقى هنا الكرنك تحصيل حاصل في معادلة نجاحه.

بس الحظ صالحه ووقف في صفه من ثاني.. «النمر الأسود» الفيلم ده كان في إن جيل التمانينات يحلم بالسفر بره، وكان دافع لناس كتير إنها تحقق حلمها.

الفيلم ده كان وش الخير عليه وعلى السينما المصرية.

لأن أخيرًا بقى عندنا نجم حقيقي بالمواصفات الحقيقية للنجومية اللي أهمها الموهبة، أحمد زكي هو أول ممثل يمثل بقفاه.

النقاد قالوا كده مش أنا ودي بردو حقيقة في فيلم «البريء» اللي علشان يتعرض شافه 3 وزراء قبل قرار العرض.

مشهد بيعبر بعضلات ظهره وقفاه عن القهر والظلم.

ما هو أحمد سبع الليل رضوان الفولي مكانش هيبقى حقيقة من غير أحمد زكي في «الهروب» و«البية البواب» كان صعيدي بجد.. صعيدي على حق.. مش صعيدي من بتوع التلفزيون اللي لما تشوفهم تضحك.

«أرض الخوف» يا عيني عليه وهو عامل يحيى أبو دبورة المقسوم اتنين بين ديتين.

الإنسان اللي بيدور ع الحتة المنورة فيه قبل الضلمة ما تاكلها.

أحمد زكي حواديته السينمائية مش بتخلص ولا هتخلص.

بس اللي مش ممكن يتنسي إصراره على النجاح.

رغبته في تحقيق حلمه.

قدرته على المواصلة في زمن ناس كتير فشلت تحافظ فيه على حلمها.

عزيزي أحمد زكي:

إياك تستسلم لفكرة إن الموت غياب لأنك يا صاحبي الموجود دايماً على شاشتي والواقف جنبي في أزماتي، إنت خلاص هزمت الغياب يوم ما قررت تبقى «منتصر».

بس فشلت في «الهروب» من اللي مفيش منه هروب... «الموت».



## الرجولة أدب مش هز كتاف

عندنا في مصر مثل بيقول «الرجولة أدب مش هز كتاف» وده الفيرجن المخفف من المثل الشعبي الشهير، المثل ده بصراحة وقفت قصاده كثير الفترة اللي فاتت لأحداث كثير مهمة، منها فيديوهات التريفة اللي فيها إهانة لبعض ناسنا الغلابة، أو التريفة على واحد بيحاول يغني وصوته وحش.. ودول بقى كثير مع إن الجزء الشرير اللي جوايا بيقول يستاهلوا اللي يجراهم طالما صوتهم كده بس الحنة الديمقراطية اللي فيا بتنقح عليا بردو ساعات وأقول حقهم يغنوا بردو.. ما علينا، مش هي دي القضية، القضية مين أول بني آدم فيكي يا منطقة قال «الرجولة أدب مش هز كتاف»، ويعني إيه الرجولة أدب أساسًا أو يعني إيه هز كتاف؟.. بصوا بقى الموضوع ده تحسوها ديالكتيك كده وجاي من البعد البؤري للسميوطيقا المعرفية، بس هو أبسط من كده، والله وزى شكة الدبوس.. بس ركزوا معايا ازاي ما نتوهش من بعض في دهاليز الانبعاث الفكري والتفكير النظري والرؤية اللامحورية للأخلاق في المجتمع المدني اللي هي جايه من كلمة المدينة.. يادي النيلة باقول إيه.. معلش هنركز اهو.. أول واحد قال الرجولة أدب طبعًا كان مصري بس مكانش راجل.. مش قصدي يعني.. قصدي كانت واحدة ست.. آه واحدة ست... ودي كانت في عصر ما قبل الأسرات وفجر التاريخ وقبل بدايات الكون بمحطتين ثلاثة، الست دي كانت خارجه من الكهف بتاعها رايحه تعمل شوبنج في الغابة أيام ما كان مصر فيها غابات وحركات وكده، قوم واحد راجل من إنسان الكهف البدائي قام معاكسها قامت مناواه اللي فيه النصيب ووقفت في وسط الكهوف وقالت بعلو صوتها «الرجولة أدب مش هز كتاف» لأنها ملقتش حد يلم الراجل ده، دي كانت أول صرخة نسوية متحررة من هيمنة القبضة الذكورية في زمن ما قبل الوعي الإنساني.. ماشي.. تفوت أيام وتعدى شهور وسنين، وفي مظاهرات ثورة 1919 اللي كان زعيمها سعد باشا زغلول قررت المرأة المصرية إنها تخرج في مظاهرات متضامنة مع الرجال في قضية الوطن، والوطن المقصود بيه هنا مصر مش الجرنال، المهم.. اصَّرب عليهم نار وفيه واحدة ست رجعت من المظاهرة جوزها حلف مليون يمين ما هي داخله علشان خرجت من البيت من غير إذنه وكان هيمد إيده عليها قامت صرخت بكل ما فيها «الرجولة أدب» وسكتت، ما هي لو كانت كملت كان

زمانها اتطلقت وسعد باشا زغلول مكانش هيعمل لها حاجة يعني، بس للأمانة المثل ده مهم أوووي في حياتنا المصرية، مهم لدرجة إننا محتاجين نطبعه في كروت صغيرة ونوزعه على الناس في الشارع، ونعمله بانرات في الطرق وفوق الكباري، لأن الرجولة في خطر، واقصد هنا الرجولة بالمعنى الحقيقي للكلمة.. ما هو مش من الرجولة تسخر من اللي مش فاهم أو صاحب الحاجة أو الفقير، ولا من الرجولة إنك تهين ست أو تعتدي عليها، ولا من الرجولة إنك تعمل من بنها قصاد الأخطاء المنتشرة حوالينا، الصراحة «الرجولة أدب».. الرجولة تعامل.. والله فكرتوني بحدوتة «هاتولي راجل».. بس دي هنبقى نحكيها في مرة تانية.. لأنها من الحواديت اللي تستحق إنها تتحكي بالتفاصيل.. آه والله زي ما بؤلك كده.

## اللي بنى مصر

في زمن الدراما الجميل كان فيه مسلسل عنوانه: «بوابة الحلواني» اللي هو إيه بقى معتمد على مثل مصري جميل بيقول: إن اللي بنى مصر كان في الأصل حلواني.. سرحت أنا كده في المثل والمسلسل اللي مالوش علاقة بالمثل أساسًا غير العنوان، وسألت نفسي سؤال لولبي عميق أعمق من بوستات النشطاء والمعارضين وبتوع يسقط أي حاجه حتى امتحانات الابتدائية.. وعلشان أعرف إجابة السؤال ده كان لازم أرجع للكتب.. ناس قالت إن اللي بنى مصر الحديثة اللي احنا بنحبها وكل يوم نهد فيها أثر أو مبنى أثري مبني بشكل معماري مميز من أول إسكندرية لحد أسوان، اللي بنى مصر دي يبقى الخديوي إسماعيل اللي كنا عارفين من الكتب إنه كان وحش وغرق مصر في الديون بس محدش قالنا إنه هو نفس الراجل اللي ساب لنا القاهرة الخديوية الجميلة اللي كلنا بنتمنى في يوم ترجع زي ما كانت.. باريس الشرق.. وفيه ناس تانية بتقول الحدوتة مش كده.. لا الخديوي ولا غيره.. الحدوتة إن فيه حاكم زمان لما بدأ يبني في مصر جاب مقاول كبير من عيلة اسمها «الحلواني» وقعد معاه قعدة طويلة انتهت إن الحلواني يبني مصر على مزاج الحاكم وعلى هواه ومع الوقت وانتشار المباني في مصر الناس بدأت تقول إن اللي بنى مصر هو «الحلواني» مش الحاكم إياه، واتضرب بيه المثل، قوم الحاكم قفش جدًّا على «الحلواني» وقرر ينفيه بعيد لعل وعسى الناس تنسى حدوته وتفتكر إن الحاكم مش الحلواني هو اللي بنى مصر، بس نعمل إيه بقى في الذاكرة الشعبية الحديد، مع العلم بقى إن اللي بنى مصر أساسًا ونقصد هنا بمصر يعني «القاهرة» بس بلغة أهالينا في بحري وقبلي اللي بيتعاملوا مع القاهرة على إنها «مصر» كده خبط لزق، اللي بنى مصر اللي نعرفها هو عبد صقلي شاءت الظروف إنه يكون قائد جيش الفاطميين ولما شاف حته أرض واسعة كده قالك أنبي عاصمة للخليفة الفاطمي وسماها القاهرة، كل دي نظريات وتفصيل في اللي بنى مصر.. بس الحقيقة اللي أنا عارفها إن اللي بنى مصر كان في الأصل مقاول.. آه... زي ما بؤلك كده.. مقاول.. وبدأ مشواره بشيل الطوب والرمل والاسمنت.. مقاول باع قيراطين طين في البلد واشترى أرض في فيصل أو الهرم وعمله عمارتين وباعهم تمليك وبفلوسهم اشترى أرض تانية وتالته، المقاولين هما اللي بنوا مصر اللي

احنا نعرفها بكل عشوائيتها وتفاصيلها.. تلاقهم في أي مكان جديد صالح للمباني وإقامة العمارات، من بداية الدائري عند المرج ونهاية المحور عند حدائق الأهرام، المقاولين ناس نقدر نقول عليهم بنايين عظام.. زي ما بنوا الكرنك ومعبد فيلة بيعملوا أبراج غريبة في فيصل وشارع العشرين ومحور اللبيني، المقاولين المصريين زي ما عملوا معبد أبيدوس وندرة زمان ما هو أكيد الفرعون مكانش فاضي يتابع أكيد ادى مقولة المعبد لمقاول.. هما اللي حولوا حدائق الأهرام لكتل خرسانية جنب بعض، العيب في مين؟ مش عارفة الصراحة! بس أنا بقيت مقتنعة تمامًا إن مصر من أول الثمانينات وانت جاي علينا بوشك السمح كده اللي بناها وشطبها وخلاها تسليم على المفتاح هما المقاولين من كل نوع وصنف ومن موقعي هذا أطالب بتعديل المثل من «اللي بنى مصر كان حلواني.. ل.. اللي بنى مصر كان في الأصل مقاول..» والسلامو عليكم.

# أول قهوة

الأيام بتغير الحاجات بشكل غريب، القهوة بقت كافيته، وبعد ما كانت القهاوي بتقدم جنب الشيشة والشاي والقهوة، فنون زي السيرة الهلالية وسيرة بيبرس وساعات بقى رقص وحركات، بقينا قاعدين مزنوقين في مربع ومتسمرين قدام شاشة تليفزيون وكل واحد ضارب بوزه في الموبايل، أومال نازلين نتقابل ليه.. لبييه

تجربة الكافيته بالنسبة لي مكانتش مفهومة، حسيت إنني مش مرتاحة، وده خلاني أرجع بضهري لورا كده مع الحرص الكامل إنني مخبطش في الحيطه وأفكر هو مين أول واحد عمل قهوة؟ وعملها ليه أساسًا؟ بصوا بقى لأن الموضوع تاريخي حبتين، تقيل شويتين.

الحدوتة بدأت يا جماعة بواحد صاحبنا كده كان راجع من اليمن الكلام ده كان في القرن الخمستاشر باين.. في نصه مش متأكد.. في آخره الله أعلم. الراجل ده وهو جاي من اليمن جاب معاه شوية بُن بس يا عم وفي يوم وليلة البن ده بقى أغلى من الذهب و الناس بدأت تشربه، وكعادة المصريين الجميلة واحد مصري كده لطيف قال في عقل باله دي فرصة نعمل شوية دنانير.

قام فاتح إيه.. أيوه.. قهوة.. دكان صغير كده بيتعمل فيه القهوة ولأننا مصريين في يوم وليلة الناس شافت صاحبنا شغال زي الحريقة، وهوب لقينا المقاهي أو القهاوي بقت زي الرز في القاهرة المحروسة.

وده في حد ذاته كان شيء لطيف للناس الشغيلة، لكن بالنسبة لشاه عباس حاكم مصر كان الوضع مقلق، مقاهي إيه وقهاوي إيه، قام مانع القهوة أساسًا وأي حد كان بيشربها كان بيتعاقب، بس في النهاية شاه عباس أدمن القهوة.

وفضلت الحدوتة ما بين حاكم بيحب القهوة يقوم يسمح بالقهاوي.. وحاكم مش طايقها يقوم يمنعها.

شد وجذب!

والناس ما بين كده أو كده مش مرتاحين.

لحد الموضوع ما اتطور.  
مبقتش قهوة وبس.. لا بقى فيه كمان الشيشة أو النارجيله.  
والشيشة بردو كان فيها كلام.  
ووصلت الحدوتة إنهم مرة أصدروا قرار بإعدام اللي يتقفش بيدخن  
الشيشة، آه زي ما بؤلك كده.  
كانت أيام بقى والدكان الصغير بتاع القهوة بقى مكان كبير شويه.  
والموضوع وسع واتطور وبقت تجارة كبيرة ومهمة، ومع الوقت بقت  
القهاوي مراكز ثقافية وإبداعية زي قهوة متاتيا اللي كان بيقتد فيها جمال  
الدين الأفغاني والإمام محمد عبده وسعد زغلول.  
أو قهوة إيزافيتش أو قهوة ريش أو قهوة عبد الله في الجزيرة اللي كان  
بيقعد عليها نجوم الأدب والصحافة.  
أو قهوة الفيشاوي في الحسين.  
وقهوة قشتمر اللي كتب عنها عمنا نجيب محفوظ رواية.  
أو قهوة خمسة باب في باب الخلق أو قهوة سوق الحميدية في الفلكي.  
الصراحة مع الوقت القهاوي بقت معلم مهم من معالم القاهرة  
الناس بتعلم بيها الأماكن وكمان الذكريات.  
وكثير من القهاوي التاريخية راحت في الوبا واللي فاضل قليل أووي بس  
هتفضل حدوتة القهوة وأول قهوة فيكي يا مصر من الحواديت الحلوة.  
قبل ما القهوة تبقى كافيها يا متعلمين يا بتوع المدارس.

# أول واحد ركن صف ثاني

الأسطورة بتقول إن في زمن أسعد من كده كان فيه مكان ركنة لكل مواطن، قصدي لكل عربية يمتلكها مواطن مصري سعيد.

بس ده كان في الزمن السعيد، الزمن اللي كانت الشوارع فيه فاضية، زمن عبد الحليم وهو راكب عربية النابلسي رايجين المطار.

والدنيا براح حوالهم ومفيش غير أربع خمس عربيات بالعدد في الشارع، في الزمن السعيد ده مكانش فيه أزمة ركنة.

ولا سُياس.

ولا صف ثاني.

أيوه صف ثاني.

الأزمة المحورية للمشكلة المرورية العصرية المصرية

تبقى نازل من بيتكم نشيط.

لا عملت حسنة ولا سيئة.

لسه بترش ميه قدام باب اليوم المفتوح.

اللي هو يومك مش اليوم المفتوح بتاع القناة الثانية زمان.

وهوب تلاقي واحد راكن صف ثاني وقافل عليك.

تجيب عربيتك شمال.. يمين.. إنسى يا عم.. مش هتعرف تخرج

تدور في سلقط في ملقط مش هتلاقي صاحب العربية وانت ونصيبك.

ممكن تلبس يوم بحاله بتدور عليه.

بس اللي اخترع موضوع الصف الثاني ده كان راجل برنس في ذاته!

ضارب الدنيا مليون صرمة قديمة.

ولا فارق معاه حد ولا أشغال ناس ولا هوا.

يعني تحسه كده قاعد بيراقب أسراب السنونو وهي بتنشوف أسراب

القريديس في الشمال.

حاجة خيال والله!

الحدوتة دي فكرتني بأول واحد ركن صف ثاني في الكون.  
فيه بردية محفوظة في بدروم متحف مهجور في سرداب قصر منسي في  
مكان ما في العالم السخيف ده.

البردية دي بتقول إن أحد ملوك الفراعنة عمل مسلة مخصوص وكتب عليها  
نص عقوبة لأي حد يركن عربيته أم حصانين صف ثاني قدام المعبد.  
وعلشان فيه مؤامرة على كل ما هو فرعوني البردية دي اختفت والسرداب  
اتردم، والقصر اتهد، وطلع مكانه برج عشرين دور بس التاريخ زي القطننة  
مش بيكدب.

أنا قرئت مرة في مجلة إفريقية إن الركن في الصف الثاني ليه دلالة  
معرفية عميقة يصعب على أمثالي إدراكها إلا لما أتعمل جنب عربيتي  
بالساعات علشان اطلع.  
بس ده كان زمان.

قبل الكلابشات.. وزمن كلابشات العربية.  
دلوقتي تبقى راكن في السليم يقوم الونش مكليش العربية الصف الثاني  
وحضرتك بردو مش هتعرف تطلع بعربيتك مع إنك راكن في السليم!  
فيه بحث مش منشور على الإنترنت ولا في أي حته بيقول إن الركنة صف  
ثاني دليل أنانية.

آه زي ما بؤلك كده!  
والبحث بيقول إن الكائن المتعود يركن صف ثاني مش مهتم غير بنفسه  
وبس، بس للأمانة الناس تعمل إيه؟  
تشيل العربية وتطلع بيها الشقة؟؟

ليا واحدة صاحبتني ساكنة في مصر الجديدة ممكن تقعد في الشارع  
ساعتين علشان تعرف تركن.  
أو تلاقي مكان تركن فيه.

احنا محتاجين شعار جديد للمرحلة اللي إحنا فيها «ركنة لكل مواطن» أو «  
الركنة في السليم نصره يا عالم».

أي شعار ما هو يا تقفلوا باب استيراد العربيات يا توفروا أماكن ركنة للناس.  
لكن تبقى العربيات كتير ومفيش ربع متر الناس تركن فيه؟؟



في أوروبا والدول المتقدمة الركنة قبل العربية.  
وعلى رأي عمنا يوسف وهبي «و ما الدنيا إلا باركينج كبير».  
يوعدنا ربنا يا جماعة.  
ربنا ما يوقفنا صف ثاني في أي حاه.  
ربنا ما يكلبش لنا عربية تقفل على عربية واحد راكن في السليم.  
ربنا يجعل لنا في كل مشوار ركنة بنت ناس. قولوا آمين.

# أول واحد سرق كهربيا من العمومي

ناس كتير شايفين إن الفراغنة عملوا كل حاجة وأي حاجة، وإنهم الأوائل دايماً في كل الأفكار.

يعني تقولي مين منح حق المرأة.. أقولك الفراغنة.

أول ناس نادت بالتوحيد كانوا الفراغنة.

الفراغنة دول حدوتة كبيرة.

بس للأسف أنا لازم اصدمكم صدمة التريلا على الطريق الدائري، الفراغنة مكانوش الأوائل في كل حاجة.

لا.. أحفادهم غلبوهم في حاجات كتير.

حاجات مش كلها حلوة.. لكن معظمها سيئة.

يعني مين أول واحد سرق كهربيا من العمومي؟

الصراحة اللي خلاني أبص للموضوع ده وأفكر فيه كنت سايقة في أمان ربنا كده على الدائري ولقيت ناس فارشة، إشي فاكهة، على غطا عربيات، على بتوع تصليح كاوتشات.

ليلة يا عمي ومولد كبير.

بصيت كده واستغربت مش علشان هما فارشين على طريق سريع لا سمح الله ده العادي بتاعنا في مصر.

ده الناس بتفرش على شريط القطر يا مؤمن.

لكن استغرابي ودهشتي بسبب كمية الكهارب الملعلطة دي

وفكرت يا ترى الناس دي مركبة عدادات؟

واخدين وصلة كهربيا رسمي نظمي حكمت فهمي ولا إيه؟

بعد تقصي كده وشوية تدوير اكتشفت إن كلهم سارقين من العمومي، أيوه العمومي.

اللي هو غالبًا بيكون أقرب عمود كهربيا ليهم أو بوكس توزيع كهربيا مش همه لوحدهم، لا ده في بيوت ومصانع.

والناس اللي بتعمل أفراح في الشارع.

يعني الموضوع كبير وواسع.

ومش كده وبس ده وزير الكهرباء قال إن قيمة مخالفات الكهرباء في الشهر بتوصل لـ 100 مليون جنيه.

كلام جميل والله، طيب بنحصل منهم كام؟ الله أعلم.

حسيت إن الحدوتة مش واحد دافس سلك في العمومي وبينور لمبتين والسلام.

لا الموضوع أكبر من كده، لأنه بيأثر على شبكة الكهرباء اللي ماصدقنا اتظبطت.

قوم عقل بالي قاللي لازم أدور على مين ابن الإيه الأولاني اللي سرق من العمومي؟

مين الراجل ده؟ وليه عمل كده؟

وازاي عملته السوداء انتشرت كده في ربوع مصر المحروسة؟

البداية كانت مع مستر لبيون اللي قرر يدخل الكهرباء مصر وكان شهر مايو 1895 هو التاريخ الرسمي لأول مشترك يتعاقد مع شركة لبيون على توصيل الكهرباء.

حاجة كده تاريخ وكانت الكهرباء في القاهرة والإسكندرية بس

وكانت قصور الأمرا والباشوات هي اللي فيها الكهرباء وشوية شوارع رئيسية.

نقف بقى عند الشوارع الرئيسية دي شوية..

الناس الساكنة على أطراف الشوارع الرئيسية صحبوا من النوم لقوا الكهرباء منورة الشارع.

يسكتوا؟ يعملوا من بنها؟

طبعا لأ.

بس محدش قدر يلمس العمود.

الكهربا زمان كانت زي العفريت في الحواديت.

حاجة مش معروفة واللي متعرفوش مالكش دعوه بيه.

بس بعد ثورة يوليو انتشرت الكهرباء في أماكن كثير ومنها قرى ومدن في الصعيد والوجه البحري.

بس بردو مش كل الناس عندها كهربا بس كل الناس قدام بيوتها خطوط توصيل الكهرباء.

قام إيه؟

واحد فكيف.. مصري أصلي كده قام لاسع وصلة من العمومي اللي ماشيه جنب بيته.

وهوب.. المعلم ده بقى خبير توصيل من العمومي خبط لزق.

ومش بعيد لو عرفنا شخصيته الحقيقية نعمل له تمثال جنب مستر ليون، باعتباره من الأوائل.. مستر ليون دخل الكهرباء مصر.

وأخينا هو اللي سرقها وش.. هيبويه دونيا بقى.

# أول واحد قال مفيش فايدة

مين ما تروح في حته تسمع الجملة دي: مفيش فايدة.. مفيش فايدة، كثير باحس إن الشعب المصري قلب على هاني رمزي في مسرحية «وجهة نظر».

مين ما تقعد مع حد وتسأله: الأحوال إيه؟ الدنيا هتتظبط؟

يكرمش وشه في وشك ويقولك: مفيش فايدة!

طيب العربية هتتصلح؟

مفيش فايدة!

طيب الشوارع هتروق؟

مفيش فايدة!

بقت تريند والله جملة مفيش فايدة.

وده خلاني شوية محبطة.. حبتين مش طايقه نفسي

هو إيه اللي مفيش فايدة؟؟؟

مين قال مفيش فايدة؟

وهنا قفشت أنا في السؤال مين أول واحد قال مفيش فايدة؟

الأسطورة في الحدوتة دي بتقول إن سعد زغلول زعيم ثورة 9191 هو اللي قالها وهو بيشوف حلم الثورة الشعبية على الملك بينهار، قام باصص لصفية مراته كده وقايل: مفيش فايدة يا صفية.

بس للأمانة التاريخية مفيش حد كتب إن الراجل قال كده، لا من قريب ولا من بعيد.

يبقى سعد باشا زغلول بريء يا اخوانا.. أومال مين اللي قال كده؟

الصراحة قعدت ادور وأقدح زناد فكري ورمزي وحسني، ولقيت إن ممكن يكون أحمد عرابي زعيم الثورة العرابية.

كانت أول ثورة مسلحة بيقوم بيها الشعب، ولما اتهزم جيش الشعب قصاد الإنجليز بسبب الخيانة وقف أحمد عرابي وقال: مفيش فايدة.

بس لا النديم أكد ولا الشيخ محمد عبده أقر بكده.  
قلت يمكن حد من جدودنا الفراعنة قالها في لحظة يأس.  
بس مجرد الفرجة على آثار جدودنا بتقول حاجه واحده: إحنا شعب مالوش حل.

طيب أومال مين؟؟ مين يا جماعة؟؟  
السؤال قعد يزن في دماغى.  
مين ما اروح.. معايا.  
نايمه صاحية باشتغل.  
لحد ما كنت في يوم ملتحمة بجماهير الشعب المصري في لقطة عاطفية  
نوستالجية بحتة.  
الشعب حاضن بعضه كده بكل الحب والرغبة في الدفا في مغربية شتا ما  
يعلم بيها إلابنا.

وده طبعا كان ع المحور.  
مشهد مهيب ولا الأفلام والله!!  
وأنا في عز الالتحام بالشعب.. قصدي بعربيات الشعب، ودماغي ما بين  
اكسر يمين واخبط اللي جنبي واخلص، ولا اكسر شمال واحضن السور  
الخرسانة وارتاح.  
فجأة نزل سواق تاكسي من عربيته وقعد يزعق: كده مفيش فايدة.. كده  
مفيش فايدة!!

وفجأة نسيت المحور والزحمة والبرد ونط السؤال تاني في راسي.  
ولأن الشعب هو المعلم زي ما قال عمنا جمال عبد الناصر.  
قلت اسأل سواق التاكسي: يا عمو، مين أول واحد قال مفيش فايدة؟  
الراجل بص لي بصة حب وشفقة كده.  
تحسه عايز يقولي: يعني انتي مش عارفه؟! بس لقيته في نفس الثانية  
قايل:

بصي يا مدام أول واحد قال مفيش فايدة الراجل المسئول عن تطوير  
شبكة الطرق في القاهرة.

بص ع الخريطة كده.. شمال ويمين.. فوق وتحت.  
بيدور على حل للزحمة.. جرب يعمل أنفاق كباري علوية وكباري سفلية.  
وآخر ما تعب قام مقطع الخريطة وقايل: مفيش فايدة.  
الصراحة.. أنا اندهشت بس الدهشة ماسرقتنيش يعني قمت رازعة السؤال  
التاني:

والراجل ده فين أراضيه؟  
سواق التاكسي نظرلي نظرة محبة كده وقاللي:  
مزنوق ع الدائري قبل نزلة المنيب.  
ساعتها بس عرفت إن مش كل الأسئلة ليها إجابات هتريحك.

## أيها القاطنون فوق التراب

في الجو البارد اللي مالوش ملامح ده وانا باقلب على اليوتيوب لقيت فيديو كليب إن صح التعبير إننا نقول عليه هذا المصطلح العصري جدًّا لسي عبده، اللي هو محمد عبد الوهاب موسيقار الأجيال، أغنية مشهورة عنوانها «أيها الراقدون تحت التراب جئت أبكي على هوى الأحباب» متصورة وسط مقابر الإمام الشافعي ما تعرف، المجاورين مش قادرة أميز، ترب الغفير الله أعلم بس للأمانة حاه كده فخيمة شغل التلاتينات وما أدراك ما التلاتينات؟ حتى المقابر كانت فخمة.. ما علينا.. الغنوة دي قلبت عليا المواجه.. مش مواجع اللي راحوا، لأن اللي راحوا موجودين معنا دايماً، لكن فكروني بحدوتة فيلم ثاني كان مشهور عنوانه «مدافن مفروشة للإيجار» بطولة محمود ياسين ونجلاء فتحي، في عز أزمة بداية ظاهرة سكان المقابر، الغنوة دي بقى فكرتني بالفيلم اللي فكرني بقصة سكن المقابر، مين صاحب الفكرة النميسة المرعبة بتاعت يلا نسكن القرافات؟؟ مين؟؟

ببساطة كده وعلى بلاطة التاريخ هو المعلم والقائد والكل في الكل في أي موضوع، يعني لما نفر كتب التاريخ كده نلاقي إن في عصر الاضمحلال الثاني اللي كان بعد الأسرة التمنتاشر اللي هي يعني كانت أهم أسرة في التاريخ الفرعوني، الدولة المركزية الفرعونية انهارت وحصل انحلال للقوى وبقى فيه فوضى والناس سكنت فين!!! قولي فين كده؟ أيوه في المقابر الملكية.. تخيلوا، المقابر الملكية اللي الناس بتيجي من آخر الدنيا تتفرج عليها، المصريين القدماء سكنوا فيها في عصور الاضمحلال والفوضى وبكده وعلى بلاطة أثبت الشعب المصري إنه سابق في كل حاه وفي أي وقت، للأمانة، ما علينا.. بعد الفراعنة بشوية حلوين وفي عصر الفاطميين والمماليك الناس سكنت القرافات اللي بناها الخلفاء وسلاطين المماليك وانتشروا ما بين قراة المماليك وجبل المقطم وكان فيهم ناس صوفيين مشاهير زي الشاطبي وغيرهم، ومع الوقت الحدوتة بقت عادة بس مش لكل الناس، مش أي حد يسكن في المقابر، ما هي الحدوتة مش سايبه، بس قبل ما انسى شامبليون شخصياً اللي هو فك لغز حجر رشيد والأبجدية الفرعونية لما زار مصر سكن في مقبرة الملك رمسيس الثاني هو والبعثة اللي معاه!! تخيلوا نقلنا الفكرة للأجانب إحنا جابرة، نرجع لحدوتة إن مش أي حد يسكن في



المقابر ومش أي مقابر تتسكن. الحدوتة ليها سيستم وتفاصيل.. يعني القرافات بتاعت الباشاوات اللي تحسها كده ولا أجدع فيلا في أجدع كومباوند دي مش أي حد يسكنها، والقرافات العادية ليها ناسها، وكله بتمنه، ما هو السيستم ليه تفاصيله وناسه بردو، عمنا خيرى شلبي كتب عن القرافات وسكانها أكثر ما كتب عن القاهرة وناسها، وعمنا خيرى شلبي كان عاشق للحدوتة دي ويقال إنه في فترة من فترات حياته سكن في حوش محترم بتاع باشا من باشاوات الزمن اللي فات، وكان جايب واسطة.. شوفتوا السيستم.. بس الغربية إننا الشعب الوحيد اللي موسيقار أجياله غنى للراقدون تحت التراب وجمهوره قرر يعيش مع الراقدون تحت التراب بس فوقهم الصراحة ودي قمة الإعجاز العلمي والموسيقي في نفس واحد للأمانة.. هيبويه بقى دووونيا.

## هاتولي راجل

عنها وقام واقف يا سيدي وصرخ بعلو صوته وقال «هاتولي راجل» ده كان أشهر فيديو كوميدي في 2013 حاه تفتس من الضحك، الناس بقت استلمت الإيفيه وهات يا شغل برامج اتعملت على حس «هاتولي راجل» وعملوا فيلم عنوانه «هاتولي راجل» بطولة أحمد الفيشاوي.. آه والله زي ما بؤلك كده.

ونما وصحينا لقينا «هاتولي راجل» بقى تريند ومكسر الدنيا ولا أغاني عمرو دياب.

من يومين كده وانا حاضنة الدفاهيه وباحاول امنع انبعث الكينونة في الظروف اللامتناهية في الصقيع سمعت حد في الشارع بيقول «هاتولي راجل أكلمه»!!! قلت في عقل بالي راجل إيه في البرد ده يا حاج؟؟

ويا ترى الإيفيه اللي طلع في 2013 ينفع نسجله باسم الشيخ محمود شعبان والسلامو عليكم السلام!!

الصراحة حسبي التاريخي والنقدي اللي جوايا صحى.

قلت مش ممكن يكون هو أول واحد يكون قال كده، دي جملة مهمة وتاريخية.

طيب مين اللي قالها؟ وامتى؟ وفين؟

الصراحة بعد مجهود ولف وتدوير وبحث خد مني وقت كثير!! قول كثير وخليك كريم.

اكتشفت إن أول واحد قال «هاتولي راجل» كان الخليفة العباسي.. آه وحياتك زي ما بؤلك كده.

الخليفة العباسي المستعصم لما سمع إن اللي تولت الحكم في مصر بعد وفاة الملك الصالح نجم الدين أيوب هي زوجته شجر الدر قام ناطط من عرش الخلافة وقايل «هاتولي راجل».

هو مقالهاش كده بالصريح يعني.

بس بعث جواب قبل ال sms والشات والجو الرخيص بتاعنا ده، بعث رسالة قال فيها بالنص «إن كانت الرجال قد عدمت عندكم فأعلمونا حتى نسيّر إليكم رجلاً».. يعني بالبلدي هاتولي راجل.

وشجرة الدر يا عيني اضطرت تتنازل عن العرش وجابوا راجل اللي هو عز الدين أيبك اللي قتلته شجرة الدر ومن بعده شجرة الدر نفسها خدت علقه بالقباقيب لحد ما ماتت.

طيب الخليفة العباسي قال هاتولي راجل أهو وجابوله راجل والدنيا مشيت. الأيام تجري والسنين تفوت متتعدش.. قول عَدّ المهم في بدايات القرن اللي فات اخونا قاسم أمين كتب كتابه «تحرير المرأة» وكان ليلة بلاك يا عم. الكل هاجمه والكل وقف ضده حتى أصحابه.

بس مش دي القضية.. القضية إن الكل في نفس واحد كان شعارهم «هاتولي راجل» يعني مش عايزين ستات.. لا تتعلم.. لا تنتخب.. ولا يكون ليها حقوق.

وعدت ليلة عمنا قاسم أمين وفي ثورة 19 لما فيه وفد راح يقابل المعتمد الإنجليزي، كان وفد من الحركة النسائية الوليدة أيامها.

المعتمد الإنجليزي رفض يقابلهم وقال «هاتولي راجل»!!!

الله ما الستات في المظاهرات زي الرجاله والوطن ده بتاع الكل!!

بس المعتمد الإنجليزي أصر يجيبوله راجل وجابوله راجل في الآخر.

فضلنا كثير على كده؟؟

الصراحة آه. التاريخ مش معترف بالستات.

حتى لما حتشيسوت أعظم ملكات التاريخ القديم مسكت الحكم فضلوا وراها لحد ما ماتت وجابوا راجل مكانها.

أصلنا مش معترفين بالستات.

وهتلاقي على مدى تاريخنا الطويل الحافل الممتد عدد الشخصيات النسائية البارزة قليل جدًّا.

وكان الشعب شعاره طول الوقت «هاتولي راجل».

ما تدونا فرصتنا يا أخي.

هات الفرصة بقى ولا لازم أشدها بنفسى وبالعافية.. مش الطيب أحسن..  
مش كده ولا إيه؟!

# التلكيكة الأولى

قاعدة كده في أمان ربنا باتفرج على فيلم «الزوجة 13».. وهوووب لقيت  
رشدي أباطة رزع شادية حته قلم وهو بيصرخ بعلو صوته: وكمان  
بتقوليلي «مساء الخير»!!

نهار مش باين هي مساء الخير بقت جريمة؟  
وبعيد عن الدراما وخفة دم وحلاوة رشدي أباطة.  
وبعيد تمامًا عن انحيازي لدلوعة السينما وصوتها الحنين شادية هي جريمة..  
أيوه جريمة، إنك تتلكك تبقى جريمة.  
وبيني وبينكم كلنا مجرمين ومتلبسين بالجريمة دي بنتلكك على أي حاجة  
ولأي حد.

لو الكهرا قطعنت نتلكك لوزارة الكهرا.  
لو الشوارع زحمة نتلكك للعربات اللي ماشيين جنبنا.  
لو الميه قطعنت يا لهوي بقى هنتلكك كده على روحنا.  
والصراحة الشعب المصري متلكك بطبعه.  
لو في المترو واحد يقرأ قرآن بصوت عالي نتلكك.  
ولو ست قبطية معلقة الصليب على صدرها بفخر نتلكك.  
ولو ولد و بنت إيديهم حاضنة بعض نتلكك بردو.  
شعب بيصحى من النوم بيتلكك على بعضه.  
طيب ليه يا جماعة؟ إيه الجو الشبورة اللي احنا عايشين فيه ده.  
كده مش حلو على الفص الأيمن من المخيخ ومضر جدًّا بالفص الأيسر  
وحياتكم.

جو التلكيكة ده مش بيخلينا نشوف حاجات كتير.  
يعني.. حضرتك لو قاعد بتلكك للبلد علشان تنتقد والسلام عينك مش  
هتشوف غير السلبيات..



نص شوية بإيجابية.

فيه سلبيات؟ آه فيه ومش هاننكر.

بس نحاول نكون إيجابيين زي جدنا الفرعون ويكون رد فعلنا على السلبية  
أو التلكيكة دي هو بداية فعل إيجابي لصالحنا وصالح الناس ولصالح البلد.. بس  
خلاص أروح قبل ما اتلكك لكم على حاجة... سلام.

# الألف وكوز الدرّة

أذكر فيما أذكر إن كان يبقى نهار الواحد منا أزرق وماتطلعوش شمس وتناه عدم المؤاخذه قطران واحنا أطفال.

ده لو اكتشف السيد الوالد أو الوالدة أو أبلّة في المدرسة إننا كتبنا في الكراسة ولا في حصة الإملا غلطات إملائية من نوعية لآكن باللام ألف.

ولا هاذا بالألف بعد الهاء.

آه والله زي ما بؤلوكوا كده.

ده واحنا أطفال سن الابتدائي بالكثير، دي كانت بتتصنف كوارث ماتعديش من غير مسطرتين عالصواع والوقوف وشنا في الحيط في المدرسة أو علقه ولا نوم من غير عشا في البيت مثلاً.

لكن كانوا بيعتبروا الهمزات والمد وعلامات التنصيص غلطات تستحق الزغر والزعيق والتهزيق بس.

دي كانت نوعية التعامل مع العربي في المدارس والبيوت على أيامنا.

وبالمناسبة الوضع مكانش مختلف بين المدارس الأميري أو الخاص كله كان فيه نفس المستوى من الحزم فيما يخص التعليم عمومًا والعربي خصوصًا.

قوم إيه طلّعنا نعرف نمسك ورقة نقراها عادي من أولها لآخرها

لا ننطق السين صاد ولا ننطق الضاد دال.

ويوم ما يبجي على بالنّا كلمتين نكتبهم عادي يتكتبوا ما يجراش حاجه، القلم يغلط ده طبيعي، البتاع اللي ما يتسمى اللي بيصحح الكلام في التليفون يقل عقله ويصحح من دماغه ويحط كلام من دماغه ممكن.

لكن اللي بيحصل وبنشوفه اليومين دول مايرضيش حد أبدًا، المرحوم طه حسين طيب الله ثراه ورفاعة باشا الطهطاوي.

والأستاذ عبد العاطي مدرس العربي بتاع الإعدادي الله يرحمهم جميعًا مش مرتاحين أبدًا في نومتهم من الدهولة اللي دهولناها للعربي دي.

ناس بهوات قد الدنيا يقفوا قصاد ناس بهوات تانيين قد الدنيا وفي محافل شعبية ودولية أحيانًا وهات يا رص كلام يندي له جبين أصغر عيل بيدرس عربي



في معهد تحسين خط!!

إيه الهمزات اللي بتطير من مطرحها وتروح تقعد عند اخواتها في حنت تانية خالص.

وإيه اللي بيترفع وهو منصوب واللي بيتكسر وهو مضموم، وإيه الجمل اللي نتديها ولا نعرفش نلتقيها نهاية دي!

وإيه الحروف اللي اختفت أساسًا وأصلًا ولسانًا بقى يعرج عندها ولا يعرفش ينطقها دي؟!!

خد عندك الذال الله يرحمها كانت بنت ناس، فين أيام لما كانوا يقولونا طلّعوا لسانكوا وانتوا بتنطقوا الذال.

دلوقتي اللسان لا بيطلع ولا بيدخل، اللسان نسيها أصلًا.

القاف تحس إن الكاف باركة على مراوحها ومش مديها فرصة تاخذ نفسها وقربت تفر فر يا عين أمها.

الضاد يا مؤمنين اللي اللغة العربية اتسمت على اسمها الدال يا عيني جابت أجلها.

أما الثاء بأه... هيبيبيبيبية بلاش بأه اذكروا محاسن موتاكم مع إن المرحومة مكانش ليها مساوئ والنبي.

السين والصاد كرفوا على بعض ويستحيل تميزهم وبقوا ولا التوائم الملتصقة.

آه والنبي زي ما بقولكوا كده.

ده غير بأه الإبداعات الجديدة... آه أبدعنا، اسم الله علينا، وأضفنا حروف للغة العربية.

عندك حرف التشه.

وده خلط بين التاء والشين والهوا وعدم المؤاخذه الرزاز ففتحول معه انتِ إلى إنتشي، وأختي إلى أختشي.

وقومنا كمان بإبداع جديد وهو تسقيط الحروف، وده أسلوب جديد في القراءة والكلام يحسسك إن اللي بيقرأ أو بيتكلم ملسوع في سقف حلقه من

12 كوبايه شاي شربهم مولعين ورا بعض.

فتلاقي الكلام طالع: حررتك ا.. نا اتفنا عا مشروه جديه، وترجمتها بتكون:  
حضرتك إحنا اتفنا على مشروع جديد.

فتقضي وقتك وانت بتسمع في محاولة فهم الكلام أصلاً بغض النظر عن  
استيعابه. آه والله زي مايقولكوا كده.

إبداعاتنا اللغوية اللي ماتليقش بعيال لسه بتستهجى النهارده لاقى مكانها  
للمؤتمرات واللقاءات التلفزيونية، لأ ووصلت للمحافل الدولية كمان.

طب لما نلاقي الكلام طالع بالمنظر ده من ناس كوبرة وفي مراكز وأماكن  
ليها تقلها ومكانتها، هنلوم ازاي العيال بتوع مدارس اللغات والتعليم الدولي  
اللي أساسًا مايشموش ريحة العربي في مدارسهم؟؟

نسلم أمرنا لله ونقرا الفاتحة على روح لغتنا العربية يسر لا عسر ولا نراجع  
نفسنا ونراجع كلامنا ونطقنا ومخارج حروفنا خصوصًا لو اضطررنا نقف ونتكلم  
قصاد الناس ونصدر تعليمنا وثقافتنا قدامهم؟؟

# الترموستات

حار جاف صيفًا... دفيء ممطر شتاءً.  
معلش لحد كده وكفاية... آه وربنا كفاية خلاص يعني احنا حفظناها كده  
وعيالنا وعيال عيالنا حفظوها كده عديناها كتير.  
أجيال ورا أجيال واحنا بنعديها وساكتين وبالعين وصابرين على قلبنا  
وماحدث فاتح بؤه.

بس ماحدث قادر يستحمل التدليس والتزوير أكثر من كده  
يعني بأنهي وش نقول للعيال الجو اللي إحنا فيه ده دفيء.

يعني يبقى النفر مننا عامل صوباع المحشي اللي محطوط بين راقات  
راقات، 30 راق بطاطين تحت منك، و30 زيهم لحفة فوق منك، وضارب  
طرطور صوف على دماغك، وشرايين في رجلك، ومولع الدفاية، ومش باين  
منك غير عينك، وبرضو قاعد تتكتك وتنفخ في صوايع إيدك اللي انت أصلاً  
مش شايفهم من طبقات القماش اللي مدفونين فيهم!!

كل ده ويقولك دفيء.. ده الدفيء يا مفترين؟!

بأنهي وش وفأنهي شرع ده دفيء؟!

نيجي لنقطة ممطر دي بأه.

ماحدث بينكر إنه ممطر.

بمطر في نوات معروفة ومحسوبة من أيام قدماء المصريين وعمرها ما  
بتخلف الحقيقة. لأ.. بتخلف آه وربنا زي مابؤلك كده بتخلف.

لما تبقى أكبر كمية مطر تنزل على سواحل مصر كلها تيجي في شهر  
أكتوبر لدرجة إن الناس تنزل تبلبط في المطر وبروحوا بيوتهم عوم أو في  
قوارب بمجاديف.

وولاد الناس يستخدموا اللانشات والجيت سكي، بينما يناير وفبراير يا دوب  
بتنقط فيهم، يبقى الترموستات يا اتلعب فيها

يا محتاجين نتصل بمركز الصيانة يطلعوا يشحنوها علشان الموضوع مهرب  
فريون، نيجي بأه للصيف، يقولك إنه حار جاف، حار ونعديها يعني لو اللي

ينقى فيه ده والشمس اللي بتنزل على قلقوزة نافوخ الواحد، زي الفحمة المولعة دي بيسموها حار أوك.

لو لفحة السخونية اللي بتحصل للنفر أول ما يفتح باب السكة ولا كأنه فتح باب الفرن عالككة، دي بيسموها حار نعيها، نعمل إيه؟ نستسلم وأمرنا لله. لكن نيحي عند جاف دي ولا ممكن أعديها لكم أبدًا. لأ وربنا ما يصح ولا يكون.

جاف؟

جاف يا جابرة؟

ده الناس بتمشي عرقها مرقها من الرطوبة، ده الرطوبة هتاخذ قفاكي لحد رجليكي يا لينا على رأي سمير غانم.

الرطوبة بتمشي الناس بقع آدمية ماشية فاقدين 40% من سوائل جسمهم عالقمصان والتيشترات والطرح، كل الرطوبة دي وجاف؟!

ده الرطوبة في السواحل كافية لتخضير صحراء كلهاري يا مؤمن آه والنبى زي ما بؤلك كده.

وعلى فكرة الموضوع كان ماشي لحد عشرة عشرين سنة فاتوا، كان الحر محتمل والبرد محتمل، كانش الشتا بيحي بنبرد عادي والمطر بينزل عادي، لا كنا بنتجمد ولا بنغرق وكان الصيف راخر عادي نتحر ونفرهد والرطوبة راخرة عادي، لا كنا بنتحرق ولا بنستحمى رطوبة، آه والله زي ما بؤلكوا كده.

قوم بيحي حد يتذاكى ويقولك إنتو شعب فرفور، تعرفوا إيه عن البرد في ألأسكا، ولا الحر في كينيا، ماشي يا ضنايا، الشعوب ديه مابتبسترش بسترتنا، الفرق بين درجات الحرارة بين صيفهم وشتاهم مش كبير ده يوم ما بتوصل درجة الحرارة فوق العشرين في إنجلترا الناس بتفرفر من الحر ويقعوا زي الفراخ.

لكن لما عندنا يوصل الفرق بين الصيف والشتا لأكثر من 30 درجة فده مايقاش دلح حضرتك.

إحنا بني آدمين مش نص كبدة شمبيري تقطيع شوي!!!

القصد.. التغير في درجات الحرارة وتطرفها التطرف المنيل ده بقى موضوع لازم يتاخذ بأهمية أكبر من كده.

التلوث والاحتباس الحراري والأوزون والبيئة وكل المواضيع اللي بنتعامل معاها على إنها حاجات فافي، متأكّش عيش واللي بيتكلموا فيها عالم فاضية. مابقتش كده خالص، الموضوع مآثر علينا تأثير حقيقي، والصراحة مابقيناش عارفين نتني دراعنا من طبقات اللبس والواحد بقى يطلع من دور البرد علشان يريح يومين قبل الدور اللي بعده.

ده واحنا قاعدين في بيوتنا تحت طبقات الهدوم والغطا اللي فوق بعضه وقصاد الدفريات وأجهزة التكييف، وفي قلب القاهرة وبنشتكي وبنقول كل ده، أمال أهلنا في الصعيد اللي حر صيفهم مضروب في 10 وبرد شتاهم مضروب في 100 يقولوا إيه؟ ولا البيوت اللي من غير سقف واللي من غير بيوت أصلاً، يقولوا إيه؟

آآآآآآآآآآآ، والله زي ما بقولك كده.

# الدول الصُّغَنَة

هل تعلم عزيزي المواطن إنه في جنبات وطننا العامر فيه دول صغيرة ليها حكم ذاتي.

آه والله زي ما بقولكوا كده.

بس استنوا ما حدش مخه يروح لبعيد لأن الدول دي بعيدة كل البعد عن نظرية المؤامرة والخيانة العظمى والشرق الأوسط الجديد والقديم والنص نص.

دوكها دول وطنية بس هي استقلت بنفسها... ماستقلتش عن البلد بس لأ هي استقلت عن الكوكب كله وعن المجرة بحالها كمان، ألا وهي دولة الميكروباص.

الميكروباص المصري دول وأقاليم مستقلة بذاتها ماشية على الأراضي المصرية، هو الميكروباص في القاهرة المعز والمشروع في الثغر والميكروباص في بعض كتب التراث.

بدخولك الميكروباص فأنت في دولة كاملة متكاملة ليها حدودها اللي بيحميها ويزود عنها الحاكم ونائبه.

ودول بيمثلوا السلطات الثلاثة في الدولة، الحاكم هو السواق حفظه الله، ونائبه هو التابع بارك الله في صوته، القوانين بيسنها الحاكم ويتابع النائب تنفيذها بكل دقة.

صاحب الجلالة لما يقول 4 ورا، كلمته ماتنزلش الأرض إنشالله يكون اللي راكبين ورا دول مصارعين سومو برضو هيقعدوا أربعة.

زي ما بقولكوا كده. بعض الحكام برضو بيسنوا قوانين غريبة زي كده، وما فيش نزول قبل الإشارة، أو بعدها، أو آخر الكوبري، أو النزلة الفلانية، قفل الشبابيك وفتحها بيعتمد برضو على حزمة قوانين السواق، المهم إن القوانين بتكون واضحة وصريحة وتدررها بمجرد دخولك حدود الدولة.

وزي أي دولة الميكروباص فيه مواقع استراتيجية يعني جنب السواق ده موقع استراتيجي لا يناله إلا فئة بيختارها السواق تبعًا لمجموعة معايير هو اللي بيحددها ويعتمد على الفراسة عادة، فالاختيار جنب الشباك ده موقع

استراتيجي مش دايماً أحسن موقع لأنك ممكن تبقى في مهب الرغبات  
معلش أصلي عيان اقل الشباك، باشا الدنيا حر افتح الشباك، معلش الواد  
يستهوى اقل، معلش الريحة افتح.

ده حال ما كانت الدولة مهترئة ومش فارضة قوانينها على الأرض، فيه كمان  
المواقع الغير استراتيجية أو تقدر تقول إنها العشوائيات بتاعة الدولة.

دي بتضمن الكنبه اللي ورا كلها والكرسيين اللي بيتقفلوا ويتفتحوا وده  
بسبب التكدير في الدخول والنزول وفي موقع يعد هو الأسوأ في الدولة كلها.  
وده بيكون أول كرسي في أول كنبه؛ لأن اللي بيحتل الموقع ده بيتحول  
تلقائياً لوزير المالية في الدولة.

مطلوب منه يجمع إيراداتها ويسلمهم للخزانه ويراجع العجز في الميزانية  
ويعرف مصدره، ويحسب الفرق بين الإيرادات والمدفوعات ويرجع الباقي أو  
يسلمهم للدولة ويستنى الباقي يرجعه للمواطنين، اللي ممكن يتهموه في  
نزاهته وتبقى ليلته مش باينها ملامح، آه والنبي زي مابقولكوا كده.

الإعلام في الدولة دي قائم على 3 محاور، محور الروحانيات وده بيتمثل في  
التسجيلات الدينية اللي بتتركز في الجهاز الإعلامي للدولة. ومحور  
المهرجانات والأغاني الشعبية ودي بتحتل الجهاز الإعلامي لـ 99% من دول  
الميكروباص. وأخيرًا التوك شو وده بيقوم بيه الوافدين على الدولة بالاشتراك  
مع الحاكم ده لو حد تطوع بفتح موضوع ما والكل شارك فيه وأدلى بدلوه.

وبتبقى ونسة الحقيقة وطق حنك لآخر المشوار لو ربك سترها ولم يتقابل  
الأضداد وقلبت غفلقة عالكل، اللغة الأولى في الدولة هي الميكروباصية، ودي  
لغة حديثة ليها أصول عربية، ولكنها تطورت عن العربية وبقي ليها قواعدها  
ونحوها وصرفها وانشقاتها، ومنها المسموع والمقروء وده بنلاقيه في صورة  
حكم ومواعظ تحتل جدران الدولة داخلياً وخارجياً.

ومنها المشاهد وده بيجيده الزباين فلما تلاقي واحد في السكه عامل إيده  
مثلث متستغريش لأن ده بيجيد اللغة الميكروباصية وعاوز يروح الهرم.

بتعتمد اللغة أكثر على التورية والاختزال والاختصارات وعدد مرادفاتها قليل  
مابيزيدش عن أسامي المناطق بعد تحويرها من كوبري عبود لـ عبؤ عبؤ عبؤ  
والمؤسسة لـ سسا سسا سسا.

والميكروباصية يجيدها نائب الحاكم إجابة تامة وده شرط من شروط  
منصبه.

القصء الميكروباص في بلدنا واحد من أكبر الأغاز الللي ممكن تقابلها في يومك في الربع ساعة ولا النص ساعة الللي بتقضي فيهم مشوارك هتلاقي حياة كاملة متكاملة قائمة بذاتها.

فيها الحلو والوحش والنص نص وألوان من البشر لا أول لها ولا آخر، لو استفضنا في الحكي عن الميكروباص ودولة الميكروباص مايكفيناش 3 برامج من بابهم، أي والله زي ما بقولك كده.



# المزايدة

بيقولك آفة حارتنا النسيان.  
لا والنبى، النسيان مقدور عليه أهو له دوا وأحيانًا النسيان شخصيًا بيبقى دوا.

لكن اللي مالوش دوا وآفة حارتنا بجد هو المزايدة..  
واحنا يا مصريين بقينا مبدعين في فنون المزايدة والمزايدة عندنا أخذتها شكل محوري كده وبقت أسلوب حياة.  
تصحى الصبح تقول لا إله إلا الله تلاقي اللي يقولك عليك غضب الله، يا ساتر يا رب؟!!!

جرالنا إيه؟ مش طايقين خيال بعضينا عالارض ليه كده؟!  
مش عارفين نسمع كلمتين من بعض من غير ما نعلي ونجود ونزايد على بعضنا.

تلتقي مثلاً عالم كباره في مجال ما إنشالله علوم السرمديات الكوكبية.  
بيتكلم في منهجه والعلم اللي فنى عمره فيه لحد الراجل ما أتب ولبس نصارة أتخن من الخدافية.

شوية وتلاقي كائن ما قب من تحت الأرض يتهم الراجل بالجهل وهات يا تفنيد في كلامه ومُصر يثبت إن الراجل مايفهمش.

طب يا سيد إنت إيه معلوماتك عن السرمديات الكوكبية؟  
صوت صرصور الحقل، طب إيه خلفية حضرتك العلمية أصلاً؟  
أنا دبلون فني لحام بس عندي رأي وعاوز أقوله.  
أي والله زي ما بقولك كده.

والله آراء الأخ اللحام على عينا وراسنا وممكن كل إنسان طبيعي يقول رأيه بمنتهى الصراحة والوضوح بس من غير ما نفسه وبتفه رأي غيرنا.  
بالأخص بأه لو غيرنا دي شغلته أو دراسته أو أكل عيشه.

ده المثل بيقولك إن كنت في روما فافعل ما يفعله أهل روما، ليه المزايده بقت سلوك أساسي في حياتنا اليومية.

هل ده له أصول تاريخية مثلاً؟!

بالك رجعنا لورا تاريخياً كده لقينا الموضوع فعلاً له أصول متجذرة في معاميق تاريخنا.

طب بالك نرجع لحد فين؟ الفراعنة مثلاً؟

جدودنا الفراعنة كانوا يعزوا المزايده زي عندهم.

آه والله زي مابقولك كده.

الفرعون يموت من هنا تلقى الفرعون اللي بعد منه، حتى لو ابنه يا جدع، داخل على معابد ونقوش واسم اللي قبل منه وهات يا هد ومسح وكسر وتلطيش، وهوب يقوم رازع اسمه ونقوشه مكان نقوش اللي سبقه؟!!

تقولش من قلة الحيطان والعمويد!

مايحلش للفرعون من دول إلا الحيطه والعمود اللي كان عليها شغل الجدع اللي سبقه.

يزايد عليه ويحط نقوشه واسمه ويمحي سيرته!

قلت في عقل بالي يمكن هما بس الفراعنة كانوا منفسنين بس باقي التاريخ ما تلقاش فيه مزايده أكيد، اتمشيت حبة لقدام كده وعلى ناصية العصر العباسي والفاطمي والأموي رحت نازلة أبص بصة ألتقيلك المزايده كانت فن وعلم قائم بذاته عندهم. أي والله زي ما بقولك كده.

يطلع الشاعر القيقاع بن الأخطل المشلوب مثلاً يقول قصيدة غزل في حبيته شلوحة.

تاني يوم يلاقي شاعر منافس طالع عامل شعر على نفس الوزن والقافية بيشتم فيه القيقاع وشلوحة وعيلته وعيلتها وقبائلهم والكل كليله.

يا إما لو الشاعر ده أخلاق يعني تلتقيه عامل قصيدة على نفس الوزن والقافية بس بمعاني أجمد وجماليات أفكه علشان يطلع القيقاع نص كم قصاد شلوحة.

لدرجة إن المزايديات دي بقت فن قائم بذاته وسموه فن المعارضات الشعرية. والنبي زي مابقولكوا كده.

في عصر السوشيال ميديا تبلورت علوم وفنون المزايدة لدرجة إن البعض بقوا مقطوعين لها 24 ساعة، يخش يزايد على آرائك السياسية والفنية والثقافية والأدبية والعلمية بمجرد ما تحاول تطرحها حتى يكرهك في اليوم البرتقاني اللي فكرت تكتيلك فيه كلمتين تفك بيهم عن مخزون فكرك أو حتى كتبتهم من باب إنك تبعبع مش أكثر.

المزايد عادة وفي الأغلب مايبقاش عنده هدف أو نظرية بيزايد عليك علشان يثبتها أو يأكدها.

لأ أسليوتلي هو بيزايد حبًا في المزايدة واقتناعًا بالمرازيَّة وإيمانًا بالعكننة وطمعًا في إسكاتك وتكريهك في عيشتك.

لأنه عادي يخش يزايد ويسفه ويتفه في رأيك وبعد شوية عند حد ثاني تلاقيه داخل يقول عكس اللي قاله عندك تمامًا لمجرد إنه يزايد ويرازي في هذا الآخر الغلبان. آه وربنا زي ما بقولكوا كده.

عزيزي المزايد إنت مفقوس أوي وباين وواضح وممارساتك كلها بلدي أوي يا حسين.

أمنتك أمانة يا شيخ، الدنيا مش ناقصة مرازية.

اقعد في حته ناشفة بس تكون بعبيبيد، أي والله زي ما بقولك كده.



الخطر ابتدى يدق غالباب والطمعانيين كتروا واستكتروا علينا بؤ الميه هنعمل إيه؟ محلك سر؟ ونفضل تتعامل مع شريان حياتنا بنفس الهمجية وقلة القيمة اللي بنعملها فيه دي؟ هنستنى لما نصبح نلاقه قرر بجد يقل معانا زي ما احنا بنقل معاه كل يوم، بس هو الحقيقة أصيل ومأصل وميعملهاش أبدًا، ورغم كل اللي شايفه مننا عمره ما يعملها معانا بس إحنا اللي ماعدش ينفع نقف ساكتين لا نقف ساكتين عالطمعانيين ولا نقف ساكتين على تصرفاتنا معاه وفيه. آه والله زي ما بؤلكوا كده، اللي بيرمي ورقة زيه زي اللي فاتح ماسورة صرف، الاتنين بيسمموا بؤ الميه اللي بنشربه، اللي بيبنى عشة على شطه زيه زي اللي بيبنى ناطحة سحاب 500 دور ويردم جزء من حرمه، الاتنين بيقصوا من حقنا وحق عيالنا وأحفادنا فيه، اللي بيستبيح مايته وحرمة شطه ويتجرأ يوسخ مجراه مايفرقش في حاجه أبدًا عن اللي بيخونك ووشه في وشك وعينه في عينك وبياكل من عيشك، الحكاية مش حمل تريقة وهزار الموضوع مر ووجهه معلم أوي وفارق أوي وكل يوم بنسمع حلول واقتراحات ومؤتمرات وقعدات والخوف ليكون ابن الأصول أخذ على خاطره بجد واحنا مش داريين، آه والله زي ما بؤلك كده.

## لعب عيال

في خروجة حلوة كده مجموعة عائلات لطيفة ستات ورجالة وعيالهم وأحفادهم وكطبيعة النوع ده من الخروجات، شوية والستات اتلموا على بعض وهات يا أكل في ودان بعض، والرجالة اتلموا على بعض وهات يا قفش وهزار وصوت عالي، والعيال اتلموا على بعض وهات يا لعب، أسيلك نميمة الستات حبة كده وأبص حواليا أتابع مجريات الأمور ألتقيلك الحتة اللي فيها العيال مش طالع منها صوت!!! اتربينا إن لما عيال يتلموا على بعض ومايطلعوش صوت يبقى هيطلعوا ريحة... آه والنبي زي ما بقولكوا كده.

لأ مخكوا ما يروحش بعيد مش الريحة اللي بالكوا فيها... هايبقى فيه مصيبة يعني... يا هنلاقي حريقة، يا هنلاقي أجزاء بشرية بتتحدف علينا، يا هيلعبوا البخت في عيون بعض. المهم قلبي كلني عالعيال قلت قومي بصي يا بت شوفي بيعملوا إيه أبصلك عليهم ألاقيهملك قاعدين ساكتين أي والله زي ما بقولك كده 9 عيال ما بين أطفال ومراهقين ونص نص قاعدين دايرة في قلب الجنينة ما يبيصوش لبعض حتى، كل واحد مطلع تليفون أو تاتش سكرين أياً كان مسماها وداب عينه فيها ولا حاسس باللي حواليه ولا حاسين باللي قاعدين معاهم، أنه عليهم ما حدش عبرني واد يا اسمك إيه يا ابن نوال، إنتي يا بت يا بت منى مالكو يا عيال ماتعبروني إنتو اصنجيتوا ولا إيه؟ أخيراً عيل مفعوس رفع عينه من عالتتاع اللي في إيده وقاللي: ثوري طنط أثلي بنذل لعبة جديدة. لعبة إيه يا عيال مانتو مع بعض ما تلعبوا سوا كورة ولا باسكت؟ ردت بت تانية بعد ما شالت عينها بالعافية من عالتتليفون، لأ أنا ما بحبش التيمز جيمز، هار أزرق؟! العيال مش واصلهم إن فيه أصلاً لعب غير اللعب الديجتال! العيال قاعدين سوا في الشمس والهوا وعالنجيله وفكرتهم عن اللعب هي اللعب أون لاین أو أبليكيشن اللعب أو الهري والفرجة على السوشيال ميديا، آه والنبي زي ما بقولكوا كده.

ده أنا بقولهم العبوا كورة ولا باسكت أمال لو قتلهم قوموا العبوا مساكة الإنجليز ولا شد الكوبس ولا الأولة كانوا اعتبروني من الحفريات المجنحة؟! إمتى سيينا عيالنا يفقدوا روحهم ويتمسخوا كده؟! ليه سلمناهم تسليم أهالي

للسوشيال ميديا والأبليكيثانز!؟ ليه استنينا لحد ما علاقتهم مع الشاشات بقت أقوى وأوضح من علاقتهم بالبشر والعيال في سنهم وبأهاليهم أصلاً؟!

طب إحنا عالآقل عيشنالنا سنين حلوة لا كان فيها شاشات ولا سوشيال أصلاً، التلفزيون نفسه كان عجة واختياراته محدودة ما بين 3 قنوات بالكثير، قوم لعبنا ووقعنا في الطين، وسوقنا عجل، ونطينا الحبل، وخربشنا بعض، وشدينا شعور بعض، واتصالحنا، وغنينا، وشوطننا طوب، وجلطنا ركابنا، وسرّحنا للعرايس، وقصينالهم شعرهم زليطة وعملنا اللي نفسنا فيه واحنا في سنهم، ومع ذلك بنقول الميديا بتأخذنا وبتبعدنا عن الواقع وقلقناين على نفسنا رغم رصيد التعايش الضخم اللي عندنا، أمال الجيل اللي طالع متربي على انعدام التواصل البشري والمباشر من أساسه هيكبروا يبقوا إيه؟ علب تلاجة محطوطين جنب بعض لا ليهم علاقة ببعض ولا فارقين مع بعض أصلاً ولا حاسين ببعض؟! يتملوا جينة زي ما يتملوا صلصة أدوات استقبال بس؟ اللي تدهلهم السوشيال ميديا يتملوا بيه والسلام؟! آه والله زي ما بقولك كده..

لكل أب وأم شايفين إن أسهل طريقة للتخلص من زن العيال هو حذفهم جوه الشاشات التاتش ولهيهم في أي أبليكيشن يحطوا فيه عيونهم بالساعات، إنتو ببساطة بتسحبوا من عيالكم سنين طفولتهم وبتسحبوا من أرواحهم لمعتها ومن عنيهم شغفها بالدنيا اللي بجد مش الدنيا الباردة اللي بتتحرك قصادهم عالشاشة، آه والله زي ما بقولكوا كده.

## ليفة وصابونة

من المعلومات اللطيفة اللي بيدرسوها في علم السلوك إن فيه حوالين النبي آدم دايرة نص قطرها 50 سم، دي اسمها المنطقة الحميمة أو المنطقة الشخصية الجزء بتاعك من الكون اللي من حقك تتحرك فيه لوحدهك ومش من حق العالم يخترقوه بدون إذن أو سماح منك إلا للناس القريبين أوي؛ ولادك مراتك أبوك أمك... كده يعني ده كلام فارغ آه والله زي مابؤلك كده.

اتفقنا أصلًا إننا شعب عشري والخصوصيات دي مالناش فيها أوي ونحب كده نقرب من بعض ونلرزق لبعض، ده غير أساسًا وأصلًا إن الدنيا زحمة آه وربنا زحمة، زحمة أوي، يعني مش أي كلام قوم الزحمة دي والحميمية وحب التلزيق ده بيلغي المنطقة الحميمة دي، وبينسف فكرتها.. قوم إيبه بتبقى دايماً أبدًا على صلة دائمة بالبشر وده بيترتب عليه حاجات أغلبها مش ولايد، يعني بنكون مضطربين للتعامل مع أغلب الروايح البشرية طول النهار وكثير أوي بقوا بيتعمدوا ينسوا ينسوا النصايح الأبوية والمدرسية ونصايح الست كريمة الله يديها الصحة وحتى النصايح اللي كانت في ظهر كراريس الوزارة آه والله زي مابؤلكوا كده، ماتعرفش نسيان ولا تناسي ولا اكمن النفر طول وفرّع ورعرع وبلغ من العمر عتيا، يبقى خلاص النضافة الشخصية مش مقتصرة على العيال، ودورنا مايبنتهيش بتعليمها للعيال مهما كبر النفر لازم يصحى يطس وشه بشوية مَيَّه آه، وربنا لازم هي دي فيها نقاش؟ لازم يفتح حنكه ويتعامل مع فرشاة السنان ده أقل واجب!! فيه ناس يا مؤمن تصحى تخش الحمام تبص في المراية بالعدل وبعدين بالبروفيل وخلاص خلاص الموضوع على كده اليوم بيتدي آه والله زي ما بؤلك كده، ماهو لو النفر عايش في الدنيا لوحده، كان ماشي معلىش يمارس دور إنسان الغابة لوحده وبمنتهى الأريحية ماחדش له عنده حاج، بس لما نعيش في مجتمع ونتعامل مع بشر ماتنفعش عيشة طرزان دي أبدًا، ماينفعش نركب الأتوبيس ولا الميكروباص ولا المترو ونتحشر حشرة بذر الجوافة، وفوق الحشرة والزحمة والحر مطالبين نستحمل روايح طالعة من الناس اللي قررت تفحفح من كل سم في جسدها ده إحنا بنحكي في بديهيات...



حاجات بنعلمها للعيال مع الكخ والدح وكمان مش بنتكلم في الأوفر منها يعني لا بنتكلم الأودي تواليت بتاع الصبح والبرفيوم بتاع بالليل والشاور جيل والمناديل المعقمة الهاند جيل، ده إحنا بنتكلم في الممارسات الطبيعية المتعلقة بالنضافة الشخصية والصحة العامة، آه والنبي زي ما بؤلكوا كده، ماهو لو الموضوع مكلف مثلاً كنا قلنا جازر ده سبب تكبير الدماغ لكن ده إحنا بنتكلم في مية من الحنفية وصابونة وفرشة ومعجون سنان يعني حسبة 10 جنيه تكفي النفر شهر بطوله. طب إيه؟ استسهال؟ كسل؟ اكتاب؟ طب أمال لو تعمقنا أكثر واتكلمنا في الفكرة المجملة؛ فكرة إن النضافة سلوك مش بس ممارسات زي ما بؤلكوا كده؛ يعني إن واحدة تغير لعيل الحفاض ده ممارسة نضيفة تحافظ بيها على نضافة ابنها وصحته، لكن إنها تغيرله وسط الناس ولا في مكان عام دي مصيبة لازم يتعملها قانون يجرمها، إن الإنسان يقضي حاجته بشكل صحي فدي ممارسة صحية ضرورية، لكن إنه بقضيها عالحيط فده سلوك مايلقش بالكائن البشري أصلاً، ده غير البشري بيعمله في أضيق الحدود أساساً والنبي زي ما بؤلكوا كده.

التف في الشارع من شباك العربية والبلكونات وحذف الزبالة من شبابيك العربيات وشبابيك البيوت وسلوكيات استعمال الحمامات الخاصة والعامة اللي ممكن تخليك تغير رأيك 180 درجة في ناس عرفتهم وعاشرتهم عمر بطوله يوم ما يحصل وتخش حمامهم وسلوكيات الاستعباط بعد الأكل بالأخص مع الوجبات السريعة الكل بيعمل من مدغشقر مش بنها وينسى أو يتناسى يغسل إيدوه وبؤه ويا يمسخ في هدومه يا في الكرسي يا في الحيط، يا يستنى أول مغفل يسلم عليه ياختيبيبي ده إحنا بنشوف بلاوي. كمان مرة ما بنتكلمش في رفاهية النضافة الشخصية حوار أبعد ما يكون عن الرفاهية والكماليات، ده موضوع له علاقة بالاستمرار في الحياة ذات نفسها.



هتخاويه بأه؟ إن شاء الله شوية كده، شوية قد إيه؟ إمتى هه؟ هه؟ هه؟  
عاوزين نشرب الشربات بأه آه والنبي زي ما بؤلك كده.

حل النوع ده من البشر إنك أول ما تقابلهم ويبتدوا يسألوا تقوم مادد إيدك في جيبك مطلعهم إزازه شربات تديهاهم يسأسئوا فيها براحتهم طالما همهم عالشربات أوي كده.. الناس اللي مبتطلش ملاحقة وأسئلة بيسببوا لكل الدواير اللي حوالهم توتر دائم ووجع دماغ وإرهاق عصبي وضغط رهيب على حياتهم اللي أساسًا فيها اللي مكفيهم فلانة ماتجوزتش علشان ماحدث له دعوة، فلانة ماخلفتش علشان مش المفروض تسأل، ابن علانة مانجش علشان دي آخر حاجه تفرق معاك، زعيط ساب شغله علشان ده حاجه تخصه، معيط اتخانق مع مراته علشان دي أسرار بيوت، نطاط الحيط سافر بره أو رجع من بره علشان هو قرر يعمل كده آه والله زي ما بؤلك كده، الناس مايتحبش تكسف بعضها، والحشرية اللي بنمارسها في أمور غيرنا أكثر حاجه بتضايقنا وتترفزنا لما غيرنا بيمارسها علينا، فاعى تضطر حد لأنه يكسفك. عندنا بلاوي في أمر نفسنا لو شغلنا نفسنا بيها وسيينا أمر الناس للناس هنفضل مشغولين كل لحظة باقية في حياتنا.

وعلى الناحية الثانية برضو فأمور حياتك عادة ماتهمش حد إلا الفئة اللي قلنا عليها فمش لطيف برضو نزود من ممارسات الفودو اللي بتتعمل بشكل مفضوح أوي لمجرد إن حد يباركلك على خطوبة ولا جواز ولا عربية جديدة ولا عيل نجح ولا بت اتقرت فتحتها ولا شغلانة جديدة زي ما بؤلكوا كده. عادي المباركة والمشاركة في الفرحة طالما بطريقة مافهاش حشرية شيء لطيف وواجب كمان، فالمفروض نتقبلها بصدر رحب، بلاش الأفورة بتاعة التخميس والتمتمة اللي من تحت لتحت، اللي متخيلين إن محدش واخذ باله منها، بينما الكل بياخدوا بالهم عادي جدًّا؛ القصد يعني الفضيلة بين الإفراط والتفريط لا ندفس مناخيرنا في اللي لينا فيه واللي مالناش فيه من خصوصيات الناس، ولا نستقبل المجاملات العادية بتوجس وقفش وظن السوء آه والله زي ما بؤلك كده.





## هم يا دايناصور

واقفة مع صديقة في المطبخ ومانجيش في سيرة الناس ولا بنقطع في فروة حد ولا بتشتكيلي من حماتها ولا من جوزها ولا من جيرانها ولا من زمايلها في الشغل.

أهو كنا بنتجاذب أطراف الحديث عن مشاكل الأقليات في أقاليم جنوب منغوليا.

المهم واقفين في المطبخ وهي بتقلي في بطاطس وفراخ بانيه وتسلق في مكرونة وصلصة حمرا وصوص أبيض وماشروم.

أبص في الساعة ألقياها 8 الصبح.

وماحدش يسأل بعمل إيه عندها 8 الصبح؟

لأن مش دي المشكلة أساسًا. المشكلة إن فيه مكرونة بصلصة وفراخ بانيه وبطاطس مقلية وصوص أبيض بيتعمل 8 الصبح أصلًا.

المهم الشابة لاحظت الانبعاث الواضح في ملامحي ومليون سؤال اللي بيتنططوا في وشي.

قالتلي لأ ماتقلقيش ماينتغداش 8 الصبح ده علشان اللانش بوكس بتاع دودي.

دودي!!! الواد الشبر اللي في مراحل ما قبل الحضانة التعليمية بتعمليله منيو الكوليسترول الخام ده عالصبح؟!!

اعمل إيه كل صحابه في الحضانة أهاليهم بيعملولهم كده ويرجع يعيط يا إما ما ياكولش.

كل العيال في الحضانة بيعملوا فيهم كده؟!

لما العيال في الحضانة بيدولهم على غيار الربق بانيه ومكرونة أمال لما على الابتدائية هياخدوا إيه برام رز معمر وبطة محمرة في السمنة؟! وعلبة مورثة على سبيل السلطة؟

إيه العادات الغذائية اللي مايعلم بيها إلا ربنا اللي بنقلها للعيال دي؟

يعني الوجبات السريعة وقولنا معلش أهي مرة في الأسبوع ولا لما العيال تخرج تتفسح مش مشكلة.

لكن يبقى اليومي والعادي والتغذية اللي العيل بيتغذى عليها تشكيلة كوليستروول ودهون ومقليات!

ده العيل مايكملش معنا لتانية إعدادي كده من غير قصور في الشرايين على حبة جلطات.

آه والله زي ما بؤلكوا كده.

بعد الشر يعني عن عيالنا وعيال السامعين.

بس ده إحنا كده بنقضي عليهم. أمال فين زمن الساندوتشات الجميل؟

سندوتش الجبنة الرومي وسندوتش الجبنة والمرى والحلاوة ده يوم ما كان يتحط في الشنطة ساندوتش بيض بالبسطرمة كان يبقى عجة، فين علبة العصير ولا اللبن فين فكرة الوجبة المتوازنة أصلاً، الموضوع مش واقف عند أكل العيال في المدارس الموضوع إن عادتنا الغذائية.

إجمالاً بقت حاجه ما يعلم بيها إلا ربنا بداية من اختفاء فكرة الوجبات الأساسية أساساً بسبب ظروف الشغل والدراسة، فبقى أي حاجه تطولها إيدنا بندلقها على زورنا من غير ما نفكر إن كانت هتنفع ولا هتشفع، علب وأزايذ المياه الغازية والصودا بقت في إيدنا بدل كوباية المايه الوجبات السريعة والجانبك فود بقى هو الوجبة السخنة اللي ممكن ناكلها في يومنا واستبدلناه بطبق الخضار والسلطة وحب الرز وحتة اللحمه بتوع البيت الأكياس اللي بتلمع في إيدنا وإيدن عيالنا ليل ونهار وضهر وعصر ومغرب وعشا إشي كياس بطاطس على كياس مخبوزات على حاجات بتقرمش وحاجات بتفرقع وحاجات معسلة وحاجات مملحة آه والله زي ما بؤلكوا كده.

مجموع تمن الحاجات اللي بنحشي بيها جوفنا علشان نجوع أكثر من الأول بدل ما نشبع ممكن يملا التلاجة خضار وفاكهة وبروتين نباتي وحيواني 3 مرات، ومع ذلك مستمرين في حشي معدتنا ومعدة عيالنا كمية مقليات ومواد حافظة وملح وكوليسترول خام، وباقي البلاوي اللي بتجري تستخبي في الأوعية والشرايين أو تجري تستخبي في الفخاد والجناح والكروش والدراعات وتحولنا لبالونات بشرية تزحف على الأرض من أعباء الكوارث اللي بنعبي بيها جسمنا أي والله زي ما بؤلكوا كده. سلوكنا الغذائي إجمالاً محتاج مراجعة ومراجعة سريعة كمان مش ممكن يكون اللقمة اللي بنحطها

في بؤنا وبؤ عيالنا بدل ما تسري وتمري نخليها تهري وتكوي أي والله زي ما  
بؤلك كده.



# الأجيرو فويا

وأنا بقلب كده لقيت مرض نفسي غريب اسمه «الأجيرو فويا»، وده إيه ده يا اخويا.. قالك ده «حالة رهاب بتيجي للنبي آدم تعمله رعب من عبور الطريق».

النفر يقف في المفارق أو عالرصيف يبص عالشارع ورجله تتمسمر مكانها وركبه تدربك وكعابه يلفوا على بعض ، ولا يمكن ينزل يعدي ولا بالطبل البلدي، حالة نفسية بتصيب نسبة كبيرة من البشر ويتحول حياة البعض لجحيم حقيقي ومجرد نزولهم الشارع يبقي صراع مع إشارة المرور، والخطوط البيضاء وأماكن عبور المشاة. زي ما بؤلكوا كده.

المشكلة وأنا بقرا عن الموضوع ده لاقيتني بصطدم بحبة مصطلحات مريبة؛ رصيف، أماكن عبور مشاة، خطوط بيضاء، إشارة ضوئية؟! ياااااااااااااه والله زمان فين أيام ما كانت الحاجات دي ليها مردود كده في ذهن النبي آدم مننا؟! زمان كنت لما يبجي قصادك كلمة إشارة ضوئية مثلاً ولا إشارة مرور تفتكر الـ3 ألوان إياهم ومدلولاتهم وكده هيبسييه، أيام يا راجل، والنبي زي ما بؤلك كده، كنت تسمع كلمة رصيف دي تلاقيها عادية وليها معنى في ذهنك؛ مساحة مرتفعة عن الطريق محددة بألوان معينة معدة للمشاة، تسمع أماكن عبور مشاه ولا خطوط بيضاء تفتكر الخطوط العريضة عند الإشارة اللي بتقف وتفتح بالمناسبة وتحدد المكان اللي يعدي منه البشر.

المشكلة إن الحاجات دي بقت خيالية أوي نسمع عنها ممكن نشوفها صعب تتعامل معاها، مستحيل شوارعنا من كتر ما اتحولت لجراج عربيات كبير مابقالهاش معالم حقيقية التفاصيل دي اللي بتدي شكل الشارع، رصيف عليه صف شجر وعمدان نور جنبه طريق اسفلت فيه خط أبيض متصل بيقسم الشارع نصين وخطوط بيض متقطعة تحدد الحارات وإشارة عند المفارق تعدي اللي ماشيين على رجلهم، كل الديكورات الطبيعية دي بقت غريبة على الشارع المصري عمومًا والقاهري خصوصًا وإن لاقتها بتلاقيها زي ما بتلاقي تمثال رمسيس ولا إعلانات الكازوزة كيانات متواجدة بس مافيش بينك وبينها كونتاك مباشر آه والنبي زي ما بؤلكوا كده.

الرصيف في شارعنا يا عين امه حاجه تصعب عالكاقر، وبقي فيه حاجه ماسة للقضاء على الكائنات الخرافية أكلة الرصيف اللي بتسرح بالليل تاكل في الطوب وتساوبها بالأرض ماهو أكيد مافيش حاجه طبيعية ممكن تعمل كده في الأرصفة لازم تكون العنقاء أو الغول أو الخل الوفي إشارة عبور المشاة دي بقي حاجه أندر من الغزالة أم زلومة حاجه كده، بنطلعها من كتب التاريخ نتحسر عليها وتننا مكملين حياتنا عادي، وده اللي بيرجعنا لكلامنا عن الأجر فوبيا أو رهاب عبور الطرق، إحنا ممكن نجتذب سياحة علاجية عظيمة لو استقدمنا مرضى الأجر فوبيا دول هنا والنبي بعد خروجتين تلاتة في شوارع القاهرة العامرة لنرجعهم بلدهم بيمشوا عالجيل. صدقوني زي مابؤلكوا كده طب شوفتوا الناس هنا بيعدوا السكة إزاي؟ الناس في بلدنا بيعدوا الطرق بنفس منطق القطط لامؤاخذة شوف القطط بيعدوا الشارع إزاي وانتوا هتلاقوا البشر يا ولداه بيعملوا نفس الأداء والنبي زي مابؤلك كده الواحد ينزل من عالرصيف يحمدهم ربنا يبص يمين وشمال- حتى لو الشارع اتجاه واحد -مافيش حاجه مضمونة أصلاً هوب ينزل ياخذ خطوتين زيووووووو عريية تعدي قدام مناخيره ب3 مللي يجري يرجع عالرصيف ويفضل يكرر في المحاولات القططي دي تلاتين اربعين مرة كل مرة يزود عدد الخطوات لقدام لحد ما ربنا يكتبهاله ويروح للناحية الثانية ممارسة زي دي ماتعالجش الأجر فوبيا؟ دي تعالج قطع الخلف شخصياً بمنطق خالة نظيمة.

شوارعنا محتاجة إعادة... والنبي ما عارفة إعادة إيه هي محتاجة إعادة تأهيل محتاجة حد يقنعهها إنها شوارع حقة زي مابؤلكوا كده.

# الحمار المثالي

دخل أحد النحويين -بتوع النحو- السوق يشتري حمارًا.  
فقال للبائع:

أريد حمارًا لا بالصغير المحتقر ولا بالكبير المشتهر، إن أقللت علفه صبر،  
وإن أكثرت علفه شكر ، لا يدخل تحت البواري، ولا يزاحم بي السواري، إذا  
خلا في الطريق تدفق ، وإذا أكثر الزحام ترفق.

فقال له البائع: دعني إذا مسخ الله القاضي حمارًا بعته لك.  
أي والله زي ما بؤلك كده.

حكاية الجدع بتاع النحو ده فكرتني بكم المتطلبين اللي بقىوا في حياتنا.  
فكرة القناعة والرضا ما بقتش واردة أوي في قواميس البعض، وهي مش  
حاجه بطالة في كافة الأحوال.

يعني السعي للكمال والتجويد ده حاجه كويسة في الأغلب الأعم، بس هي  
المشكلة في الأفورة، يعني العجب اللي ما يعجبش، واللي تتمناه الرضا  
يرضى ما يرضاش، اللي عمله شغلك كله زي ما اتطلب فيقولك يا سلام لو  
جبته بدري يومين!! الفيلم الحلو اللي تستمتع بكل كلمة فيه فتلاقي اللي  
يقولك لا بس أصل الحكمة الدرامية مكانتش قد كده والقفلة كانت عاوزة  
تبقى كده، والجنب كان عاوز بنستين وسوستة في الظهر!! الرواية اللي  
تقضي وانت بتقراها أحلى وقت وتلقى اللي يعلق: بس كانت محتاجة عمق  
أكثر!! وأبعاد المستوى السايح مكانتش حلوة أوي، آه والله زي ما بؤلك كده،  
فيه فئة بأه مبدعة في الموضوع ده مبدعة في تحسيسك دايماً إنك مقصر،  
وإن فيه حاجه فارطة منك، وإنك عمرك ما بتعمل حاجه عدلة ولا مكتملة،  
الفئة اللي عندها ملكة تسويد العيشة وتنغيص الفرحة وعينهم ماتجيبش غير  
الناقص والقليل بداية من إنجازات الدولة نهاية بصنية المكرونة بالبشامل  
اللي مش هايشوفوا فيها غير الجنب المقرمش أيوه زي ما بؤلك كده، الناس  
اللي التراث الإنساني اللغوي أبدع في تسميتهم من المتطلبين لحزب أعداء  
النجاح لـ العالم السؤ لأصحاب الطاقة السلبية.

المهم إن مهما اختلف مسماهم الفئة دي لو وقعت في دايرتهم بأي شكل من الأشكال ديل الجلابية في سنانك واجري، سيبهاهم مخضرة وفلق، وجودهم في حياتك بينقلك كمية إحباط ومأسوية وانكسار رهية تخليك تترعش وانت بتاخذ أي خطوة لقدام فئة قادرة على هزيمتك في عز انتصارك، والمشكلة إنهم بياخدوا أحيانًا شكل الناصح الأمين أبو قلب طيب اللي عايزك أحسن، صدقني زي مابؤلك كده.

بس فيه فرق كبير بين اللي ينقدك علشان يبكيك بدل ما يبكي عليك والكائن السو اللي بينتقدك علشان يكسرك ومايقوملكش قومة الكائنات دي أصولهم التاريخية متفشية وسارحة في تواريخ الأمم دول شافوهم في عهد بناء الأهرام كانوا واقفين تحت والناس طلغان عينها في الهرم وهما واقفين ماطين بوزهم شبرين وبيقولوا مميم مش بطل بس لو كان كورة مش كان يبقى أحسن؟ وأيام البطالمة راخرين ياما نصحوا كليوباترا تسببها من أنطونيو وتتجوز ابن عمته اللي جاي من الكويت صدقوني زي مابؤلكوا كده العالم دي موجودة في كل عصر وكل أوان ماوراهومش غير التنبيط والنارزة وعصر البصل على إنجازاتك. اطردهم من حياتك أو اخرج من محيطهم أو ارمي كلامهم في البحر علشان تقدر تستمتع بأي حاجه في حياتك صدقني زي مابؤلك كده.

## اللي بيته من إزاز

(عن حتمية قتل سوسن) المثل الحكيم يقولك إيه؟ اللي بيته من إزاز ماغيرش هدومه في الصلاة، أبدًا أي والله زي ما بؤلوكوا كده ببيجي عالنفر لقطه يشوف كل الناس بيوتها إزاز، كل الناس مكشوفين وعيوبهم ظاهرة وباينة وتسد عين الشمس، تلاقي الأبعد يفند في عيوب غيره ويدقق ويقلب بوزه وينبري مدافعًا عن قيم الشرف والفضيلة ولا يوسف بيه في زمانه فلان الفاسد فلانة الكدابة؟ دا مرتشي؟ دوکها حرامي؟ دول قلالات الأصل وبحط عباية الفضيلة والشرف على كتفه ويمشي حامي حمى الشرف اللي بل الندى طرطوره آه والنبي زي ما بؤلوكوا كده.

بس المشكلة إنه شايف بيوت الناس الإزاز ومش شايف بيته، بيتك إزاز وإزاز لميع ويبيرق كمان وبالمناسبة بتغير هدومك في الصلاة طول اليوم، ودي مشكلة كبيرة، على فكرة الفساد اللي شايفه عند غيره ما يمكن هوا راخر بيمارسه بشكل ثاني بس متزوق وحلو وكده ومسميه اسم لطيف يريح ضميره المرتشي اللي بيقابله وممكن يقف يعايره ويواجهه بالعار اللي بيمارسه، ممكن جدًّا يكون قبل الخطبة العصماء اللي أداها لغيره لسه مكرمش عشربناية كده لأي حد علشان يقضي مصلحته ولا يخلص ورقة ولا يعدي مخالفة ويسميها إكرامية ولا حلاوة ولا صباح الخير لأ ويزعل ويتأثر أوي لو حكى عن الموضوع ويقولك أصل ما فيش حاجه بتمشي في البلد غير كده، سبحان الله يا مؤمن! لهو إنت تعمل المصيبة وتكررها وتغرر فيها لحد ما تبقى عادة واعتياد، وبعد كده تقول ما فيش حاجه بتمشي في البلد غير كده؟ طب ما انت اللي أصلتها ماوقفنتش تحمي الفضيلة ليه لما اتحطيت شخصيًا في المحك؟ مارفضنتش الغلط ليه لما جه عندك؟ ليه؟ سميته سوسن ليه؟ قبلته وهورته وماشوفنتش فيه حاجه بطالة ليه؟ ما كدبوش اللي قبلنا لما قالوا: لو كان الجمل شاف سنمه كان نط عليه قطمه زي ما بؤلوكوا كده.

بس المشكلة إن في حالتنا الجمل عامل نفسه مش شايف سنمه أو شايفه ومعتبره حاجه لطيفة حاجه كيرفي كده وكيوت في جتته مش مشكلة خالص، بينما عند باقي الجمال عاهة وحاجة يااااكي وكخ وماتصحش، على بلاطة محتاجين كلنا وقفة متينة كده قصاد المراية وبعد ما نعدل القصة ونزبط

الحزام ونداري الكرش نقف نواجه نفسنا مواجهة صريحة وضيحة وقيحة أي والله زي ما بؤلك كده، اللي بعمله ده اسمه فساد ما اسموش تسليك أمور اللي بدفعه ده اسمه رشوة ما اسموش تفتيح مخ اللي بقبله ده اسمه رشوة ما اسموش عمولة ولا إكرامية، اللي بقوله ده اسمه نفاق وكذب ما اسموش ديبلوماسية، تجاهلك لمشكلة صاحبك ولا قريبك اسمه قلة أصل ما اسموش تلاهي ودوامة الحياة لو وقفنا بس خمس دقائق قصاد المراية مانعملش أيتها حاجة غير تسمية الحاجات باسمها هنكتشف قد إيه بيوتنا إزاز آه والله زي ما بؤلكوا كده، مش بس بيوتنا اللي إزاز إحنا شخصياً اللي إزاز وورق وقش كمان، ساعتها يمكن نقف مع نفسنا وقفة ونقرر نبطل نطلع من اللي بنمارسها ومسمينها سوسن علشان نريح ضميرنا، نبطل سوسن الأولانية ونبطل سوسن الثانية، ويمكن نبطل كل السواسن في يوم من الأيام، وساعتها البيوت ترجع تستر اللي جواها وساعتها يمكن نبطل نحذف طوب عاليوت، بينما بيتنا ساكناه سوسن ومعششة فيه أي والله زي ما بؤلكوا كده.



ده حتى الأفلام والمسرحيات اللي بتستهدف الكوميديا من أجل الكوميديا اللي هي ضحك علشان الناس تضحك حبة فرفشة وتريح دماغ من حسبة برمة اللي مابتنتهيش على الله ألف مين يهاجمها ويوصفها بالابتذال وقلة الأدب وانعدام المضمون والهدف آه وربنا زي مابؤلكوا كده زي ما يكون الضحك والانبساط في حد ذاته مش هدف ولا مضمون، لأ لازم الجرعة تبقى نكد حلو كده وعصر فدادين من البصل الصعيدي عالقلب علشان تعجب وتكيف المعنيين بالفنون آه والنبي زي مابؤلك كده.

هل ده إيمان راسخ وعميق بأهمية الاحتفاظ بكثافة محددة للنكد كاتمة على عصفورة قلبنا ولا هو شكل من أشكال خزو العين ونداري على شمعتنا علشان تقيد، وعدوك ابن كارك والشاطرة تقضي حاجتها والهابلة تنده جارتها، وأي هري تراثي من النوع ده؟! خوفنا وهلعنا من فكرة المرح والتوجس من الفرحة والرغبة الدائمة في احتفاظنا بنفسنا في المنطقة الدافية اللي هو إوعى تفرح ولا تضحك بالأوي لتصبيك كوارث كونية، الله وحده يعلم مداها بيأدي بينا لشكل من أشكال الكلاونفويا.

بس بعيد عن السامعين شكل أعمق وأتخن ممكن يتطور ويخلق سيريال كيلرز يمشوا بالليل يدبحوا في مخاليق ربنا من جرعة النكد المضاعفة اللي غاويين نعيش فيها آه والنبي زي مابؤلكوا كده.



# أينشتين

(الجهل أرخص متعة)

العالم العلامة الكبير أوي أينشتين حد عارفه؟

أيون أهو هو ده

مرة كان رايح يتغدى في مطعم، وكعادة أهل العلم دايماً شاردين وتايهين ودماغهم مش فيهم ويفكروا في معضلات الكون كله، فما بالك بأينشتين ذات نفسه بأه؟!

المهم العالم الجليل كان ناسي نضارته، جاله الجارسون، وقاله: تطلب إيه؟  
قعد يدور في سلقط في ملقط على نضارته مش لاقياها فراح قايل للجارسون معلش اقرالي المنيو لو سمحت.

راح الجارسون بص بالأطعة أوي لأينشتين وقايله:

عفوا سيدي فأنا أمي وجاهل مثلك تمامًا.

أي والنبي زي ما بؤلك كده.

وبغض النظر عن المعجزة اللي خلت أينشتين مايتجلطش في موقف زي ده ويكمل ويبدع وينتج النسبية وباقي نظرياته اللي الزمان راح وجه عليها، وبعد 60 سنة العالم اتقلب فوقاني تحتاني على قولة الزمكان.. الزمكان.

أتاري يا ولاد الأرض استقبلت إشارات ناتجة عن نشأتها الأولى اللي وصفها المرحوم بكل دقة

أي والله زي ما بؤلكوا كده.

حاجه كده إشي خيال يا ناس.

الراجل في معمله وبنظريات رياضية وفيزيائية بحتة قدر يستنتج شكل نشأة الأرض الأولى من كام مليار سنة، والعالم كله بيحتفي بالإبداع البشري ده وبفكرة ربط الزمن بالمكان وفكرة الزمن يبقى شيء مادي، وبإثبات علمي طال انتظاره.

حبه كده وانا بتابع كل ده عبر السوشيال ميديا أبصلك حوليا ألتقيلك صوت صرصور الحقل.

- إحم يا أفندية: واخدين بالكوا العلم وصل فين؟  
ألاقيك في الخلفية صوت وصفة الشيش طاووق بصوص المهلبية الحار.  
- يا جدعان الناس وصلوا لنشأة الأرض.  
يجيني من الراديو سؤال لدار الإفتاء عن حرمانية أكل لحم البطريق.  
- يا بشر الزمن بقى مادي مش معنوي.  
ألتقيك الدنيا مهدودة فوقاني تحتاني على شمهورش اللي كان جاي ماتش  
كورة.

أي والنبى زي مابؤلكوا كده.

إحنا فين؟!!

لأ بجد فين يعني الدنيا بتتشال وتتنكت من حوالينا واحنا عايمين عوم في  
ماية المخلل.

الدنيا بترمح لقدام رمح وواحدة ديها في سنانها أزح واحنا ولا الهوا،  
المشكلة إننا مش واقفين مكننا لأ خالص نوهائي، ده إحنا بنجري برضو  
وواخدين ديلا في سنانا برضو، بس بنجري لورا واخدين السكة من الناحية  
التانية وعمالين نرجع نرجع لما قربنا نلاقي إنسان الغاب طويل الناب  
ماشي في أول فيصل.

صدقوني زي ما بؤلكوا كده.

فيه حاجه عطلانة أو محشورة أو سادّة علينا الرؤبة فتحس إننا مش مدركين  
لأبعاد اللي بيحري حوالينا.

عايشين في فقاعة مشغولين بالسفاسف والهيافات والصغيرات  
والممنمات لحد ما احنا ذات نفسنا بننكمش والدنيا بقت بتضور علينا  
بالعدسات المكبرة.

مكانا فين وسط القفزات العلمية والفنية والثقافية والرياضية وكل حاجه  
آخرها (إية) المهولة اللي بتحصل في الدنيا؟

ولا كأننا هنا؟!!

لأ ومش متضايقين ولا الحمية وخدانا ولا نجاح وتقدم غيرنا ده بيقلقنا  
ويوجعنا كده وبكسفنا.

نوهائي خالص ده إحنا متسقين جدًّا مع ده، ومدركين حقيقة الواقع المؤلم  
ومعندناش أيتها مشكلة معاه.

وأحيانًا بنوصل لمراحل القلب القاعد أوي وننكر إنجاز الآخر كمان.

بقينا شبه الواد اللي بص لأينشتين بألاطة وقاله:

أنا جاهل وأمي زيك، سوري.

بجد حاجه توجع وتزعل وتحزن أوي.

أي والله زي ما بؤلكوا كده.

# سعد سعد يحيا سعد

(عاش عربي مصر الوحيد)

من قيمة 100 سنة - يمكن أقل شوية - الأتومبيلات ملت بر مصر المحروسة  
وظهر التاكسي لأول مرة والبلد بقت حته من أوربا، لأ وكمان أوربا بقت  
تستمنى تبقى حته من مصر هيببييحيححج.

القصد نتيجة ظهور التاكسي سواقين الحناطير خافوا وقلقوا لأن أكل  
عيشهم ابتدى يتأثر مع دخول كيان جديد شيك وسريع ومودرن، والمصريين أو  
البشر عمومًا بيقبلوا أكثر على الحاجات الجديدة خصوصًا لو بتأديلهم خدمتهم  
بشكل أفضل وأسرع.

القصد الحوذيين أو العربية لموا بعضهم برابطة المعلم وخذوا السكة  
قياسة وأزح وعلى فين؟! على بيت الأمة عدل، آه والنبي زي مابؤلكوا كده لأ  
ومشيو بالكراييج، وهات يا طرقة في الهوا لحد ما اتلم عليهم التايهين،  
ووصلوا بيت الأمة وهات يا زعيق على سعد باشا علشان يطلع لهم. عم آدم  
حارس بيت الأمة يقولهم يهديكم يرضيكم الباشا بيفطر مايصحش كده وهما  
راسهم وألف شبشب بصباغ إلا الباشا يطلع لهم. المهم سعد باشا ماكديش  
خبر ساب الفطار وساب الست صفية وطلع لهم في شرفة بيت الأمة ووقف  
يسمع شكواهم، قالوله حوش عنا التاكسيات يا زعيم الأمة، التاكسيات  
بيصنعوها الإنجليز، والحناطير بيصنعوها مصريين ولاد بلد.. التاكسيات بتمشي  
بالجاز اللي بنستورده والحناطير بتمشي بالشعير اللي بنزرعه.. الأتومبيلات  
بتموت الناس لما تصدمهم، لكن الحناطير ما بتموتش حد، آه والنبي زي  
مابؤلكوا كده.

كلام يسجد الحقيقة وخصوصًا واحد بأه بمصرية وحمية زعيم الأمة، المهم  
الباشا سمعهم للآخر وقالهم إن كنتوا إنتوا عربية فأننا عربي وافتخر ولكن  
أنا عربي مابيركبش فيها إلا زبونة واحدة وهي مصر، فرح العربية وراحوا  
هاتفين أشهر هتاف وقتها عاش سعد عربي مصر الوحيد، لما حس سعد  
باشا إنه امتص غضبهم قالهم: بس زمان سواقين الكارو شافوا إن الحناطير  
هتوقف أكل عيشهم، وطالبوا بعدم تعميم الحناطير والسوارس والنهارده انتوا  
شايفين التاكسي هيقف أكل عيشكم، لكن الحقيقة إن دي عجلة التطور

اللي بتمشي دايماً لقدام ولا بترجعش لورا أبداً، أمم العالم اليوم بتتجه لاستبدال الأتومبيل بالطيارة وانتوا عاوزين مصر تثبت عالحنطور.. انا كعرجي لعربية مصر مارضاش لمصر ترجع لورا ولا إن حد يسبقها.. أفهم إنكم تطالبوني بتطويركم وتعليمكم حرفة جديدة وافتتاح مدارس لتعليمكم قيادة الأتومبيلات ومدارس لتعليمكم ميكانيكا إصلاح الأتومبيلات، وتطالبوني باستبدال حناطيركم بسيارات أجرة حديثة علشان مصر تطور وانتوا تلحقوا بركب التطور ده. العرجية اقتنعوا وهتفوا لسعد باشا ورجع الباشا لمدمام صفية كملوا الفطار بعد ما العيش قدد والبيض والفلول جلدوا.. المهم سعد باشا وأي حد يبحب بلده فهمها بسهولة. الحمية والغلب وأكل العيش واللي نعرفه اللي احسن مانعرفوش مش دايماً بيكون هو اللي في الصالح العام، واللي بيقف قصاد عجلة الزمن وتطوره بتعدي فوق منه وتبسطه وتساويه بالأسفلت.

الدايناصورات انقرضت... آه والله انقرضت، بصوا حواليكوا كده مش هتلاقوا دايناصورات.. مش كده والنبى؟ الدايناصورات وقفت قصاد عجلة الزمن لا منها اتطورت ولا منها اتوائمت مع الجديد فعجلة الزمن عدت عليها ونهتها، وبتوع الاقتصاد قالوها كلمة حكمة العملات الجديدة تطرد العملات الرديئة من السوق آه والله زي ما بؤلك كده.

من الآخر وعلى بلاطة، اتطور واشتغل على نفسك ودور على عيبك وصلحه وشوف منظومة جديدة ومناسبة اشتغل من خلالها لأن ما حدش هيرجع للحنطور بعد ما يجرب الأتومبيل!! حلو ده ومناسب؟ يبقى على بركة الله، مش مناسب خلاص هتضطر مع الأسف تنقرض في هدوء وربنا المعبود زي ما بؤلك كده.





# الأميتو فويا أورهاب الكهرياء والإضاءة

نوع من الخوف المرضي يصاب الناس بخوف مرضي من كل حاحه ليها علاقة بالكهرباء.

يعني الفيشة بالنسبة لهم بتتحول لبوابة الجحيم ومنظر اللمض وهي منورة بينرفزهم وممكن يخليهم مايقدروش يقعدوا في أي مكان فيه إضاءة مباشرة شايفين مصدرها، مشاهير كتير عندهم رهاب الكهرباء ده منهم سيرينا وليامز مثلاً اللي بتقول إن السبب إنها اتكهرت يا عين أمها وهي صغيرة !! بس برضو فويا الكهرباء دي ماجاتش عندنا راخرة، تحس الفويات دي بتيجي للعالم الدليكا اللي الدنيا مش مكحرتاهم صح، آه والنبي زي ما بؤلوكوا كده.

أهو على سيرة عقدة الكهرباء دي كنت معدية من شارع طويل عريض إلا والتقيلك كهارب عالصفين نور أحمر وأخضر وسلاسل لمض بالطول وبالعرض وعمارة من فوقها لتحتها بتضوي بلمض إشبي كبير وإشبي صغير وإشبي أحمر وإشبي أزرق ودواير كده كبيرة فيها ييجي عشرتلاف لمبة.. والإضاءة جواهم عمالة تلف حوالين بعضهم، وكشافات ضخمة من اللي كانوا بيستدعوا بيها بات مان لما يضربوا نورها ويوصل السما دي، حبة كتير بأه من دول ضاربين في السما وضاربين في عين الناس اللي ماشيين واللي سايقين غير الكشافات الهالوجين اللي متشعبطة على العمدان الحديد، غير الميكروفونات اللي عمالة تزف البشري السعيدة بافتتاح محلات الحاج سيد لعصير القصب أضربلك بعيني ألاقيلك محل الحاج سيد ده متر في متر إلا ربع لدرجة إن الحاج سيد شخصياً ثلاث ترباعه بره المحل ومحتويات المحل مكنة القصب و4 شوبات زجاجة و30 عود قصب ويافطة وطبعاً الحاج سيد شخصياً.

بقى الإضاءة والكهرباء اللي تكفي تنور قرية في الصعيد شهر ونص والإضاءة المحلية اللي قلبت دماغ سكان المنطقة من صباحية ربنا دي كلها على افتتاح دكان الحاج سيد؟! والنبي زي ما بؤلوكوا كده.. المشكلة طبعاً مش في حجم الدكان ولا نوع النشاط المشكلة اللي بجد في كمية الإبداع الكهربائي اللي بيحصل في النوعية دي من المناسبات وغيرها كمية الإزعاج والتلوث البصري والضوئي والصوتي اللي بيحصل في افتتاح المحلات



بالطريقة دي.. ولا في بعض الأفراح الشعبية أو غير الشعبية حاجه بجد مش منطقية ده إحنا لسه مافوقناش من أزمة كهربا كانت مخلية أيامنا أسود من قرن الخروب لسه طعم المرار مراحش من على لسانا يا جدعان!! لحقنا نسينا بالسرعة دي الليالي والأيام اللي مايعلم بيها إلا ربنا نسينا طلوع الـ51 دور على رجلنا ولا الأكل اللي باظ في التلاجات، ولا المذاكرة على أضواء الشمع ولمض الجاز؟! إيش حال إن الكلام معداش عليه كام شهر وإيش حال إن ماكانش الصيف داخل والله لا يقدر يحصل ثاني ده اللي اتلسع من الشورية بينفخ في الزبادي.. وفي حالتنا اتلسعنا من الشورية لدرجة توجب النفخ في الأيس كريم مش حياالله الزبادي أزمطنا السابقة المفروض تكون عطتنا درس مر جدًا في التعامل مع مصادر الطاقة عمومًا والكهربا بالأخص. الهدر المستفز ده ببيجي على دماغنا في الآخر... أي والله زي ما بؤلكوا كده.

# لـ

قعدت أقرا شوية عن الواد الفسل اللي عمل فيسبوك لاقيتهولك عيل اصفراوي كده وسهن ومش سهل ابن الإيه ده، خد عندك.. مؤسس موقع فيس بوك مارك زوكربيرغ، قضى السنة اللي فاتت في كتابة قصاقيص ورق تحمل عبارات شكر يوميًا بخط إيده لكل اللي ساعدوه في حياته.

وفي 2011 امتنع عن تناول اللحوم ماعدا اللي ذبحها بنفسه، كمان عكف عام 2010 على تعلم اللغة الصينية.

مؤسس فيسبوك قرر في 2015 قراءة كتاب جديد كل أسبوع ولا يقتصر ذلك على الكتب التي تعنى بالشأن الاقتصادي، فزوكربيرغ يسعى إلى تجميع المعارف حول مختلف الثقافات والمعتقدات. كما إنه شكل ناديًا للكتاب على موقع فيسبوك تحت اسم «عام - من - الكتب».

الواد باع الموقع وعمل القرشينات وقاعد يزيط بأه آه والنبي زي ما بؤلوكوا كده.

بس الصراحة بينا وبين بعض دماغه حلوة والحته الأخرانية دي عجبتني قالك كتاب كل أسبوع!! شيء عظيم حوار كل أسبوع ده.. عجبتني الفكرة ودخلت اتفرج كده علينا وعلى قرابتنا وباريتني يا خويا لا دورت ولا جبت السيرة، قالك شعوب المنطقة حدانا من أقل شعوب العالم كله قراءة وإن زمن القراءة بالنسبة لعددنا ولساعات يومنا ولكمية اللي بنقراه ففكركووا يطلع قد إيه؟ ها؟ غلب حماركووا؟

يطلع دقيقة في اليوم يا مؤمنين والنبي زي ما بؤلوكوا كده.. دقيقة يتيمة في اليوم هي محصلة القراءة اللي بنقراها وطبعًا مش محسوب فيها قراية رسايل الواتساب وقراية بوستات الفيس بوك علشان حد حدق هناك سامعاه بيقول ده أنا ما بطلش قراية طول اليوم.. لا يا فكيك القراية اللي نقصدها القراية بهدف المعرفة أو الاطلاع مش قراية الأخبار وبوستات الكوميكس ورغي ساعة العصاري عن العيال وصواني البشامل عبر السوشيال ميديا.

القراية اللي من نوعية إنك تطلع المترو في أيتها بلد في الناحية الثانية من العالم تلاقي كل واحد ماسكله كتاب وحاطط فيه همه وقاتل بيه وقت السكة.

تبص في شنطة أي واحدة تلاقي معاها كتاب!!!  
تبص للناس شايلين إيه غير الموبايلات ومادليات المفاتيح تلاقيهم ماسكين  
الهاند بوك.

ده غير التقنيات الحديثة اللي محلية أغلب اللي مركزين في شاشات  
موبايلاتهم هناك مركزين مع كتب منزلينها وبيقروها على التليفون.  
أي والنبى زي ما بؤلوكوا كده.

ده في أمريكا وأوروبا وأمريكا بالأخص بيقولك عبارة شهيرة جدًّا Not less than

. 250

ودي مقصود بيها حبهم للكتب الكبيرة بالأخص لو روايات أو قصص، فتلاقيهم  
يعزوا الكتب المدملكة اللي عدد صفحاتها ضخم ما يقلش عن 250 صفحة قوم  
لما يقرأوا يتكيفوا كده وياخدوا جرعة كبيرة تسعدهم، ياختبيبيسيبيي أمال ليه  
عندنا القراءة مقتصرة على كتب المدارس، لا والنبى حتى كتب المدارس  
تخش عالغيل من دول تفتح الكتب تلاقيها بيضاء لم يمسهها بشر ويقولك  
كتب إيه كبر دماغك بنذاكر من الملخصات والملازم وورق الدروس هضحك  
عليكم مثلاً، خشوا دلوقتي اسألوا العيال هيقوللكوا زي ما بؤلوكوا كده تقولش  
عداوة بتتزرع في العيل من وهو بيرضع للكتاب؟؟! ده حتى معرض الكتاب  
تروحه تحس إنك رايح الأزهر بارك ناس زي النمل رايحين جاينين.. وأكل  
وشرب وطراطير وبلالين ملونة وأعلام وضحك وهزار ولا مولد أبو جلابية  
وتشوف حصيلة البيع!! بلح!! ده إحنا ورثة أعظم حضارة في الكون فكركوا  
يصح يكون معدل اطلاقنا اليومي دقيقة في اليوم؟! والنبى ماينفع.. حقيقي  
والله زي ما بؤلوكوا كده.

# التوكوفوبيا

التوكوفوبيا أو رهاب الحمل والولادة وده مرض نفسي بيصيب البشر، والغريب إنه مش بيصيب الستات بس يعني مش الست بس اللي بتخاف من الحمل والولادة ومسئولية ما بعد الحمل والولادة.. ده مرض بيصيب الجنسين على حد سواء زي ما بؤلوكوا كده.

يعني لو راجل ومراته قاتله إنها حامل يترعب من الفكرة وممكن في الحالات الشديدة لو شافوا واحدة حامل في الشارع يترعبوا ويطلعوا يجروا، بعض المشاهير في العالم وبالأخص الستات وبالأخص مع هاجس الرشاقة والسمباتيك واللوك وما شابه بيصابوا بالرهاب ده ، والبعض برضو لا يمكن يتعاملوا بأي شكل من الأشكال مع واحدة حامل !! فكرت حبة في المرض الغريب ده وقلت في عقل بالي يا حلاوة ألا احنا المرض ده ما حودش عندنا هنا ليه؟ لا بجد والنبي زي ما بؤلوكوا كده.

لسه من كام يوم الساعة السكانية أعلنت إشارات ضبط الوقت إننا بقينا 90 مليون بالصلاة عالنبى إحنا مش بنوق، ولو إن النق في الحالات دي مفيد شوية، بقينا 90 مليون حنك مفتوح والكلام ده من حبة حلوين العدد زاد دلوقتي اللي معدي جنب الساعة السكانية يبقى يقولنا لأ بجد جايبين جبروت وسعة صدر الخلفة بالمعدلات دي مينين؟ يعني هل مثلاً الناس اللي لسه مصره تزرب بالسبع والـ8 عيال لحد النهارده شايفين حاجه إحنا مش شايفنها؟! ما هو لازم يقولولنا لو مكشوف عنهم الحجاب يدلونا ويريحونا ده إحنا اخواتهم المواطنين برضو وعائشين معاهم في نفس البقعة من الكون، يعني لو هما شايفين بحبوحة معيشية في الأفق وأنهار بترول هتدقق تحت رجلينا ومناجم ذهب وحديد وزرنيخ هتتفتح.. وسياحة أشكال وألوان واقفين مزنوقين في المطارات هايموتوا ويدخلوا، ومستثمرين أجانب جايبين بالمشوار يحطوا دم قلبهم تحت رجلينا يدلونا، قوم نرتاح إحنا كمان ونفهم منطلقهم ورغبتهم المستعرة في زيادة الأيدي العاملة اللي هتجيب مصادر دخل بالهبل حقيقي فعلاً زي ما بقولكوا كده.

بس أصل اللي عائش معانا وشايف اللي إحنا شايفينه مش عندنا وبس ده العالم كله مهروس في أزمة اقتصادية ما يعلم بيها إلا ربنا وعندنا كمان الأزمة

مضاعفة بسبب الأحداث اللي بتحصل عندنا وفي المنطقة ولو وقفنا فوق بعض كده صف طويل هنلاقي من بعيد كده بوادر حرب عالمية وأزمات دولية كل ده يا بشر واحنا عندنا عالم حاطين همهم في الخلفة!! آه والله زي ما بؤلكوا كده الخلفة حلوة وكل حاجه وتعمير الأرض أكيد وحتما ولا بد رسالة الإنسان أصلاً بس هي الحقيقة الأرض عمرانة الحمد لله، فمحتاجين نفكر شوية في العالم اللي بنجيبهم يعمروا الأرض دول ليهم مكان عالارض ولا لأ، يعني لما بتاخذ قرار تجيب الطفل الرابع والخامس والسادس في وسط اللي احنا عايشين فيه ده بيبقى الهدف إيه؟ حتى لو مقتدر ماديا ماهي المادة مش كل حاجة.. كل عيل المفروض يعني إنه بيتكلف تقله صحة وبال وأعصاب علشان توصله لبر الأمان منين يتجاب ده كله في وسط كل العيال دي؟

فيه ناس أصلاً من حالة الهسهس اللي بيوصلولها من تربية عيل ولا اتنين مش بيبصدقوا إن فيه ناس لسه بتخلف بالقورطة! بس ده واقع وإلا مكناش تتضاعف مرة ونص في 20 سنة.. النبي اللي يعرف التوكوفوبيا ده بيتباع فين يجيلنا منه حبوب ولا سفوف ولا كباسين، يمكن يجيب نتيجة وربنا زي مايقولكوا كده.

## مولانا عظم الله شحمه

كان يا مكان يا سادة يا كرام ملك في سالف العصر والأوان تخين ومكلبظ  
ودهونه وكوليستروله مبهدينه وقاطعين نومه.

جلالة الملك جمع الحكما والأطبا يشوفوله حل في كرشه وجنابه والبلاوي  
اللي على قلبه وغدده.. الحكما والأطبا حاروا في شحوم مولانا.. لا دوا نافع ولا  
سحر شافع، قام في وسط المجلس منجم زي البارودة المحمصه يهتف:

إلحق يا مولانا إلحق يا مولانا.

جربوا الخدم والحشم عليه.

- ها لاقيت حل لسمنة مولانا؟ اقعدوا على جنب بلا سمنة بلا زبدة مولانا  
باقيله على وجه الدنيا شهر يتيم بعدها يقابل رب كريم وساعتها لا هيفرق  
سمنة ولا رجيم. الملك اتاخذ واتشائم وجاله اكتتاب وخط في نفسه وقاله  
جاي تبشر عليا يا بوز الغراب!! قاله

يا مولانا دي النجوم اللي بتقول ولو مش مصدقني احبسني شهر ويوم لو مت  
قبلي أبقي حر وإن ما حصلش إبقى اقتلني آخر الشهر. وفعلاً يؤمر الملك  
بحبسه ويعدي كل يوم في الشهر عالمك زي الكابوس قاطع الزاد وشايل  
الهم ومستني الموت يوم ورا يوم لحد ما بقى زي عود الحطب.. آه والنبي زي  
ماقولكوا كده.

المهم طبغاً فهمتوا إن المنجم كان بيضحك عالمك علشان يعيشه شهر  
أسود على دماغه ويجيبه هم واكتتاب قوم يسد بوزه عن الأكل ده غير إن  
الهم أحسن علاج للسمنة، والملك خس طبغاً بس من فرسته من المنجم  
قتله برضو، وبيقولوا الملك رجع ياكل وتخن أكثر من الأول وجاب (تريد ميل)  
وبيتابع مع دكتور دايت بقاله 7 سنين.

المهم شيل الهم فعليا أكبر مشكلة ممكن يقع فيها النفر منا، وباريت  
الموضوع يبجي على قد الخسسان! ده بيقولك إن شيل الهم السبب الرئيسي  
لأكثر من 70% من الأمراض العضوية ولأكثر من 95% من الأمراض النفسية  
وعلى راسها الاكتئاب آه والنعمة زي ما بؤلوكوا كده.



# الرويعي

زمان كده، مش زمان أوي يعني في التمانينات وأوائل التسعينات لو انت لسه مشتري شقة جديدة وعايز توضبها إشي ستاير إشي نجف إشي أوكر بيان وشبابيك كان لازم تروح الرويعي، الرويعي أيامها كان حاجه كده ولا وول مارت بتاع أمريكا بس في حي العتبة، الصنایعية مشاويرهم هناك، التجار بتوع القطاعي على كل لون وكل شكل، الزباين في الرويعي أيام ما كان الرويعي سوق كبير، الأيام دي راحت زي ما أيام غيرها راحت وبقي فيه محلات تانية وطرق تانية ممكن توضب بيها شقتك.. ده يا راجل ممكن وانت أونلاين توضب شقتك من غير ما تتحرك.

المهم مش هي دي القصة والتغيير سنة الحياة.. عادي بقي إيه بقي حكاية الرويعي؟ ومين الرويعي ده اللي اسمه كان أشهر من نار على علم؟! الحدوتة بدأت هناك مش هنا بدأت في المغرب العربي لما تاجر كده قرر يهاجر من المغرب على مصر والتاجر ده هو السيد شهاب الدين أحمد بن محمد الرويعي ولأن مصر بلد الكرم والضيافة السيد شهاب الدين أحمد بن محمد الرويعي لقي مكان في القاهرة المحروسة، وبسرعة تجارته زادت وانتشرت وكان بيتاجر في كل حاجه وأي حاجه تجيب فلوس، وبعد ما بدأ بشريك في نص وكالة بقي صاحب أراضي وأطيان وعزب ووكالات تجارية ومكان سوق الرويعي عمل وكالة ليه ولأسرته، والوكالة دي كبرت وانتشرت وكان أي حد عايز أي حاجه يروح وكالة الرويعي.. بخور من الصومال تلاقي حاجات من الهند شغال، شغل يدوي من الحجاز مفيش مشكلة حاجات من المغرب وإيطاليا مفيش مانع كانت حاجه كده زي الشركات عابرة القارات اللي بنسمع عنها الأيام دي.. تمر الأيام والسنين والمنطقة المحيطة بوكالة الرويعي تتغير ملامحها بركة الأزبكية تتردم، ميدان العتبة يظهر للوجود، ما هو الخديوي إسماعيل كان صاحب رؤية ونظر الصراحة وبقت وكالة الرويعي في قلب أشهر ميدان تجاري في مصر ميدان العتبة الخضراء والموسكي...

ومع تطور الدنيا مبقناش نتاجر مع الهند مباشرة ولا نجيب حاجه من الصومال والوكالة يوم ورا يوم نورها بيطفي، ورثة باعت نصيبها وناس اشترت، بيوت اتهدت ومحلات طلعت. وفي السبعينات وما أدراك ما



السبعينات اتحول الرويعي لأهم مركز لبيع مستلزمات تشطيب الشقق والعمارات والناس رايحة جايه الرويعي شايلين آخر ما وصل إليه العلم الحديث من كوالين بيان الشقق ومقايض الشبايك ومفاتيح الكهريا وفضل الناس يقولوا الرويعي.. الرويعي.. الرويعي لكن حد فيهم كان عارف الرويعي؟ طبعا لا مع إن الراجل عاش ومات ولقبه هو «شهيندر التجار» حاه كده ولا وزير يعني وكان الناس لما يتكلموا معاه يقولوا عليه الوجيه الأمثل والجناب العالي مستجمع المفاخر والمعالي عين أعيان السادة التجار بمصر المحروسة والأقطار الحجازية.. مش بقولكم حاه معتبرة ومفتخرة يااااه كام رويعي كان في مصر وكام غريب حضنته مصر وكام شارع وحارة وحي بأسماء ناس إحنا منعرفش قصتهم ولا حدوتتهم!! مصر دي بلد العجايب وحصن الغريب.. آه زي ما بؤلك كده.

# حكاية التروماي / الترام / الترامواي

السنجة وقعت يا اسطى.

شوف يا عزيزي شوفي يا عزيزتي.. أنا طالبة معايا أتكلم عن حاجات مبقتش موجودة في حياتنا، سموها نوستالجيا قولوا عليها حنين للي فات قولوا اللي يعجبكم بس أنا قررت اتكلم عن السنجة اللي وقعت ورا يا اسطى، والسنجة دي مش الحاجات اللي بنشوفها في خناقات البلطجية لا سمح الله، لأ السنجة أو السنكة دي اللي كانت بتبقى متعلقة في الترامواي علشان توصله كهربا، إيه بقى حكاية السنجة والترامواي معانا؟

في نهاية القرن التسعتاشر كانت القاهرة باريس الشرق قررت إنها تمد خط ترامواي كهربائي وده كان في سنة 1894 واللي أخذت الامتياز ده شركة بلجيكية محترمة وكان مركز خطوط الترامواي أو الترام هو ميدان العتبة الخضراء وكان عدد خطوط الترامواي ستة، كلهم بيبدءوا من العتبة. الخط الأول من العتبة للقلعة والثاني لباب اللوق والثالث الناصرية والرابع العباسية والخامس مصر القديمة والسادس للروضة.. حازه كده أيامها كانت خيال والأجرة كانت ستة مليم.. يا بلاش!

وفي 1 أغسطس 1896 كانت الحفلة التجريبية اللي حضرها مندوبي الشركة وكبار البلد وكبار الموظفين، العتبة يومها متقولش بقى زينات وكهارب وحلويات بتتوزع وأول ما الترامواي اتحرك.. العيال جريت وراه وقعدت تصرخ وتقول: العفريت.. العفريت.. ما دي كانت أول مرة يشوفوا عربية بتمشي بالكهربا.

الترامواي بقى يا حلوين كان حدوتة أيامها ربط القاهرة ببعضها وخلي المسافات أقرب، ومفيش فيلم فيكي يا مصر لحد الثمانينات مكانش الترامواي عنصر فيه أو بيظهر فيه، ومع الوقت الترامواي دخل الزمالك وبولاق والجيزة وأخيرًا شبرا واللي كانت الأراضي فيها ببلاش بقت بفلوس ما هو الترامواي دخلها خلاص والمسافة بقت قريبة.

أكثر ذكرى عايشه جوه الجيل اللي عاصر أواخر زمن الترامواي هي السنجة البتاعة اللي فوق عربية الترامواي اللي بتوصله كهربا كثير كانت تقع، كان الركاب يصرخوا «السنجة وقعت يا اسطى» يقوم السواق أو المساعد بتاعه

نازل ومرجعها مكانها بعصايه طويلة.. ويرجع الترامواي يتحرك من تاني شايل الناس وهمومهم وتفاصيلهم.

الصراحة الترامواي أو الترام زي ما بتوع اللغة العربية بيحبوا يقولوا عليه قابله هجوم كبير.. آه زي ما بؤلك كده ليه بقى؟ لأن فيه ناس شافته قطع رزق الحوذية! اللي هما مين الحوذية دول؟ حد كده مصصح يسألني علشان أجاب... من غير سؤال طيب الحوذية دول هما بتوع الحنطور والكارو لا مؤاخذه ما هو الحنطور والكارو وسيلة المواصلات الأساسية قبل الترامواي ودول بقوا عملوا حملة ضد الترامواي وخوفوا الناس من الكهريا وطلعوا إشاعات إن الترامواي رجس من عمل الشيطان وإن الترامواي بيسهل خروج المرأة من البيت دون علم جوزها، آه وربنا قالوا كده بس على مين؟ الترامواي نجح وفضل موجود وعاش فترة طويلة في مصر وكان السبب في إنشاء حي المعادي وحي مصر الجديدة أو هليوبوليس زي ما كان بيتقال عليها الأول؛ لأن الترامواي سهل حركة الناس من قلب القاهرة للأماكن الجديدة دي. عاش الترامواي على قد ما عاش وسطينا واختفى في غفلة من الزمن بس فضلت «السنجة وقعت يا اسطى» هي الحاجة الوحيدة اللي فاضلة منه.

# الولس اللي هزم عرابي وممكن يهزمننا

وأنا قاعدة لا بيا ولا عليا كده، وباتفرج على مسلسل تاريخي مش فاكرة مين فيه ولا ليه لقيت مشهد جميل كده، خير اللهم يجعله خير.. عرابي باشا واقف بحصانه الأبيض والخديوي توفيق واقف على رجليه كده عادي وببيص لعرابي اللي فوق الحصان وعرابي بيقول خطبته الشهيرة بتاعت: لقد ولدتنا أمهاتنا أحرارًا.. مشهد مؤثر يخلي الجسم يقشعر، وبعد ما القشعرة راحت والتترات نزلت، قلت في عقل بالي: هو ده حصل بجد؟ مش اهدي كده واسكت وانام، لا قعدت ادور وابحث وابحث بجد يعني مش هزار ولقيت إن ده عمره ما حصل. لا عرابي قاعد على حصانه الأبيض ولا الخديوي توفيق كان واقف قدامه زي التلميذ الخايب، بس اللي اتأكدت منه إن اللي هزم عرابي «الولس» مش حاجه تانية، ودي بقى حدوتة تانية خالص.

الولس كلمة عربية سليمة 100% مع إنها تدي على عامية بس والله المعجم بيقول إنها عربية سليمة بس زيها زي كلام كثير انتقل من الفصحى للعامية من غير لا إحم ولا دستور والولس يعني الخيانة، الغدر، عدم الأمانة، والولس بقى اللي هزم عرابي كان عبارة عن واحد ضمن جيش عرابي كان بينقل تحركات جيش عرابي أول بأول للجيش الإنجليزي. وده طبعا غير الولس اللي كان جاي من الخديوي توفيق، والولس الجامد أو ووي اللي عمله الخليفة العثماني لما أصدر مرسوم بعصيان عرابي، وفي يوم وليلة عرابي بعد ما كان بطل شعبي وقائد واقف قصاد جيش الاحتلال بقى خاين في نظر ناس كثير، وطبعًا ولس ديليسبس اللي سمح لسفن الإنجليز بعبور قناة السويس وده خلى الجيش الإنجليزي يطوق جيش عرابي، وكانت معركة التل الكبير اللي لعب فيها الولس دور كبير، وكانت خسارة كبيرة لعرابي ولمصر قبل منه.

اللي حصل مع عرابي بعد كده درس تاريخي مهم لأن بعد الهزيمة والنفي ورجوعه للوطن لقي معاملة سيئة من أهل وطنه، وطنه اللي دافع عنه وحاول يمنع الاحتلال!! للأسف عرابي مات في صمت وبعد سنين قدرنا نعرف قيمته ودوره والناس والتاريخ رفضوا يفتكروا اسم الخاين اللي كان وسط

جيش عرابي وقالوا عليه «الخنفس» دليل احتقارهم وعدم رغبتهم حتى في إنهم يقولوا اسمه...

لكن الغريب إن الولىس مخلصش، الولىس لسه موجود وسطنا ماهو الولىس ده سبب بلاوي كتير في حياتنا مش بس هزاييم عسكرية أو خسائر اقتصادية.. لأ الولىس موجود وعائش، الولىس موجود في موظف معندوش ضمير بيصعب حياة المواطن، الولىس موجود لما تلاقي كوبري لسه معمول من شهر وبيقع. الولىس موجود لما عمارة تقع على ناسها وهي لسه جديدة، دي المحارة بتاعت الواجهة لسه مانشفتش يا عالم، الولىس موجود وهيفضل موجود للأسف مش علشان إحنا معندناش كفاءات ولا علشان إحنا أقل علمياً أو مادياً من أي دولة تانية، لا، لأننا ببساطة لسه الولىس فينا ووسطينا، يوم ما الولىس ينتهي مصر هتبقى زي الأول واحسن.. ودي الحقيقة.

# كوبري قصر النيل.. أول كوبري فيكي يا مصر

مصر بلد الأهرامات بلد التاريخ والحضارة ومصر بلد الكباري! إحنا تفوقنا في الكباري بشكل غريب الصراحة فيه إحصائية بتقول إن عندنا فوق الخمسين كوبري وده قبل 2012 وناس تانية بتقول أكثر وناس بتقول أقل.

بس الحياة بقت كلها كباري لدرجة إن مصطلح كوبري اتطور في مصر مبقاش بس بيتقال على الكوبري اللي بتمشي عليه العربيات لا خالص، وحياتك بيتقال ساعات لما حد ياخد حد كوبري علشان يوصل لحاجة معينة، بيتقال لما لعب كورة صايع يلسع منافسه كوبري بالكورة، الكوبري بقى أسلوب حياة خلاص مش مجرد وسيلة لفك الزحمة والاختناق المروري لدرجة إن أول حل بتفكر فيه الدولة هو الكوبري، كوبري لأي حاجة وفي أي حاجة، حتى في الاقتصاد بقى فيه كباري.. في التعليم كباري.. ما هو الكوبري بقى أسلوب حياة مش وسيلة لحل أزمة ما علينا.. ولأن الكباري بقت مهمة كان لازم نفكر كده مين صاحب أول كوبري فيكي يا مصر؟ وأول كوبري في المحروسة كان فين؟

بعد البحث والتنقيب لقينا إن كوبري قصر النيل هو أول كوبري بالمعنى الحديث يتعمل في مصر وطبعًا كان من بنات أفكار الخديوي إسماعيل أبو القاهرة الحديثة الراجل ده حدوته لازم في يوم تتحكي بأمانة وصدق وضمير، الكوبري ده اتكلف يا سيدي 110 ألف جنيه بفلوس أيامها، ودي فلوس كتير لو تعرفوا حتى بأسعار زمان كوبري فخم معتبر شيك يليق بمصر وبالخديوي المبهور بباريس وفرنسا أربع أسود حارسين مداخل ومخارج الكوبري، الكوبري نفسه عرضه عشرة متر.. الراجل كان يفكر لـ100 سنة قدام.

الكوبري صممه ونفذته شركة فرنساوي وقعدوا سبع سنين شغالين فيه وكان الافتتاح سنة 1871 وكان الكوبري الوحيد في البلد اللي كان مفروض عليه رسوم عبور.. لأن مفيش غيره الناس تستخدمه للعبور بين ضفتي النيل أي حد ماشي على رجله ربع قرش.. راجل أو ست ما عدا الأطفال دول ببلاش والغزلان ببلاش والفتيات الحسان أيوه الغزلان أيام ما كانت مصر فيها غزلان وطبعًا فتيات حسان، العربيات لو فاضية قرش لو مليانة قرشين..

الكوبري ده اتسمى كوبري قصر النيل لأن من جهة ميدان التحرير اللي أيامها مكانش ميدان التحرير كان فيه قصر مبني لبنات محمد علي اتحول بعد كده لثكنات للجيش الإنجليزي، وبقى مكانه دلوقتي مبنى جامعة الدول العربية علشان كده الناس قالت على الكوبري.. كوبري قصر النيل.

وبعد 60 سنة كده من إنشاء الكوبري الملك فؤاد قرر يجدهه قام شايل الكوبري القديم وعمل واحد جديد وسماه كوبري الخديوي إسماعيل وأطلق على الميدان القريب من الكوبري.. ميدان الإسماعيلية اللي بعد ثورة يوليو 1952 بقى ميدان التحرير.

وكوبري قصر النيل فضل واقف في مكانه شاهد على التاريخ والزمن، الكوبري للأمانة حدوتة حلوة تتحكي، حدوتة عن مصر اللي كانت دايماً الأولى.. الألفة في كل حاه، مصر اللي كانت سابقة العصر والزمن بزمن بس ما علينا مش هي دي القصة دلوقتي القصة إن الكباري ليها تاريخ وأصول وتفصيل، والأهم ليها دور ومعنى مش أي حاه نخط كوبري أو نعملها كوبري.. الكوبري الصحيح في المكان الصحيح.. من فضلكم.

## حكاية التاكسي

من كام يوم كده قلت بلاها سواقه في الزحمة واخذ تاكسي؟ عادي يعني.. حقي كمواطنة مصرية صميمة وقفت يا اختي تقوليش ساعة إن حد يعبرني... أبدًا طالت الوقفة يا اخويا؟؟ تقولش عدى عليّ الدهر وأكل وشرب، كمان كل ما أقول لتاكسي المهندسين.. يبصلي السواق من فوق لتحت ولا اللي قتلت أبوه مثلاً، المهم قررت أروح بلاها مشاوير، بس سألت نفسي سؤال لولبي لوذعي هي إيه حكاية التاكسي مع مصر؟ وليه الناس قافشة على التاكسي كده وسواقينه؟ وليه سواقين التاكسي في مصر قافشين على الزباين؟ من غير دخول في تفاصيل بتحصل وهتحصل أنا هاحلكم حكاية التاكسي في مصر علشان ناخذ عبرة.. كلنا.. آه كلنا.

في الأول كانت وسيلة المواصلات الأساسية للشعب المصري هي الحمار أيون الحمار.. زي ما بؤلك كده، وكان صاحب أي حمار بيشتغل في نقل الركاب، كان لازم يطلع له رخصة ومع التطور بقى فيه الحنطور اللي مش أي حد يركبه بردو، كان ركوبة ذواتي حبتين وغالية، قوم إيه طلع راجل اسمه سوارس وعمل حناطير شيك كده وعمل لها موقف في قلب ميدان الأوبرا والسوارس كانت حناطير بس حاهه آلاجه كده، ومن غير ما تسألني هي السوارس اللي خبطت الست أمينة في فيلم «بين القصرين» وختل سي السيد أحمد عبد الجواد يطردها من البيت وقال جملته الشهيرة «السوارس يا أمينة»!!! ولأنا شعب بيحب الجديد واحد تاني قام عامل مشروع اسمه «زينب هانم» مين زينب هانم دي؟؟

محدث يعرف بس المشروع كان عبارة عن حناطير شيك ومخصصة للستات بس حاهه كده زي التاكسي البنك اليومين دول، وظهر أخيراً التاكسي قبل القرن العشرين بكام سنة، وكان عددهم ثلاثة بالضبط في ميدان الأوبرا، كانت ركوبة الباشاوات واللي عايز يعمل فيها ابن باشا، ومع الوقت عدد التاكسيات بدأ يزيد من ثلاثة لعشرة ومن عشرة لتلاتين وهكذا، وسيطر التاكسي على الوضع وبدأت السوارس وعربيات زينب هانم وحاجة كده كان اسمها الأمنيوس يختفوا، احتجوا آه اعترضوا آه بس دي سنة الحياة والتطور وبقي التاكسي وسيلة المواصلات الأساسية مع الترامواي.



تعدي السنين يا مؤمن والأيام والتاكسي اللي كان لونه أسود يبقى أبيض  
في اسود والحكومة تلزم السواقين بتركيب العداد علشان تحافظ على حق  
السواق والراكب في نفس الوقت، ولأننا شعب فهلوي حاولنا نلعب في العداد  
في الأول مكانش فيه ورشة لتصليح العداد غير واحدة بس ملك راجل إيطالي  
بس كان بيرفض يلعب في العداد، وهوب كترت الورش وهوب اللعب في  
العداد بقى على ودنه، قوم الحكومة تعمل موضوع التاكسي الأبيض علشان  
تحافظ على حق السواق والراكب بردو بس يا ترى هي الحدوتة كده خلصت؟  
الصراحة لا، لازم كلنا نفتكر السوارس وعربيات زينب هانم وإن الزبون دايمًا  
على حق وإنه عايز يبقى مرتاح وراضي ولو لقي خدمة تانية بتعامله باحترام  
هينسى.. زي ما نسي السوارس وزينب هانم والأمنيوس وخلينا فاكرين ده  
كويس.. علشان ساعتها منرجعش نزعل من بعض زي ما بؤلكم كده.

# سوق باب اللوق.. أول مول فيكي يا مصر

زمان أيام ما كانت الدنيا لسه فيها خير قبل ما نسمع عن إن الخضار وحش وفيه اللي فيه وإن الأكل مش عارف ماله وحاسبي من الخيار والكوسة علشان حرام والكلام الكثير اللي بقى مالي حياتنا وأيامنا، زمان بقى مكانش فيه الكلام ده لا كان فيه معلبات ولا مواد حافظة ولا فيه خوف من البروتين الحيواني أو النباتي الناس كانت عايشة كده بالبركة، الأسواق في الشوارع والدنيا سهيلة وآخر حلاوة، أيامها مكانش فيه أمراض من اللي بنسمع عنها والعياذ بالله بس مع بداية القرن العشرين كده كان فيه أوبئة الناس بتروح فيها بالآلاف زي الكوليرا، قوم الحكومة فكرت في إيه بقى؟ فكرت في أسواق مغطاة على الطراز الأوروبي حاجه معتبرة وشيك محلات الأكل جنب بعضها ومنظمة والأسواق مضاءة بالغاز أو الكهرباء أيهما أرخص وأقرب وكمان بيتم حفظ الخضروات بطريقة التبريد الجديدة ويا سلام بقى لو فيه فرع لبنك صغير جوه السوق ومكتب تلغراف وتليفون عمومي يبقى كده اتعشت، الكلام ده اتخط موضع التنفيذ في سنة 1911 واتعملت شركة رأسمالها 30 ألف جنيه مصري حته واحدة وكان هدفها إنشاء أول سوق حديث ومغطى في مصر واختاروا سوق باب اللوق ليه بقى؟ علشان أيامها كان ميدان باب اللوق مركز تجمع خطوط الترامواي يعني الناس تروح وتيجي من السوق ببساطة وسهولة ممكن تيجي من حلوان أو الجيزة أو الزمالك يعني من أي مكان في القاهرة وكمان كان فيه سوق موجود ومساحته كويسة وكان مبني من أيام الخديوي إسماعيل، وهووب بدأ الشغل واللي صمم السوق جوزيف قطاوي ابن عيلة قطاوي الشهيرة، وهو كان خريج هندسة باريس وشارك في تصميم محطة مصر بالإسكندرية زي ما بيقلوا وعيلته كمان كانت من كبار ملاك أسهم الترامواي يعني كلها مكاسب من كل ناحية، وخط تصميم السوق على شكل حدوة حصان، وكان من دورين الدور الأرضي لمحلات الفاكهة والخضار واللحوم والدواجن والدور الثاني مكاتب إدارية للشحن والتفريغ وفرع لبنك ومكتب تلغراف وتليفون، وبالمره قالوا نعمل مخابز فرنساوي وقهاوي شيك كده لزوم راحة الناس، وعملوا بدروم كبير لزوم التبريد والتخزين طيب

بذمتكم ده مش شبه أي مول موجود دلوقتي؟ الكلام ده كان من أكثر من 100 سنة سوق باب اللوق كان أول مول في مصر بالمعنى الحديث لأيامنا، السوق شاف أيام عز أيام ما كان الزبون عادي يلاقي المانجه في يناير والفراولة في الصيف وده كلام جريدة الأهرام أيامها، وكان للسوق اشتراطات صحية زي أوروبا بالظبط حاجه كده فوق الخيال، وبعد أيام العز كان لازم يبقى فيه أيام وحشة، السوق اتدهور البدروم اللي كان مخزن للتبريد اتردم الدور الثاني حالته اتدهورت، معظم المحلات قفلت والواجهة الجميلة للسوق اختفت ومع الوقت اتحول السوق لأنقاض وبقى شيء لا يحتمل، خسارة أول مول فيكي يا مصر يبقى ده حاله مع إن حاله بيحكي حالنا إحنا في الـ100 سنة اللي فاتت.. زي ما بؤلك كده.

## رفعت العلم يا عبد الحكم

تعالي بقى كده في الكلوز وقولي: كام مرة سمعت جملة رفعت العلم يا عبد الحكم؟

كام مرة؟

ولا مرة؟

معقولة.. ولا مرة ولو بالصدفة؟؟؟

طيب كام مرة سمعت جملة.. محمد أفندي رفع العلم؟

أكيد دي سمعتها خصوصًا لو اسمك محمد يعني طيب مفيش مرة سألت نفسك علم إيه؟ وعبد الحكم مين؟ ومحمد أفندي مين؟ اللي رفعوا العلم أنا أقولك بقى حكاية عبد الحكم اللي رفع العلم اللي هو أصلًا محمد أفندي... آه زي ما بؤلك كده ما هو الاتنين واحد.

الصراحة الحكاية إن مصر لما كانت تحت الاحتلال الإنجليزي وفي يوم 14 نوفمبر 1935 قرر الطلبة التظاهر اتجمعوا في شارع المدارس اللي هو شارع الجامعة دلوقتي طلبة حقوق، طب بيطري، المدرسة السعيدية، مدرسة التجارة، طلبة آداب، طلبة كلية البنات، مدرسة الصناعات والفنون وغيرهم طوفان من الطلبة بيهتف بحرقه « يسقط هور ابن التور » وهور ده بقى كان مسئول إنجليزي مهم أيامها، المهم بوليس الجيزة لأنه عارف إن الطلبة رايعين وسط البلد قام سايبهم وفضل مأمّن المظاهرة لحد نص كوبري عباس، أيون كوبري عباس اللي غنى له عدوية «على كوبري عباس ماشية وماشية الناس..

ماشية تبص عليك يا فروته وأناناس» وفي نص الكوبري قاموا مسلمين المظاهرة تسليم أهالي لبوليس القاهرة وخلعوا هما، قوم إيه بقى قررت الحكومة إنها تفتح كوبري عباس قبل ما المظاهرة توصل للقاهرة بس الطلبة تسكت؟ أبدًا..

قاموا قافلين الكوبري ثاني وطوفان الطلبة اللي بيهتف لمصر والاستقلال بقى في نص الكوبري وكان قرار رسل باشا حكمدار القاهرة هو الضرب في المليان، وكان ضمن الطلبة محمد أفندي عبد الحكم الجراحي وفي وسط

الضرب رفع محمد أفندي العلم علم مصر علم الاستقلال في وش الجنود الإنجليز اللي قام ضابط منهم اسمه «ليز» بضربه بأربع رصاصات رفع محمد أفندي العلم بس وقع بعدها بثواني وسط زمايله، نقلوا محمد أفندي عبد الحكم لمستشفى القصر العيني فضل شوية أيام ما بين الأمل في إنه يعيش واليأس في نهاية حياته.

وكانت النهاية أسرع من أي حاحه واتجمع الطلبة في حوش القصر العيني وكانت جنازة محمد أفندي اللي رفع العلم جنازة مهيبة جنازة شعبية كانت جنازة محمد أفندي أكبر رد من الطلبة على جنود الاحتلال وكان الهتاف يومها رفعت العلم يا عبد الحكم، الاستقلال التام أو الموت الزؤام، نموت نموت وتحيا مصر، بس الغريب يا جماعة إن فيه زميل تاني مات قبل محمد أفندي بيومين كانوا راقدين في نفس الأوضة في القصر العيني الزميل ده اسمه «علي طه عفيفي» أيون نفس اسم بطل رواية القاهرة 30 لنجيب محفوظ على طه اللي كان يحلم باستقلال مصر من الاحتلال الإنجليزي ومن يومها بقى الشعار.. محمد أفندي رفع العلم أو رفعت العلم يا عبد الحكم بس لأننا بننسى، بننسى حتى أجمل لحظات فخرنا وعزتنا، نسينا محمد أفندي عبد الحكم ونسينا على طه مع إن تضحيتهم كانت مهمة وضرورة لرحيل الاحتلال الإنجليزي عن مصر بعد كده.. آه زي ما بؤلك كده.

## ش ش ش شقاوة شباب شبيرا

ش ش ش.. ثلاثة شين مرة واحدة مين بقى ماسمعش عن ش ش ش؟ شقاوة شباب شبيرا... يا عالم شبيراوية أنا وأفتخر الصراحة. وبما إننا قاعدين بنتسامر مع بعض حبيت أفتخر بشبيرا ما هو في الأصل شبيرا دي حدوتة حلوة لازم تتحكى، الحدوتة بدأت لما علي باشا الكبير قرر بيني قصر جميل كده فاختر حنة على ضفاف النيل اللي هي شبيرا، بنى قصره في شبيرا وبعدها حس إن الحدوتة مش كاملة كده قام عمل طريق واسع من كوبري اللمون اللي هو باب الحديد اللي بقى ميدان رمسيس بعد كده طريق واسع من رمسيس لحد القصر طريق مزروع بشجر الجميز واللبخ، وشجرة اللبخ دي يا جماعة كان ليها زهرة حلوة ريحتها جميلة وشكلها مميز، قام الناس سموا الزهرة دي «دقن الباشا» علشان شكلها الغريب والجميل وحوالين القصر عمل محمد علي جنينة كبيرة زرع فيها شجر من أوروبا وآسيا وكان عنده موظف درس في أوروبا اسمه يوسف أفندي، قام يوسف أفندي اقترح إنه يزرع شجرة جديدة بتطلع فاكهة حلوة، وجديدة على مصر، وكانت شبيرا أول مكان فيكي يا مصر تعرف «اليوسفندي» أو «اليوسفي» أو «اليوستفندي» بالبلدي كده مش بقولكم شبيرا دي حدوتة وحكاية. راح محمد علي باشا وفضلت شبيرا مكان جميل للفسح والخروجات بس مين جه اسم شبيرا أساسًا؟ الناس بتقول إن الاسم له أصل قبطي هو «شبرو» يعني التل ويمكن ده سبب إنها حاضنة لعدد كبير من المصريين الأقباط! الله أعلم، بس شبيرا اتحولت مع الوقت من مكان للفسح والخروجات لمكان سكني مهم. كان محمد علي باشا -الله يرحمه- راجل عنده بعد نظر يعمل شارع كبير يعيش سنين يستحمل كثافة السكان ويقوم باني قصر فيه يلاقي الناس جايه تبني جنب الباشا وده اللي حصل، الباشوات والأعيان بدعوا بينوا في شبيرا قصور كبيرة زي قصر زينب هانم بنت محمد علي قصر إنجه هانم أرملة محمد سعيد باشا والي مصر وغيرها من القصور.

وكانت شبيرا على ميعاد ثاني مع الخديوي إسماعيل اللي شق عدد من الشوارع في شبيرا واعترافًا بأهمية شبيرا مدت الشركة البلجكية خطوط الترامواي لشبيرا وكان يمشي في شبيرا أكثر من خط للترامواي خط 8 وخط 9 وخط 16 وخط 21 أيام بقى أيام كانت معظم شوارع شبيرا منسوبة لأسرة

محمد علي باشا اعترافًا بالفضل لأنه منشئ حي شبيرا ومع ثورة يوليو اختفت أسماء عدد كبير من الشوارع مع إنها تاريخ بس ما علينا وفضلت شبيرا؛ تتوسع وتكبر لدرجة إن سكانها بقوا يقولوا عليها جمهورية شبيرا، أيوه جمهورية.. شبيرا مصر.. شبيرا البلد.. شبيرا الخيمة.. شبيرا المظلات، تبقى جمهورية ولا لأ يا متعلمين يا بتوع المدارس؟! بس مين أول واحد قال: ش ش ش.. شقاوة شباب شبيرا الصراحة محدش يعرف، وكتب التاريخ مهتمتش تحكي لنا قصة ش ش ش بس أكيد إنه كان شاب شبيراوي معجباني بنفسه وبشبرا وقف وقال أنا من شبيرا ولما سألوه يعني إيه قالهم: يعني شقاوة شباب شبيرا. وبالمناسبة دي وللمرة الثانية أحب أقولكم: أنا شبيراوية وأفتخر.. آه زي ما بؤلكم كده ملخص: ش ش ش.. شقاوة شباب شبيرا وحكاية حي شبيرا.

## فيلا أحمد رامي

لو انت من عشاق الست.. الست أم كلثوم يبقى أكيد هتعرفه ولو انت بقى من أصحاب المزاج العالي وبتتفرج على حفلاتها في التلفزيون هتبقى فاكر شكله، راجل كده نحيف.. سفيف قاعد دايمًا في الصف الأولاني هايم وسارح مع صوت أم كلثوم أيوه.. شاعر الشباب أحمد رامي الراجل ده حدوته في تطور الغنا المصري ما ينفعش تتكلم عن الغنا من غير سيرته بس النهارده هنتكلم عن حازه غير مشواره الفني، الصراحة هنتكلم عن فيلا أحمد رامي المكان اللي عاش فيه حياته وقابل فيه أم كلثوم وعبد الوهاب وغيرهم كثير من نجوم الفن والغنا، الفيلا رقم 4 شارع محمد نبيل السباعي في حدائق القبة.

رامي كان مستأجر الدور الثاني ومكانش يحلا ليه الكتابة إلا في البلكونة وهو لابس الروب دي شامبر حازه كده آخر شياكة الفيلا دي مهددة بالانهيار والنسف أيوه بتقع ومحدث ببسأل فيها زيها زي غيرها من المباني الأثرية اللي كل يوم بتروح مننا فيلا أم كلثوم قبلها وقبلهم كثير وبعدهم شكلهم هيكون فيه أكثر، الصراحة حال الآثار في مصر لا يسر عدو ولا حبيب، ناس بتبيع الهرم بالحطة وناس بترمم المعابد بالأسمت والجير، ولا الكوميدي أكثر لو حد قرر يرمم تمثال فرعوني في أحد المعابد رجله مكسورة قام ضارب رجل تكعيبة المنظر والشكل، يا جماعة اللي بتعملوه ده يخلي العالم يحجر علينا وش ماهو مش طبيعي يبقى عندنا آثار إسلامية ومباني أثرية من كل حقب التاريخ ونضيعها بالشكل ده، ده حتى الجو معاند معانا يوم تعامد الشمس على وش رمسيس.. الشمس حلفت ماهي طالعة بتقولنا لا بالعند فيكم ياللي مضيعين الآثار وهيبته، الموضوع مش بسيط ولا سهل كام فيلا أثرية اتهدمت في العشر سنين اللي فاتوا؟ كام مبني أثري مهمل ومهمل بالقوووي كمان يا راجل ده إحنا حرقنا المجمع العلمي اللي من أيام الحملة الفرنسية.

الصراحة الموضوع مفيهوش أي كوميديا غير الكوميديا السودا وبس عندك قصر الجوهرة اللي جوه القلعة خلاص بيعق فين وزارة الآثار؟ فين وزارة الثقافة؟ مفيش حد صاحي القصر مبني من أيام محمد علي وتحفة معمارية



خلاص حرفيًّا بينهار حتى ساحة القصر اتعملت باركينج.. باركينج يا عالم؟! استراحات الأسرة العلوية الموجودة في الصعيد حد يعرف عنها حاجة؟ حد يسمع عنها حاجة؟ بلاش.. استراحة الملك فاروق اللي في الهرم حد مهتم بيها؟ بلاش دي.. بيت ساكنة بك.. هي اسمها كده اللي في حي طولون حد اهتم بيه؟ حد صوره؟ حد وثق تراثه المعماري ولا الهوا يا معلمي محدش مركز ومحدش فايق ومحدش عارف تاريخنا بينهار قدام عينينا هنقول إيه للأجيال الجايه؟ كان عندنا هرم واتباع بالحتة؟ كان عندنا آثار بس هديناها علشان نعمل مولات؟ لا بجد نقول إيه للأجيال الجايه؟ الصراحة لو عايزين مستقبل مصر يكون أحسن لازم نحافظ على تراثها، لو عايزين مصر تكون أفضل لازم نحمي آثارها لو عايزين مصر تبقى قد الدنيا لازم لازم نحافظ ع اللي فاضل من تاريخها.



الونش اتسرق واختفى ولحد النهارده محدش يعرف الونش راح فين؟ ناس تقولك ده اتسيح واتباع حديد خرده وناس تقولك لا ده اتهرب بره مصر!! ولما تسأل: يتهرب إزاي ده ونش؟ يرد عليك: دول مصريين يا عم.. جابرة راح الونش!! وفي عام 1987 تم افتتاح خط مترو الأنفاق الأول من رمسيس لحلوان وبعدها بكام سنة افتتح الخط الثاني من رمسيس للمرج وشوية بقى عندنا خط شبرا وخط الجامعة وخط تالت ورايع جاي في السكة، عدت سنين كثير يا عمي؟ أيوه قربنا على ثلاثين سنة من افتتاح أول خط مترو أنفاق في مصر ومحدش لحد النهارده عرف مين اللي سرق الونش.. آه زي ما بؤلك كده ملخص: مين اللي سرق الونش.. حدوتة مترو الأنفاق في مصر.

## 3 ستات جدعات

ببص الصبح لاقيت حد باعتلي مقال وكاتبلي لازم تقريه قلت وماله وقريت  
وقلت لازم أشارككم اللي قريته، بيقولك يا سيدي في واحدة من قرى دلنا  
مصر المحروسة 3 ستات زي القمر مها وانتباه ونشوى ال3ستات الجدعات  
دول أعمارهم فوق ال55 سنة مايمتلكوش من حطام الدنيا أي حاجه ولا الهوا  
بمعنى الكلمة أيديهم وبس قوم يعملوا إيه علشان يتحايلوا عالمعايش ينزلوا  
ترعة بلدهم وبأيديهم الفاضية يتعلموا يمسكوا السمك وهو عايم أي والله  
العظيم زي ما بؤلكوا كده، اتعلموا يمسكوا السمك بأيديهم من غير لا سنارة ولا  
شبكة ولا يحزنون هوب بأيديهم ويحطوه في حجر الجلاية ويربطوا عليه وبس،  
وهكذا التلاتة على ده الحال لحد ما رزق ربنا يبجي وحجر الجلاية يتملي  
يطلعوا من قلب المايه ويروحوا على الطريق لا معاهم قفة ولا حيلتهمش  
فرشة حتى، يقفوا يشاوروا بالسمك للي ماشيين عالطريق ويطلعوا من  
حجرهم ويبيعوا اللي ربنا جاد بيه ويروحوا باللي كسبوه لعيالهم تصدقوا!!؟

صيف شتا برد حر الماية تلج الماية قليلة الماية عالية عليهم سنهم جنسهم  
مجتمعهم كل ده مايهمش تصدقوا بالله الدمعة فرت من عيني وبقى الود  
ودي أدور عالتلاتة وأروح أنزل معاهم وأبوس راس كل واحدة.

الحكاية أثرت فيا وملتني شجن وطاقة إيجابية في ذات نفس الوقت ونزلت  
راكبة العربية إلا والتقليلك فلق النبي حارسه وصاينه طول بعرض في أوائل  
التلاتينات عيان بالصحة ويفصلوا منه

4 أوض نوم، جاي من آخر الشارع جري وبيمارس مهام وظيفته أيوه يمين  
أبوه اكسري وره وره اكسري كله تمام على طول بأه كل سنة واتني طيبة يا  
مدام، وليكم تتخيلوا حالتي في اللحظة دي.. بس النفر برضو بيحاول يحتفظ  
بضغط دمه وشرايينه في حالة تخليه يكمل كام يوم كمان في الدنيا دي أي  
والله زي ما بؤلكوا كده.

شوية وفي الإشارة التقليلك شابة فرعة بتاعة عشرين سنة ماشية بين  
العربيات بمناديل، حبة وانا معدية والساعة عز الظهر وألاقليلك شبان زي  
الورد مالين القهوة وقاعدين عالرصيف بيشيشوا!! حبة وانا في السكة

ألاقيك فلايرز بتتوزع عالعربيات أبص في الفلاير ألقيه إعلان عن منتجات بيتي بأسعار هائلة وبجودة ممتازة وبأيادي شبان سوريين!!

هيسيسيسيح لاقيتوا أي رابط بين مجموعة المشاهد المتتابعة دي اللي ممكن تشوفها من أول ما تخرج من بيتك لحد ما توصل شغلك، بالك مالقتش حاجه أقولها غير إن الإيد البطالة... مش نضيفة مش ولا بد لأهيا نجسة الإيد البطالة نجسة، يا بشر لما إنتباه ونشوى ومها يبقوا فوق الخمسة وخمسين سنة وماحيلتهمش إلا إيد عريانة يمسكوا بيها السمك صاحي في المية وشبان بشنبات إيدهم فيها فوطة صفرا أو لي شيشة يبقى لازم نقول إن الإيد البطالة نجسة، لما الغريب والقريب يجوها ماحيلتهمش إلا إيدهم عريانة وهي في عز أزمتهما ويلقوا طريقة يكسبوا بيها ويفتحوا بيوت ويعيشوا ويعمروا وابنها قاعد يندب ويستنتع يبقى لازم نقول إن الإيد البطالة نجسة، ماتأخذونيش الجرح واجع ومعلم وغازير لجوه أوي وابن بلدي غالي عليا وكلمتين واجعني الصراحة من غيرتي عليه قوم يا جدع قوم ماتضحكش عليك عبيده.. حقة زي ما بؤلكوا كده.

## ابن مين في مصر؟

عرف عن العرب في الجاهلية اعتزازهم الكبير الكبير بزيادة يعني بالأنساب، يعني كان ممكن النفر منهم يقف يعدد ويحسب وينسب في نفسه بالساعات وأوقات بالأيام كمان أي والنبى زي مابؤلكوا كده يفضل واقف يقول هو ابن مين؟ وابوه ابن مين؟ وينتسب لمين؟ ومناسب مين؟ وابو امه من عيلة إيه؟ وجوز بنت خالة عمته كان مناسب مينين؟ وهكذا لدرجة إنه كان من أساسيات القصائد في الجاهلية بيتدوها بالغزل وبعدين الوقوف بالأطلال وبكاء الديار وبعدين الاعتداد بالحسب والنسب، راخرين قدماء المصريين كانوا يعزوا الافتخار بالنسب أوي، ودول بأه كانوا بيحبوا من الآخر يعني تلاقي الفرعون من دول يقولك إنه ابن آمون شخصياً زي مابؤلكوا كده والله، لسه هايجبلك أبوه وأمه وعمامه وجدوده؟! لالالالا من الآخر منه للإله على طول بلا وجع قلب، قوم إحنا شكلنا ولاد حلال مصفيين وارثين الطبع ده بعيله وبكل الإضافات التاريخية اللي حصلتله على طول وعرض الزمان، وده بيتجسد ويتجلى في مواقف حياتية كتير بنعيشها يومياً خد عندك أشهر جملة بنتقال على مدار الساعة وآفة المجتمع المصري الكبرى انت مش عارف انت بتكلم مين؟! ياخيتيبيبيبيبي على إنت مش عارف انت بتكلم مين!! انت مش عارف إنت بتكلم مين الجملة اللي قضت على أي محاولة تطبيق قانون، الجملة اللي أحياناً بتقضي على القانون شخصياً الجملة اللي بتختصر كل ألوان النطاقة والاستقطاع والاستهبال والرخاوة واستحلال حقوق الآخرين، الجملة اللي بتختصر الوسطة والمحسوبة والرشوة المادية والمعنوية والفساد والإرهاب، الجملة اللي قامت عليها بدل الثورة اتنين واتغير عليها بدل الدستور اتنين، وهي صامدة وباقية لا تتزحزح ولا تترنح، مافضلش إلا نشبيلها ونعملها عمل ولا ندقلها زار يمكن تنصرف وتسيينا في حالنا، أي والله زي مابؤلكوا كده.

عزيزي: (إنت مش عارف انت بتكلم مين؟) إنت ولا حد إنت ولا الهوا إنت إمعة بكل ما تحمله الكلمة من معنى، أي كائن أيّاً كان يستخبي ورا أي صفة علشان ياخذ حق مش ليه أو يفرض هيمنة أو يعلى فوق القانون أو فوق غيره يبقى ولا حد فراغ، فقدت احترامك لنفسك وفقدت احترام كل الناس ليك وماكتسبتش غير عار جلبته لنفسك، آه والكلام ده راخر ينطبق على أخوك

(إنت مش عارف أنا ابن مين؟) وده ماردش عليه رد حقيقي ومن القلب غير الزعيم لما قال (إنت مش ابن فلان إنت ابن كلب) أي والله زي ما يؤلكوا كده فئة احنا ولاد اسمالله وانتوا ولاد يعلم الله وإحنا ولاد اللي بل الندى طرطورهم كيانات طفيلية بغيضة ماتملكش أي شيء غير الغطى التافه اللي بيستخبوا بيه من عمايلهم وهو أصلاً غطى اللي متغطي به عريان يا أهل الله ياللي سامعنا، إتبني لترفعوا الغطا ده بأه عنهم والنبي 70% من بلاوي ومشاكل البقعة دي من الكون هتتحل أول ما تنتهي فكرة: (إنت مش عارف انت بتكلم مين؟) من قاموسنا للأبد لو كل نفر ماشي عالارض دي آمن تمامًا إنه مش أحسن من غيره لأي سبب هنتساوى كلنا قصاد سلطة واحدة وهي سلطة حقي وحقك، ولو كل واحد حس بجد إنه بياخذ حقه وماحدش بياخذ حق أكثر من اللي له لأي سبب هيرضى ولو وصلنا للرضى تبقى خلصت خلاص والله العظيم تبقى خلصت والله زي ما يؤلكوا كده.

# التكنو فويا

والتكنو فويا عزيزي المواطن هو الخوف المرضي من التكنولوجيا أو إرهاب الأجهزة الحديثة وده بيشمل الخوف والرعب من أجهزة الكمبيوتر والموبايل والسوشيايل ميديا وأحيانًا بيوصل للخوف من ماكينات السحب البنكية اللي في الشوارع لا أخفيكم سرًا حاسة بأعراض تكنوفوبيا داخله عليًا، آه وربنا زي مابؤلكوا كده، بقيت مينين ما ادخل مؤسسة أيًا كانت بنك بأه وزارة، مصلحة، شركة أيتها كيان بيتعامل مع الكمبيوتر ألتقيلكم ركيبي بتلف على بعضها وكرشة النفس تمسكني وعرق بارد ينزل عالواحد، أي والنبى زي مابؤلكوا كده بس انا الصراحة مابخافش من التكنولوجيا ذات نفسها بخاف وتمسكني التكنوفوبيا من حاه تانية من الجملة اياها من اللحظة اللي مدام عايده أو الأستاذ محسن أو مستر فؤاد هاييص في المونيتور اللي قدامه ويفضل يتكتك عالكيبورد وبعدين يرفع عينه في عيني ويقول باستسلام: سوري السيستم واقع ياخيتيبيبيبيبى عالرعب بتاع السيستم واقع، ألا هو البعيد السيستم بيشد ركه كده ويسترجل ويقف على حيله إمتى؟؟ لأ بجد أنا محتاجة إجابة حالًا عالسؤال ده السيستم بيقوم من وقعته السوداء إمتى؟؟ هو انتوا بتجيبوا برامج التشغيل دي أصلًا واقعة يعني تو ما تنزلوه عالجهاز هوب يقع فكده يبقى اشتغل!؟ ألا ما فيه سيستم في البلد إلا لما تلاقيه واقع أي والله زي مابؤلكوا كده، آلو لو سمحت النت بيقطع -سوري يا فندم السيستم واقع، لو سمحت عاوزه أعمل إيداع في حساب جاري واسحب من التوفير - سوري السيستم واقع، آلو لو سمحتي عاوزة ابعت الكارتونة دي ساحل العاج -معلش السيستم واقع، الموبايل اتسرق وعاوزة أرجع الشريحة - خليكي معانا يافندم السيستم واقع، آلو اتنين حواوشي و4 كبة اسكندراني و3 مكرونة بشامل وواحد كولا دايت -مهم الدايت- معلش يا أبلة السيستم واقع آه والله زي مابؤلكوا كده، خايفة أفتح .. أفتح باب الاستوديو وانا خارجة الأوكرة تنطق تقولي سوري السيستم واقع إيه الفكرة؟ ماهو يا دي أسهل حجة للتزويغ من الشغل يا إما احنا مابنعرفش نتعامل مع البعيد السيستم ده أساسًا؟ طب مثلاً هل زي ما فيه استسهال للإجابة المشهورة إياها بتاعة (اعمل ريستارت للجهاز أو اقفل الراوتر وافتحه بقى فيه استسهال (السيستم واقع) آه والله زي مابؤلكوا كده التكنولوجيا المفروض... المفروض



يعني فرصًا جدًّا إنها تدخل حياتنا علشان تبقى الدنيا أسرع وأسهل، لكن ده إحنا بقينا بطننا بتكرب يوم ما ندخل مؤسسة ونعرف إن التكنولوجيا عدت حداهم، ده غير شغل المانيوال اللي بيبقى مصاحب للشغل الإلكتروني يعني تلاقي الموظف من دول عينه متشعبطة في الجهاز والبيانات اللي بيشوفها بينقلها في ورقة!! يا إما العكس ياخذ البيانات المكتوبة في الورقة ويكتبها تاني عالكمبيوتر!!! نعم؟؟؟ ده اللي هو إيه؟؟؟ يا إما الأخ اللي يبص عالجهاز برضو وبعدين علامات الفزع تترسم على وشه وينادي يا فلان يا فلان يجوا فلان وعلان يلحقوه ويصلحوله اللي بيعمله ويكَبِّروا في ودنه وبسقوه حبة مايه ويهدوه، يكتب سطرين ووشه يصفر تاني وعينه تغرب وبترعب ويا فلان يا فلان ويجروا عليه يلحقوه، وهكذا تباغًا لحد ما تتجلط وانت واقف قصاده أي والنبى زي ما بؤلكوا كده ماهو يا ندخل التكنولوجيا بشكل صح لمؤسساتنا ونجيب اللي بيعرف يتعامل معاها برضو بشكل صح علشان تقوم بالمطلوب منها وتسهل وتقصر على عبيده يا بلاها تكنولوجيا ونرجع لزمان الدفاتر والدوسيهات والاستمارات الوسطي الجميل.

## الجودة بالموجودة

مرة حد كتب إنه كان في زيارة لكوكب اليابان الشقيق، قوم وهو هناك ومعه صديق ياباني قرروا يركبوا المترو، وهو واقف على الرصيف لقي خطوط صفرا مرسومة على الأرض فسأل صاحبه: إيه الخطوط دي؟ قوم صاحبه قاله دي خطوط بتحدد المكان اللي هيكون فيه باب الدخول لما المترو يقف، قوم المترو جه ووقف وبس لقالك الخط بعيد عن الباب يجي ب 10 سم راح قال لصاحبه: لا يا راجل ده اسمه كلام كده برضو الخط يفارق 10 سم عن الباب من باب القفش يعني والهزار إلا ويلقالك الراجل وشه يحمر ويخضر ويتقطم نصين ويعتذرله ويمسك التليفون ويتكلم ويفضل وشه في الأرض، من صاحبنا لحد ما وصلوا محطتهم إلا ويلقالك راجل كباره ببدلة وكرافته واقف على باب المترو في المحطة مستنيهم وراخر مقطوم نصين وهات يا اعتذار، وطلع من جيبه ظرف جواه اعتذار من الحكومة شخصياً واكتشف إن الراجل الكباره ده يبقى مدير المترو في الجزيرة دي كلها!! أي والله زي مابؤلكوا كده، أقولكم الكبيرة؟ صاحبنا ده لما رجع مصر جاله بوكيه ورد من السفارة وكارت مكتوب فيه: إن المشكلة تم حلها بشكل نهائي ومش هتتكرر تاني!! بغض النظر عن الجدد ده اتجلط ولابس عباية خضرا وعمة وماسك مبخرة عند ام هاشم حاليًا بس ده مايهمناش، لما افتكرت الحكاية دي وقفت عند حبة حاجات كثير. الموضوع مش موضوع أدب مبالغ فيه، ولو إنه الحقيقة أدب مبالغ فيه ولا هواش موضوع أخلاق مش موجودة غير في كوكب اليابان. ولو انه جايز يكون كده فعلاً، الموضوع موضوع انعدام الغطرسة والمكابرة والمعافرة في الغلط، الموضوع موضوع التجويد وعدم الرضا إلا بالكمال، والكمال لواحد ومش حاه أقل منه، الموضوع إن الشاطرة مابتغزلش برجل حمار؛ الشاطرة بتغزل بمغزل علشان تطلع غزل، لأن اللي هتغزل برجل حمار هتطلع حاه كل شي نكان، ونربط هنا بأه عند كل شي نكان دي، ليه كل حاه في بلدنا بقت كل شي نكان، عندنا حاجات شبه المباني حاجات شبه الشقق بنخطط حاجات شبه الشوارع، ونعملها حاه شبه الرصيف وحاجة شبه الميدان ونحط فيه حاه شبه التماثيل أهو على عينك يا تاجر زي مابؤلكوا كده، ليه بنستورد حاجات شبه البضاعة ونعمل حاجات شبه الموضة وناكل حاجات شبه الأكل وتتفرج على سيما ومسرح

وميديا وُعُنًا ورقص شبه الفن حتى الهوا اللي بنتنفسه برضو هوا على ما تفرج، ليه مابنسعاش للتجويد، بلاش الكمال يا سيدي، الكمال ده صعب وما دايم إلا وجه الله، إحنا بنتكلم في مجرد التجويد، الوصول لصورة حاه حقيقيه، مواصفه قياسيه أو حتى قريه من المواصفه القياسيه، حاه آدميه مش شبه آدميه بنتكلم في إن سقف طموحنا يعدي شويه الحته بتاعة (أحسن من مافيش) لا وربنا مافيش، أحسن صدقوني زي ما بؤلكوا كده، مافيش أحسن لأن اللي شبه الأكل ده فيه بلاوي تمرض واللي شبه الهوا ده برضو شايل مصايب، واللي شبه الشارع ده بيقتل كل يوم بشر، ولا الناموس واللي شبه الميدان واللي شبه التمثال واللي شبه الفن ده يفسد الذوق ويقتل الإحساس ويحولنا لمسوخ فاقده للتمييز وفاقده حتى للقدرة على معرفة الحلو من الوحش، ماتيجوا الأول نعترف إننا غلطانين في أكم وأكم وأكم قوم لما نعرف إننا غلطنا نحاول نصلحه وندور على شكل أحسن للغلط اللي غرقانين فيه ده، فكركوا ينفع نعترف بالغلط!؟

هيبيبيب

## الماسوشية

ودي مالهاش دعوة بالماسونية ليجبولنا ضلف المحطة واحنا قاعدين، ولا ليها دعوة بالسوشي برضو ولو انها فيها منه الحقيقة بيقولك يا سيدي الماسوشية دي هي حب تعذيب النفس، يعني النفر يتلذذ كده وهو بيدلق على روحه جاز وبولع في نفسه، يطير من الفرحة كده وهو رايح يحط صوابه في الفيشة، تبقى غية النبي آدم إنه يمرمط روحه، مرض نفسي ما يعلم بيه إلا ربنا، بس اكتشفت وانا بقرا عنه إن نسبة مش قليلة إن ما كانش كلنا عندنا لمحات كده من الماسوشية دي آه والنبي زي مابؤلكوا كده.

الصبح بتصفح أتفرج عالديا وهي عادة النبي آدم بقى مدمن عليها لا لشيء إلا لملء خزان الطاقة السلبية بتاعه، بدل ما ينزل على لحم بطنه لازم تاخذ جرعة السواد كده على غيار الريق، حبة قتل على دبح على تهجير على حروب على عالم بتاكل لحم بعض، قوم تنزل كده منتشي وتبتدي يومك بالسعادة الكافية آه والنبي زي مابؤلكوا كده رغم إنني يا ما عاهدت نفسي إنني لازم أتوب وأنوب عن هذا الجرم اللي برتكبه في حق نفسي، وابطل اتطلع على البلاوي دي ولا افتحش فيديوهات ولا اقراش عناوين ولا اتفرجش على أخبار ولا أبص على تويتات بس الكيف بيذل بعيد عنكم وعن السامعين، شكل العيشة بعيد عن الكوارث ماتلزش باين ولا إيه؟! جيت على نص اليوم وبرضو إيدي كلتني على الأخبار وعلى السوشيا ميديا وعالتويتير وعالبلاوي اللي بتجرى، دخلت أخذت الجرعة المتينة اكتتبت أخذت طاقتي السلبية، كملت يومي بطاقتي الكاملة، آه والنبي زي مابؤلكوا كده.

المشكلة إن مش دايمًا محتوى الأخبار والعناوين بيبقى بلاوي وكوارث لا وربنا، أوقات بتبقى حاجات كويسة فيديوهات لمواهب حلوة وحيوانات لطيفة أحيانًا وعيال صغيرة بيعملوا حاجات تهلك من الضحك، تامشكلة إن المحتوى الإيجابي أغلبه ياخويا ماتلاقيهوش جاي من ناحيتنا لأ 99% جاي من الجزء الثاني من العالم، زي ما يكون ما عندهم مش بلاوي ولا مصايب، مابيصدروش إلا الحاجات الحلوة آه والنبي زي مابؤلك كده، بس الأكادة إنهم راخرين عندهم بلاويهم ومشاكلهم ومصايبهم، مش ضروري يعني يكون عندهم مصايب من نوعية مواسير الصرف اللي بتضرب، بس أكيد عندهم حاجات بالنسبالهم

تعتبر مصايب أهم لقيوا تحت بلاستك في الشيكولاتة مثلًا من كام يوم أهي دي بالنسبالهم مصيبة، أيوه هي مصيبة مشوها مصيبة، القصد يعني بيقدروا يوازنوا شوية يبصوا على الحتة المليانة من الكوباية اللي مش لازم تكون نصها بالمناسبة أهو أي حتة مليانة لربما تكسر السواد الفاضي، محتاجين بجد نصالح نفسنا شوية نبص على أي حاجة عدلة ونشيرها برضو ونقول عنها كلمتين حلوين من وقت للتاني آه وربنا زي مابؤلكوا كده.

كمية السواد اللي بنصدره وبيصدرلنا في صورة أخبار وصور ونقل مباشر من موضع الكارثة بيقتضي على أعصابنا وبيدمر نفسيتنا ويحولنا لمخازن طاقة سلبية ماشية تفح في وش بعضها لحد ما أدمنا تعذيب نفسنا وتعذيب المحيطين بينا، راخرين اللي بيصيغوا الأخبار إني على قلبكوا يا جدعان تهدوا علينا شوية، والنبي الواحد من كتر ما بيشوف كلمة عاجل اللي بالاحمر دي بقى يجيله هُسهس من الكلمة، وربنا هنبقى أول شعب يجيله عاجلوفوبيا وذنبا هيبقى في رقتكوا، محتاجين نعيش بالحبة اللي فاضلين في عقولنا الله يخليكوا والنبي زي مابؤلكوا كده.

# ألوان الطيف

من أكثر التعليقات اللي بتسمعتها من أي حد يساعده وقته ويسافر بلاد الفرنجة إنه يقولك أنا شوفت ألوان عمري ما شوفتها قبل كده.

ودي حقيقة وواقع منين ما تبعد عن مصر المحروسة وتروح حنة تانية تلاقي درجات ألوان بتشوفها بعينك غير اللي عشت عمرك كله تشوفها.

وده ممكن تلاحظه حتى لما تشوف أفلام بلاد بره، إحساس إن الحاجة بتبرق كده ومغسولة غسلة بضمير!

كل حاجة؛ زرع، مباني، عربيات، شوارع، بني آدمين، هدوم، كل حاجة نضيفة ومغسولة حتى الشحاتين اللي واخدينلهم 10 لفات في غسالة المرمطة راخرين مغسولين. إني ماتسألوني إزاي،

أهو زي ما بؤلوكوا كده سكتش أنا عالْحكاية دي؟ لأ ماقدرتش، قسط الفضول فضلت تنونو في دماغي لحد ما حد ابن حلال له في الليلة دي قاللي ما هو ده عادي في المدن الملوثة. إزاااي؟؟!

قاللي يعني شوفي يا سيّي لندن اللي اسمها لندن إبان - حلوة إبان دي - الثورة الصناعية كانوا بيسموها المدينة الرمادية مش علشان عاصمة الضباب والكلام ده، لأ علشان كمّ التلوث فيها بسبب المصانع والغلايات واستخدام الفحم المفرط. خلي كل حاجة يبقى لونها رمادي حتى درجات الألوان الطبيعية اختلفت في عيون الناس بسبب ذرات الكربون والعوالق والتلوث في الهواء.

خلي انكسار الضوء اللي بيقع عالْأشياء يبقى مش طبيعي قوم يخلي درجة اللون اللي بتشوفها العين مش حقيقية، واضح طبعا الكلام ومفهوم، ومش محتاج شرح أفتر.

بغض النظر إنه فضل يشرهولي ويبسطهولي ويكتبلي على ورق ويرسملي عالْحيط وعالسبورة وأقلام ملونة وإضاءة وخلفيات موسيقية، واللي فهمته بعد مجموعة محاولات بسيطة خلت الجدع يقرر يبطل تدريس فيزيا في الجامعة، ويسرح بتين شوكي، إن التلوث اللي في هوانا خلانا نتحرم حتى من إنا نشوف كل حاجة على طبيعتها وبالوانها.

تصدقوا أي والنبي زي مابؤلكوا كده مش بس التلوث حرمانا من نسمة الهوا  
النضيفة ومش بس خلى السحاب الاسود ضيف دائم على سمانا وقصاد  
شمسنا الشمس اللي العالم كله كان بيحسدنا عليها وييجي من آخر الدنيا  
مش مصدقين إن يناير ممكن يكون فيه شمس منورة ودافية في أي حته في  
الكون تطلع فوق برج القاهرة ولا على حته عالية في القلعة ماتشوفش إلا  
خيالات للقاهرة بعد ما كنت تقدر تشوفها كلها حارة حارة ومَدَنَة مدنة.

يتهيألك إن دي شابورة أو غيامة، لكن لأ دي ستاير الهوا الملوث وعوالق  
الكربون اللي مغطية سما بنت المعز بقت حاجبة جمالها وطافية بهجتها، أي  
والله زي ما بؤلك كده.

والأمانة إنك لما تَبَحَّرَ ولا تَقَبَّلَ ولا تشرق ولا تغرب في مصر عينك برضو  
بترجع تشوف الألوان اللي مابتشوفهاش في يومك العادي في القاهرة.

كل ده جه في عقل بالي لما الأخ ليوناردو دي كابرियो اتكلم عن البيئة  
والكوكب والكرة الأرضية والتلوث في خطبته لما أخذ الأوسكار من كام يوم؟!  
بقى الراجل بعد المعاناة دي كلها لحد ما أخذ الأوسكار ما يوقافش يتنطط  
قصاد الميكرفون ويحضر في الحاج أوسكار ويبوس فيه ويقول: أهدي  
للحظة الغالية دي لبابا وماما وتيتا وخالو سعيد في كاليفورنيا؟! ويهتم  
بتوعية الناس لقضية التلوث لَهَوَّ التلوث حاجه مهمة أوي كده؟ شكله كده ولا  
إيه، ولا نسكت ونكمل في اللي احنا فيه وعادي لما نسمع إن القاهرة من  
أعلى 01 مدن تلوث في الكون بعد ما كانت أجمل مدينة في العالم، أي والله  
كانت زي مابؤلك كده.

## بره الصندوق

من المعروف إن أكثر مكانين ممكن تلاقي فيهم أكثر حلول لـ93% من مشكلات الكون هما تحت الدش ووانت مزنوق على كوبري أكتوبر.

تحت الدش الدنيا بتبقى بعيدة أوي، وتحس إنك بتخلق كده فوق أنات المعذبين على الأرض الشريرة فشايك كل حاجه رايقة وصافية وكل الحلول سهلة، وممكن علشان كده لحظة التأمل تحت الدش بتاخذ 95% من وقت الحموم، بينما استعمال الصابون والشامبو والليفة والسفنج والحجر وكل ماله علاقة بالحموم بيكون في الـ5% الباقيين آه والنبي زي مابؤلكوا كده.

المهم مش ده موضوعنا، لأنني أصلاً جاتلي لحظة الإلهام اللي بتكلم عنها دي وانا في اللقطة الثانية أيونننن زنقة كوبري أكتوبر، قاعدة في العربية ومسلمة أمري لله ومستنية المعجزة اياها تحصل وتخلي العربية تتحرك أكثر من 3 متر من غير ما ترجع توقف تاني، ربع ساعة إلا وألاقيك موتوسيكل بتاع دليفري عدى من جنبي وررررر.

ورا منه عجلة عدت وررررر، شوية واسكوتر وراح معدي راخر وررررر كل ده في الـ60 سم اللي بيني وبين الرصيف، فكرت كده في عقل بالي طب ماهي حلوة اللعبة دي مافكرتش فيها ليه قبل كده إيه لازمة أوض النوم والأنترهات اللي الناس بتتحرك بيها دي طالما 99% راكب فيها نفر واحد مالناس دي عندها حق.

فكروا بره الصندوق، وبالحاجات الصغيرة اللي راكبينها دي هايوصلوا قبل مني وقبل كل اللي متحنطين مستنيين الفرج زي حالاتي، ولجّل ما تكتمل الحبكة الدرامية يا مؤمن وانا في عز زن النحل اللي فداغي ده يوقف جنب مني سكوتر وتترفع الخوذة عن دماغ اللي لابسها إلا والتقيلك بنت آه والله زي مابؤلكوا كده.

بنوتة أمورة رفعت الخوذة وكلمتني وبعد السلامة والتحيات والإعجابات قولتلها مابتخافيش يا شابة؟ ضحكت وقالتلي لأ ده سهل أوي زي البسكلتة بالزبط بس بموتور.

إلا تقعي يا ضنايا؟ لا باخد بالي وبمشي على مهلي ولا بسة الخوذة وربنا بيستر لو هفكر في الخطر ما المشي عازّجلين خطر وركوب المواصلات





# فوت على عدوك مكسي ولا تفوتش عليه محشي

قالك يا سيدي فيما روى الراوي عن النحاس باشا رئيس الوفد وزعيم الأمة إنه كان في زيارة من زيارات الحزب لواحدة من قرى الدلتا.

قوم جاله تليفون عند العمدة إن فيه اجتماع عاجل في قصر عابدين.. قوم النحاس باشا اتترفز وقعد يضرب أخماس في أسداس ويتشال ويتحط ليه بأه؟ مش علشان مشاكل السياسة ولا تعقيدات العلاقة مع الملك والحاشية لأ نوهائي، الراجل افكر إن بدلة التشريفة عند الترزى بتتوضب ومستحيل يروح اجتماع رسمي في القصر من غير بدلة التشريفة وفي أحسن حالاتها.

المهم زينب هانم الوكيل حرمة المصون حلت المشكلة واتصلت بنفسها بالترزى اللي خلص البدلة قبل ميعاد الاجتماع زي مابؤلكوا كده.

الحكاية بسيطة وممكن تعدي بسهولة بس على مين، النحاس باشا كان ممكن يلغي مرواح الاجتماع ومقابلة مولانا بحاله علشان بدلة التشريفة مش جاهزة إيه الناس دي؟ المظهر والدقة واحترام التقاليد كان مهم ازاي كده؟؟ أمال الدهولة اللي اتدهولناها دلوقتي دي سببها إيه؟؟ حصلنا إمتى ده؟؟ يعني إيه اللي يدفع شباب طموح في مقتبل العمر بيشتكي من قلة فرص العمل قوم لما يلاقي شركة ومؤسسة عاملة إعلان طلب موظفين، قوم الشباب الكيوت ياخذ بعضه يقدم وهو ضارب التيشرت والمنطلون الجينز ودقنه أطول من بابا نوبل وشعره عامله غزل البنات!!! ولا على الناحية الثانية الشابة اللي لسه متخرجة ونفسها تثبت ذاتها وأول ما يجيلها فرصة تقدم في شغلانة تجري تأدي أداء خطوبة سعاد صاحبته في ثانوي.. مكياج عفريت العلبة وطقم ساتان لميع ومايضرش وردة بترتر على جنب كده مع سَيَع تَمَن طُرح عالراس طبقات طبقات فيونكات فيونكات بندنات بندنات مع رشة بارفان المساء والسهرة علشان الأناقة تكتمل.

والنبي بيحصل زي مابقولكوا كده حتى السي في بتاعه مايكلفش خاطره ويحطه في ظرف بلاستك من أبو ربع جنيه لأ بيحبيه تحت باطه!! ليه طاه؟؟ ده انت يا مؤمن رايح تقدم نفسك، واخذ بالك من تقدم دي، نحطها بين

قوسين ونحط تحتها خطين حمر ونمشي عليها بماركر فسفوري وممكن نعلقها فرعين نور كمان.

رايح تبتي مستقبلك رايح توري للمؤسسة اللي عندك علشان يرضوا يشغلوك ده فيه دلوقتي محاضرات ودورات تدريبية بتتاخد مخصوص في ازاي تقدم نفسك للوظيفة وازاي تكتب السي في وازاي تقعد وتتكلم في المقابلات الشخصية وتقول إيه وإمتى وازاي.. المهم إن اللي بيهمل في المظهر الخارجي ده ممكن يكون فعلاً أحسن واحد من ناحية الكفاءة أو الخبرة بس سدة النفس اللي بيعملها في نفسه دي بتخلي كل حاجه تفرط منه، آه وربنا زي ما بؤلكوا كده.

المظهر مش رفايع ولا تفاهة ولا كمان طبقية وعنصرية خالص، الإنسان في الأساس بيتاخذ الانطباع الأول عنه من خلال مظهره وأول هلة دي عارفنها؟ بعد كده لما بيتدي يهري ويفتح بؤه نبتدي نكون رأي عنه لكن لما من أولها تخش عالناس بعبك ولا تخشي عليهم بأفورتك بتقفلوا على نفسكم فكرة الانطباع الأول والثاني والعاشر، أساساً المظهر الكويس مش مكلف بالمناسبة بنطلون نضيف ومكوي وقميص زيه وجزمة سليمة ومتملمعة تسريحة شعر عادية ووش مخلوق مبتسم مش أكثر من كده. تاير سادة نضيف ومكوي وطرحة واحدة أو تسريحة بسيطة الموضوع لا مكلف ولا متعب بس بيفرق كتير مظهرك عنوانك ده المثل قالك: «فوت على عدوك مكسي ولا تفوتش عليه محشي».

## وحدوووووه

قاعدة بفرّ كده في تاريخ مصر الملكية وإذا بيا أقف قصاد وصية مواطن مصري عام 1933.

المواطن اسمه نبيل بولس روفائيل بيوصي إن جنازته تخرج من كنيسة بعينها في شبرا وإن العربية اللي تحمل الجثمان يجرها 4 خيول على الأقل ويكون لونهم اسود، وان عدد الزردخانية (اللي بعد البحث والاستقصاء عرفت إنهم حاملو المباخر أمام الجنازة) مايقلوش عن 6 ده غير باقي الوصية المتعلقة بالكتابة على الشاهد وأدق تفاصيل العزا والنعي في الأهرام!!! آه والله زي ما بؤلكوا كده يمكن الموضوع غريب شوية.

شويتين.

قول 3 شويات.

إننا نتكلم عن جنازة في برنامج ساخر وعلى غيار الريق كده.

ده إيه وجع القلب ده يا ربي بس معلش اشتروا مني للآخر.

إللي وقفني في الحكاية إنه مواطن مصري عادي من سكان شبرا وموظف حكومي مش حد من أعظم القوم يعني، ومع ذلك مهتم بالنظام والدقة في حدث زي جنازته، وسألت نفسي كده: إحنا ليه بطلنا نهتم بتنظيم المناسبات سواء مناسباتنا الخاصة أو العامة.

يعني مثلاً تلاقيهم بيقولوا مهرجان الفن الحلزوني ولّا افتتاح سلسلة محلات السحلية السعيدة، ولّا مارثون ربيع العمر أي فعالية أيّا كانت تلاقي قمة التنظيم بتاعها عبارة عن الكهارب والبلالين اياها اللي شبه الباراشوت، وبعدين التحليق عالزحمة عالم زي القرادة عمالة تتلم وتصور وتزعق وتنادي، وناس بتحلق عليهم يمين وشمال في حاحه أشبه بيوم الحشر لحد ما كل واحد يقرر يروح لحاله، وبهذا تنتهي الفعالية ويلموا السجاد ويفسوا البلالين ويلموا الكهارب وقضيت، أي والله زي ما بؤلك كده.

حتى الجنازات يا مؤمن أمنتك أمانة يا مواطن يرضيك اللي بيجرى في الأوقات الصعبة اللي بنودع فيها عزيز ولا غالي؟! يعني النبي آدم يعيش زي

ما يعيش ياخذها بالطول وّلا بالعرض ولا بالورب بس أقل واجب إنه لما يودع يبقى آخر نص ساعة في حياته حاه محترمة حقه يعني وربنا.

بس اللي بيجرى حاه تانية شوف مثلاً كده آخر جنازة لشخصية عامة شوفتها كانت لمين وأراهنك لو المشهد اتغير عن مشهد زحمة الأفران البلدي وشد وجذب وأمواج بشرية وناس حزانة وحالهم كرب، ومُصّورين مصريين يسجلوا لحظات الاكتئاب والشحفة لأ وياخدوا تصريحات من نوعية: تقول إيه للمرحوم!! و: إوصفنا شعورك في اللحظة دي.

على أساس إنه المفروض يرد بابتسامة عريضة زي يحيى الفخراني في الكيف ويقول: أنا في غاية السعادة!! وظيفة الأيفنت بلانر أو مُنظمين المناسبات ليها مؤسسات دولية دلوقتي مابقتش بس شركات صغيرة على قد أفراد، لأ الموضوع دخل لشركات عابرة للحدود كل مهمتهم في الدنيا ياخدوا المناسبة أيّاً كانت شاكب راكب بحيث إن ماتفوتهاش الفايته، تطلع المناسبة أحسن مما تتصور إنت شخصياً، والحاجة تحصل بالدقيقة والثانية وكل حاه محسوبة وفوقتها.

وهو برضو مانقدرش ننكر إن فيه محاولات للموضوع ده هنا فيه شركات بتحاول تعمل ده أينعم أغلبهم مركزين في الأفراح ومركزين أكثر مع لون كسوة الكراسي وعدد الشمع في السنتر بيس، بس أهى محاولات يمكن تطور بكره ويتبقى شركات كبيرة كده تقدر تنظم أحداث كبيرة ومهرجانات ضخمة خصوصاً واحنا بندور عالسياحة بشمع، أي والله زي ما بؤلكوا كده.

## يا فاشل يا فاشل

شوف يا سيدي قالك زمان وبسبب الطاعون راحوا قافلين الجامعة اللي كان شغال فيها جهذ عصره وأوانه إسحق نيوتن. قفلوها كتير؟ سنة بحالها.

قوم الراجل لقي نفسه زهقان وفاضي قيمة سنة، فمن باب تقضية وقت الفراغ راح مأسس علم التفاضل والتكامل، أي والله زي ما بؤلك كده: المهم إن إسحق نيوتن ده وهو صغير مدرسته بعثت لامه قالولها ابنك مش نافع بصلة علميه صنعة... البعيد غبي وبليد ودماعه مش في العلام. شوف ازاي؟؟! برضو من كام يوم قاعدة بتفرج على فيديو لطفل ياباني في بطولة مدرسية في الجمباز وعَمَّال يا عين امه يجري يجري وهوب ينط الحاجز ومايعرفش يعمل الحركة، قوم المدربة تقوله ارجع حاول ثاني، وزمايله عَمَّالين يشجعوه ويهتفوله يجري يجري وهوب ينط يتشعبط برضو ولا يعرفش يعمل الحركة، ترجع المدربة تقوله معلش ارجع ثاني، رجع ثاني كتير؟ أربع مرات، وفآخر مرة زمايله ما اكتفوش بالفرجة والهتاف نزلوا لفوا حواليه دايرة كبيرة وقعدوا يهتفوله وحصنوه وطبطبوا على كتفه الواد خد الطاقة الإيجابية وجري جري وهوب نط واتشقلب وعمل الحركة والمدربة وصحابه وكل اللي قاعدين طاروا بيه ولا كأنه جاب كاس العالم، أي وربنا زي ما بؤلكوا كده.

أقرالك عن عم إسحق وأشوفلك الواد الياباني إلا وبرتلك كلام العلامة الكبير أحمد زويل في ودني وهو بيقول: الفرق بينا وبين الغرب إنهم بيدعموا الفاشل لحد ما ينجح واحنا بنكسر الناجح لحد ما يفشل. ايه يا جدعان ده؟؟! إحنا مستخسرين الدعم المعنوي في بعض؟ المعنوي... المعنوي يا مؤمنين يعني الكلمة الطيبة، يعني طبطبة، معلش، يعني تطيبب الخواطر، يعني كوابية الشاي وساندوتش الحلاوة اللي بتخش بيهم الحاجّة عالغيل وهو بيداكر ليلة الامتحان؟؟! أي والنبى زي ما بؤلكوا كده، إيه الغرض من تكسير المجاديف إللي بقينا محترفين فيه ده؟ منين ما نسمع عن أي إنجاز ولا محاولة ولا فكرة حتى إلا ونجري بالمشوار ندور وراها ونفتش عالعيب ونفضح العوار، وان مالقناش نجري على صاحب الفكرة ولا المشروع ولا الاختراع ولا الموهبة

ونديله جرعات من فواتح الشهية؛ حبة مصمصة شفايف على حبة (ماتعيش نفسك) مع رشة (مافيش فايدة) توابل بأه من نوعية (كان غيرك اشطر) و(قديمة) و(الصين عملتها)، ده غير الألس والتريقة والتأفية، فضلنا نألش على طالب المنوفية اياه لحد ما الناس بقت بتتكسف تقول إنهم اخترعوا ولا حاولوا يخترعوا.

مسكنا مشاريع وأفكار أصحابها اقترحوها تريقة وإحباط وكسر نفس لحد ما أصحابها لموا ورقهم ودفسوه في الأدراج وتابوا وأتابوا عن جريمة التفكير. تجاهلنا مواهب وإبداعات لحد ما أصحابها ماتوا محصورين بمواهبهم أو شَمَّعوا الفتلة على أول بلد رضيت تبص في وشهم.

لأ والأكادة نرجع نزعل ونقول بصوا شوفوا، إخص على قلة الأصل... كفاتتنا راحت بلاد بره وطفشت وسابوا بلدهم!!! ماتجلطوناش يا جدعان حرام عليكموا هما طفشوا من شوية! طفشوا من اللي شافوه واللي جرالهم، أي والنبي زي مابؤلكوا كده، ماحدثش ناجح في المطلق ولا فاشل في المطلق، إللي حاول كتر خيره إنه حاول وكسرة النفس بتوجع أكثر من كسرة الضلع، فبلاش منها اللي ما عندوش كلمة طيبة يخلى الرضية في زوره ويبلغ عليها إزارة كازوزة هتتهضم ومش هاتتعبه، ما عددش ينفع نفقع بعض ونحطم حد بيحاول؛ لأن أصلاً اللي بيحاولوا بقوا قليلين بالعكس محتاجين دعم بعض ولو بالكلمة والابتسامة ودعوة التوفيق.

أي والله زي مابؤلكوا كده.

## يا مدارسك يا مصر

مدرسة واحدة في مصر درس على طاولاتها سيميون الثاني آخر ملوك بلغاريا، واحتضنت المدرسة الملياردير السعودي عدنان خاشقجي، والأمير عبد الإله بن الملك علي بن الشريف حسين الهاشمي، الذي تولى الوصاية على عرش العراق، والشريف زيد ابن شاكر وكان رئيس وزراء الأردن، والصادق المهدي رئيس وزراء السودان الأسبق، وعائلة الخرافي من الكويت، وقسطنطين ملك اليونان، ده غير الفنانين والأدباء وصفوة مثقفي العالم كل دول اتخرجوا من «فيكتوريا كوليديج» المدرسة المصرية الكبيرة. أمال لو اتكلمنا عن باقي مدارسنا العريقة اللي خرجت ملوك وملكات وأمراء ورؤساء وعلماء وفنانين للعالم كله، أي والله زي ما بؤلكوا كده.

مصر في عصرها الذهبي مكانتش قبلة الاقتصاد والثقافة والسياسة والفن بس كانت قبلة للدراسة والعلم قبل كل دول، مدارسها العريقة كانت هدف وأمنية للطبقات الراقية من العالم كله علشان يعلموا ولادهم فيها ويكون لهم شرف التخرج فيها.

أمال إيه اللي حصل؟؟!!

لما دوكها العصر الذهبي للتعليم في مصر، اللي احنا فيه نسماه إيه العصر الخشبي؟؟ لا والنبي مايديش على خشبي هو حجري أي والنبي حجري، اسمعوا بس زي ما بؤلكوا كده.

كل واحد معاه قرشين محيرينه ولا عنده حته أرض مسقعها قوم بقدره قادر تلقى القرشينات ولا حته الأرض اتحولت لمدرسة دولية مبنى حلو شبابيكه ألوميتال وسور حوالين منه، مايجراش حاجه من حمام سباحة صغنن كده مع ملعب باسكت وتنس وكورة وكام مدرس بعين ملونة وكام مدرسة خوجاية، حبة إعلانات وبانرات هنا وهناك وهوب بقت مدرسة دولية، معايرها إيه؟ مميمم حاجه كويسة أكيد مش مصاريفها بالدولار الكندي أو بالفرنك الموزامبيقي تبقى هايلة طبعا، طب مستواها إيه؟ مميمم... حلو أهو شكل المدرسة حلو ونضيف طب المدرسين الخواجات دول مستواهم إيه؟ مميمم هايلين طبعا مش عندهم خضرا وشعرهم أصفر وأجانب!!!؟ ولما هما حلوبن وماحصلوش والمدرسة حلوة وماحصلتش ونظام التعليم حلو



وما حصلش. أمال إزاي مستوى العيال في الجامعات بيبقى عامل كده؟ العيل يتصرف عليه تقله دولارات واسترلينات وسلة عملات بحالها ويطلع أجهل من المتسربين من فصول محو الأمية طب المدارس الأميري وبنقول نعمل إيه؟؟ أمر ربنا ضعف إمكانيات حالة البلد 700 عيل فوق بعض زي القراد.

ضعف مرتبات المدرسين وأسباب كتير كلها متعلقة بضيق ذات اليد، لكن في المدارس إياها دي اللي ذات اليد فيها مبهوقة نقول إيه؟؟ ما لهمش نفس؟ رفاهية مفرطة أدت للزهد مثلاً؟ يعني لا القشفرة والغلب الأزلي بينفع ولا الصرف المفرط نافع أمال المشكلة فين؟ المشكلة بيني وبينكم في الجودة، آه والله زي ما بؤلكوا كده. أكم مدارس حكومة مع إدارة عاقله وواعية بتطلع عيال زي لمض النيون بيلمعوا كده من الجمال والاحترام ومستوى التعليم؟ وأكم برضو مدارس خاصة ودولية وقومية وكنايسية وأزهرية بتطلع نفس المستوى اللي يفرح؟ الموضوع مش دايماً فلوس لكن الموضوع دايماً تجويد وإدارة صح مش من الصرف بالهبل على المباني والملاعب والمسارح والمدرسين الخواجات اللي بالمناسبة كتير منهم ما عهمش دبلومات حتى في بلدهم بيكون نتيجته تعليم محصلش وأدب وتربية، ولا ينفع كمان ندلق العيال فأى مبنى شيك عليه يافطة ملونة مكتوبة بالأفرنجي من باب الوجاهة الاجتماعية، ولا ينفع كمان السكوت على بوتيكات التعليم دي كتير.

سمعنا حرفياً في التعليم كانت زي البرلنت على رأي يوسف بيه البرلنت اتطفى أوي الأيام دي يا جدعان.. أي والله زي ما بؤلكوا كده.

# الذهب الأبيض

زمان لحد الستينات كده ويمكن أوائل السبعينات، كانت معظم الأراضي المصرية بتتزرع بالقطن المصري طويل التيلة، وكانت الكتب المدرسية يمكن لحد التسعينات بتحت القطن باعتباره المحصول المصري الرئيسي. وكان بيتعمله عيد وطني والناس تاخذ أجازة والحكومة عملت طواع عن القطن.

ما هو القطن كان ليلة كبيرة وطويلة وعريضة وكان ليه بورصة وياما ناس اغتنت من وراه وياما ناس ليست اسود بسببه، والقطن كان بيتقال عليه في مصر «الذهب الأبيض» لأنه كان مهم للاقتصاد المصري أكثر من البترول اللي هو «الذهب الاسود»، بس ده كان زمان.. زمان اللي مبقاش موجود، والقطن دلوقتي يمكن بطلنا نزرعه أساسًا في مصر بس أنا حبيت احكي لكم حكاية القطن المصري مش علشاننا.. لا علشان الناس اللي عاشت وهتموت وكل معلوماتها عن القطن مشهد فيلم الأرض ليوسف شاهين. المصريين من زمان كانوا بيزرعوا القطن عادي قوم محمد علي باشا.. الراجل ده هتلاقيه ناطط في حواديت كثير وبلاش نزهق منه.. ماشي. محمد علي باشا جاب مهندس زراعي فرنساوي اسمه «لويس جوميل» علشان يحسن زراعة القطن قوم إيه.. جوميل ده يكتشف نوع قطن مزروع في جنينة أمير مملوكي شكله غريب، ويدرس القطن ده ويلاقيه أجود من القطن المصري الأصلي والقطن الأمريكي، وإن أصل القطن ده هندي يقوم محمد علي بسبب الحدوتة كده وخلص؟ لا طبعًا بعت جوميل للهند علشان يجيب بذور القطن ده ويعمل تجارب على إنتاجية الفدان ولما التجارب تنتهي ويكتشفوا إن القطن ده الإنتاجية بتاعته أكثر وجودته أحسن وتيلته أطول يقوم محمد علي معمم زراعة القطن الجديد في ربوع مصر، ويدخل بيه سوق تصدير القطن، ويحط مصر على قائمة مصدري القطن في العالم ونظرًا لجودة القطن المصري اعتمدت عليه مصانع الغزل والنسيج في لانكشير وظهرت منتجات جديدة قائمة على القطن المصري زي البولين لحد هنا والحدوتة تمام.

ولما قامت الحرب الأهلية الأمريكية سنة 1858م وكان القطن الأمريكي هو المنافس الوحيد للقطن المصري في السوق العالمية إتوقف الإنتاج الأمريكي

وده رفع سعر القطن المصري للسما، قام الخديوي إسماعيل قعد يستلف على حس محصول القطن من بيوت المال الأوروبية مرة علشان حفل افتتاح قناة السويس، ومرة علشان تخطيط القاهرة، ومرة علشان يشتري فرمان الوراثة لأنجاله من الباب العالي والناس بتديله الفلوس عادي ما هو القطن المصري مفيش غيره في السوق وسعره في الطالع.

وحوالين القطن المصري نشأت طبقة جديدة من الناس مضاربين بورصة على موردين على تجار تجزئة وسعر الأراضي ارتفع ومصر بقت تمام بس للأسف مش كل حاجه فضلت زي ما هي. الحرب الأهلية الأمريكية انتهت وبدأ محصول القطن الأمريكي يرجع السوق وبدأ سعر القطن ينزل في الأسواق العالمية وبورصة القطن اتضربت وكانت ليلة كوبيا على مصر بسبب ديون الخديوي إسماعيل واللي أكلناه بط بط من القطن طلع علينا وزوز يا معلمي. وكانت الرقابة المالية على مصر بسبب الديون أول مسمار في نعش الاستقلال المصري وأول مقدمة للاحتلال بعد كده بس للأمانة فضل القطن حافظ مركزه لحد ما وقع واتنسى وانهار زي حاجات كتير للأسف راحت مننا في الزحمة.

## العتبة جراز والسلم نايلو في نايلو

في فيلم «لصوص لكن ظرفاء».. ميمي جمال واقفه في البلكونة وبتغني «العتبة جراز والسلم نايلو في نايلو» كثير منّا اتفرج على الفيلم وسمعنا الغنوة دي وعدت علينا عادي وملايين من المصريين راحوا العتبة.. قصدي طبعًا ميدان العتبة.

إلا إيه هي حدوتة «العتبة» وليه الميدان بقى اسمه «العتبة» مش حاجه تانية.

الأصل في الحكاية إن العتبة كانت زرقا قبل ما تكون خضرا، أول واحد بنى في المنطقة دي كان الحاج محمد الدارة الشرايبي شاه وهو صاحب جامع الشرايبي المعروف بجامع البكري في الأزبكية، الراجل ده بنا سرايا حلوة كده ومن بعده السرايا اتنقلت بين كذا واحد منهم محمد بك أبو الذهب اللي خان على بك الكبير وبوظ حلم استقلال مصر عن الباب العالي، ومن بعده السرايا راحت لواحد من الاغنيا الكبار اللي في البلد وكان اسمه أحمد باشا طاهر.

أحمد باشا طاهر ده بقى كان حاكم للصعيد وناظر ديوان الجمارك يعني راجل مقتدر من الآخر، وجدد السرايا وعمل عتبة باب السرايا من الرخام الأزرق النادر والغريب رخام شبه القزاز والسلم اللي قبل العتبة كان من رخام أبيض شفاف غريب. من هنا الناس قالت على الميدان اللي قدام السرايا ميدان العتبة الزرقا وطلعت «غنوة العتبة جراز والسلم نايلو في نايلو» ولأن الظلم مش بينفع ولأن أحمد طاهر باشا ياما ظلم الصعايده واستصفى أراضيهم وأموالهم يشاء ربك يموت بعد ما كمل بنا السرايا بوقت قليل، قوم السرايا تروح للست الوالدة باشا اللي هي أم الخديوي عباس الأول اللي أجرتها من أرملة أحمد باشا طاهر لمدة ستين سنة واشترت من حر مالها الحرملك. وكانت أرملة أحمد باشا طاهر بتتصرف في ميراث جوزها لأنه عمل ميراثه وقف عليه وبس.

وبعدها بشوية كده الخديوي إسماعيل أخذ مكان الوالدة باشا كمستأجر وهدم جزء من السرايا ووسع الميدان وجاب مهندسين من بره علشان يخططوا القاهرة الجديدة اللي كان بيحلم بيها، وفي قلب الميدان اللي قدام

السرايا عمل جنينة حلوة كلها زرع وخضرة ومن هنا بقى الميدان «العتبة الخضرا» بدل «العتبة الزرقا» والميدان ده كان حيوي جدًا قلب القاهرة التجاري فيه مجمع خطوط الترامواي والمحلات الكبيرة زي البيت المصري عمر أفندي سليم وسمعان سيدناوي وغيرها من المحلات اللي كانت بتنافس محلات باريس في الشياكة وطريقة العرض والمنتجات.

فضل حته من السرايا اللي بناها أحمد باشا طاهر بقت مقر للمحكمة المختلطة لحد ما اتنقلت لمكانها في دار القضاء العالي، لكن ورثة أحمد باشا طاهر حسوا انه اتضحك عليهم ورفعوا قضايا على الحكومة المصرية علشان ياخدوا الحته اللي فاضله من القصر وفضلت القضية دي في المحاكم خمسين سنة.

خمسين سنة بحالها، خمسين سنة الميدان اتحول اسمه من «العتبة الخضرا» لميدان محمد علي شوية من الوقت وشوية بقى اسمه ميدان الملكة فريدة لحد ما استقر وبقى ميدان «العتبة» خبط لزق من غير أي ألوان لحد ما قامت ثورة يوليو وألغت الوقف وأصبح الميدان باللي فيه ملك للحكومة المصرية. الغريب في حدوتة الميدان ده إن السرايا اللي كلفها أحمد باشا طاهر فلوس كتير من عرق الصعايدة لما كان حاكم عليهم ومكانوش يحلموا يشوفوها أساسًا.. السرايا دي بقت ميدان اسمه «العتبة» ميدان بيدوس عليه الصعايدة كل يوم ودي بقى حكمة الزمن وحكاية ميدان العتبة.

## المجنا كارتا المصرية

مين ما تمشي في القاهرة تلاقي جامع السلطان فلان، بيمارستان السلطان علان، والبيمارستان اللي هو مستشفى يعني تراث معماري مهم وجميل بناه المماليك.

والمماليك دول حدوة غريبة أوووي يا أخي ناس جليهم التجار من القوقاز وكازاخستان وغيرها واتباعوا ممالك وعلشان كده كان بيتقال عليهم «الجلبان» بضم الجيم وساعات فتحها كثير منهم مكانوش يعرفوا عربي أصلاً، وكثير منهم كانوا مسلمين بالاسم، اضطهدوا الشعب المصري بعنف وقسوة وغشومية كمان.

بس الغريب يا أخي إنهم كانوا أكثر ناس خاضوا حروب دفاعًا عن الإسلام وأكثر ناس بنوا جوامع ومستشفيات، وتراثهم المعماري حاجه جميلة جدًا ومُسْتَرَفَّة جدًا، آه والله زي ما بؤلك كده.

مش بؤلك ناس غريبة المماليك دول، والشعب المصري فضل ساكت وراضي على تصرفات المماليك وعامل من بنها لحد ما فاض بيه الكيل قوم إيه في يوم كده سنة 1795 وقبل الحملة الفرنسية طوالي أهالي قرية في بليس رفعوا شكوى ضد مراد بك وإبراهيم بك بسبب الضرائب الزيادة، وكان مراد وإبراهيم دول هما يعني اللي ماسكين البلد، والوالي العثماني ده كان منظر ولعبة في أيديهم، الناس الغلابة رفعوا الشكوى لمين؟

تخلوا لمين للشيخ الشرقاوي اللي قرر يعمل اجتماع في الأزهر وكانت الدعوة عامة شيوخ على ولاد بلد على فلاحين، أيامها الأزهر كان رمز السلطة الدينية والملاذ الأخير للشعب، ولما لقي الشيوخ إن مراد بك وإبراهيم بك عاملين وذن من طين وودن من عجين، قام الشيوخ دعوا الناس للإضراب.. أبوه إضراب وش؛ يفتلوا المحلات ومفيش بيع ولا شرا واعتصموا في الأزهر والأمور اتطورت والقاهرة بقت مدينة مقفولة ليل نهار، وساعتها حس الوالي العثماني إن مش بس مركزه في خطر.. لا دي الولاية كلها في خطر لأن المصريين لما بيركبوا دماغهم بتبقى مشكلة، قام الوالي كده اتدحرج ونزل من القلعة وقعد مع الأمراء اللي مكانوش فاهمين فيه إيه ولا هيعملوا إيه مع

الناس بس المشايخ والناس كان ليهم رؤية مختلفة مش للي حصل.. لا لأن اللي حصل حصل خلاص كان ليهم رؤية للي جاي وطالب الناس بمكتوب..

أيوه ورقة مكتوبة فيها مطالبهم يمضي عليها الأمر والوالي وعلشان يضمنوا تنفيذ المكتوب ده اللي يكتبها القاضي الشرعي في صيغة حجة شرعية ويبصم عليها الأمر والوالي والمشايخ وكان المكتوب فيه 3 مطالب واضحين ومحددين: مفيش ضرايب من غير ما الشعب يوافق.. واللي يمثل الشعب هما المشايخ.. أحكام القضاة لازم تتنفذ ولو كانت ضد أمير، حرية الناس أمر مفروغ منه ويضمنها الأمر..

3 مطالب بتحدد علاقة الشعب المصري بحكامه.. 3 مطالب محددة مفياش فصال المكتوب ده ممكن ببساطة نقول عليه «الماجنا كارتا المصرية» زي ما قال عمنا عباس العقاد وثيقة شبه الوثيقة اللي فرضها الإنجليز على حكاهم في القرن السادس عشر ونسمع بعد كده إن الشعب المصري كان ميت تحت الحكم العثماني، وإن الشعب المصري استكان بعد الاحتلال، وإن الشعب معرفش حقوقه غير بعد الحملة الفرنسية.. ده مش حقيقي للأمانة الشعب كان بيثور في الوقت بس اللي يناسبه في الوقت اللي هو محتاجه وهو ده شعب مصر.

## باب زويلة إلهي ليه واللي عليه

القاهرة دي حدوتة كبيرة، مفيهاش مكان إلا ووراه حكاية ولا مبنى إلا وليه تاريخ، مدينة غريبة عجيبة تحبها في الليل وممكن تكرهها في النهار.. عادي. تعشق مبانيها تحت نور الشمس وتخاف منها في عتمة الأيام، وللأمانة قاموس القاهرة اللغوي لو افترضنا إن لكل مدينة قاموسها الخاص بيها قاموس غني بالمفردات الغربية والعجيبة زي المثل القاهري «ولا جُرسة باب زويلة».. إيه حكاية المثل ده؟ في الأول كده باب زويلة ده باب من أبواب سور القاهرة، السور اللي بناه القائد جوهر الصقلي لما بنى القاهرة ذات نفسها، وجوهر الصقلي كان عامل أبواب على السور ده وفي زمن الخليفة المستنصر بالله قام الوزير بتاعه بدر الدين الجمالي وبنى باب زويلة اللي هو أكبر باب في السور كله، باب مكانش ليه زي في أي بلد زي ما قال عمنا المقريزي مؤرخ مصر المملوكية، بس هي مين زويلة دي؟ زويلة دي قبيلة من قبائل البربر.. والبربر ده مصطلح عربي شحط محط مالوش علاقة بالواقع، الصراحة حاجه كده زي حدوتة الهنود الحمر اللي في أمريكا اللي هُمَّا لا هنود ولا هُمَّا حمر، بس ما علينا، زويلة دي قبيلة كانت في خدمة الخليفة الفاطمي وكان معسكرهم جنب الباب. تمر الأيام والسنين ولأن الباب أشهر باب من أبواب القاهرة الخليفة لما كان عايز يقول فرمان يعدم حد.. يجرس حد.. يبقى هناك عند باب زويلة لأنه أكبر باب وأهم باب وأكثر باب الناس بتعدي منه من هنا جه المثل الشهير ده اللي مبقاش ليه وجود إلا في الكتب بس ليه اختفى المثل ومعاه الباب؟ الصراحة آخر حد مهم اتعدم على باب زويلة كان آخر سلطان مملوكي السلطان طومان باي اللي وقف في وش الجيش العثماني اللي احتل مصر.

كان طومان باي راجل محبوب.. بتاع ربنا كده وكان عنده أمل يهزم العثمانلية، لكن الخيانة كسرتة زي ما كسرت قانصوه الغوري من قبله ولما اتقبض على طومان باي كان السلطان العثماني بي فكر إنه يطلق سراحه علشان شجاعته وقدرته على الصمود، لكن حد من الحاشية قاله: لازم يموت لأنه محبوب من المصريين وحياته تخلي روح المقاومة تستمر وساعتها أمر الخليفة العثماني بإعدام طومان باي على باب زويلة وقدام الباب اللي لسه



موجود لحد النهارده، وقف طومان باي قصاد المصريين وطلب من المصريين يقرأوا له الفاتحة 3 مرات، وعلى حبل المشنقة اتقطع الحبل 3 مرات، وفي الرابعة اتشنق طومان باي وبموته افترس السلطان العثماني إن روح مصر انكسرت، وإن برحيل طومان باي.. المقاومة مبقاش ليها وجود، وإن مصر اتذلت وخضعت وخلاص هانت، لكن اللي ميعرفوش العثماني ولا غيره إن روح مصر ممكن تستكين.. تهذا لكن عمرها ما تنكسر، مصر ممكن تنام تاخذ تعسيلة كده لكن عمرها ما تموت، والدليل إن بعد رحيل طومان باي اتمرد الشعب المصري أكثر من مرة على الحكم العثماني، ووصل الأمر في النهاية إنهم دعموا محمد علي علشان يبقى والي مصر، وبعدها بكام سنة كان الجيش المصري ذاته واقف على أبواب الآستانة بيهدد العرش العثماني نفسه.. هي دي روح مصر.. روح مصر اللي متعرفش الانكسار أبدًا والموت كلمة مالهاش وجود في قاموسها.

## حكاية الأتوبيس وأبو رجيلة

كثير منا اتفرج على فيلم « الكمساريات الفاتنات».. فيلم كده كوميدي أبيض واسود بطولة إسماعيل يس وأحمد رمزي ونجاح سلام، الفيلم بيدور حوالين بنات عايزين يشتغلوا كمساريات في أتوبيسات النقل العام اللي هي كانت ملك مين؟ ملك أبو رجيلة؟ مين أبو رجيلة ده يا ولاد.. أقولكم أنا، أبو رجيلة راجل إسناوي صعيدي يعني درس واتعلم في القاهرة، وبعدها سافر لندن كمل دراسته ورجع اشتغل في بنك مصر، وكان شايف إن طلعت حرب هو أستاذه ومعلمه ويوم ما حوش أبو رجيله 34 جنيه قرر إنه يترك الوظيفة ويشتغل لحسابه الخاص، وفتح مكتب صغير للتصدير والاستيراد، وركز شغله مع إيطاليا وبعد خمس سنين بقى أبو رجيلة من أصحاب الملايين بالتعب والاجتهاد والعرق، كان مؤمن إن الكلام عن الفشل يخليك فاشل وإن التفكير في النجاح يخليك ناجح..

المهم صاحبنا أبو رجيلة خسر كل فلوسه في الحرب العالمية الثانية كان ليه بضائع بالملايين في إيطاليا راحت في الحرب ورجع على الحديدية قام عمل إيه؟ استثمر الحديدية وش، وبعد فترات استقرار في إيطاليا وشغله هناك رجع لمصر سنة 1949 وقرر المنافسة في مجال النقل العام، وأسس شركة أبو رجيلة للنقل العام، أتوبيسات نضيضة سواقين متدربين الفرق بين الأتوبيس والثاني 3 دقائق تظبط عليهم ساعتك.. كمساريه في منتهى الذوق والاحترام، وكان حريص على راحة الراكب وعدم الإساءة إليه، وكان كل شهر بيركب أي خط وهو متنكر علشان يشوف تعامل الموظفين عنده مع الركاب، وهو أول واحد سمح للسيدات يشتغلوا كمساريات في خطوط الأتوبيس بتاعته.. ودي كانت حركة صايعة منه الصراحة علشان ينافس بيها شركة مقار وسوارس اللي كان ليهم خطوط نقل عام زيهم زي أبو رجيلة.

الصراحة أبو رجيلة بعد سنتين من الشغل في الشركة كانت الشركة بقى ليها 400 خط نقل عام وبنى أكبر جراجين مع ورش صيانة متطورة واحد في الجيزة والثاني في حدائق القبة، وكان أبو رجيلة زمالكاوي أصلي وهو اللي اتبرع لبناء مقر نادي الزمالك في ميت عقبة بعد ما كان مقر النادي القديم عبارة عن 3 أوض ومدج خشب، وهو اللي استضاف فريق دو كلا براغ

التشيكى يوم افتتاح المقر ويومها كسب الزمالك الماتش تلاته صفر، كان أبو رجيلة راجل صاحب رؤية، ولما قرر يمد خط ميه لنادى الزمالك قام مَدَّخَل الميه كمان لحي ميت عقبة على حسابه، ومع إن أبو رجيلة كان راجل كسيب وصاحب ملايين لكن حدوتة الأسلحة الفاسدة اللي نشرها إحسان عبد القدوس بعد حرب فلسطين طالت أبو رجيلة، وكانت مشكلة مع إن المحاكم بعد كده برأت ساحتة، ولما قامت ثورة يوليو عرض أبو رجيلة تصفية أعماله في إيطاليا ونقلها لمصر، لكن قرارات التأميم خدت في وشها شركة أتوبيس أبو رجيلة ولقي الراجل نفسه بيبدأ من الصفر وانتقلت ملكية شركة أتوبيس أبو رجيلة للقطاع العام المصري وكان دايمًا يقول إنه ممكن يحل أزمة قطاع النقل العام في مصر قبل ما يخلص قهوته لو المسئولين سمحوله يعمل كده. لكن للأسف قهوة أبو رجيلة خلصت وهو شخصيًا مات، وفضلت أزمة النقل العام في مصر مأساة بتزيد كل يوم، واللى هيفضل من أبو رجيلة مجرد فيلم كوميدي وغنوة كانت بتتقال أيام عز شركته غنوة بتقول «الليلة والليلة وباصات أبو رجيلة».

هيبويه بقى دووونيا.

## شغل عيال أو حكم عيال

مصر دي ياما شافت يا جماعة، ياما عانت وقاست، ياما اتحملت.. آه والله، زمان في زمن المماليك مصر شافت أيام بلاك كثير، أيام من كتر ما هي بلاك ومن كتر ما هي مضحكة في نفس ذات اللحظة.. الشعب المصري قال عليها أيام «حكم العيال» واللي منها جه المصطلح الشعبي الشهير «شغل عيال».

إيه بقى حكاية «حكم العيال» أو «شغل العيال»؟ لما حضرتك تمسك ورقة وقلم وتعمل إحصائية كده للسلطين المماليك وسنين حكمهم هتكتشف حاجه غريبة أوووي؛ إن فيه خمسين سنة حكم مصر فيها «العيال» وكان عدد العيال دول 17 عيل بالتمام والكمال، أيوه العيال الصغيرة دي.. عيال سن أربع سنين، واتناشر، وعشرة وحاجات كده غريبة. أول عيل حكم مصر كان المنصور ابن عز الدين أيبك، أيوه اللي كان طالع في فيلم «وا إسلاماه» عبيط وكان بيصرخ ويقول «عايز الحصان بتاعي يا ابويا».. المنصور ده قضى السنة ونص اللي حكم فيها مصر وهو بيطير حمام وبيرقص كلاب وبيتفرج على مصارعة الديوك مع العامة والدهماء، لحد ما عزله الأمير قطز واستولى على الحكم علشان التتار كانوا على الأبواب.

السلطان منصور فتح باب حكم مصر للعيال ومنهم مثلاً الملك المظفر أحمد اللي حكم مصر وعمره أقل من سنتين.. متخيل يا مؤمن.. سنتين وبيحكم مصر وألطف حاجه إن الوصي على العرش كان أمير اسمه «ططر»، وكان مصمم إن السلطان اللي عمره أقل من سنتين يحكم علشان يحكم هو من وراه وفي الخباثة، قوم جمع المشايخ والأمراء والأعيان علشان يقدموا فروض الولاء والطاعة للسلطان «العيل».. ولأنه عيل.. ووسط مراسم الولاء قام معيط وراسه وألف برطوشة ما هو ساكت لولا إنهم جابوله الدادة بتاعته وقعدته على حجرها وقعدت تهشكه وتبشكه، والأمراء بيبوسوا إيد السلطان وهو على حجر الدادة.

ومن العيال دول السلطان الناصر فرج اللي تولى السلطنة وعمره اتناشر سنة، بس كان واد شقي وابن حظ مع إنه عيل كده، كان كل يوم يقتل مملوكين ثلاثة من المحبوسين في القلعة، السلطان ده قعد في الحكم 100

يوم بس وقتل فيهم ألفين مملوك.. يعني كل ليلة كان بيقتل 20 مملوك من المساكين دول.

وبردو من العيال كان السلطان الناصر محمد ابن قايتباي.. إتسلطن وعنده 14 سنة، وده بقى كان مجنون رسمي معاه شهادة معاملة أطفال زي ما بنقول بالبلدي، ده منع الناس تخرج من المغرب للفجر، وكان عيل سمج أووي الصراحة.

العيال دول لما حكموا مصر.. استهانوا بشعبها، ولأن شعبها مكانش ليه يد في الحدوتة ومفيش في إيده سلاح غير النكتة طلوعوا نكت على العيال دي بالكوم، والمؤرخين المصريين اتريقوا عليهم ياما، بس الشعب أول واحد إتريق لما قال: « ده حكم عيال» أو «ده شغل عيال» ومع الوقت بقى «شغل العيال». مصطلح بيتقال على أي فعل غير مسئول، أي فعل مالوش مبرر إلا إنه فعل صادر من عيل، والصراحة التاريخ المصري شال لنا كتير من «شغل العيال» اللي تعبوا مصر.

آه وحياتك.. زي ما بؤلك كده.

## مثلث الرحمات وهي دي مصر يا عبلة

الصراحة مصر مالهاش مثل، قولوا عليا شوفينية، قولوا عليا وطنية، قولوا عليا اللي نفسكم فيه بس ده رأيي ببساطة.. مصر مالهاش زي ومالهاش مثل، مش علشان تاريخنا اللي من تاريخ الحضارة، ولا علشان آثارنا اللي اتسرق منها ياما واتنهب منها ياما.. بس لحد النهارده تلت آثار العالم عندنا ويمكن أكثر.

السريا جماعة في عظمة مصر هو ناسها، ومصر ربنا أكرمها بناس كثير حبت البلد دي وحطت مصلحة البلد قبل أي مصلحة تانية وقبل أي مصلحة شخصية أو طائفية أو سياسية، والدليل البابا كيرلس الخامس مثلث الرحمات، الراجل ده قبل ما يكون بابا للكنيسة الأرثوذكسية كان راجل وطني حقيقي.. راجل غيور على مصر وعلى الكنيسة المصرية.

المهم البابا كيرلس الخامس طول فترة حياته اللي قربت على الـ 100 سنة كان دايماً حاطط مصر قدام عينيه، لما قامت الثورة العرابية والخليفة العثماني أصدر قرار بعصيان عرابي ومفتي الإسلام التركي طلع فتوى بأن عرابي كافر، البابا كيرلس مغيرش موقفه، من الثورة والثوار وفضل على موقفه كتفه بكتف المشايخ والمصريين وولاد البلد، ولما حصلت ثورة 1919 ضرب مثال للوطنية لما فتح أبواب الكنائس لخطباء الثورة ومشايخ الأزهر علشان يحمسوا الشعب على الثورة، وأثناء الثورة قابله القنصل الأمريكي وعرض عليه إن الكنيسة المصرية تبقى تحت حماية ملك بريطانيا، وإن مصر بلد مسلم ومش معقول تبقى الكنيسة تحت حماية المسلمين، كان رد البابا كيرلس الخامس مثلث الرحمات هو الرفض التام، وإن الكنيسة الأرثوذكسية ملك للمصريين ويحميها المصريون وسأل القنصل: هو ملك بريطانيا يموت؟ رد القنصل: أيوه يموت. رد عليه البابا كيرلس الخامس: إحنا بقى تحت رعاية ملك لا يموت.

البابا كيرلس حواديته مش ممكن تتقال كده وبسرعة، لكن ليه موقف مهم بيكشف وطنية وغيره الراجل على الكنيسة المصرية اللي هي أصل الكنائس في العالم.

في زمن الخديوي إسماعيل بدأت الإرساليات الأمريكية تيجي مصر، وكان لها نشاط كبير في الصعيد وخصوصًا في أسيوط وبدءوا يفتحوا المدارس وببلاش، وكان الغرض من الإرساليات الأمريكية دي تحويل الأقباط المصريين لمذهب الكاثوليك، قوم البابا كيرلس طلب من الخديوي إسماعيل إنه يزور أسيوط ودخلها في موكب حافل في حماية الجنود المصريين بأوامر الخديوي، وكانت المدارس الأمريكية أو أي مدارس غير حكومية بتعتمد شهادتها من مدير الإقليم، ولما حاولت المدارس دي تعتمد نتيجة مدارسها مدير الإقليم اللي هو مسلم رفض وده لمساندة جهود البابا للاحتفاظ باستقلالية الكنيسة المصرية، وده خلى الطلاب الأقباط اللي في المدارس دي يسيبوها ويرجعوا للمدارس القبطية المصرية، وفضل البابا كيرلس يتنقل من مدينة للتانية في الباخرة النيلية اللي خصصها ليه الخديوي إسماعيل، ومنين ما يروح تقف الإرساليات الأمريكية عند حدودها، كان راجل حريص على استقلال الكنيسة المصرية وحريص على وحدة المصريين وكان شعاره إن مصر للمصريين.. أقباط ومسلمين.

من هنا يا جماعة بتيجي عظمة مصر الحقيقية.

اشتري المنتج المصري.. بالعافية.

# محمد علي باشا.. أو محمد علي الكبير

الراجل الألباني الشبه أمي واللي علاقته باللغة العربية زي علاقة كثير من المصريين باللغة الصينية كده، الراجل ده على قد ما ظلم الشعب المصري في حاجات على قد ما كان ليه أيادي بيضا على تاريخ مصر الحديث، الحق يتقال، يعني الراجل كان عنده مشروع وطموح ورؤية مالهاش حل، بنى مدارس ومصانع ودخل زراعات، سيطر على أدوات الإنتاج والزراعة وعمل نهضة حقيقية في مصر، المهم ولي النعم محمد علي باشا لما قرر إنه يدخل بمصر في منظومة الإنتاج الصناعي ويطور من قدرات مصر الإنتاجية، كانت عينه على السلع الأجنبية المنافسة شايف إنها ممكن تشكل خطر على المنتج المصري، طيب يعمل إيه؟ يتصرف إزاي؟ يحمي المنتج المصري إزاي من المنافسة؟ ومع إنه راجل شبه أمي.. آه وربنا زي ما بؤلكم كده، لكنه كان راجل واعي وسياسي مالوش حل وكان بيفكر لقدام، قعد يفكر لحد ما لقي حل يحمي بيه المنتج المصري اللي لسه طالع جديد من المنافسة الخارجية على الأقل داخل الأراضي المصرية، قام عامل قانون سماه خيانة الأمانة، كثير منّا عارفين إن القانون المصري معرفش عقوبة خيانة الأمانة إلا بعد زمن محمد علي بشوية حلوين، ونص قانون العقوبات على خمس حالات لو حصلت تعتبر خيانة للأمانة وهي: تبيد شىء استلمه المؤتمرن عليه سواء على سبيل الوديعة أو الوكالة أو الإيجار أو الرهن أو الاستعمال.

لكن إيه قانون خيانة الأمانة بتاع محمد علي؟ عمنا محمد علي قالك.. اللي يشتري منتج أجنبي وفيه زيه منتج مصري يبقى خاين للأمانة.. كده وش، ودي جريمة جديدة مش بس في مصر لا في العالم، الصراحة وهي جريمة شراء مصنوعات غير وطنية لا ينتجها المصريون وحدد عقوبة للجريمة.. اللي هي إيه؟ لو قيمة المصنوعات أو المحاصيل خمستلاف قرش يعاقب صاحب الجريمة بالسجن من سنتين لخمس سنين في اللومان ويفضل مربوط في الحبس بالزنجير، ولو ثبت إنه اشترى بحسن نية من غير ما يعرف إن المصنوعات دي أو المحاصيل دي ليها بديل مصري.. يعامل برفق ويتربط



سنتين بس في القلعة، يعني تروح اللومان لو عارف، وتروح القلعة لو مش عارف شوف ازاي.

فيه ناس قالت إن اللي عمله محمد علي عمله علشان يحمي استثماراته، يحمي مصانعه والأراضي اللي كان محتكرها، وده للأمانة جزء من القصة، بس شوف الراجل عمل إيه علشان يرفع من قيمة المنتج المصري؟ شوف الراجل أجبر الناس إنها تشتري المنتج المصري ازاي؟ قالك اللي يشتري حاجه مش مصرية يبقى خاين للأمانة.. وش.

فيه ناس قالت على القانون ده إنه أول قانون وآخر قانون حاول يحمي الصناعات الوطنية بجد، وإنه أول قانون يحول الثروة الفردية لثروة وطنية يُجرم ناقلها ليد أجنبية.

ده محمد علي باشا الراجل الأمي اللي لحد دلوقتي فيه ناس بتسخر منه، بس للأمانة الراجل ده عمل لمصر كتير وكان سابق عصره.

# ملك القطن محمد أحمد فرغلي

كنا حكيما قبل حدوتة القطن المصري وازاي رفع ناس للسما وخسف بناس سايع أرض، وازاي القطن كان أكبر منتج مصري ويتم تصديره للخارج.. النهارده عايزة أحكيلكم حكاية ملك القطن. وملك القطن مكانش من الأسرة المالكة ولا كان من المماليك، بالعكس كان واحد من عيلة كلها تجار واسمه محمد أحمد فرغلي، أصله من أبو تيج وأسرته استقرت في الإسكندرية، وكان أبوه وجده من كبار تجار الحبوب.

ولما أنهى محمد أحمد فرغلي دراسته في فيكتوريا كوليديج، وهي نفس المدرسة اللي اتخرج منها يوسف شاهين وعمر الشريف وغيرهم، وكمل دراسته للاقتصاد في لندن، ولما رجع مصر قرر يشتغل لحسابه الخاص، وكان قراره إنه يعمل مزرعة لتربية الخنازير في المنصورة، وكسب منها كثير بعدها قرر يدخل مجال بورصة القطن.. وفي أول صفقة خسر 4000 جنيه مرة واحدة وده رقم كبير أيامها، ولما مات أبوه سنة 1927 قرر يتوسع في تجارة القطن، وبعد ما كانت حصته من التصدير متعديش الـ 1% بعد عشر سنين كانت حصته 15% من إجمالي القطن المصري اللي بيتصدر للخارج.

وفي سنة 35 انتخب كوكيل لبورصة مينا البصل وكان أول مصري ياخد المنصب ده من الأجانب، وساعتها قابله الملك فؤاد وودعه وهو ماشي وقاله: مع السلامة يا أحمد بك وبكده خد البكوية في مينت، وفضل أحمد محمد فرغلي يكبر في مجال تصدير القطن، لدرجة إنه في سنة 1949 دخل شراكة لشراء محصول القطن متوسط الثيلة بمبالغ وصلت لـ 63 مليون دولار بسعر أيامها، ومن ساعتها استحق عن جدارة لقب «ملك القطن» بس ملك القطن مكانش بتاع قطن وبس عمل شركات واستصلح أراضي، وكمان أحمد محمد فرغلي أول واحد استخدم الرشوة في الانتخابات، كان بيدي للصوت جنيه مصري كامل، ومندوبه بيدي المنتخب نص جنيه والنص الثاني بعد ما ينتخب ملك القطن، والراجل كان صريح في مذكراته وقال كل ده بالتفصيل، بس ملك القطن اللي مكانش ملاك، وبالضرورة مكانش شيطان لما قامت ثورة يوليو أمت ممتلكاته اللي كانت تقدر بحوالي 8 مليون جنيه ولجنة التأميم قررت منحه مرتب شهري اتنين جنيه ونص في الشهر.. كانت صدمة للراجل

يا عيني، ومع إنه خبرة في مجال القطن طلبه أحد البنوك الإنجليزية للعمل كمستشار، لكنه رفض وقرر البقاء في مصر علشان يفيد البلد زي ما قال، لكن الحكومة قررت إنها تديله مرتب مستشار لمؤسسة القطن المصري 100 جنيه في الشهر، في الوقت اللي كان معروض عليه في إنجلترا 25 ألف جنيه واتصدم الراجل خصوصًا لما واحد من أصحابه نقل شكوته للوزير لبيب شقير فكان رد الوزير: خلي أحمد محمد فرغلي يبيع نجفة من نجف بيته وهيعيش بتمنها سنة!! وحدوتة ملك القطن اتكررت كثير مع ناس تانية مقدرتش مصر الثورة إنها تستفيد منهم، وكانت النتيجة ضياع مجهودات ناس تعبت مع فلوس ناس قلبت عيشها أيام الملك.

واتساوى ملك القطن بمحمد فوزي، وبقي الكل في التأميم سواء.  
وضاع القطن يا ولدي.

## ولاد الناس

تبقى ماشي كده في الشارع وتسمع كلمة «ولاد الناس»، تقعد في قعدة مع صحابك وتسمع تعليق «فلان ده ابن ناس»، على طول تلاقي لمبة التفكير نورت كده وتسال نفسك سؤال مهم: ما هو كلنا ولاد ناس، ولا فيه ناس مش ولاد ناس؟ وإيه حكاية ولاد الناس دول؟ الحدوتة يا سادة يا كرام بدأت في العصر المملوكي.. أيوه العصر المملوكي.. زي ما بؤلك كده.

كان كل سلطان يبجي يقعد على عرش مصر يجيب معاه مماليكه وصبياناه وناسه، يقعد على أد ما يقعد الحاشية بتاعته ومماليكه هما الكل في الكل.. مفيهاش كلام دي.. قوم إيه بقى السلطان ده يموت، يتعزل، غيره ياخذ السلطنة أول حاجه يعملها السلطان الجديد إنه ينزل مماليك السلطان القديم وعياله يطردهم بره القلعة اللي كانت رمز الحكم والسيطرة، واللي قاعد فيها وماسكها هو اللي ماسك مصر وش، واللي كانوا عايشين في الخير والنعيم يصبحوا يلاقوا نفسهم في الشارع.. الوضع ده استمر شوية لحد ما جه سلطان من السلاطين وحس إن الوضع ده مش لازم يستمر، لأن مماليك السلطان المعزول أو الميت بيعملوا قلق علشان مبقاش في أيديهم فلوس، فقرر يكون ليهم مرتبات ياخدوها من الديوان ومن يومها أطلق عليهم في دفتر المرتبات.. ولاد الناس.

الوضع ده قعد كثير؟ الصراحة آه.. طول فترة الحكم المملوكي وولاد الناس بيكثروا كل شوية، ما هو المماليك مكانوش بردو بياعين سبج، كانوا شغالين انقلابات على بعض وغدر ببعض، وكتر ولاد الناس في بر مصر وطبعًا المخصصات بتاعتهم بتزيد.

قوم بقى لما السلطان يتزنق وما أكثر زنقاته كان يعمل إيه؟؟ أيوه يلغي مخصصات «ولاد الناس»، ولو فيه أزمة في بيت المال عادي تنكسر مرتبات ولاد الناس بالشهر والتلاتة والخمسة عادي بقى، وصادف إن قنصوه الغوري كان عامل تجريدة.. يعني حملة عسكرية كده، وقرر يصرف للجنود كل واحد 100 دينار ومرتب أربع شهور وتمن جمل، ولما حس إن الحدوتة وسعت منه قام قايل إن «ولاد الناس» لازم يطلعوا الحملة وياخدوا نفس المصاريف، واللي عايز يقعد منهم يخليه وياخذ مرتب شهر واحد بس، وطبعًا فيه منهم

اللي قعد ومنهم اللي خرج مع الحملة. بس الغريب إن ولاد الناس كانوا صيع  
بالفطرة والوراثة، لو بيت المال قطع مرتباتهم يعملوا قلق ودوشة وزبطة  
وفيه منهم اللي اتحول لقاطع طريق، وولاد الناس كان لسانهم مترين طول  
ما هما في السلطة، وأول ما يخرجوا منها يعملوا ضعفا ومساكين. ولاد الناس  
فضلوا على حالهم ومع سقوط دولة المماليك تحت سنابك العثماني  
وبسيوف الخيانة انتهى من الوجود ولاد الناس كمصطلح متداول في السلطة،  
وفضل المصطلح بين الشعب إن ولاد الناس دول هما اللي كانوا في عز.. بس  
جار عليهم الزمن واتحدرت بيهم الحال، وسبحان مغير الأحوال.. والناس  
الأيام دي لو يعرفوا أصل كلمة «ولاد ناس» أو «ابن ناس» هيبطلوا يقولوها..  
آه وحياتك زي ما بؤلك كده.

## ماكروفوبيا - Macrophobia

قالك يا سيدي الماكروفوبيا دي فوبيا بتصيب البعض من الدكاترة والعيادات! آه والنبي زي ما بؤلوكوا كده، يتعب النفر ولا يعيى ولا يجراه أي حاجه يتلبش من الخوف من فكرة إنه يروح للدكتور أو يدخل مستشفى.. يعني عنده يموت بعياه أهون من إنه يروح للدكتور.

المرض ده منتشر في كل الدول الغربية ويعملوا البدع علشان المصابين بيه يتعالجوا.. المصيبة إنهم يتعالجوا إزاي وهما أساسًا أصلًا مرعوبين من فكرة العلاج والحكما!! القصد قرئت شوية عن المرض الغريب ده وقعدت أفكر شويه، لا والنبي ولا منتشر في الغرب ولا حاجه.. ده المرض ده إحنا موطنه الأساسي آه وربنا زي ما بؤلوكوا كده.. آخر مرة رحلت للدكتور كان إمتي يا مواطن هتلاقي اللي يقولك: يااه ده أنا رايح جاي عالدكاتره لما كعابي دابت، الصبر بس هاجيلكم كمان شوية بتكلم في العادي اللي معندوش مرض مزمن.. من الآخر 90% منا مايبلجأش لقرار الدكتور ده إلا لما يبقى بعيد عن السامعين قرب يتشال مرابعة.

في الأول مع ظهور أي أعراض عالنفر مننا بيتدي يشتكي للدواير المحيطة، وكل واحد يدلي بدلوه من أول العلاج المثالي لكل أمراض الدنيا وهو: ادفى كويس وانت نايم.. اشرب حاجات دافية كتير.. نهاية لوصف القيام بجراحات دقيقة في المخ والقلب والأجهزة الحيوية كلها.. مرورًا بأه بوصف الأدوية براشيم وكباسين وبلايغ وسفوف ونقط وحقن.. آه والنبي زي ما بؤلوكوا كده.

طب تعا نعمل تجربة عملية، افتح تليفونك واختار أي رقم وقول للي هتكلمه حاسس برهقان وكرشة نفس ومهبط وبطني واجعاني وشوف هايقولك إيه.. أراهنك يا مؤمن لو جابلك سيرة الدكتور أول حاجه هيسألك أسئلة من نوعية الوجع مسمع في ضهرك؟ ريقك ناشف؟ مزغلل؟ أي أعراض يربط عليها الدور اللي جاله السنة اللي فاتت ومالوش أي علاقة باللي إنت بتقوله وهيوصلك الدوا اللي ريحه بعديها بيومين، وهيوصلك طبغًا تدفى كويس وتشرب حاجات دافية كتير.. اهو جرب وابقى قول إسعاد قالت.. والنبي زي ما بؤلوك كده.

فكرة اللجوء للدكتور سواء منك أو من كل اللي هينصحوك هتكون آآآآآ آخر  
حاجه تيجي سيرتها في بالك أو بالهم.. بعد استنفاد كل المحاولات العظيمة  
اللي في الأغلب نتيجتها بتكون إن الأبعد كان حباله قولونه فيه انتفاخ وبيروح  
للدكتور وهو بيعاني حساسية والتهاب مفاصل وجرب وجلطة واكتئاب ولوز  
من كم الوصفات اللي سمعها وراح منفذها.

المشكلة إن البلاوي اللي من النوع ده بتمتد مننا لعيالنا.. يعني العيل سخن..  
مممم.. بيسنن ماتقلقيش.. الواد بيسهل.. مممم معلىش كل العيال كده.. البت  
على صرخة واحدة.. مممم العيال كلها كده ارقياها ودفياها كويس واسقياها  
حاجات سخنة كثير. الواد بيهرش.. البت وقعت على دماغها.. العيال طلعلهم  
فسافيس.. البت حطت صوباعها في الفيشة.. والنصايح هيا هيا، والحاجات  
السخنة داخله طالعة ومخزون التيليو والينسون والعسل واللمون مايبنتهيش..  
وربنا زي ما بقولكوا كده.

وربنا يا بشر الدكاترة مستأنسين ولا بيعضوا ولا بيقلبوا مصاصين دماء أول  
ما تروحوا تقولولهم تعبانين، اللي هيتلحق عند الدكتور النهارده في العيادة  
أحسن بكتير ما تلحقوا بكره تحت المشروط في المستشفى في أوضة  
العمليات. إوعى تسأل مجرب ما تسألش إلا طبيب، أكم ناس حبايب وقراب  
نصايح الحاجات السخنة والتدفية وروشتات التليفون ودتهم ولا رجعتهمش  
تاني. خلوا بالكم شوية.. والنبي زي ما بؤلكوا كده.





هو يمكن مصطفى باشا كان حالة خاصة، بس هو أصلاً الطبيعي إن تحقيق الطموحات والآمال والحاجات الحلوة دي يكون في فترة الثلاثينيات والأربعينيات من العمر، ده العادي وربنا آه زي مابؤلكوا كده، بس اللي حاصل دلوقتي مش شبه كده خالص، يعني الطبيعي تلاقي اللي في المرحلة دي من العمر حاجه من اتنين، يا مقطوم وسطهم شغل ما بيرحمش علشان يلاحقوا على مصاريف الجواز وأقساط الشقق والعربيات والأجهزة يا ولداه، يا بيلفوا على كعب واحد زي ذكر البطريق ع الوظائف اللي مش لاقين صداها، الشباب في السن ده علاقته مع الشغل يا محبط من قلته يا مدهول من كتره، بينما ده سن الابتكار والإبداع والأفكار الجديدة والخروج من الصندوق، طب دي غلطة مين؟ الشباب بيقولك ما حدش بيدينا فرصة، والمسئولين بيقولوا الفرص موجودة واحنا جاهزين ندعمهم، الله!؟ نروح القسم طه ولا إيه؟! ما حد ابن حلال يحللنا المعضلة دي يا جدعان، أيوه عاوزين خطيب مفوه زي مصطفى باشا، ودماع أماظ زي الواد بتاع فيسبوك، ومجانين حتى زي سيلفادور دالي، ومخترعين، وفنانيين، وأصحاب مواهب وأفكار؛ لأن الحال اللي احنا فيه ده مش هيتغير غير بدول، ودول عطلانين في حته ضيقة ومستنيين الفرج، ما حد يقولنا الحل إيه طيب؟ زي مابؤلكوا كده.

## الديمونوفوبيا

قالك يا سيدي في بعض بلاد العالم ناس بيعانوا من رهاب أو فوبيا الديمونوفوبيا. ايه الديمونوفوبيا دي ياخويا؟ قالك ده رهاب الجن والعفاريت، سلامٌ قولاً من ربِّ رحيمٍ، آي والنبى زي مابؤلكوا كده.

للوهلة الأولى تلاقية موضوع عادي ومنطقي، عادي جدًّا لما تتجمع كلمات من نوع جن، عفاريت، يبقى يتبعهم بالضرورة والمنطق كلمة رهاب... أو فوبيا، بلح؟ ده كلام فارغ، استنوا بس خدوا كلامي للآخر، الرهاب ده يعني إن الناس تترعب لما تيجي سيرة الجن والعفاريت والشياطين، ولا ممكن أبدًا يقعدوا في مكان بيتكلموا فيه عن الحاجات دي، ولو صادف واتخيلوا بحاجة كده ممكن يموتوا من الرعب، طب ما هو إحنا مالنا ومال الكلام ده، إحنا يا مؤمن آخر دراسة عندنا بتقول إن المنطقة اللي عايشين فيها البشر صرفوا 5 مليار دولار وكسور على أعمال السحر والشعوذة واستحضار الجن والعفاريت وباقي قائمة الكلام الفارغ في سنة واحدة.. آه وربنا زامبؤلكوا كده.

خشوا اتأكدوا بنفسكم 5 مليار دولار يا بشر في سنة 2015 صرفناهم على الجن والعفاريت، والنبى تلاقوا العفاريت عيشتهم بقت نغنة دلوقتي، وكلهم راكبين هامر وبورش من شقانا وعرق جيبنا، والله ولعبت يا زهر مع العفاريت، شوف يا مؤمن الخمسة مليار دولار دول بينوا 8 جامعات بحثية، ويمولوا 3 أقمار صناعية وبينوا 500 مدرسة ثانوي، ويصرفوا على 8 تلاف باحث دكتوراه، وينقدوا حياة مليون لاجئ، ويأمنوا غذا وكسا لـ3 دول فقيرة، لأ، ويكفوا شونج لـ 10 ستات لمدة أسبوع مثلاً، والنبى زي مابؤلكوا كده، مسكنا كل دا حرقناه بخور، وكلاب يتيمة، وغربان عارجة، ومعيز متطلقة، وفراخ بعُرف بنفسجي!!؟ علشان ننول رضا الجن والعفاريت علينا، ونستجلب الرزق، ونرفع المرض، ونفك المربوط.

لأ، والأوكس من كل ده نفتح كنوز مستخبية، ونولد دولارات، آه وربنا نولد دولارات، قال إيه الدولارات بتولد، تجيب الدولار وتوديه لعم الدجال قوم يخلي الجن يخلي الدولار يولد دولارات صغيرة، والعالم بتصدق، وبتروح تدفع وتدعي للدولارات تنتع بالسلامة، وممكن يجيبولها أم السعد كمان بس أصل الموضوع ده قتل بحثًا زي ما يقولوا.. ومع ذلك لسه لحد النهارده الناس

مصدقة ومعدلات الصرف ما بتقلش.. دي بتزيد، والإقبال ع الدجل والشعوذة في ازدياد، وعدد النصابين العاملين في المجال ده في اللمون، ماشاء الله.. لدرجة وجود برامج في الفضائيات للنصابين دول وكله ع الهوا، لأ وإيه بقى فيه فضائيات من بابها للعالم دي طب إزاي؟ الدنيا بتمشي لقدام ولا بترجع لورا!!!؟

يعني ليه سنة 2016 ناس مقتنعة إن الطب مش هو اللي ممكن يشفي أمراضهم، وإن حرق البخور هو اللي هيحيب العريس، وإن جاميكا هو اللي هايحيب الأجوان، والسحلية المكسحة هاترد الغايب!؟ ليه سلمنا دماغنا تسليم أهالي وبعنا العلم والتعليم وحتى الدين والمقدسات.. كبرنا دماغنا منها ولجأنا للخرافة والأوهام؟ بقول ده وانا وانت عارفين ليه، بس بنعمل نفسنا مش واخدين بالننا، أيوه زي مابؤلك كده.

عارفين إن العلم اللي في دماغ البعض مش سلاح، عارفين إن الأميين وأشباه المتعلمين أكثر بكتير، عارفين إن معلومات أغلبنا عن الدين مغلوطة، عارفين إن اليأس والفقر والهموم اللي ملزمة ورا بعضها زي العقد اللي مالوش آخر جابت لكل إحباط، والمحبط ماتقدرش تقوله رميت دماغك في حجر العفاريث الزرق ليه.. آي والله زي مابؤلكوا كده.



عمر الأرض مع استمرار وجود الأكياس دي مش ممكن يزيد على 100 سنة..  
آه وربنا زي مابؤلكوا كده، يعني بالكثير أحفاد السامعين هيكونوا آخر جيل  
على وجه الأرض بسبب البلاستيك، بعض دول العالم ابتدت تلتفت للكارثة  
دي، كندا مثلاً كانت من أكثر دول العالم استهلاكاً للأكياس، طلعوا قانون إن  
مافيش أكياس بلاستيك عادية تدخل كندا، وإن كل الأكياس في كندا تبقى من  
النوع القابل للتحلل، دهلي وبومباي في الهند منعوا استخدام الأكياس نهائياً،  
ورجعوا للقماش والورق، نفس الشيء عملته بنجلاديش وتايوان منعوا  
راخرين الأكياس البلاستيك نهائياً، فرنسا ودول أوربية فرضوا ضرائب على  
الأكياس البلاستيك، وخلوها بفلوس مش مجانية مع البضاعة علشان يرغموا  
الناس تجيب أكياس سابقة أو أكياس قماش ممكن تستخدم أكثر من مرة..  
طب وبالنسبالنا؟ هه؟ هنا إيه النظام؟ لأ، عادي الحمد لله العيال كويسين  
وحمادة بس اللوز قايمه علي... بتكلم عن الأكياس!! آه حلوة الأكياس  
وملونة، لأوعندنا اكتفاء ذاتي ما بنستوردش، الحمد لله والأرض اللي بتفيص  
مننا، يا راجل الأعمار بيد الله ما حدش بياخذ أكثر من نصيبه.

ومنطقتنا اسم النبي حارسها بتعتبر من الأعلى استهلاكاً للأكياس في العالم،  
ونهار ما سوبر ماركت قرر يخلي الكيس بفلوس علشان يشجع الناس  
تستخدم الأكياس القديمة سودوا عيشته، أستأذن أنا ألق أجيب البقالة وأنا  
مروحة واجيب رولين كياس زبالة أهو ينفعوا.

## ده إحنا دافينه سوا

بيقولك يا سيدي زمان أيام الممالك كان فيه اتنين متشاركين في عربية كارو، المهم كان حالهم كرب، وكملت كمان والحمار عملها ومات، وقعوا في حيص بيص، الحدق اللي فيهم قال لصاحبه إحنا ندفن الحمار ونبني له تربة وقبة ونعمله مقام ونقول مقام سيدي زمهرير، وفعلاً يعملوا عملتهم والمقام يقاله مريدين، والعرجي وصاحبه يبقى واحد خليفة سيدي زمهرير والثاني يبقى خدام المقام.

ويجوا الناس من كل حته طالبين بركة سيدي زمهرير، وتنزل الندور ترف على المقام ويتملي الصندوق تبرعات، وكله رايج طبعا لجوز العرجية السابقين، وييجي يوم ويطمع واحد منهم في ندر كبير جه للمقام وباخده لنفسه، قوم الثاني يتغاضب والشر يتنطط في عنيه ويقوله وربنا لو ما رجعت الندر لسوق عليك سيدي زمهرير يخرب بيتك، الثاني ضحك وقاله.. وحياة طنط؟! ده (إحنا دافينه سوا) لتكون فاكر إن (تحت القبة ولي) فبقت المقولتين مثلين لحد النهارده بيتضربوا، زي ما بؤلوكوا كده.

عجبتني الحدوتة ما وقفنتش أوي عند الأمثال، يمكن اللي وقفنتي الفكرة، فكرة إنك تكذب الكدبة وتصدقها.. فكرة إنك تعيش الدور لآخره، بينما انت عارف كويس إنك بتضحك على نفسك، فكرت حبة كده في كم الكذب اللي كل يوم بنكدبه على نفسنا ونصر إننا نصدق، لأ ونبني عالوهم ده أحلام وآمال وتوقعات، ولما ماتتحققش تتضايق ونزعل ونندب ونلوم كل حجه في الدنيا.. بداية من حظنا الشوية، نهاية بطاقة الكون كله اللي احتشدت علشان توقفلنا مراكبنا السائرة.

اسمعوني بس زي ما بؤلوكوا كده، يعني كام ألف واحد اقتنع إن عنده موهبة فريدة من نوعها سواء فنية ولا أدبية ولا رياضية، راح خبط كل البيان وسمع صوته للقراض، وفرج تمثيله لطوب الأرض، وعرض أدائه في كل نادي والكل يقوله يابني وربنا ماينفع، والأبعد جيلة، مصدق نفسه ومكذب الكون كله وواخد في وشه وآازح لحد ما تتسد كل البيان يكتب بأه ويعيش دور الشهيد، ويتحسر على غلبه، وهات يا بوستات يعاني فيها ويتوجع ويصدر طاقة سلبية تكفي مجرة درب التبانة بحالها، خدوا مني للآخر زي ما بؤلوكوا كده.

تيجي انت من باب الجدعنة تحاول تتعاطف معاه.. صاحبك برضو وحببيك وعشرة لايكات وبوستات وتهاني في أعياد الميلاد وتعازي على صور المرحام وعشرة السوشيال ميديا ماتهونش إلا على الهاكرز والفيروسات، تقوم تزود الطين بلة وتروح نافخ فيه وتقوله أيوه حرام عليهم كلهم ظلمة، والكون معاندك وانت اللي فيهم ولا قبلك صوت، ولا بعدك تمثيل، ولا زيك شعر، ولا فيه منك في الملاعب، هوب أخونا منعدم الموهبة يتشحن بكم النفاق الأسري اللطيف ده ويرجع يرازي العالم بموهبته المنعدمة، ويرجع لنفس الكدبة اللي كديها على روحه، ويرجع يصدقها وينتشر ويتوغل ويتسرب ويستمر ويستمر، والنبي زي مابؤلكوا كده.

عزيزي الضاحك على نفسه مرحلة النيرفانا أو السلام اللي إنت عايشه مع أوهامك لطيفة جدًّا.. طول ماهي مريحاك أنبي خليك فيها لوحده، أنبي متفرض أوهامك ومواهبك المنعدمة على حد، أنبي ما تدور على شماعة لأوهامك، أنبي ماتصدرها لنا كل ساعة والثانية، أنبي ما تدور على سكة تنشرها وتكرسها وتخليها واقع، أنبي تقعد في حة ناشفة علشان مش ناقصاك، أنبي ماتعيش دور الضحية، أنبي إنت أول واحد عارف إننا دافنيه سوا، والنبي دافنيه زي مابؤلك كده.

## جهاز الـ4 عرايس

قالك يا سيدي كان يا مكان قرر مولانا الخديوي زمان يجوز 4 من عياله دفعة واحدة، حاجه كده علشان نفرح ونلحق نشوف عوضهم، قوم يجوز الأمرا توفيق وحسين وحسن وفاطمة لولاد عمهم أمينة وعين الحياة وخديجة وطوسون، ولاد عم في بعضيهم بأه، ونلم نفسنا، وماحدث يطلب ولا يطالب، وتبقى الجوازة كويسة ورخيصة وبننت ناس زي مابؤلكوا كده.

بس الحقيقة يعني الدنيا مكانتش ملمومة ولا حاجه، ده الدنيا كانت واسعة ومبهوأة ومطرطشة ومدلقة من كل ناحية، الخديوي إسماعيل بجلالة قدره اللي يحب العظمة والجمال، ده الراجل خلى مصر كلها زي طبق القشطة، شوف لما يجوز عياله بأه..

لأ وإيه 4 دفعة واحدة، كفاية أقولكم إنه خلى فرح كل واحد وواحدة 10 أيام كاملة، يعني المجموع بقى 40 ليلة أفراح وليالي ملاح، اللي لحد النهارده لما نبالغ نقول فرح 40 ليلة، كان بسبب جوازة العيال ولاد الخديوي، خدوا الزغلولة الكبيرة سرادقات.. الأفراح من كتر النور اللي كان مشعشع منها طول الـ40 ليلة سموا المنطقة اللي كان النور طالع منها للقاهرة كلها، إيه سموها المنيرة، أي والله زي مابؤلكوا كده.

ده غير شارع (أفراح الأنجال) اللي أصبح بعد كده شارع (فاطمة اليوسف) لتكريم المرحومة روز اليوسف كانت اتسمى لنفس السبب، المهم وانا بقراً عن الفرحة الأسطورة لقيت الخديوي إسماعيل وقتها عمل مناقصة عامة طرحها في الصحف لكل المحلات والوكالات في مصر لتوريد شوار العرايس.. ما هم 4 بأه.. لأ وإيه أمرا مش أي حاجه، قوم يفوز بالمناقصة وكالة فرنساوي في مصر فيعرف الخديوي ويستغرب -إيه مافيش وكالات مصرية فيقولوله لأ يا مولانا فيه بس العطا بتاعها بزيادة 25% عن الوكالة الفرنسية، قوم يرد الخديوي اللي يشور ولادي ضروري يكونوا مصريين.

وفعلاً (محلات مدكور) تفوز بالمناقصة رغم زيادة أسعارها وتقوم بالواجب وزيادة، قطيعة قطع الشوار وسنينه، نجف وحلل وفوط وملايات وستاير وغطا أنبوبة وسبت غسل وسبت بلكونة وهم ما يتلم.. أي والنبي زي مابؤلكوا كده.. المهم العروسة للعريس والجري للمتاعيس، وعاشوا في تبات ونبات وخلفوا



أمرا وأميرات، عجبني الصراحة.. موقف الخديوي قالك المصريين أولى بشوار عيالي حابه تفرح.. أومال ياخويا إحنا نشوف الحاجة (صنع في مصر) من هنا ويركبنا العفاريت الزرق ليه؟! مالنا بينا وبين صنع إيدينا وإيدين عيالنا عداوة!!؟ ده إحنا ولا اللي عاملين مقاطعة لمنتجات بلدهم.. أي والنبي زي مابؤلك كده.

عمر كمش شوفت حد بيعمل حملات علشان الناس تشتري منتجات بلدها؟! ده الإنجليز بيعتبروا السفر على طيرانهم واجب وطني ويتعصبوا يوم لما يلقوش تذاكر لوجهات سفرهم عليه رغم إنه عيضة يعني مش نيئة أوي.. أي والنبي زي مابؤلكوا كده، حتى لو منتجاتنا مش أحسن منتجات في الدنيا، رغم إن فيها اللي أحسن إنتاج في الدنيا وربنا، ومع كده وفي ظروفنا دي مابقاش خيار ده بقى واجب ندور عالمصري ونشتره وننفع صناعة ومنتجات بلدنا وصنع إيدين عيالنا! قوم نشغل ناس أكثر، ومصانع أكثر، وبيوت تتفتح أكثر، والدنيا تمشي، والعجلة تدور، وبيننا وبينكم زي ما بؤلكوا كده قلبنا مش هيبقى على هن-تشو-سين ومي-شانج-يونجخ أكثر من حمو وحسونة وأبو عماد، عيب حتى تيجي من الخديوي ولا تجيش منا يا جدعان.

## صفا الجميل

صفا الجميل... شوف حلاوة الاسم! بس صاحب الاسم مكانش حظه كبير من اسمه، لو اتكلمنا على أساس الشكل.

صاحب الاسم كثير ما يعرفهوش اسمًا، لكن كثير جدًّا يعرفوه شكلاً.

مين ما يعرفش نوفل في فيلم شباك حبيبي؟!

نوفل اللي كان لابس البالطو الفرو بتاع نور الهدى طول الفيلم ومطلع البلا على جتتها.

ومين ما يعرفش حرنكش ابن زينات صدقي في فيلم (دهب) اللي قالت عليه ابني وحيلتي، الشاب يا ربي اتشلفط خلاص ما بقاش نافع.. ده أنا هرميه للقطط.

ومين مايفتكش التلميذ اللي كان بيغني لنجيب الريحاني خلال زيارته للمدرسة في فيلم «سلامة في خير» وسط التلامذة ويقول ترررم ترررر.. هوا ده.

صفا الجميل، كثير فاكرينه صاحب إعاقة ذهنيه رغم إنه كان شاب ذكي ومثقف جدًّا، ولولا مشكلة كلامية أصابته في طفولته كان بقى متحدث لبق؛ لأنه كان بيكتب شعر، وكان أديب ومبدع في الكتابة، آه والله زي مابؤلكوا كده، فوق كل ده اشتهر إنه صاحب أطيب قلب وأنقى سريرة في الدنيا، وماحدث عرفه إلا لما كان يستبشر به خير، لدرجة إن الموسيقار محمد عبد الوهاب كان بيصر على وجوده علشان ألحانه تطلع زي ما هو عاوز، ومرة فضل يسجل في لحن واحد فوق الـ10 مرات ومازبطش معاه إلا لما جابوله صفا الجميل يقعد ساعة التسجيل، كمان أنور وجدي كان بيصر على حضوره في وقت إمضاء العقود وتصوير الأفلام، صالح جودت الشاعر والأديب كان بيصر يشوفه كل يوم الصبح علشان يضمن إن يومه يمشي عدل، وربنا زي مابؤلكوا كده، ده اللي النهارده بيسموه الطاقة الإيجابية، وزمان كانوا بيسموه وش الخير، الكلام عن صفا الجميل وقلب صفا الجميل وجمال صفا الجميل خدني لفكرة الانطباعات اللي بنكونها عن كل حاجه وتلرزق في دماغنا وتثبت ولا ممكن تطلع ولا تتغير بالطبل البلدي مهما جات لنا إثباتات وبراهين على إنها غلط أو منقوصة، أو ليها أكثر من زاوية مختلفين عن اللي في دماغنا،

وفكرة إننا هل بنفكر في الحاجة مرتين؛ يعني ممكن ندي نفسنا فرصة نغير الفكرة اللي أخذناها عن شخص أو حدث أو مكان أو حاجة؟ يعني فلانة دي جبارة ومفترية، فكرنا هي جبارة ومفترية في المطلق ولا علشان مسئولة وعليها ضغوط، بينما هي غلبانة وشقيانة، المكان ده الأكل فيه زي الزفت والخدمة تقرف، ما يمكن اليوم ده كان فيه مشكلة، والدنيا فرطت منهم، بينما أداؤهم العادي ملتزم والأكل كويس، طب ما يمكن المشكلة فينا أصلًا مش في الناس؛ يعني لما تبقى طول الوقت شايف الناس فيهم البدع وكل عيوب الأرض يبقى تأكد إن العيب فيك إنت زي مابؤلك كده، ماهو أصل مافيش حاجه اسمها الناس كلها معطوبة وانت البعيد اللي بتفرد السجادة، وتمشي عالمياه، وتفرد دراعاتك تطير للسحاب. لو عينك مابتجيش غير العيوب والنواقص، ولو ودنك ما بتسمعش غير الفارغة والأبيحة واللي ماتصحش، ولو فكرك دايمًا متشائم ودماعك مقفولة على فكرة واحدة ونمط ثابت، اتأكد إن العيب فيك، الدنيا ليها بدل الوش ألف، والحقيقة نفسها ليها كذا ناحية نشوفها منها راجع أفكارك وانطبعتك هتلاقي كتير منها، محتاج يتبص عليه من الناحية الثانية، وساعتها يمكن لأ أكيد هتلاقي صفا الجميل مش نوفل، آه وربنا زي مابؤلكوا كده.



أصلاً المكالمة شغالة، والطرفين عايشين يومهم كله مع بعض عبر الأثير من منطلق لسه هنقفل وتتصل ما ادينا قاعدين لو فضينا دقيقة ولا دقيقتين اهو نتكلم مافضيناش أهو النقل المباشر لليوم شغال هضحك عليكوا؟؟ أراهنكوا إنكوا بتسمعونى بودن دلوقتي والثانية عليها مكالمة... زي مابؤلكوا كده، القصد التليفونات محور أساسى فى حياتنا مابقيناش عارفين كنا عايشين من غيرها إزاي من حباله 10 سنين، والواحد ممكن ينزل حافى من بيتهم ومن غير ما يلبس بس ماينساش يحط الموبايل فى جيب البيجاما وهو نازل، واسود أوقات بتعيشها فى يومك هى لحظات الشرطة الواحدة فى مكان مافهوش فيشة، بس كل ده ماينفيس إن التليفون أداة، والمكالمات أسلوب تواصل مش أسلوب حياة، وان البنى آدم محتاج يعيش بره السماعه شوية ويتواصل مع البشر عيني عينك ووشى وشك شوية، برضو العيشة اللي بنص دماغ ونص وذن ونص ذهن دي بتكلفنا أرواحنا أحياناً، مش بس شغلنا وتركيزنا وعلاقتنا الإنسانية المباشرة، شيل السماعه شوية واسمعني، أيوه اسمعنى زي مابؤلك كده.

## ما صنعه الحداد

يقولك إيه يا سيدي، زمان يا سادة يا كرام في زمن الأعراب والسادة الأطياب راجل غلبان، مطلعته عينه المدام، كل يوم شجار ونقار وطلبات زي المنشار، حاجات تقلب العيشة مرار وجزاز على زيت حار، الراجل يا ولداه طق من جنبه وساب الخيمة وطلع عالباب وصرخ فيها: بصي يا اسمك إيه إنتي يا وداد بيني وبينك ما صنع الحداد وخذ بعضه وخرج هبد باب الخيمة وراه، زي مابؤلكوا كده، الست وداد تضرب أخماس في أسداس، الراجل قصده إيه بما صنع الحداد؟ مش فاهمة لحد ما رجع الراجل بالليل في إيده حاجه ملفوفة فتحها طلع منها قرص حديد وعصاية واداهم لابنه وقاله دق عليهم، الواد يدق والراجل يمشي، الواد يدق والراجل يمشي ويبعد فين لحد لما بقى مش سامع صوت الدق عالحديدة راح ناصب خيمته، في أبعد حته عن مراته الست وداد وهو ده ما صنع الحداد، أيوه زي مابؤلك كده، حكاية الست وداد وجوزها خدتني لفكيرة الدق عالحديدة والبعد عنه، يعني يا ترى يا هل ترى أقدر أبعد قد إيه عن صوت عم عطية البياع المتجول اللي بييجي على عربية بحمار في 2016 وإمعانًا في مجارة العصر بيستخدم ميكرفون مزود بسارينه مطافي وهو بينادي على الطماطم أم 4 خمسة وسبعين الكيلو يا مدام؟! ولا ممكن أبعد قد إيه برضو عن صوت شادر عزا المرحوم الحاج محمود بسمعته اللطيفة اللي مابتعملش غير أكو مستمر لا تميز منه صوت المقرئ من كحته؟! وكل ده سنة 2016 برضو!!! هضحك عليكم يعني اطلعوا بصوا من الشباك قوموا، والنبي زي مابؤلكوا كده، ولا ممكن أبعد قد إيه عن الميكروباص اللي بيصر إن الحارة اللي إنت ماشي فيها هي الوحيدة اللي آخرها الجنة واليمين والشمال آخرتهم حفرة في قاع الجحيم، ويصر إن الكلاكس هو وسيلته الوحيدة لبلوغ الكمال، وإن تعليقة إيده على زمارة العربية هي اللي هتخليه ينول نعيم الدنيا والآخرة من أقصر طريق؟! وسؤال وجودي انتابني وانا بتساءل برضو عن كيفية إقناع الحاج عدوي إن كونه صاحب البيت اللي فيه الزاوية مايتبعهوش بالضرورة ملكيته لميكرفون الزاوية اللي قرر يحطه في زور عمود النور بحيث يشنف أذان المنطقة بحالها بصوته الشجي وبالأخص ساعة أذان الفجر بأه لما ينبري مؤذّنًا وبعد كده داعيًا بصوته الشجي، بغض النظر عن اللحمية البسيطة وآثار المعسل ومخارج

الحروف اللي أبعد ما تكون عن العربي من أساسه، الحاجة اللي تحس معاها إن غالبية مؤذني الزوايا يا طلاينة، يا جريح، يا أطفال اتعلموا الكلام أول امبارح، لهو أنا عايشة لوحدي؟ ما انتوا سامعين وعايشين في اللي احنا فيه ده، زي ما بؤلكوا كده، وكل ده كوم والإنسان الأنوي النادر اللي لسه عايش حقبة التسعينات لحد النهارده ومصر يحط استوديو سمعيات كامل في عريته للدرجة اللي معاها تحس إن الصوت اللي طالع من العربية بيخبطك في جتتك ويوجعلك أعضاءك كلها، مش حيا لله واجعلك ودنك، كوم ثاني، كمية الإزعاج اللي عايشين فيه النهارده مع كم اللا مبالاة من المزعجين أنفسهم كانت تخلي جوز مدام وداد، الله يرحمها ويرحمه، يوطي على رجلها يبوسها ويستسمحها لو جه عاش معانا يومين على بعضهم ولا يجيلهاش سيرة ما صنع الحداد دي أبدًا. آي والله زي ما بؤلكوا كده .

## متلازمة فيرجولي

أعز أنا علم النفس وبلاوي المكنونات البشرية، أعزها أعزها يعني الصراحة قوم قريتلكوا من كام يوم عن اضطراب نفسي نادر حبتين بيصيب واحد من كل مليون بني آدم تقريبًا، قالك يا سيدي اسمه متلازمة فيرجولي، قال إيه مصاب المتلازمة دي بيحيله هاجس إن كل الناس اللي في الدنيا عبارة عن شخص واحد، آه والنبي زي ما بؤلك كده، هو نفر واحد بيغير شكله وهدومه ومهنته وجنسه كمان كل شوية ويطلعله بـ 9 مليار منظر وليه هوا لواحد علشان يجننه ويقرفه في عيشته، فكرت حبة كده في العيشة هتبقى شكلها إيه مع واحد بالمنظر ده، وبعدين رجعت قلت لأ والنبي عادي ما احنا عايشين مع غالبية المصابين بالمتلازمة دي، آي والنبي زي ما بؤلك كده، كل اللي عايشين معاهم عندهم مشكلة مع الآخر أي آخر أي حد مختلف، أي واحد (تاني)، أي واحدة (غير شكل) على رأي إخواننا اللبنانيين حاطين نمط وقالب وبرواز لكل البشر واللي يخرج بره القالب ده يلاقي منا معاملة الغز، عارفينهم الغز؟ أيوه هما اللي آخر خدمتهم علقه، ربك من فوق سابع سما خلق البشر أشكال وألوان وأحجام وقلوب مقلبة وأمخاخ وضمائر مقفولة عاللي فيها ليه إحنا جينا ورفضنا الاختلاف، مميمم فلانة سمرة بس حلوة، اسمها إيه بيضا بس دمها خفيف، مميمم فلان ده ملتزم بس مش إرهابي، علانة دي مسيحية بس طيبة، فلانة دي ست بس بتعرف تسوق دايمًا، فيه توصيف وبعد منه استثناء؟! آه وربنا زي ما بؤلكوا كده طب بلاش بصوا كده الناس بيصوا للأجانب في الشارع -هيبسح أيام ما كان فيه أجانب في الشوارع - إزاي؟! تحس إنهم بيتفرجوا على كائنات جاية من البعد إكس مفتحين عندهم على آخرها وبيجيوهم من فوق لتحت ولا عملية الفحص الذري، بلاش الأجانب شوف النظر للعازب أو العازبة لمن تجاوز الـ30، شوف التعامل مع المتجوز بس لسه مخلفش، شوف التعامل مع الفقير ولا المعوق ولا اللي جاي من الأرياف بلاش كل ده، شوف إى بيحصل للستات في الشارع لا لشيء إلا إنهم ستات من الأصل، يعني كل البشر لازم يتحولوا لذكور بيضاء متزوجين مؤمنين، سليمة الجسد أغنيا قاهرة أهلاوية علشان يتعرض للحد الأدنى من الرفض والاستنكار في مجتمعنا اللطيف، القصد ماينفعش الناس تبقى خلقة واحدة، وشكل واحد ولغة واحدة ولون واحد



وليس واحد، وجنس واحد وانتماء واحد وفكر واحد دي حاجه أصلاً ضد الفطرة  
اللي ربنا خلقنا مختلفين علشان نقبل بعض والناقص فينا نلاقيه كامل عند  
غيرنا فيكملهولنا ويكمل هو اللي ناقص عنده مننا، وهكذا عادي طبيعة البشر  
الاختلاف وحلاوة الدنيا أصلاً في الاختلاف ده، جتتك يا أخي مش شبه بعضها،  
تخيل عيشتك البعيد عدم المؤاخذة بجزم كلها فردة يمين!!! آه وربنا تخيل زي  
مابؤلك كده، ما نجرب نقبل بعض نقبل بعض بعلنا كده، زي ما احنا بطولنا  
بقصرنا، بتخنا برفعنا بسوادنا ببياضنا بدينا بشعرنا بطرحنا بخلفنا بعقمنا  
بفقرنا بغنانا بمنوفيتنا بدقهليتنا بأياً كنا، زي ما احنا كده، علشان متلازمة  
فيرجولي اللي بتصيب واحد من كل مليون بني آدم شكلهم جمعوا الـ90  
مليون اللي موجودين في الكرة الأرضية وجابوهم هنا ولا إيه؟! آي والنبي زي  
مابؤلكوا كده.

## مدام توسو

يقولك يا سيدي مدام توسو ست فرنساوية اتولدت من يبجي قرنين من الزمان في فرنسا، واتولدت ياولداه يتيمة، قوم جوز أمها الله يكرمه كمل تربيتها وعلمها حب الشمع، آه الشمع، والست تكبر وتحترف مهنة تشكيل الشمع، وتقوم الثورة الفرنسية ويشجعها الثوار على عمل تماثيل شمع لرموز فرنسا السابقين، هوب تروح إنجلترا وتحترف أكثر وأكثر وتعمل مجموعة تماثيل للمشاهير وتفتح أول معرض ليها اللي مع الوقت يتحول المعرض ده لأهم متحف للشمع في العالم ويقع في قلب لندن، المتحف فيه مئات التماثيل لأهم الشخصيات في العالم، إشي فنانين، ورياضيين، وأدباء، وعلماء، وسياسيين، وزعماء، وملوك أحياء وأموات، وكل زوار المتحف يحق لهم يتصوروا مع أي تمثال بالشكل اللي حبينه، يعني ممكن تأنجز أنجلينا جولي من ذراعها، أو تطلع لسانك للدلاي لاما شخصيًا مافيش مشكلة، وممكن تبص لأوبرا ونفري باشمئناط وتاخذ ليوناردو دي كابريو حزن مطارات، آه والنعمة زي مابؤلكوا كده، المتحف الأتيكة ده بأه بيكسبهم على كده؟ آه حاجات بسيطة كلها، حيالله

4 مليون جنيه إسترليني في الأسبوع، دخل المتحف في الأسبوع 4 مليون جنيه إسترليني، عارفينه الإسترليني الحلو ده اللي بفلوس كثير، أهو هو ده، لا وبيقولك إن كثير من زوار لندن ما بيهمهمش يروحوا يشوفوا قصر باكنجهام ولا ساعة بيج بن قد ما بيهتموا يزوروا متحف مدام توسو، لما قرئت الكلمتين دول نط في عقل بالي خاطر غريب، طب ما احنا عندنا متحف شمع! آه وربنا عندنا واحد أنا فاكراه ياما روحناه واحنا في المدارس زمان، قوم ضربت غطس في جوجل أدور على متحف الشمع المصري ألتقيلك.. أيوه صح عندنا متحف قد الدنيا تم إنشاؤه سنة 1934 وبيضم مجموعة مشاهد تصور تاريخ مصر وتمثل الحياة اليومية، لأ وإيه اتصنف كواحد من أهم 4 متاحف شمع على مستوى العالم، والأنكت إنه اتصنف الثاني مباشرة بعد متحف مدام توسو وربنا زي مابؤلكوا كده، كلام جميل وربنا طب أخبار المتحف إيه؟ ويبدخل كام؟ وآخر صورته فين؟ والتجديدات بأه والحاجات الحلوة اللي دخلت عليه هه؟ أخبار المتحف إيه؟ هه؟! في إيه بسأل عن ثاني أهم متحف شمع في العالم اللي عندنا في حلوان ده، لأ يسمع حسك بالخير

مقفول من 2009 والقطط والكلاب سارحين فيه، والزبالة أكوام أكوام جوه، أيوه والله زي مابؤلكوا كده متحف الشمع مقفول والشمع ساح راح مطرح ما راح من 2009 علشان إجراءات السلامة وتكلفة إعادة تشغيله كبيرة، مش بس متحف الشمع، أكم حاجات في بلدنا محتاجة يتنفخ من عليها تراب الإهمال والزمن وتتمدها زعافة التطوير وريشة التجديد، وهي هترجع تبرق لواحدها مش محتاجين نخترع العجلة وربنا العجلة، أصلًا موجودة هي بس واقفة ومصدية وواكلاها البارومة وعندنا صناعية إيديهم تتلف في حرير وفاضيين بالمناسبة قولولهم هوب عالجلة هيصنفروها ويدوها وش المعجون التمام ويدخلوها فرن الدوكو ويرجعوها تلف ولا اللي راكبها ستين عفريت، آه والله زي مابؤلكوا كده، ساعات التاجر بيبقى محتاج يبص فعلاً في دفاتره القديمة ويقلب في الكراسة الصفرا ومن غير ما يفلس ولا يكون ناوي يعمل فرح يلم فيه نقطة، الدفاتر القديمة والكراسة الصفرا فيهم حسابات سقطت سهواً، وانتست لو طلعتها وراجعتها ولحقنا اللي ممكن يتلحق يمكن تفرق كثير وصدقوني، زي ما بؤلكوا إحنا في عرض الفرق ده.

## البوسطجية اشتكوا من كتر مراسيلي

كثير منا سمع غنوة «البوسطجية اشتكوا من كتر مراسيلي.. روح يا قمر والنبي ع الحلو مسيلي» الغنوة دي للمطربة المصرية الأصلحة اعتدال جورج عبد المسيح أو رجاء عبده، الغنوة دي كانت أشهر من كماننا وأهم بكثير من مكارينا، الغنوة دي ياما حبيبة زمان سمعوها واتهدوا كده علشان البوسطة بتأخر، ورجاء عبده بقى شخصياً مراسيلنا إحنا مكانتش بتروح لها ولا تشكره على البهجة اللي منحتها لينا بسبب أغانيها لأننا بصراحة وعلى بلاطة ناكرين جميل أي حد بيضيف لينا بهجة، رجاء عبده فضلت ياعيني وحيدة مستنية ساعي البريد ينادي على اسمها ويديها جواب من جمهورها أو من محبيها بعد ما كانت البوسطجية بتشتكي بقت هي اللي بتشتكي يا عيني لدرجة إنها اعتزلت الغنا لمدة يمكن توصل لأربعين سنة محدش فاكر يسأل عليها أو هي فين، وبعد ما كانت جوابات المعجبين بالكوم.. وساعي البريد مش ملاحق على الرسايل هيبه كانت أيام بقى.. أيام شكرًا لساعي البريد زمن الكتابة الجميل والجوابات بس إيه حكاية البوسطجية دول؟ سنة 1864 اشترى بنك ديرفيو وشركاه من مسيو موتسي مكاتب البريد اللي كان بيديرها، وده لصالح الحكومة المصرية بمبلغ 46000 وكسور وبعدها بسنة صدر الأمر العالي من الخديوي إسماعيل بإقرار صفقة البيع وأصبحت مصر بتمتلك مكاتب البريد الخاصة بيها وفي نفس السنة اتعاقدت الحكومة المصرية على طبع طوابع البريد لصالحها وتولي إدارة هيئة البريد مسيو موتسي، وتم توريد طوابع البريد لأنحاء القطر المصري، وفي خلال خمس سنين تم تعميم مكاتب البريد المصرية في الوجه البحري ومصر الوسطى وتم افتتاح مكاتب بريد مصرية في إستانبول وجدة وإزمير وبيروت وطرابلس الشام، بس للأسف فضلت مشكلة متعلقة واقفة في زور البريد المصري، كانت قناصل الدول الأجنبية ليها مكاتب بريد خاصة بيها وكان الخديوي إسماعيل عنده رؤية هي توحيد البريد في مصر كلها تحت سيطرة البريد المصري ودارت مفاوضات مع عدد من قناصل الدول دول زي إنجلترا وأمريكا وفرنسا، وكان الغرض منها إلغاء الدول الأجنبية مكاتب البريد بتاعتها ويستعملوا مكاتب البريد المصرية، كانت خطوة مهمة لتوحيد نمط البريد في مصر، وكمان أصر الخديوي إسماعيل على أن يكون لهيئة البريد مكتب خاص بيها وهو مركز هيئة البريد المصرية

الموجود لحد النهارده في ميدان العتبة، الصراحة الموضوع خد وقت شوية يمكن لحد سنة 1875 على ما بقت البوستة الخديوية كيان كبير ومعترف بيه، المهم يا اخوانا البوستة الخديوية أو البريد المصري من يومها وهو بيتطور وينتشر ويتوغل وبقى ملمح مهم من ملامح الحياة المصرية، وبقى البوسطجي بالزي الرسمي بتاعه علامة على إن فيها جواب جاي من البلد.. من الحبيب الغايب.. من الابن المسافر وعلى فكرة كسوة ساعي البريد كانت إلزامية وبأمر الخديوي من سنة 1865، شايفين الشياكة المصري في كل التفاصيل ومهنة البوسطجي طلعت في الأفلام واتكتب عنها أعمال أدبية وهو حد ممكن ينسى فيلم «البوسطجي» لشكري سرحان ولا النص الأدبي البديع لعننا يحيى حقي، البريد المصري موجود وشغال بس في زمن الإنترنت والواتسآب.. البريد بريقه قل بس تاريخه عمره ما هيتنسي.

# الحاكم بأمر الله

لما حد يفضل يدك في أوامر، وكلها أوامر كده غريبة عجيبة ويمكن كمان مربية، دماغك تفضل توديك وتجييك وتلاقي نفسك بتقول على النبي آدم ده: هو فاكر نفسه الحاكم بأمر الله، إنت بتقول الاسم كده من باب إنك عارف وفاهم مين هو الحاكم بأمر الله ولو حد سألك طبعًا بتعمل ناصح وتقول: ده واحد كان عايش زمان وأحكامه غريبة، الصراحة بقى إحنا محتاجين نقعد قعدة حلوة كده ونتكلم عن الحاكم بأمر الله الخليفة الفاطمي الغريب الأطوار اللي عمل بلاوي في مصر، والأهم من كده كان ليه وجهة نظر ابن اللدينا في كل حاجه بيعملها، الحاكم ده كان اسمه المنصور وابوه كان العزيز بالله ثاني خليفة فاطمي في مصر وجده لزم هو المعز لدين الله الفاطمي أول خليفة فاطمي في مصر ومؤسس القاهرة.. من الناحية النظرية، يعني المهم المنصور لما أبوه مات بقى هو الخليفة، واختاروا له لقب هو الحاكم بأمر الله، الحاكم كان لسه عيل لما بقى خليفة، واللي مسك أمور الحدودة الوزير عيسى والقائد برجوان، واللاتين اتعاملوا مع الحاكم على إنه عيل مالوش فيها، لدرجة إن القائد برجوان كان بيقول على الخليفة في قعداته الخاصة «الوزغة» يعني البرص.. يععع المهم تلف الأيام والحاكم يكبر كده وهوووب يقلب ع الكل يقتل القائد برجوان ويحكم سيطرته على الحكم، ويصدر عدد من القرارات الغريبة، بلاش جرجير في الأكل علشان السيدة عائشة كانت بتحبه، معرفش جاب المعلومة دي مين بس اتمنع الجرجير في مصر، منع الخمر ع الكل مسلمين وأقباط، وحرق مزارع العنب بالمره، بلاش ملوخية.. ليه يا عم.. علشان معاوية ابن أبي سفيان كان بيحبها، خلي الناس تفتح محلاتها بالليل وتقفها بالنهار.. إيه الحكمة محدش عارف، منع الستات تخرج من البيت، ومنع الإسكافي اللي هو «الجومجي» يعني يعمل لهم مراكيب، وقالك أي ست تخرج بره البيت تتضرب وش، وكان عصبي وعلى أقل غلطة يقتل على طول مفيهاش هزار، وكان شايف إن المصريين مع بعض زي القشطة بالعسل أقباط على مسلمين حاجه كده عناب.. الأناناس يعمل إيه؟ قام مضيق على الأقباط في الزي والأكل والركوبة وكل حاجه، وحرق شوية كنايس على أديرة، وجه على المصريين المسلمين السنة وضيق عليهم، حتى اليهود قفش عليهم، فضل كثير بقى الحاكم ده عايش؟ الصراحة

قعد شوية حلوين بيحكم مصر وبيتحكم فيها، وعلى كل المساوي دي كان محب للعمارة والأدب، وفي عهده مكتبة الأزهر وصلت لدرجة من الرقي والاتساع إنها كانت بتنافس مكتبات بغداد، بس تعمل إيه الكتب للشعب اللي كل يوم والثاني بيصحى على قرار شكل؟! وفي عهده قامت أكبر ثورة للشعب المصري ضد حكم الفاطميين واللي انتهت بأعجوبة لصالح الحاكم، وربنا يجازي اللي كان السبب لحد ما اخته ست الملك قررت في ليلة مالهاش ملامح تقتله في خلوته اللي في المقطم، وفعلاً اتقتل ومحدث يعرف لجثته مكان، والشعب المصري عمل من بنها، ولا كأن فيه حد كان عايش اسمه الحاكم بأمر الله، وكأن لسان الشعب بيقول: اصبر على جار السوء يا تجيله مصيبة ويموت.. يا تجيله مصيبة ويرحل، وفي الاتنين الشعب كسبان، ودي كانت حكاية الحاكم بأمر الله.. حد يقوم يطفي التلفزيون بقى مش قادرة.. سلامو عليكمو.

# الشعب ينسى ويفتكر بمزاجه الشعب المصري فاكر مين اللي كان معاه ومين اللي كان ضده

الشعب المصري ده غريب.. عجيب.. آه والله زي ما بؤلك كده، لما تتمشى في شوارع مصر وتركز كده شوية في أسامي الشوارع هتلاحظ حاجه غريبة أوووي، أسامي ناس متعرفهاش، وشخصيات تاريخية، وناس مالهمش وجود أساسًا في الحقيقة.. بس الشعب قرر وقراره اتنفذ إن أساميهم تفضل موجودة ومش منسية، الشعب بيفتكر اللي على مزاجه وبينسى اللي أهان له أو اللي ماوقفش معاه وقت الشدة، يعني خد عندك إسماعيل صدقي.. الراجل ده كان رئيس وزرا لمصر كذا مرة، وكان وزير كذا مرة، عاش على قد ما عاش سياسي داهية زي ما كتب التاريخ بتقول، لكنه علشان وقف ضد إرادة الشعب واتحالف مع القصر ضد الشعب، ألغى دستور 23 وحت مكانه دستور 1930 اللي قلص كثير من حقوق الشعب، وهو اللي زور ثاني انتخابات في مصر سنة 25 كان قرار الشعب إنه ينسى تمامًا إسماعيل صدقي حتى مفيش حارة باسمه فيكي يا مصر.

مثال ثاني علشان متفتكرش إننا بنقول أي كلام والسلام.. مصطفى باشا فهمي.. أكثر واحد تولى رئاسة النظار في مصر.. 13 سنة بالتمام والكمال، الراجل ده محدش افكره بزقاق حتى.. مع إن الشعب فاكر اسم بنته.. اللي هي صفية.. اللي اتجوزها سعد باشا زغلول.. وبقت أم المصريين أكبر مثال على إن الشعب مش بينسى اللي بيخدمه ولا بينسى اللي يسيء إليه.

الأخوين ماهر.. علي ماهر كان آخر رئيس للوزراء في العهد الملكي والراجل اللي كانوا بيقلوا عليه: رجل القصر، وأخوه أحمد ماهر المحامي الشهير والسياسي الوفدي اللي تم اغتياله سنة 54، علي ماهر كان عدو للشعب.. مفيش حكومة أقلية أو حكومة انقلابية إلا وكان فيها، على عكس أخوه أحمد ماهر، مفيش موقف وطني إلا وخدمه علشان مصر، حتى لما انفصل عن الوفد. علي ماهر كان رجل المصالح الخاصة واللي على كل الحبال، أحمد ماهر كان واحد من أبطال الجهاز السري لثورة 19 وكان متهم



باغتيال السير لي ستاك. علي ماهر اتنسى ومحدث بيحيب سيرته والشعب قرر كأنه مكانش موجود. وأحمد ماهر الشعب كرمه بعد اغتياله وأطلق اسمه على أكبر مستشفى تعليمي في القاهرة مستشفى أحمد ماهر بحي الحلمية الجديدة. الصراحة وبوضوح كده وعلى بلاطة الشعب المصري زي ما قلت عجيب.. غريب؛ غريب في اختياراته للناس اللي بيرفعهم لمرتبة البطولة والحب، يحب اللي يسانده يسامح اللي ممكن يتخلى عنه في لحظة، بس يرجع ثاني لحضنه لكن عمره ما يسامح في اللي بيخونه أو اللي بيتخلى عن أحلامه أو طموحاته، والدليل شوارع مصر وحواريها عمرك ما هتلاقي اسم شارع أو حارة لحد بيكره الشعب، ولو حصل بتبقى غلطة حكومية بحتة زي شارع سليم الأول الغازي العثماني أو شارع قمبيز.. الإمبراطور الفارسي اللي أنهى آخر دولة وطنية فرعونية مصرية دول غلطات مش من الشعب صدقوني، لأن الشعب مش بينسى.

# الله حي عباس جي عباس مين يا اخوانا؟

كام مرة سمعت عبارة «الله حي عباس جي؟» كام مرة سألت نفسك: هو مين عباس؟ وجاي منين؟ ورايح فين؟ هو إيه حكاية عباس ده؟ وليه الشعب فاكره مش ناسيه؟ وليه أصلًا بقى كان مستنيه؟ أقولك أنا أصل الحدوتة وزتونة الليلة دي، عباس ده هو الخديوي عباس حلمي الثاني اللي تولى عرش الخديوية المصرية بعد الخديوي توفيق، عباس حلمي الثاني لقي نفسه وسط مندوب سامي ودار المعتمد البريطاني وقائد للجيش بردو بريطاني، حس إنه كده مش واخد وضعه ولا واخد حيثياته في نفسه كخديوي، خصوصًا إنه في مرة راح زار وحدات للجيش المصري وقال شوية ملاحظات كده معجبتش القائد الإنجليزي، قام المندوب السامي ضغط عليه علشان يعتذر، عباس حلمي شالها في نفسه وكان قراره إنه لازم يساند القوى الوطنية المصرية، وطبعًا اتحالف مع مصطفى كامل وكانوا بيتقابلوا في السر وحواديت كده زي الأفلام، تروح الأيام وتتغير الدنيا، مصطفى كامل يموت، محمد فريد يتخانق مع الخديوي عباس، الخديوي عباس نفسه بيتحول من راجل وطني بيدور على مصلحة البلد حتى ولو كده وكده لصورة باهتة من الحكام اللي بيستغلوا نفوذهم وسلطتهم علشان يستولى على أراضي، أو يحقق مكاسب من مشروعات أو عمولات، لحد هنا والحدوتة عادية وبتحصل.. لحد ما حصلت الحرب العالمية الأولى عباس حلمي الثاني كان بيزور الآستانة قاعد مع السلطان العثماني وفجأة قامت الحرب؛ تركيا والمحور في ناحية، والإنجليز والحلفاء في ناحية، الإنجليز مكانوش بيحبوا عباس، كانوا شايفينه بتاع مصلحته، بس كان بيورطهم في صراع مع القوى الوطنية علشان كده كان القرار الإنجليزي.. إعلان الحماية الإنجليزية على مصر وبالمرة عزل الخديوي عباس حلمي الثاني، صحي عباس من النوم لقي نفسه لا هو خديوي ولا هو أي حجه، مجرد خديوي معزول.. علشان كده اتحالف مع الأتراك وقعد يقولهم لازم تركيا تبعت جيش تعيد احتلال مصر. وانتشرت الأخبار إن عباس هيدخل القاهرة مع الجيش العثماني اللي هيغزو مصر عن طريق سيناء، قام الإنجليز طلوعوا إشاعة إن عباس حلمي مات، قامت تركيا قررت تبعت الجيش ومعاها

الخدوي عباس حلمي الثاني وانتشرت في شوارع مصر الغنوة دي «الله حي عباس جاي» تعبيرًا عن رفضهم لشناعات الإنجليز مهما كانت الصراحة، عباس كان فعلاً حي وفضل عايش لفترة طويلة بعد الحرب كمان، بس عمره ما رجع مصر وعمره ما بقى خدوي ثاني؛ لأن الإنجليز بعد عزله عينوا حسين كامل وبقى سلطان وبعد وفاة السلطان حسين كامل ابنه أحمد كامل اتنازل عن عرش السلطنة اللي راحت للبرنس فؤاد اللي بقى السلطان فؤاد، وبعدها بقى الملك فؤاد وفضل عباس حلمي الثاني بيحلم إنه يرجع، وفي الآخر وافق على ترضية من الملك فؤاد ورجعه أملاكه وفلوسه ويا دار ما دخلك شر، ومات عباس حلمي الثاني وسيرته اتنسيت واللي فضل منه الغنوة دي بس «الله حي عباس جي».. آه وغلاوتك زي ما بؤلك كده.

# اللي بنى مصر اللي هي القاهرة مالوش عنوان

كلنا عارفين إن اللي بنى مصر كان في الأصل حلواني، وده على سبيل المجاز، يعني مش الحقيقة، لكن الحقيقة اللي بنى مصر ونقصد بمصر هنا العاصمة.. القاهرة واللي بناها كان جوهر الصقلي وجوهر الصقلي ده كان قائد جيوش الخليفة الفاطمي المعز لدين الله.. ولما فتح جوهر مصر قرر إنشاء عاصمة جديدة في مصر لأن الخليفة قرر نقل دار الخلافة من المنصورية في المغرب لمصر.

قام جوهر الصقلي اختار حته أرض فاضية وبالليل والناس نائمة حفر أساسات القصر واستمر في بناء القصور والدور والسور لمدة أربع سنين متتالية وسمى العاصمة الجديدة «المنصورية» من باب المجاملة لسيده السابق الخليفة المنصور أبو الخليفة المعز.

ولما دخل المعز لدين الله الفاطمي العاصمة قرر يكون اسمها هو «القاهرة» من باب يعني إنها العاصمة اللي هتقهر بغداد عاصمة الخلافة العباسية، لكن المعز عاب على موقع القاهرة حاجه واحدة بس إنها بعيدة عن النيل وكان بيتمنى إنها تكون على مشارف ساحل النيل، لكنه رضي بالموجود.. وكان سور القاهرة عليه أبواب للحماية والحراسة، وكانت عناوين الأبواب للأمانة يعني فيها حاجه كده تدعو للتفاؤل باب الفرج.. باب الفتوح.. باب النصر حاجات كده جميلة واللي أشرف عليها جوهر الصقلي بنفسه وهو اللي أشرف على إنشاء شارع المعز ومنع سير الدواب فيه علشان الشارع يفضل نضيف.. ولو فيه ضرورة إن فيه حمولة تبن أو برسيم أو حبوب لازم تعدي في الشارع كان لازم تتغطى علشان الشارع يفضل نضيف.

وكان فرض على أصحاب المحلات -أو الحوانيت بلغة عصرهم- إنهم يحطوا زير للميه قدام كل محل، وبالليل كان الشارع بيتقفل بسلسلة في بدايته وسلسلة في نهايته حفاظًا عليه، وفضلت القواعد دي معمول بيها من أيام جوهر الصقلي حتى نهاية عصر المماليك، ياترى لو جوهر الصقلي كان عايش وشاف شارع المعز دلوقتي كان هيقول لنا إيه؟ ما علينا.. وجوهر مش بس كان قائد عسكري.. لا ده كمان داعية للفاطمية وأول ما استقرت الأمور في

العاصمة الجديدة منع قراءة «سبح اسم ربك الأعلى» في صلاة الجمعة وأزال التكبير بعد صلاة الجمعة، ومسابش شغلانه إلا وحط فيها واحد من رجالته علشان يسيطر على مصر، لكن جوهر القائد زي ما اترفع لفوق اتحط لتحت بعد هزيمته في الشام من قائد تركي، وكان الخليفة المعز لدين الله مات وتولى الخلافة العزيز بالله، وتدور الأيام وتلف السنين والقاهرة عماله تكبر وتتوسع والخليفة العزيز بالله أسس جامع القاهرة اللي بقى معروف بعد كده باسم الجامع الأزهر.. ويموت القائد جوهر الصقلي باني القاهرة الحقيقي ويحزن عليه الخليفة العزيز بالله ويأمر بتكفينه في 70 توب مطرزين بالذهب ويتدفن القائد جوهر الصقلي.. فين بقى؟؟ محدش عارف.. ناس قالت إن جوهر مدفون في قلب الجامع الأزهر لكن الأثري والعلامة أحمد زكي باشا في الثلاثينات من القرن اللي فات أثبت إن اللي مدفون جوه الأزهر مش جوهر الصقلي ده واحد تاني بس اسمه جوهر بردو.. وبكده عرفنا اللي بنى مصر بس معرفناش مدفون فين.. وهيفضل بالنسبة لنا اللي بنى مصر معروف لينا لكن عنوانه الأخير مجهول.

## جروبي

عايزين نتقابل؟ طيب فين؟ هو فيه غيره.. جروبي. وأنا باسمع الحوار ده افتكرت كده الستينات وما قبلها هو فيه حد لسه بيروح جروبي يا جدعان؟ بس الشهادة لله كان محل فخم وشيك كده وتحس إنك انتقلت نقلة تانية.. يا أخي ده جروبي دخل الأغاني الشعبية في مصر وكان حدوته وبيضرب بيه المثل لما حد يلاقي واحد متعنطر كده يقوله: إيه يا أخي هو انت شغال في جروبي. الذاكرة قعدت ترجع بيا لورا مع حرصي التام إني مخبطش في أي ذكريات مالهاش لازمة ولا معنى.. وفي نفس الوقت قررت اجيب قرار حدوته جروبي اللي بنعدي عليها وتنحسر على أيام زمان وولاد الأيام دي ميعرفوش عنه حاجه، وانه كان مكان بيتقابل فيه العشاق وكبارات البلد والسياسيين والجواسيس وكل لون وملة..

مين بقى جروبي ده؟ جروبي ده بقى اسمه جياكومو جروبي اتولد في بلد صغيرة كده على الحدود الإيطالية السويسرية، ومن صغره كان عيل شاطر ويفهم في شغلانة الحلويات، ولما كبر جد وبقى شاب حليوة راح مارسيليا اشتغل شوية وبعدها شد الرحال على مصر.. ليه مصر؟

أيامها كانت مصر بلد الاستثمارات والفرص، مصر كانت مطمع لأي حد عايز يجرب ويتاجر، كان الخديوي إسماعيل عمل نقلة حضارية للقاهرة خلتها تنافس أي عاصمة أوروبية.. عادي يعني جروبي نزل الأول في اسكندرية وقام فاتح محل بتاع شيكولاتة وجنيه معمل يعمل فيه بضاعته بنفسه.

المحل بدأ يتعرف والأجانب نازلين شرا من جروبي ووسط زحمة البيع والشرا اتعرف جروبي على بنت أوروبية من عيلة قافشة كده وهوب اتجوزها ونقل نشاطه للقاهرة، وفي القاهرة المحروسة قام فاتح محل جنب الأوبرا الخديوية.. والحدوته بقت ماشيه تمام وآخر حلاوة. وفي ليلة من ذات الليالي والحاج جروبي قاعد يفكر إزاي يطور نفسه وإزاي يكبر المحل، قالك تاهت ولقيتها ياض يا جياكومو.. عمل جنينة جنب المحل ووسع النشاط وجاب فرق موسيقية تعمل حفلات وبقى جروبي أرقى مكان للسهر وسماع المزيكا. وشوية كده قالك ما تيجي نعمل آيس كريم، كان صايع بردو جروبي ودماغه حلوة صمم عجلة تلف الشوارع بالآيس كريم بتاعه ماهو البضاعة مش

هتفضل جوه المحل بس وبقى آيس كريم جروبي أشهر من نار على علم..  
والفلوس نزلت زي المطر وقام عامل مصنع ومزرعة علشان الشغل بتاعه  
ويبقى ضامن المنتجات بتاعته وكمان شوية عمل مكان لتربية المواشي لزوم  
اللحمة واللبن.

من الآخر الخواجه جروبي سيطر على تفاصيل المحل وكان ضامن جودة أي  
حاجه بتتقدم تحت شعار جروبي وابن الخواجه جروبي وكان اسمه أكيلي فتح  
محل «الأمريكين» زي جروبي.. كده بس ع الضيق علشان بيع للطلبة  
والموظفين، شغل وبزنس بقى.. تلف الأيام يموت جروبي وابنه وتقوم ثورة  
يوليو ويبقى جروبي بيت الخبرة بالنسبة للرئاسة في أي احتفال كبير.. أعياد  
الثورة ماشي، السد العالي شغال.. وتمر الستينات والسبعينات وتيجي  
التمانينات وورثة جروبي يبيعوا المحل اللي مستواه بقى في النازل زي  
حاجات كتير في مصر ويفضل من جروبي ذكريات زمن عدى لسه بنقول  
عليه: الزمن الجميل.

## جمال المحمل

في أمان ربنا كده الواحد قاعد كافي خيره شره لا بيه ولا عليه بي فكر في أحوال الدنيا والناس وإشي انتخابات أمريكية ع الأبواب وإشي حروب على شوية صراعات.. عادي بقى تحس إن الدنيا كده خيرها اتقل وأحداثها بقت أسرع من جمال المحمل!! هنا أنا مخي وقف، جمال المحمل.. إيه اللي جابه ده وسط العك اللي حاصل في العالم اليومين دول.. بس للأمانة أنا انبسطت وقلت فرصة اقعد احكي معاكم حدوتة جمال المحمل.

بقي يا سيدي ولا سيدك.. إنت طبعا عارف مين.. ما علينا عمرو بن العاص لما فتح مصر لقي في الفيوم ناس بتعمل قماش فاخر مفتخر والناس دول مصريين أقباط وكان القماش اسمه «القباطي» نسبة للمصريين دول، عمرو بن العاص شاف القماش من هنا وعقله اتلحس... يا لهوي ع الجمال يا خرابي على خامة القماش، وقام عامل من القماش ده كسوة للكعبة. حاجه مفتخرة كده وشيك أوووي.

تلف الأيام والسنين.. الوالي العربي ساعات بيعت الكسوة محبة وجدعنة وساعات لأ. ولما مسك الفاطميين مصر أصروا على إرسال «الكسوة»، بس الفاطميين لأنهم بتوع هيصة ويموتوا في الانبساط والحركات الحلوة بتاعت الموالد ورمضان وعاشورا والجو بتاعهم ده كانت الكسوة بتخرج في زينة وهيصة على جمال اسمه جمال المحمل.. جمال محترم شايل كسوة الكعبة من مصر لمكة، ولأن الدنيا دواره راح الفاطميين وجم الأيوبيين كانوا بيعتوا الكسوة أو المحمل عادي بس من غير الجو الفرايحي بتاع الفاطميين.. لحد ما جه السلطان المملوكي الظاهر بيبرس اللي عمل أول دار لصناعة كسوة الكعبة حاجه كده مفتخرة تليق بالحدث وتليق بمكانة مصر.

ولما مسك محمد علي باشا حكم مصر جدد الدار وعمل فيها توسعات وكان الصنایعية فيها من أرقى الأسطوات وجو الشغل في الكسوة كان حاجه غير.. غير خالص يعني يعني بخور بقى وميه ورد علشان الأسطى يغسل إيديه فيه قبل ما يمسك الكسوة حدوتة كده، والصنایعية لازم تكون على طهور.. والدار نفسها كان فيها بير مليون من مية زمزم علشان يغسلوا قماش الكسوة والخيوط الذهب قبل الاستخدام، والشغل ع الكسوة نفسها حاجه كده



روحانيات روحانيات مفيهاش كلام ما هي مش أي كسوة لأي مبنى.. دي كسوة الكعبة الشريفة.

الأجواء دي فضلت موجودة ورجع الاحتفال ثاني بخروج جمل المحمل وكان الخديوي وكبار البلد والناس حريصين إنهم يحضروا الاحتفال ده.. تلاقي في بداية الموكب التشريفة شوية فرسان من الجيش المصري على شوية عساكر بوليس حاجة فخمة كده، بعدها جمل المحمل ووراه عشرين جمل ثاني شايلين المؤن والحاجات الثانية وشوية هدايا لأهالي مكة وكانت الجمال دي بتتربى مخصوص في اسطبل في بولاق، وبعد الجمال طابور من الحمير والبغال اللي شايلين حاجات للتكية المصرية اللي في مكة، وكان ريس الليلة دي أمير الحج اللي هو مسئول عن الحدوتة ومعاها «أمين الصرة» اللي هو ماسك الفلوس اللي هتتوزع في مكة.

الموكب بيخرج من دار الكسوة لميدان القلعة وبعدها ميدان العباسية يركبوا القطر ع السويس ومن هناك على مكة يا معلمي.. الموضوع ده فضل موجود لحد الستينات فجأة مبقاش فيه محمل ولا جمل ولا تشريفة، انتهت الحدوتة ومبقاش فيه محمل ولا دياوله.. بس دار الكسوة موجودة دليل على كرم مصر من قديم الأزل.

## حكم قراقوش

لما حد يفرض عليك رأيه بغشومية بتقول: هو إيه ده قراقوش، لما ابوك وانت كده لسه شاب حليوة وبتاخذ المصروف ويفرض عليك رأيه كنت بتقول: ده ولا حكم قراقوش.. هو مين بقى قراقوش؟ ده اللي بيضرب بيه المثل في فرض الرأي والتحكم اللي ساعات عمال على بطال مين يا جماعة قراقوش؟.. حد يقولنا ويفهمنا؟ أقولكم أنا... قراقوش ده كان دراع الناصر صلاح الدين الأيوبي.. آه والله زي ما بؤلك كده، اسمه الأمير بهاء الدين قراقوش الأسدي.. والأسدي ده نسبة لأسد الدين شيركوه اللي هو عم صلاح الدين الأيوبي لزم.. خبط لزق. وقراقوش لفظ تركي معناه النسر الأسود. آه وغلاوتك.

المهم بهاء الدين قراقوش ده كان حاجه مهمة كده في دولة الناصر صلاح الدين الأيوبي.. اللي هو إزاي أقولكم بقى.. صلاح الدين بعد ما جاب درف الخلافة الفاطمية في القاهرة وقفش كرسي السلطنة قرر إنه يخوض حرب التحرير، اللي هي تحرير الأراضي العربية المحتلة بواسطة قوات الصليبيين، وعلشان يعمل كده جهز جيش معتبر، وهات يا معارك.. ووسط العركة دي كان لازم يسبب القاهرة لفترات طويلة.. طيب يسببها لمين؟ وإزاي؟ وفين؟ وليه؟ قام عمل بهاء الدين قراقوش نائب ليه.. كده وش.. قراقوش قام عامل كومينه على الأمراء اللي فاضلين من بيت الخلافة الفاطمية، وحبسهم وفرق بين الستات والرجال علشان مييقاش فيه نسل فاطمي تاني.. وكمان عمل حملة ضد المتمردين أو اللي بيفكروا يتمردوا أو اللي خيالهم يصور لهم إنهم يتمردوا.

قراقوش مكانش بيهزر كان خادم مخلص ووفي لصلاح الدين بشكل عجيب وغريب، وقراقوش هو اللي أشرف على بناء قلعة الجبل... اللي هي قلعة صلاح الدين، وأشرف كمان على بناء وتحصين سور القاهرة الجديد.. بس علشان يعمل الحاجات دي كلها، ومن باب الاستسهال قام فك شوية أهرامات صغيرة كده في الجيزة وخذ الحجارة بتاعتهم وبنى بيهم القلعة والسور من باب دي أهرامات صغيرة مالهاش لزمة... ما علينا، قراقوش علشان أثبت إخلاصه ووفاءه صلاح الدين اعتمد عليه في كل حاجه، عايزين نحسن عكا يا

قراقوش؟؟ حمامة يا سلطان. عايزين نعمل قنطرة تحجز ميه النيل اللي عند الهرم؟؟... علم وينفذ يا سلطان.

ولما اتأسر بهاء الدين قراقوش في عكا.. صلاح الدين افتداه بمبلغ محترم يبجي شوال كده من الدنانير.. وقسوة وقوة بهاء الدين قراقوش في تنفيذ أوامر السلطان هي اللي خلقت ليه سمعة شعبية في الاستبداد لحد ما طلع واحد بلدياتي صعيدي اسمه ابن مماتي، الراجل كان شغال في حكومة صلاح الدين ومكانش عاجبه بهاء الدين قراقوش يعمل إيه؟ يعمل إيه؟ قام ضارب كتاب عنوانه: «الفاشوش في حكم قراقوش» مسح بكرامة الأمير الأرض بالطريقة وبالنكتة الحراقية، وبسبب الكتاب ده طلع المثل المصري: «ده ولا حكم قراقوش» دليل على الحكم القاسي اللي مفيهوش إنسانية، مع إن التاريخ بيقولنا إن قراقوش فضل خادم وفي للسلطنة الأيوبية حتى بعد موت صلاح الدين، بس نعمل إيه في شعب مصر اللي النكتة في إيده سلاح مالهاش حل ولما بيستخدمها بيحول البطل.. لمجرد نكتة وبس، آه يا أخي.. زي ما بؤلك كده.

## خيمة بالوية

الواحد من دول يبقى قاعد على البلاي ستيشن 4 أو حتى 2 ومندمج قال يعني بيخترع الذرة.. وتقوم الست والدته ناطه في وشه فشر أفلام الرعب وحنجرتها ما شاء الله ولا أجدعها ساوند سيستم مالتى تراك يا معلم، وتقوله: قوم يا ابني ذاكر جتك خيمة بالوية. بدمتكم كده وبينى وبينكم ومفيهاش إحراج؟ كام مرة الماما بتاع الإنث قالت لك خيمة بالوية؟ من غير كسوف بقى!! إنتى تتكسفى يا بيضا.. ماشى هنعدىها، وبما إننا عاملين العمل ده مش علشان نتسلى ولا نضيع وقت بعض خصوصًا إنى معلقة على حلة المحشى ع النار وغلاوتكم قلت أجيب التايهة وأعرف حكاية الخيمة اللي بالوية دي.

بص يا سيدي.. بصي يا حاجة زمان كده.. لا زمان بجد يعني مصر كانت ولاية رومانية، وكان دور مصر في الإمبراطورية الرومانية زي بطاقة التموين بالطبط، الرومان يحكموا مصر ومصر تنسحن لروما القمح حلاوة كده.. قشطة بالعسل.. قوم يروحوا الرومان وييجي العرب ويفضل دور مصر زي ما هو مجرد مزرعة كبيرة وشعب بيدفع ضرايب وخراج وجزية وشوية حاجات تانية.. المهم يا سيدي في عصر الخليفة المأمون اللي، كان راعي الأدب والفنون والترجمة، ولو على أيامه كان فيه راديو، كان ممكن يبقى الراعي الرسمي للبرنامج ده.. عادي ما هو خليفة بقى، المهم في عصر المأمون كان عمال الخراج، اللي هي الضرايب، شادين حيلهم على مصر يا عمي ضرب وسحل.. يا الدفع يا الحبس وآخر بهدلة، ومصر كانت بتستخدم وحدة للوزن اسمها الوية.. حاجه كده فرعوني على أبوه.

المهم وبية القمح قربت على الربع دينار وده كان غلا وغلا فاحش، كمان الناس صرخت من الظلم.. محدش عبرهم، بالعكس عمال الخليفة واصلوا جمع الضرايب والخراج عادي، ولا كان البلد في محنة، لدرجة إن الناس باعت عيالها علشان مش قادرين يأكلوهم كانت مأساااااا بصوت يوسف بك وهبي.. الصراحة المهم في حته كده اسمها بشمور.. الحته دي كانت في الوجه البحري ما بين دمياط ورشيد، أهالي بشمور بقى يا معلم العرق المصري ضرب في نافوخهم والنخوة الفرعوني خلت الأدرينالين يضرب في

العروق.. وهوووب قاموا مجمعين بعض وفي صوت واحد: ثورة! طردوا عمال الخليفة واللي عصلج معاهم قتلوه والدنيا ولعت يا عمي في ثانية.

جيوش الوالي راحت تهدي الوضع لقت الأقباط المصريين جاهزين وهزموا جيش الوالي في نفس الوقت المصريين اللي أسلموا.. ما هما كمان كانوا في الهم سوا وانضم المسلمين للأقباط في أول وحدة مصرية بيعرفها التاريخ يا اخوانا كتف بكتف كده.. إنتم مين.. أنا مصري.. مات الكلام يا معلم جيوش تروح وجيوش تيجي.. المصريين أو ثورة البشموريين زي ما بتقول عليها كتب التاريخ بهدلت جيوش العباسيين لحد ما المأمون بذات نفسه جه مصر على راس جيش كبير، وبعد خيانات ومعارك قدر ينهي الثورة بس بعد إيه؟؟ بعد ما عرفت مصر يعني إيه وحدة بين قبطي ومسلم.

وبعد الثورة ما راحت لحال سبيلها الأسعار بدأت تهدأ وفي السوق اتنين بلدياتنا كده بيتكلموا عن القمح والوينة والثورة زيهم زي أي اتنين مصريين ع القهوة.. جت سيرة الثورة قام مواطن اتنفض وقاله: لا.. دي كانت خيبة بالوينة والله أعلم أنا مكنتش قاعده.. آه زي ما بؤلكم كده.

# سليمان باشا الفرنساوي الشهير بالكولونيل سيف

مصر عندها القدرة إنها تستوعب أي حد، تضمه، تحضنه، تدوبه فيها وتخليه ينسى نفسه وأصوله ومايفتكش غيرها.. يحارب حروبها وبعادي أعداءها ويتدفن كمان في ترابها.

اللي أنا بأقوله ده مش كلام إنشا ولا محفوظات من كتاب النصوص في المدارس دي حقيقية، والدليل سليمان باشا الفرنساوي.. اسمه الحقيقي هو أوكتاف جوزيف سيف من مواليد مدينة ليون الفرنسية، اتطوع في الجيش الفرنسي وفضل يترقى وشارك في معظم حروب جيش بوناپرت ومنها حرب موسكو، وبعد هزيمة بوناپرت انسحب من الحياة العسكرية لحد ما قابل محمد علي باشا اللي أسند إليه مهمة تكوين الجيش المصري الحديث.

الكولونيل سيف كان راجل عنده طموح، صاحب رؤية، ومحمد علي باشا كان راجل عنده مشروع.. الاتنين اتقابلوا في منطقة مهمة وهي: إزاي نصنع المجد اللي يليق بينا، محمد علي أنشأ أول مدرسة حربية في أسوان وسلمها للكولونيل سيف، بعد 3 سنين الكولونيل سيف سلم محمد علي النواة الحقيقية لجيش مصر الحديث.. مع الوقت توسع محمد علي في الجيش والكولونيل سيف توسع في التدريبات وتحديث الأسلحة، وقرر الكولونيل سيف إنه يكون مسلم واختار له محمد علي اسم سليمان سليمان باشا الفرنساوي.. حارب مع الجيش المصري في حرب اليونان وكان رئيس أركان حرب القائد المصري إبراهيم باشا، وفضل جنب الجيش المصري في معارك الشام وانتصارات جيش مصر ضد الجيش العثماني، لدرجة إن الجيش المصري كان بينه وبين عاصمة السلطنة العثمانية كام كيلو ويدخلها وينهي السلطنة العثمانية لولا تدخل الدول الأوروبية.

ونظرًا لإخلاص سليمان باشا الفرنساوي في خدمة مصر وجيشها عينه محمد علي رئيس عام الجهادية.. حازه كده زي وزير الدفاع في أيامنا دي، وفضل في المنصب ده فترة حكم إبراهيم باشا والخديو عباس الأول والخديوي سعيد، وبعد أربعين سنة من غيابه عن فرنسا رجع لها ثاني كضيف مع إبراهيم باشا اللي كرمته فرنسا باعتباره قائد عسكري مهم وملهم

للعسكرية الحديثة. ورجع سليمان باشا الفرنساوي لفرنسا لكنه يسيبها ثاني ويرجع لمصر، ومات سليمان باشا الفرنساوي واتفن في مقابر مصر القديمة في شارع عنوانه «شارع الفرنساوي».

ونظرًا لخدماته للجيش المصري تقرر إطلاق اسمه على ميدان مهم في وسط البلد واتعمله تمثال جميل في قلب الميدان، لكن بعد ثورة يوليو 1952 اتشال التمثال واتغير اسم الميدان وبقي اسمه ميدان طلعت حرب.. وكأن سليمان باشا الفرنساوي معملش حاحه لمصر!!! أو عمل اللي يستحق عليه مننا إننا نعاقبه، في حين إن الراجل بإخلاصه وتفانيه مع رؤية محمد علي باشا أسسوا سوا الجيش المصري الحديث.. الجيش اللي قدر بعد تأسيسه بكام سنة إنه يركع جيوش الإمبراطورية العثمانية، الجيش اللي استعان بيه نابليون الثالث في حرب المكسيك، الجيش اللي قدر يعيد من ثاني خلق حدود مصر كإمبراطورية مش ولاية تابعة للسلطان العثماني، ومش الشعب المصري اللي ينسى مين وقف جنبه ومعاه ولا ينسى اللي حاربوا معاركه واعتبروا نصره نصر ليهم وأي هزيمة ليه هي هزيمة ليهم.. مش كده ولا إيه؟

## شارع عبـعزيز

رايحه فين يا خالتي؟ رايحة أشترى جهاز بنتي من شارع عبـعزيز.. أيوه بتتقال كده عبـعزيز ملحومة في بعض.. تنزل بقى يا مؤمن شارع عبـعزيز تدور على الجهاز متلاقيش، هتلاقي محلات كتير بتبيع موبايلات إشي صيني على هندي على كوري، ليله يا معلمي ومولد وصاحبه أكيد هربان مش بس غايب.

شارع عبـعزيز ده اللي كانت التمشية فيه ترد الروح اللي في آخره لما بيتقابل مع شارع الجمهورية تلاقي المسرح القومي أيام ما كان عندنا مسرح.. هيبـيح.. بقى شارع عبـعزيز اللي كان وكان وكان! ألا صحيح مين عبـعزيز ده اللي الشارع متسمي باسمه كده؟ تحسه راجل مهم، تحسه حاجه كده عليها القيمة، مش اسكت أنا وماليش فيه؟؟؟ أبدًا، قعدت دورت كده لحد ما عرفت مين عبـعزيز ده وإيه حكايته علشان نخط اسمه على شارع من شوارع مصر المحروسة.. شوف يا عزيزي شوفي يا عزيزتي الخديوي إسماعيل لما قعد على عرش مصر كان بيحلم ينقل القاهرة من حالة العصور الوسطى لمدينة حضارية.. وحاجة كده يفتخر بيها قصاد صحابه الأجانب، طبقًا عمل شوارع وجفف برك ومستنقعات وبنى عمائر وعمل ليلة عظيمة.. الصراحة المهم جه من عند ميدان العتبة وقام عامل شارع حليوة كده وجميل من ميدان العتبة الخضرا لقصر عابدين طيب يسمي الشارع إيه؟ واحد ظريف قالك نسميه حمادة على اسم جده، لكن الخديوي إسماعيل اللي مكانش أيامها بقى خديوي قرر إنه يسمي الشارع ده شارع عبد العزيز اللي هو مين بقى عبـعزيز يا اخوانا؟

عبـعزيز ده هو السلطان العثماني عبد العزيز اللي حكم 16 سنة السلطنة العثمانية واتعزل في الآخر ومات بعد ما عزلوه باربع أيام.. المهم يا سيدي إسماعيل باشا كان مقلق على عياله.. أيوه ما هو الخديوي عباس اللي هو كان قبل إسماعيل كان عايز يموت إسماعيل علشان ميقعدش بعد منه على عرش مصر، وإسماعيل كان شايف إن نظام الوراثة بتاع أكبر عيل من عيال محمد علي هو اللي يمـسك الحكم بيعمل مشاكل قام قعد يروح الآستانة ويفرفش مع عبـعزيز إشي هدايا وإشي رشاي وإشي فلوس لحد ما قفش من عبـعزيز فرمان جديد.. نوفي.. لانج بيقول إن وراثة عرش مصر في عيال



إسماعيل وبس، وكمان إسماعيل بقى ليه استقلالية في فرض الضرائب وإدارة البلاد وتسليح الجيش.. إلخ إلخ إلخ.

يعني إسماعيل بقى حاكم مستقل حقيقي وتابع للخلافة العثمانية كده وكده.. منظر يعني طبقًا لإسماعيل طار من الانبساط والفرح، وأم إسماعيل اللي لعبت دور بردو في الحدوتة نابها من الحب جانب، لما السلطان عبد العزيز بعث لها أعلى وسام وبقى لقبها الرسمي «الوالدة باشا» ما علينا عبغيز جه يزور مصر.. زيارة عمل على ترفيهه على يستقضي شوية حاجات، الخديوي إسماعيل عمل له استقبال فخم حاجه من اللي وصى عليها داود في التذكرة وركب القطر اللي كان حكاية أيامها وكانت مصر ثاني دولة في العالم تشغله، انبسط عبغيز وخلع على الآستانة.. قام الخديوي إسماعيل أطلق اسمه على الشارع الجديد اللي من ميدان العتبة الخضرا لقصر عابدين وبقى شارع فخم يليق بالسلطان، وزى كل حاجه مش بتقعد على حالها، راح السلطان والخديوي وراحت زهوة القاهرة المحروسة وفضل لنا بياعين الموبايلات وزحمة الميكروباطات وبس.

## شيخ البلد خلف ولد

في قعدة سلطنة كده قلت اقلب في دفاتر المزيكا القديمة، قوم إيه لقيت غنوة كده لبلبل الشرق وكروان الفن وعندليب الشعب شفيق جلال.الغنوة بتقول: شيخ البلد خلف ولد يا فرحته قلبه انشرح عامل فرح لخلفته شيخ البلد البلد..

يا سلام يا عم شفيق الغنوة دي من كلمات الشاعر على الجندي وتلحين شفيق جلال شخصيًا.. أنا الصراحة اتسلطنت كده وعجبتني الغنوة وقعدت اعيدها مرة واتنين وتلاتة وفي الرابعة سألت نفسي: الله هو مين شيخ البلد ده؟ ويطلع مين ابنه في الكوتشينة علشان يتعمله فرح والكل فيها يتعزم؟ الله مين دول؟ وليه كده السؤال نقح في نافوخي بشكل ضايقني، وقلت مبدهاش لازم أعرف مين شيخ البلد وإيه حكايته؟

الموضوع طول معايا!! الصراحة لا ولقيت إجابة قلت أحكيها لكم، الموضوع يا سادة بدأ في جورجيا أبوه جورجيا.. زي ما بؤلك كده.. في جورجيا اتولد غلام كده اسمه إبرام شينجيكاشفيلي.. ومتسألنيش يعني إيه الاسم الأخراني ده انا حفظته بالعافية..

المهم إبرام ده اتأخذ من جورجيا وقعد يتنقل من تاجر عبيد للتاني لحد ما استقر في حوزة محمد بك أبو الذهب اللي هو كان الدراغ اليمين لعلي بك الكبير صاحب أول محاولة للاستقلال عن الخلافة العثمانية.. المهم محمد بك أبو الذهب اشترى إبرام وسماه إبراهيم.. سهلة اهو، ومن كتر إعجابه بإبراهيم جوزة اخته وش، وشارك إبراهيم بك في حروب على بك الكبير باعتباره أحد مماليك أبو الذهب.. ولما ابو الذهب خان على بك الكبير وسلم مصر من تاني للعثمانيين ابراهيم بك طبعًا باع القضية ومشى ورا ابو الذهب، والدنيا اخلوت معاه والزهر لعب وياه والدنيا بقت مانجه بالمكسرات.. قوم ابو الذهب يموت في عكا.. قوم ابراهيم بك يستولي على ثروته ويبقى حاجه كده آخر أبهة، وقام اتحالف مع مراد بك أحد قواد الجيش وقسموا السلطة بينهم بعد ما راضوا الوالي العثماني، وبقي مراد بك هو قائد الجيش وابراهيم بك هو شيخ البلد والدنيا زهرت معاهم والبلية لعبت أحلى لعب..

وخلف ابراهيم بك عيل كده وقام عامله ليلة ولا ألف ليلة وليلة ووزع فلوس  
وهدايا وعمل ولايم للي رايع واللي جاي، وكانت يا عمي حاجه كده فوق  
الخيال بشويتين، وكان لما حد يسأل هو فيه إيه؟ يقولوا: شيخ البلد خلف ولد..  
عنها يا عمي وبقت مثل وداير وساير من يومها، بس على فكرة الزهر  
مايلعبش على طول والبلية جه عليها وقت ووقفت.. صحي ابراهيم بك شيخ  
البلد لقي الفرنساوية فوق دماغه ونازلين من اسكندرية على القاهرة حاول  
هو ومراد بك الوقوف قدامهم بس كانت هزيمتهم مالهاش زي وانسحبوا  
للصعيد.. وفي الآخر اتصالحوا مع كليبر والتاريخ هيفتكر لمراد بك إنه ساعد  
كليبر في ضرب ثورة القاهرة الثانية ولولا خيانتة كان شباب القاهرة قضوا  
على الفرنساوية، بس الله غالب تلف الأيام ويموت مراد بك في نفس السنة  
اللي خرجت فيها الحملة الفرنسية من مصر، أما إبراهيم بك تلف بيه الأيام  
ويحاول يخدع محمد علي باشا اللي بيطارده لحد ما يموت ابراهيم بك شريدًا  
في دنقلة بالسودان، شوف يا اخي الدنيا وشوف شيخ البلد اللي خلف ولد..  
وسبحان مغير الأحوال.

## محمد مظهر اللي محدش يعرفه

لو ليك في الثقافة يبقى أكيد عارف مكتبة القاهرة الكبرى.. المكتبة المهمة بتجميع أصول أي وثيقة أو خريطة أو كتاب يخص القاهرة.. مكتبة فريدة من نوعها وفريدة في مكانها، لأنها موجودة في قصر سميحة كامل بنت السلطان حسين كامل.. بس ما علينا.. مش وقته الحدوتة دي.. مالكش في الثقافة!!! عادي يبقى ليك في الزمالك.. وأكيد عدت على شارع محمد مظهر واحد من أهم وأجمل شوارع حي الزمالك الحي العريق بتاع السفارات والباشوات واللي اتغير حاله زي مصر كلها.. بس ما علينا.

حاول كده تقف في شارع محمد مظهر وتسال الراح والجاي: هو مين محمد مظهر اللي اسمه على الشارع؟ أشك الصراحة إنك هتلاقي حد يعرف الإجابة أو أصل الحدوتة إلا إذا كان حظك حلو ولقيت حد من أحفاد الراحل ده شخصياً واقف في قلب الشارع، وعلشان مطولش عليكم هاختصر لكم حكاية محمد مظهر باشا، محمد مظهر ده يا اخوانا مهندس مصري.. درس في مدرسة رأس التين، وبعدها بعته محمد علي باشا في بعثة دراسية لفرنسا سنة 1826 علشان يدرس الهندسة البحرية.. قعدت كتير البعثة دي.. قعدت عشر سنين وكان عدد الطلبة في البعثة دي 44 طالب، وكان رئيس البعثة مسيو جومار ودي البعثة اللي كان الإمام بتاعها رفاع الطهطاوي، المهم رجع محمد مظهر من فرنسا بعد ما نجح في دراسته وكان ترتيبه السابع بين 60 طالب فرنسي، أول ما رجع قام محمد علي باشا معينه ناظر لمدرسة المدفعية، وبعدها أسند إليه بناء فنار الإسكندرية اللي في رأس التين، وبعدها شارك في تصميم وبناء حوض لترميم السفن الحربية لصالح الأسطول المصري.

لكن اللي فضل من أعماله منور دايماً هو مشاركته في بناء القناطر الخيرية، والقناطر الخيرية أيامها كانت إعجاز علمي في مصر.. وكان محمد مظهر مساعد مسيو موجيل مهندس ومصمم القناطر الخيرية، ولأن محمد مظهر كان شاطر أسند إليه الإشراف على إنشاء الجزء الخاص من القناطر بتاع فرع رشيد علشان كده.

أنعم عليه محمد علي برتبة أميرالاي.

وبعد فترة ظهر إن القناطر لازم يحصل لها تدعيم وصيانة، قام سافر محمد مظهر لفرنسا للتشاور مع مسيو موجيل وخطوا برنامج صيانة وإصلاح القناطر.. ولما رجع من فرنسا أشرف على تنفيذه علشان كده منحه الخديوي إسماعيل رتبة الميرميران وبالمرة الباشوية.. الغريب إن زميل محمد مظهر في البعثة وهو المهندس مصطفى بهجت شارك في أعمال إنشاء القناطر الخيرية، وكمان شق ترعة الإبراهيمية وخط مشروع تسهيل الملاحة في شلالات أسوان وأشرف على مد السكة الحديد بين بنها وكفر الزيات، وهو اللي خط خطة تجديد الجامع الأحمدى بأمر الخديوي عباس الأول واللي تم تنفيذها في عهد الخديوي إسماعيل بس.. بردو محدش فاكره متعرفش ليه وإزاي؟ ودي باختصار حدوتة محمد مظهر اللي محدش يعرفه.. للأسف!

## يا لطيف يا لطيف

كام مرة سمعت واحد بيحكي في الشارع بيقول: يا لطيف.. يا لطيف!! ولا مرة؟؟ طيب اتفرجت على مسلسل «الأيام» بتاع أحمد زكي اللي بيحكي حدوتة عمنا طه حسين ولا مرة بردو، آه ما إتم جيل اليوتيوب والسناپ شات والحاجات دي بص يا اخويا منك له.

يا لطيف ده هتاف كده ولا هتافات بتوع الكورة كانت الناس الغلابة بتقوله لما يحصل حاجه جامدة أو خايفين من حاجه، وطبعًا المقصود بيه الطف يا ربنا بس ده بعدين.. في الأول الحدوتة كانت غير كده، الحدوتة كانت مختلفة أووي قربوا كده من بعض علشان نحكي سوا قال إيه يا اخويا.. هتاف يا لطيف يا لطيف كان المقصود به واحد ايه بني آدم زيي وزيك كده، أصل الحكاية من أيام محمد علي باشا الكبير اللي بعد ما قفش كرسي الوالي وبقي والي مصر بمساعدة النخبة المصرية اللي ثارت على الوالي العثماني، محمد علي سيطر على الدنيا في «مصر» يا مؤمن.. ظبط النخبة.. نفي اللي نفاه.. وبهدل اللي بهدله، ظبط المماليك وطردهم من القاهرة وحاربهم لحد حدود السودان، ده طبعًا بعد ما عمل لهم مذبحه القلعة الشهيرة وسيطر على الشعب والدنيا بقت زي السكينة في الحلاوة.. قوم إيه بقى السلطان العثماني يستنجد بيه علشان التمرد الحاصل في شبه الجزيرة العربية، وطبعًا محمد علي باشا علشان يثبت إنه جامد وكده.. قام بعث ابنه طوسون اللي أنهى ثورة الوهابيين واستولى على المدن الكبرى، وطبعًا محمد علي باشا بعث جواب للسلطان العثماني بيقوله أخبار النصر.. يقوم إيه بقى السلطان العثماني اللي اسمه محمود الثاني يضيف على اسمه لقب «الغازي» قال يعني هو اللي فتح الفتوحات دي.

ما علينا.. محمد علي بعث ابنه ومعاه مفاتيح المدينة المنورة ومكة وغيرها من المدن للخليفة العثماني، وكان مع البعثة المصرية مملوك اسمه لطيف باشا، وهو ده بقى صاحبنا اللي كان من أتباع محمد علي باشا وليه حظوة وكدهون يعني، لطيف باشا وهو في الآستانة الخليفة طبطه منحه رتبة الميرميران.. حاجه كده زي ما تقولوا أمير الأمراء، رجع لطيف باشا من الآستانة وفاكر إنه جاب الديب من ديله، مش بس كده ده بقى يتنطط على

محمد علي باشا، وكان فيه كلام إن الخليفة العثماني وعده بمصر لو قدر يعزل محمد علي، بس على مين.

محمد علي باشا فضل مرقد للطيف باشا والاتنين لابدين لبعض في الدرة لحد ما قرر محمد علي يسافر الأراضي الحجازية وساب مكانه النائب بتاعه اللي هو الكتخدا؟ لظ أوغلي.. أو لظوغلي اللي إحنا عارفينه المهم لظوغلي فضل مراقب لطيف باشا من تحت لتحت، لطيف مش يسكت.. لا قام طالب فلوس زيادة وحركات قرعة، قام لظوغلي جاب رجالته وكبس على بيت لطيف باشا، وكانت عركة كبيرة في حي سوق السلاح اللي فيه بيت لطيف باشا.. وطبعًا العساكر نهبت بيت لطيف باشا وشوية بيوت حواليه، الناس صحيت من النوم ع الضرب والنهب وقعدوا يجروا ويصرخوا: يا لطيف.. يا لطيف بس لطيف مين.. لظوغلي فضل وراه لحد ما قبض عليه وقتله.. ودي كانت نهاية لطيف باشا اللي الناس كانت بتصرخ باسمه.. اللي مكانتش لطيفة خالص الصراحة.

## احتياجات خاصة

ستيف هوكينغ اسم مش كتير يعرفوه، الراجل ده في طفولته ومراهقته كان علاماته الدراسية ما بين الضعيفة والمتوسطة.

كان طفل وشاب طبيعي سليم الجسد. محدود الذكاء دراسيًّا، لكن كان موهوب في فك وتركيب الحجات، كان يمسك أي ساعة أو راديو يفكهم ويركبهم في وقت قياسي. في عمر الـ21 ومع بداية تفتحه واستقباله للحياة أصيب بمرض نادر أقعده عن الحركة. شوبة أصيب بالتهاب رئوي حاد اضطر الأطباء لعمل شق حنجري فقد معاه صوته للأبد.

وفجأة الشاب المفعم بالحياة يتحول لرجل مقعد وأبكم. بس الأكادة إن اليأس بييجي عند ناس كده ويهنج. مايعرفش يتصرف. ييأس هو شخصيًّا. يعني واحد زي ده كان فاضله إيه علشان يروح يحط صباعه في الفيشة؟! أو بالكثير أوي يوم ما يكون الأمل عنده مفرتك بعضه يقعد مطرحه ويستسلم ويستنى ما هو أنيل وخلص.

لكن ستيف زي مابؤلكوا كده اليأس مايعرفلوش عنوان.

شوف يا سيدي ستيف وهو في الوضع ده.

له أبحاث نظرية في علم الكون.

وطور 21 نظرية فيزيائية.

وله دراسات عن التسلسل الزمني.

وأبحاث عن العلاقة بين الثقوب السوداء والديناميكية الحرارية.

حبة علوم كده اسمها لواحد محتاج حد ييجي يفهمولنا، آه وربنا زي مابؤلكوا كده.

ستيف بأه مش بس تخصص في العلوم دي لأ، أبسيلوتلي بصوت اللمبي، ده طورها وحطها أسس وقواعد جديدة.

من فين؟ من على كرسيه المتحرك، وبجهاز بيضغط عليه بإيد واحدة يكتب بيه اللي عاوز يقوله.



ستيف فلتة عصره وأوانه.. ده حاجة، مافيش حد في وشه نقطة دم يقدر يقول غير كده.

ولحد النهارده عايش بعمر يناهز الـ75 سنة يرازي في اليأس ويطلعله لسانه.

بس هو دايمًا يا أخي أصحاب الاحتياجات الخاصة بيقالهم قدرات خاصة. ربك أصله قبل ما يبيلي بيدبر، وعلى الله، عمرك يا مؤمن ما تقابل أي حد ربنا بيمتحنه في جسمه إلا لما تلاقيه مبدع في شيء أيًا كان الشيء ده!!.

بعضهم مبدع في إحساسه المفرط، وبعضهم مبدع في لسانه اللي بينقط عسل، آخرين مبدعين في إنتاج أيدهم، وكثار مبدعين في رياضات، وياما ياما يروح الصحاح السلام البطولات والدورات إياها مصحوبين بالضجة الإعلامية والزفة البلدي والكهارب والحصان والتنورة ويرجعوا يا ولداه بخف حنين. وحتى خف حنين بيعوه وهما راجعين علشان يعملوا شوبنج في السوق الحرة.

بينما صحابنا ذوي الاحتياجات الخاصة يروحوا سوكييتي يا ولداه، ويرجعوا محملين ذهب وفضة وبرونز أثقل من وزنهم عشر مرات ولاحدش يحس بيهم.

الإعاقة الحقيقية في أسلوب تعاملنا معاهم كأفراد وكسياسات وكدولة كمان.

الناس دي حقهم علينا كبير ودايمًا غفلانين عنه. حقهم بالمناسبة ماهواش حنية مفرطة ولا إنك لما تدخل على مجموعة قاعدة وتلاقي فيهم حد من ذوي الاحتياجات الخاصة تسلم عالكل بإيدك وتخش عليه تبوسه من راسه؟! الأداء الملقق ده بيضايقهم أصلًا وبينرفذهم، اتعامل معاه على إنه زيه زيك بس ظروفكم مختلفة.

- ماتطولش في النظرة المتفحصة الغلسة.

- ماتركنش مكان طلوعه عارصيف.

- ماتسبقهوش في الأسانسير.

- ماتشدهوش لو كان كيف ولو حبيت تساعده اسأله الأول.

- ماتتعللش بإعاقته علشان ترفض تشغله لأنك ماتعرفش قدراته ممكن تفيدك في شغلك قد إيه.

- ماتحاولش تستغله.

- قرب واتعامل معاه وافهمه واتعب كمان لو الموضوع فيه تعب لأن فعلاً  
انت الكسبان.

والله انت الكسبان زي مابؤلك كده.

## الآنسة حنفي

مين فينا مايبحبش إسماعيل يس.  
مين فينا ماضحكش على أفلامه وإفبهاته.  
اللي اتفرجنا عليها بدل المرة خمسين.  
وإسماعيل يس ليه بدل الفيلم عشرين وتلاتين ممكن تضحك عليهم.  
بس ليه فيلم كده غريب حبتين.  
مريب شويتين.  
مش مريب بالمعنى الوحش.  
لا مريب لإنه تحسه بره سياق شغل إسماعيل يس.  
الفيلم ده عنوانه «الآنسة حنفي».  
اللي بقى إقيه في حد ذاته لما أي حد يحب يتريق على ست شايفة نفسها  
حلوة وهي مش كده.  
إيه بقى حكاية الآنسة حنفي؟  
قبل ما نقول حكاية الآنسة حنفي.  
أعتقد اننا لازم نتكلم الأول عن عمنا جليل البنداري.  
الراجل ده صحفي فني من بتوع زمان.  
هو اللي أطلق على عبد الحليم حافظ لقب «جسر التنهدات».  
وكتب كتاب عن عبد الوهاب عنوانه «عبد الوهاب طفل النساء المدلل».  
وكتب عن شفيقة القبطية وعن بمبة كشر.  
وكان ليه مقالات وحواديت عن أشهر راقصات زمنه.  
الراجل ده كان موسوعة ماشية على جوز رجلين.  
المهم في نهاية الأربعينيات حصلت قصة كده.  
خلت عمنا جليل البنداري يكتب فيلم «الآنسة حنفي».  
إيه بقى اللي حصل؟

في قرية «ميت يعيش» التابعة لميت غمر، كان فيه بنت اسمها فاطمة  
إبراهيم داود أبوها مات وعاشت مع أمها وفي رعاية جدها.  
ولما مات جدها بقت فاطمة هي راجل البيت وتشتغل بإيديها.  
ما هو ستات مصر رجاله.  
ولما بقت عروسة كده بدأ العرسان يخطوا ع الباب.  
عادي يعني وتحصل كل يوم في كل قرى مصر.  
بس الغريب إن فاطمة كانت بترفض تمامًا أي عريس.  
لحد ما اتقدم لها عبد الصمد. فلاح مصري أصيل، وكان مصمم يتجوزها.  
وهنا بدأت فاطمة ترفض.  
الناس افكرت إن ده دلع ومياصة بنات.  
أهلها بدعوا يضغطوا عليها.  
بس على مين.  
في الآخر فاطمة اعترفت إنها مش عايزة تتجوز، لأنها مش بتحب الرجاله!!  
يا نهار منقط ألوان غامقة.  
أهلها عملوا مناخة لحد ما حد متعلم كده وابن ناس قرر ياخذها القصر  
العيني ويكشف عليها.  
وهنا كانت المفاجأة.  
فاطمة مهياش فاطمة.  
فاطمة راجل كامل الرجولة بس عنده اضطراب في الهرمونات، وده اللي  
مخلي شعر راسه طويل زي الستات.  
وهووب اجتمع الأطباء وقرروا يعملوا أول عملية لتعديل حياة فاطمة.  
ومصر كلها بقت مشغولة بالست اللي هتبقى راجل.  
والصحافة نازلة كتابة وهري.  
وعمنا جليل البنداري شارك بقلمه في الحكاية دي ودافع عن فاطمة اللي  
بقى اسمها «علي».  
عدت السنين، وفاطمة.. قصدي «علي» اتجوز بنت من نواحيهم اسمها  
فاطمة.

وجليل البنداري كان بدأ يكتب للسينما وعرض الفكرة على إسماعيل يس.  
اللي تحمس ليها وكانت بداية مشروع فيلم «الآنسة حنفي» اللي اتعرض  
سنة 54.

الصراحة فاطمة أو علي مش أول قضية من النوع ده ولا آخر قضية.  
بس بتوضح لنا قد إيه ساعات جهلنا بالأمور الطبية ممكن يعمل مشاكل في  
حياة الناس ويغير منهم.

بعد عرض الفيلم اللي بالمناسبة كان مكسر الدنيا أيامها.  
نظرة المجتمع اتغيرت شوية.. مش كثير بس اتغيرت.  
ومع الوقت الناس نسيت فاطمة اللي بقت علي. بس لسه فاكرين الآنسة  
حنفي.

وده حال الدنيا وطبيعة الأشياء.  
مرة نسيان ومرة فراق. آه يا أخي زي ما بؤلك كده.

## الكرباج يا عثمان.. فاطمة

أدب سبب خرسيس. فلاحه خنزاءورة.

يا عثمانان، اربطي كلبه فلاحه في شجرة.

وبعدن تنزل موسيقى حزيني في الخلفية. والمشهد يمشي سلو موشن.

الباشا مقلع الفلاح النحيف الجلابية المهربدة، ورباطينه في الشجرة، والباشا هات ياجلد بالكرباج. بس، والباشا يسببه يا ولداه ضهره ببشلب دم وبروح يوئد بنات ويلعب ميسر وبعبد أصنام عجوة لأ استنوا دوكها الكفار، الباشا هيلوع سيجار مجعلص كده ويمشي يهز طربوشه ويضحك ضحكات مججلة.

ده المشهد اللي الدراما من الستينات وهي بتصدرهولنا عن العصر البائد. زي ما بؤلك كده والنبى.

اللهم إلا محاولات أخيرة ابتدت تشيل الصدا عن الفكرة البائدة العقيمة دي. محاولات ابتدت على استحياء تقول إنه عادي على فكرة، أي عصر فيه الوحش والحلو والنص نص والعظيم. ما فيش حاجة بشعة في المطلق. ولا الدنيا ملائكية في المطلق، ولا سواد السواد يابا رشدي في المطلق برضو. وده اللي كنا بنشوفه على فكرة في السينما عمومًا في فترة الأربعينيات ولحد بداية الخمسينيات.

عادي الباشا ممكن يكون شخصية لطيفة زي (غزل البنات) مثلًا أو يكون قاسي زي (ليلى بنت الأكاير) أو حتى مسلوب الإرادة ومدهول زي (ليلى بنت الأغنيا).

عادي يعني الغني أو الباشا مكانش شيطان رجيم يعيث في الأرض فسادًا.. قوم النبي آدم يخش السبىما يطلع بحكمة وموعظة حسنة أو متعة بصرية وسمعية حسنة، ويخرج لا هو معبي ولا شايل ولا حاقد طبقًا ولا مستفز اجتماعيًا.

والنبى زي ما بؤلكوا كده.

بس المعايير لما اختلفت بعد كدهون. ودخلت حقبة جديدة كان من متطلباتها تصدير صورة مش ولا بد عن كل واحد عنده قرشين، اتحولت



## إلهي ما يحكمكوا على فراغنة

من كام يوم كده وكالعادة قبل ما الواحد يفتح عينه عدل من النوم، هوب يلاقي الموبايل في إيده، ومصايب السوشيال ميديا نازلة ترف ورا بعضها. بس اليوم ده كان مريب حبتين! أولكش اتصدمت في صورة خلتنني أكبرها واصغرها واشقليها واعدلها يبجي سبحتلاف مرة. بس علشان اتأكد إن اللي شايفاه بأم عيني ده بجد.

قال إيه عربية نص نقل واقفة قصاد المتحف المصري ومحملة تماثيل. أي والله زي مابؤلكوا كده محملة تماثيل.

عارفين تماثيل الغزلان والكلاب الكبيرة دي اللي بنشوفها في الفتارين والصور، والأجانب بيتنططوا من مطرحهم لما يلحموها. أهى هي دي متحملة على عربية نقل ومعها كام حاجة تانية شغل فرعوني خشب زان على ابوه !!!

إيه اللي انا بقوله ده !! والنبي من المنظر ما بقيت عارفة دي آثار ولا شوار عروسة جاي من دمياط !!

والنبي حتى العفش اللي ببيجي من دمياط ببيجي في عربية مقفولة، وملفوف بورق، ومربط بحبال، ومحشرين حوالين منه كارتون وسفنج علشان مايتجرحش، إنما يا ولداه دي الآثار محملنها ولا نقلة البطيخ! والله زي مابؤلكوا كده.

المهم استغفرت العزيز القدير. وأقنعت نفسي إن ده مش حقيقي، لا ممكن يكون حقيقي.. هو فوتو شوب، منهم لله العيال بتوع الفوتو شوب. يارب ده اليوم لسه في أوله مش كده.

حبة كده وعلى نص اليوم أبص والتقيلكم خبر نازل بالصور: «دجال يعثر على الممر الصاعد لهرم خوفو أسفل بير سلم بعقار بالجيزة». لأ والأكادة بيقولك البعثات العلمية بقالهم 30 سنة بيدوروا عالممر ده بشمعة وفشلوا يلاقوه.. قوم جه خليفة شهورش ده لاقاه تحت بير السلم. والنبي زي مابؤلكوا كده وبالصور كمان.





## تحت القبة شيخ

كام مرة سمعت المثل ده : تحت القبة شيخ.  
كام مرة اتقالك إن المثل ده بيتقال على الناس اللي بتخبي حقيقته ورا  
مظهر حلو وكلام جميل.

لكن للأمانة تحت القبة كان المؤيد شيخ المحمودي.  
وشيوخ المحمودي ده كان مملوك اتخطف من أهله ما نعرف.  
أهله ما باعوه محدش قال.  
بس هو كان مملوك ضمن المماليك الكثير اللي عدوا على مصر.  
وكان ولد في الفروسية وضرب الرمح واللعب بالسيف.  
وكان زمايله معجيين بيه جدًّا وشايفين إنه مجنون فروسية واللي زيه يا  
هيموت في الحرب يا هيموت في دسياسة.

المهم السلطان فرج ابن الظاهر برقوق عجبه الشيخ المحمودي..  
وضمه للحرس السلطاني ورقاه بسرعة في المناصب ودلعه آخر دلع.  
بس لإن خدمة الغز علقه.

السلطان فرج في يوم قلب عليه وسجنه في خزانة شمايل.  
اللي هو يعني تقدر تقول وضميرك مرتاح إنه كان أبشع سجن في مصر.  
الضرب فيه ع المزاج.  
والتعذيب فيه ع الكيف.

والشيخ المحمودي اتبهدل في خزانة شمايل وفي عز كربه دعا ربنا إنه لو  
خرج من خزانة شمايل على رجليه.. ندرًا عليه يهدها وبيني مكانها جامع لله.  
ولحكمة لا يعلمها إلا سبحانه يهرب شيخ المحمودي ويسافر الشام ويفضل  
مستخبي لحد ما السلطان فرج يتقتل، يقوم راجع على مصر ويعزل اللي  
ماسك مكانه ويولي نفسه سلطان للبلاد.

ويبقى اسمه السلطان مؤيد شيخ المحمودي.  
وأول حاجة عملها إنه راح بنفسه وهد خزانة شمايل وبدأ يبني مسجد لله.

الغريب بقى يا أخي إنه بنى الجامع.. الجامع بتاع ربنا.  
بناه بالسرقة.

الجامع كبير وواسع ومحتاج رخام كثير، نعمل إيه يا شيخ؟  
انزلوا على بيوت الناس اخلعوا الرخام بالرضا أو بالغصب.  
الجامع محتاج باب شكله حلو وجامد، نعمل إيه يا شيخ؟  
اخلعوا باب جامع السلطان حسن.

الجامع محتاج مصاريف، نعمل إيه يا شيخ؟  
صادروا أموال كبار التجار والناس المتريشة دي.  
علشان كده الشعب المصري اللي النكتة سلاح دائمًا في إيده.. كانوا بيقلوا  
على جامع المؤيد شيخ إنه «الجامع الحرام».  
لإنه اتبنى من فلوس ورخام وباب حرام في حرام.  
حاجات مسروقة يا عالم.

المهم المؤيد شيخ على الرغم من ده كان متواضع.. محبوب من الناس لحد  
ما فيوم قتل ابنه.

أيوه قتل ابنه إبراهيم.. اللي حس إنه هينافسه على السلطة.  
لإن إبراهيم كان محبوب من الشعب والمؤيد شيخ خاف الواد ينقلب عليه.  
وبعد ما قتله حس بالندم.  
وحس إنه ظلم ابنه.

بس بعد إيه!  
واتشل فيها الراجل ومات بعد ابنه بسبع شهور واتدفن تحت قبة الجامع  
بتاعه.

وبقى تحت القبة.. شيخ.  
شيخ مجنون، السلطة لحست مخه وقتلت فيه الأب والإنسان قبل ما تقتل  
فيه حب الغير.

شيخ كان سلطان قوي، قهر ثورات وتمردات كثير بس كان ضعيف أوووي  
قدام العرش.  
تحت القبة شيخ.

ومش بس شيخ.  
تحت القبة فيه شيخ المحمودي، وكمان ابنه إبراهيم.  
يمكن يغفر الابن لأبوه.  
ويمكن الأب يطلب السماح من ابنه.  
الله أعلم بالنفوس واللي بيحصل وهيحصل.  
المهم خليك فاكر إن تحت القبة شيخ.  
ومش لازم دايماً يكون شيخ طيب أو كويس.  
زي ما بؤلك كده.

# الست

في ليلة حلوة ونادية كده.. واحدة من الليالي اللي بتبقى الغزالة رايقة  
والمزاج عنب.. ليلة جديرة بالست من الآخر.

هوب نطيت عال تلفزيون وتقلبية سريعة، وفي واحدة من قنوات كلاسيك أو  
زمان أو ابيض واسود. التقيت ثومة واقفة بهيبتها وطلتها وفتانها وموزانبلينها  
ومنديلها.. ويا أغلى من أيامي.

أيوه بأه قولي يا ست.

ويا أحلى من أحلامي.

وكمان مرة، يا أغلى من أيامي.

يا أحلى من أحلامي.

ومرة تالته ومرة رابعة، والكل انسجم وقالك بس الست سلطنت وقررت  
الإعادة والزيادة.

ده رأيك ورأيي ورأي السميعة، لكن مكانش رأي سيد سالم.

وسيد سالم، لمن يجهل، قيمة وقامة، سيد سالم، هو عازف الناي في فرقة  
الست واللي قعد مكان القصبجي الله يرحمه، بعد ثومة ما سابت مكانه  
فاضي فترة طويلة بعد وفاته.

سيد سالم الشهير بتغزيلة سيد، وده فالمره اللي سلطن فيها وغازل الست  
بالناي، في حته سولو عظيمة كده، خرجت الست من الغنوة علشان تقول  
للفنان سيد كلمتها الشهيرة ( إيه ده. إيه ده ).

والنبي زي ما قولتلكوا كده.

فوتكوا في الكلام.

القصد سي سيد سالم حس إن ثومة فيها حاجة غلط!

هوب راح مربع الناي في حجره وقعد يلغن الست.

يا أحلى من أحلامي، الست تلقط الكلمتين من هنا، زي الغريق ما يتشعلق  
بقشاية.

وتنطلق ثومة تكمل الغنوة، والكل يسقف ويحيي الست ويهتفلها، وماحدث  
ياخذ باله من الجندي المجهول، اللي كان السبب في نجاح الغنوة والحفلة.  
وربنا زي ما بؤلوكوا كده.

الموقف العظيم ده خلاني أفكر في الموضوع من زاوية مختلفة حبتين.  
سيد سالم لما عمل كده كان بيعمل ده مش بدافع حب شخصي للست -ولو  
إن مين ماكانش بيحب الست- كان بيعمل ده لإن اللي بيحصل قصاده ده  
شغله، مجهوده ومجهود فريق العمل.  
ونربط هنا على فكرة فريق العمل. المصطلح اللي بيغيب عن كثير منا  
واحنا بنشتغل.

ما حدث بيشتغل بطوله، ده لو بقال في دكانة متر في متر الاربعة، برضو له  
فريق عمل ما بين مندوبين توزيع وسواقين بيحبوا البضاعة، وعيل صغير  
بيناوله الحاجة من عارف.

الشغل الناجح بجد بيخرج من فريق عمل، وعن طريق حاجة اسمها: العمل  
الجماعي، أو اللي بيسموه الخواجات (روح الفريق).

الحاجة السحرية دي اللي بتكون السبب في نجاح كيانات عملاقة، ميزانيتها  
بتكون أكبر من ميزانية ثلاث اربع دول مجتمعة.

الحالة الراقية اللي بنفتقدها في كل أشغالنا في متهات النفسنة، والزنبأة،  
وعدوك ابن كارك، وفرق تسد، وكل الموروث الثقافي اللي مايعملش حاجة  
غير إنه بيحبنا ورا.

وربنا زي ما بؤلوكوا كده.

يا جدعان ما فيش كيان ولا مؤسسة ولا شركة ولا هيئة ولا حتى فاترينة كبدة  
بتنجح واللي شغالين فيها همهم إزاي يجيبوا رقبة بعض تحت رجليهم.

العالم الكبير أحمد زويل، أيام ما أخذ جائزة نوبل، كان مينين ما أي حد في  
الإعلام يسأله دايماً يتكلم عن (فريق العمل) اللي أخذ الجائزة مش عن  
شخصه اللي تسلم الجائزة.

شوف الجمال!

اللي بينجح الكيانات والمؤسسات والدول كمان، هو الشغل المشترك وروح  
الفريق والكتف في الكتف زي ما بيقولوا.

الجمهور لما وقف يهتف ويسقف للست كان يسقف للحالة الحلوة اللي  
وصلتهم من الست، والفريق اللي ورا الست، ولاصغر عامل في المسرح  
اللي غنت فيه الست.

والنهارده علشان اطلع أقول الكلمتين دول، فيه فريق كامل أخرج وراجع  
وكتب وهندس وأنتج، علشان يوصلكم صوتي في الآخر.  
وانت رايح دلوقتي شغلك أو راجع منه، يا هتشتغل مع فريق يا كنت شغال  
معاه..

قصر الكلام.

لو فهمنا إننا بنشتغل (مع) بعض و(ل) بعض كلنا هتنجح.

ولو فضلنا فاهمين إننا بنشتغل (قصاد) بعض و(لنفسنا) ماحدث هيشوف  
النجاح بعينه.

خلصت.. والنبي زي ما بؤلكوا كده.

# الهلباوي أو جلاذ دنشواي

سنة 1906 سنة مهمة في تاريخ مصر.  
دي السنة اللي حصلت فيها مذبحة دنشواي.  
دنشواي المدينة المنسية في دلتا مصر.  
اللي مصطفى كامل حاول يستغل الحادث للضغط على بريطانيا علشان  
مصر تاخذ استقلالها.  
الحادثة نفسها اتكتب عنها كتير.  
وعن البطل زهران اللي طلع سلم المشنقة مرفوع الراس.  
وعن الفلاحين اللي دافعوا عن أنفسهم.  
وعن بطش وقسوة الإنجليز.  
بس محدش افكر جلاذ دنشواي الحقيقي.  
أو محامي الادعاء اللي وقف واتهم الفلاحين بأنهم همج ومتوحشين، قتلوا  
الجنود الإنجليز الطيبين يا عيني.  
المحامي ده هو إبراهيم الهلباوي ابن البحيرة.  
الهلباوي كان أشهر من نار على علم.  
محامي مالوش مثيل.  
كان لسانه ده زي السيف.  
وبيتضرب بيه المثل.  
مرة واحد راح يشتري لحمة وسأل الجزار على تمن رطل اللسان.  
الجزار قاله سعر معجيش الزبون اللي رد وقال : ليه هو لسان الهلباوي.  
كان الراجل حدوته ومعروف ومشهور.  
ولما حصلت حادثة دنشواي، الإنجليز دوروا على محامي ادعاء علشان يثبت  
التهمة على الفلاحين واختاروا الهلباوي، اللي شافها فرصة يقوي علاقته  
بالاحتلال ورجالته، وفرصة يطور من نفسه في المجتمع.  
وقبل المهمة للأسف. المهمة اللي رفضها ناس كتير.



ووقف يهاجم الفلاحين في محكمة أقل ما يقال عليها إنها صورية وغير عادلة.

بيهاجم الفلاحين.

والمشائق بتتنصب.

بيهاجم الفلاحين.

والجلد على ضهور أهالي دنشواي شغال من قبل أي حكم.

وانتهت المحكمة اللي كان أحد أعضائها فتحي بك زغلول.

أخو سعد زغلول وش.

خلصت المحكمة والهلباوي كان مبسوط وفتحي زغلول مبسوط.

بس الشعب كان ليه رأي تاني.

الشعب قرر ينسى لسان الهلباوي.

ينسى اللسان اللي كان بيضرب بيه المثل.

لأن اللسان ده أول ما لف لف على رقبة الشعب نفسه.

وبقى الهلباوي مكروه.

محدث بيحييه في قضايا إلا ابن الطبقة اللي بتتعامل مع الاحتلال.

وفي سنة 1913 تم تأسيس نقابة المحامين، وكان الاتجاه إن عبد العزيز

فهومي يبقى النقيب.

لكن لما عرف إن الهلباوي هيرشح نفسه تنازل.

وبقى الهلباوي أول نقيب للمحامين في مصر.

بس الشعب مقدرش ينسى له دنشواي.

ولما وقف يدافع عن إبراهيم الورداني اللي اغتال بطرس غالي.

الشعب كان مبسوط من المرافعة.

بس مقدرش يغفر للهلباوي دم اللي راحوا في دنشواي.

وبقى الهلباوي ملعون بلعنة دنشواي.

زي ما فتحي زغلول عاش ومات محدش فاكره.

مع إنه كان قاضي مهم.

بس أخوه سعد زغلول عاش ومات والشعب ييهتف باسمه.  
يا أخي الشعب ده غريب.  
ماشي بمنطق: حبيبك ييلع لك الزلط واللي يكرهك يتمني لك الغلط.  
بلع لسعد زغلول أخطاء ياما.  
ومقدرش ينسى عملة فتحي زغلول.  
نسي لناس كتير وسامح ناس كتير.  
بقى فضل فاكر جريمة الهلباوي.  
اللي لما رشح نفسه في انتخابات مجلس النواب.  
في قلب بلده، ووسط ناسه، الشعب سقطه ونجح عيل من دور أولاده.  
علشان بس يغيظ الهلباوي ويقوله: أنا الشعب اللي جيت عليه في دنشواي.  
أنا مش هانسى اللي عملته.  
مات الهلباوي وعمره فوق الثمانين سنة.  
ونشر مذكراته اللي حاول يبزر فيها دوره في محاكمة دنشواي.  
مات والشعب مش طايق سيرته.  
ولا عايز يسمع اسمه.  
ولا قبل منه التوبة.  
سبحان الله شعب مالوش كتالوج يا أخي.  
آه والله زي ما بؤلك كده.

# حكاية السكاكيني

كان يا ما كان يا سادة يا كرام.  
في زمن غير الزمن ده.  
وأيام بيقولوا عليها أحلى من الأيام دي.  
وبالتحديد أيام ما كانت مصر خديوية، يعني لا هي ملكية ولا هي جمهورية.  
حاجة كده ما بين البنين.  
لكنها كانت أجمل وأوسع والأهم حضنها كان براح للكل.  
في ذلك الزمن السعيد، زي ما بيقولوا، إحنا مش بنقول حاجة أهو.. جه  
مصر واحد سوري. من مواليد دمشق الراجل ده اسمه السكاكيني.. أو بالظبط  
بالظبط اسمه غابرييل حبيب السكاكيني.  
لما ضاقت بيه الأحوال في سوريا شد الرحال على مصر في وقت كان فيه  
الخديوي إسماعيل، مشمر أكمامه ورافع إيديه لفوق وهات يا مباني.  
إشي حفر قناة السويس.  
إشي دار أوبرا خديوية.  
إشي ميادين وشوارع.  
وكان شكل القاهرة حرفياً بيتغير.  
أخونا سكاكيني جه واشتغل في كوبانية.. قناة السويس.  
وكان فيه أزمة وسط العمال وهي الفيران.  
الفيران كانت طايحة في أماكن مبيت العمال، يقوم سكاكيني يعمل إيه؟  
يشترى قسط بلدي ويشحنها على أماكن حفر القناة ويحل المشكلة في  
أسبوع.  
قوم الخديوي إسماعيل يعجبه نباهة السكاكيني ويعينه كمشرف لاستكمال  
دار الأوبرا الخديوية.  
من هنا بيدأ صعود نجم السكاكيني.  
من راجل معدم، لراجل عنده فلوس.

من راجل مش معروف لراجل صاحب نفوذ.

وهب السكاكيني بقى بيه.

وشوية وخذ لقب «الكونت».

والدنيا بقت حلاوة بالقشطة.

بس الحلو ميكملش.

السكاكيني تعب جدًّا ونصحه الأطباء إنه يشوف مكان يكون هواه جاف  
علشان صدره.

قام رايح مشتري حته أرض على أطراف حي العباسية وبني قصره  
المعروف.

والقصر مكانش عادي.

كان على الطراز الإيطالي، وسكاكيني صرف عليه ياما.

وكان القصر هو صرة الحي.

بيخرج منه 8 شوارع رئيسية.

القصر خلى الناس تيجي تبني جنبه.

قوم سكاكيني الناصح يشتري الأراضي وبنني عمارات وبيع.

أهو كله مكسب وفلوس.

وعمارة تجيب عمارة.

وشقة تجيب شقة.

وجنيه بيحيب عشرة.

والحي اللي مكانش فيه صريخ ابن يومين بقى حي سكني فاخر ومعتبر.

والناس أطلقت عليه حي «السكاكيني».

ولأن دوام الحال من المحال، يموت حبيب باشا السكاكيني. والتركة تتقسم  
على الورثة.

وكان ليه ابن طيب قرر يتبرع بالقصر كامل مكمل لوزارة الصحة، اللي  
طبعا بهدلت القصر عادي.

ما هو عندنا منه كثير.

والقصر فضل أيام مبني إداري، وأيام متحف للتثقيف الصحي.

وأيام مخزن.  
وبعد ما كان بينور كده ويضوي في ليل حي السكاكيني.  
اختفى القصر وسط غابة من كتل الأسمنت، وبقي فيه الطمع.  
اللي عايز يشتريه ويطلع مكانه برج.  
ما هي ناقصه أبراج أصلها.  
واللي عايز يعمله قاعة أفراح.  
بس للأمانة وزارة الثقافة والآثار لحقوا القصر في آخر لحظة، وتم تسجيله  
كأثر يجب عدم المساس بيه.  
مع إن عدم المساس ده معناه يعني إننا منغيرش فيه.  
بلاش ندهنه بوية فُحُلُقي.  
بلاش نغير من مكونات البنا الأصلية.  
بس نقول إيه آدي الله وادي حكمته.  
وادي حكاية السكاكيني باشا أو الكونت سكاكيني.  
اللي دخل مصر مش معاه جنيه.  
وخرج من الدنيا معاه ألوفات.  
وساب لنا تحفة معمارية بتقولنا والنبي الرحمة.  
آه والله زي ما بؤلك كده.

## خاين بك

يوم الاثنين الموافق 26 يناير 1517 كان يوم اسود في تاريخ مصر للأمانة. ده اليوم اللي دخل فيه عساكر العثماني أرض مصر، ونهبوا خيرها وفنونها، ودخلونا معاهم نفق مضلم زبهم.

ده اليوم اللي وصف فيه ابن إياس مؤرخ مصر، واللي كان شاهد عيان على بداية الاحتلال العثماني لمصر.

كتب بيوصفهم وقال : نفوس قذرة فيها قلة دين.

الصراحة اليوم ده مجاش كده.

ولا كان المفروض يبجي كده.

اليوم ده كان وراه راجل، راجل واحد، الراجل ده اسمه «خاين بك».

هو للأمانة اسمه مش كده، اسمه الحقيقي هو خاير بك.

كان ليه أربع إخوات، وهو واخواته من الشركس.

واترقوا في مناصب السلطنة المملوكية.

وعاشوا عيشة فل في خير مصر وخير أهل مصر.

المهم خاير بك ده قعد يترقى لحد ما السلطان قنصوه الغوري عمله نائب ليه على حلب.

خاير بك في حلب.

والغوري في مصر.

خاير بك بدأ يعمل علاقات مع العثمانية.

والغوري مشغول في مصر هنا بالضرايب والمكوس ولم الفلوس.

خاير بك في حلب بيفتح سكة للعثماني علشان يدخلوا الشام.

والغوري تايه في مية البطيخ في القاهرة.

لحد ما صحي في يوم على خبر إن السلطان سليم الأول دخل بجيوشه الشام.

قام ناطط على الفرس بتاعه ولم المماليك بتوعه وجري على الشام.

للأمانة المماليك مكانوش مصريين.  
ولا فارق معاهم المصريين.  
بس كانوا بتوع حرب ومقضيها حروب ولو ملقوش حد يحاربوه يحاربوا  
بعض.

المهم في أول معركة مرج دابق.  
الغوري ومماليكه ضغطوا على العثمانية، اللي طلوعوا يجروا من قدامهم.  
قوم خاير بك ينسحب بجنوده ويرجع على حلب ويقول إن السلطان الغوري  
مات.

هنا كانت الخيانة.  
العساكر جريت لما شافت جنود خاير بك بتنسحب.  
والغوري جاله شلل وهو فوق الحصان من الصدمة.  
ووقع ومات تحت سنايك الخيل ومحدثش عرف لجثته مكان.  
ودخل العثمانية الشام بقوة الخيانة.  
وبعدها دخلوا مصر.  
وكان لازم خاير بك ياخذ المكافأة بتاعته.  
إنه يكون أول والي عثماني لمصر.  
بس الشعب اللي خسر أرضه يسكت؟  
الشعب اللي شاف تراثه وتاريخه بيتهان على إيد الانكشارية يسكت؟  
الصراحة كان آخر مقاومة عسكرية انتهت بإعدام طومان باي.  
بس مقاومة لسان الشعب كانت هتبدأ أهو.  
أول حاجة خاير بك مبقاش خاير بك.  
بقى اسمه خاين بك.  
وخاين بك كان بيتعفرت من اللقب ده.  
وكانت الناس بتنادي عليه باللقب ده كل ما ينزل شوارع القاهرة.  
فقرر يقعد في القلعة ميتحركش.

وقعد يحكم مصر لمدة خمس سنين، حاول ينتقم فيها من الشعب المصري  
اللي أطلق عليه لقب انتشر أكثر من اسمه الحقيقي.  
بس على مين.. الشعب فضل يعمله في نكت وأشعار.  
حَلَّ خاين بك هيتجنن لحد ما مات.  
ويوم ما مات، الشعب المصري وزع مية ورد على الماشيين في الشوارع.  
والناس كانت بتتهني بعض ولا كأنه يوم عيد.  
وفي جنازته مشي بس مماليكه.  
وباقي الشعب اعتبر إن خاين بك، عاش خاين ومات كافر على رأي عزت  
العلايلي.  
آه وحياتك زي ما بؤلك كده.



## سيما وسياحة

قالك يا سيدي إن آخر التقارير عن السياحة في تركيا بتقول: إن التدفق السياحي العربي على تركيا زاد بمعدل 1400% بعد غزو الدراما التركية للتلفزيونات العربية!.

آه والنعمة زي مابؤلكوا كده.

خدتوا بالكوا من الرقم 1400%!! يعني تضاعف 41 مرة في أقل من 10 سنين هما عمر الدراما التركية في الأسواق العربية!

حاجة كده إشي خيال يا ناس بجد!؟ ده إيه ده؟! حاجة ولا السحر وربنا.

استنوا ده لسه كمان، بيقولك يا سيدي إن السياحة العربية لكوريا -واخدين بالكوا من كوريا دي- زادت بنسبة 100% من بعد دخول الدراما الكورية للتلفزيونات العربية. وقالك إن الدراما الكورية مش ناجحة أوي زي الدراما التركية، فعلشان كده كوريا مامشيش حالها عندنا.

العكس بأه حصل مع الهند. قالك خلال 3 سنوات هي عمر الدراما الهندية في الأسواق العربية، زاد معدل السياحة العربية للهند 300%!!.

يا حلاوة يا ولاد.. ده بجد ده؟

آه وربنا بجد زي مابؤلكوا كده.

الدراما والسيما طول عمرهم أكبر مسوق للسياحة في الدنيا كلها.

وهانروح بعيد ليه ما الأمثلة عندنا كثير!

مين كان يعرف حاجة عن شرم الشيخ قبل فيلم (جيم تحت الماء) ؟ ده ماحدثش كان مصدق إن الجمال والمناظر دي موجودة في مصر!.

ولو رجعنا لورا شوية، هنلاقي الموضوع بادي من بدري أوي، خد عندك:

عبد الحلیم خلی المصریین والعرب یکتشفوا شاطئ المنتزه حریفًا بعد (أبي فوق الشجرة)، سعاد حسني فرجت الناس على حدائق المنتزه لأول مرة والبشر راحوا المنتزه أفواجًا أفواجًا بعد (أميرة حبي أنا) أيام ما كان الجو لسه ربيع وكانت الله يرحمها بتقفل عالمواضيع!!.

بلاش يا سيدي.



# شارع الشيخ علي يوسف

لو انت من سكان حي المنيرة.  
اللي كان واحد من أجمل أحياء مصر.. بس الكلام ده كان زمان، الصراحة  
هتلاقي شارع جميل كده.

واسع كده.

على أوله حديقة دار العلوم وفي آخره ظهر مستشفى أبو الريش.

الشارع ده اسمه «شارع الشيخ علي يوسف».

طبعا ناس كتير قالت ده شيخ من بتوع ربنا.

وناس قالت مين «علي يوسف» ده.. يطلع إيه يعني علشان اسمه يبقى  
على شارع حلو كده.

أنا هاقولكم حكاية الشيخ علي يوسف.

بس ده هيخلينا نرجع بضرنا لورا شوية لحد سنة 1904.

أيوه يعني من يبجي كده بتاع 112 سنة.

الست فرنسا اللي هي طبعا مش عبلة كامل.

قصدي فرنسا الدولة ومعها بريطانيا اللي كانت الإمبراطورية التي لا تغيب  
عنها الشمس.

اللاتين وقعوا اتفاق اسمه «الاتفاق الودي».. اللي كان بيقول بصراحة  
ووضوح إن فرنسا تعمل ما بدالها في المغرب، وبريطانيا تعمل اللي نفسها  
فيه في مصر.

الاتفاق ده كان مهم وهيغير كتير في شكل المنطقة.. بس مش موضوعنا.

في نفس السنة.

كان فيه راجل صعيدي وبالتحديد من قرية بلصفورة التابع لمركز المنشاة،  
التابعة لمديرية جرجا، اللي هي محافظة سوهاج حالياً.

الراجل ده كان اسمه إيه يا ولاد.

كان اسمه الشيخ علي يوسف.

الشيخ علي يوسف خد لقب «شيخ» لأنه كان دارس في الأزهر.  
بس هو الصراحة مكانش عاجبه موضوع الأزهر.  
قام اشتغل...

اشتغل...

استغفر الله العظيم يعني.

سامحني يارب بقى.

اشتغل جورنالجي.

ما هي المهنة دي على أيامه كانت شتيمة.

وكان الجورنالجي ومعاه المشخصاتي اللي هو الممثل يعني،

شهادتهم في المحكمة مش مقبولة.

المهم الشيخ علي يوسف أسس جريدة عنوانها «المؤيد».

وكانت أشهر من نار على علم.

واترقى في الحياة الاجتماعية.

واتعرف على الخديوي عباس حلمي الثاني.

وبقوا صحاب وحاجة مانجة باللوز.

وبقى ابن بلصفورة اللي محدش يعرف مكانها على الخريطة واحد من عين  
أعيان مصر.

بس الحب جابه ورا.

عمنا الشيخ علي يوسف حب صفية.

اللي هي بنت الشيخ السادات.. كبير عيلة السادات ذات الحسب والنسب.

واتجوزها من غير موافقة أبوها.

وقامت الدنيا يا معلم.

أبوها رفع على الشيخ علي يوسف قضية عدم تكافؤ النسب وتفريق بين  
الزوجين.

إزاي بنت الحسب والنسب تتجوز جورنالجي يا عالم؟

آه حاجة كده في سكة: أنا أبويا كان قائد طابية أبوك انت مين؟

والدنيا ولعت.. أعداء الخديوي استغلوا إنه صاحب علي يوسف ونزلوا تشنيع.  
الخديوي طبعًا جاب ورا وساب علي يوسف ضهره في الحيط.  
ومصر سابت الاتفاق الودي وانشغلت في سؤال وجودي:  
يا ترى لو صفية مكانتش متعلمة كانت كتبت جوابات حب للشيخ علي  
يوسف أو أعجبت بمقالاته النارية في المؤيد؟  
ودخلنا في متهاة تعليم البنات صح ولا غلط.  
والقضية وسعت، واتدخل فيها الخديوي ووزير الحقانية وبقت ليلة يا عمي،  
بس للأمانة الشيخ كان بيحب البنت.  
وصرف أوفات لحد ما حصل على البكوية ولقب في الأشراف ورجع لحبيته  
صفية والمره دي برضا أبوها.  
بس صحته كانت اتدهورت.  
ومات على غفلة.  
واتنسى الشيخ علي يوسف وضاعت قصة حبه في ضلمة النسيان. وده حال  
الدنيا يا عمي.

## في الخلفية

قاعدة من كام يوم مع صديقة عزيزة صغيرة كده. الكلام جاب بعضه وافتكرنا يوم خطوبتها - إحم اللي كانت قريب حباله 15 قول 25 سنة- المهم افتكرناها من هنا وفي نفس واحد لقينا روحنا بنهتف ( على نار على نار قلبي جاعد على نار).

ودي كانت الماركة المسجلة لكل الأفراح، والمناسبات السعيدة في الحقبة الزمنية دي. وهات يا ضحك واجترار في الذكريات.

القعدة الحلوة دي، والكام ضحكة الصافيين، وحبه الذكريات الجميلة، خدوني لفكرة غريبة حبتين. قلت أما اشارككم فيها.

كل حاجة حلوة في حياتنا دايماً بينزلها خلفية في دماغنا !

بجد زي مابؤلكوا كده، فكر شوية.. افكر كده نتيجة ثانوية عامة مثلاً ولا الإعدادية ! هتلاقي عبد الحليم راشق في دماغك بـ«وحياة قلبي وأفراحه».

لو كنت من الجيل اللي حب بنت الجيران، هتلاقي أشعار عمنا نزار قباني نازلالك في الخلفية تفكرك بالذي مضى وفات وانقضى.

قهوة الصباحية مع صوت فيروز. الأنتخة في السرير لحد ما تسمع ( إلى ربات البيوت) تروح قايم منطور من مكانك.

صوت أبله فضيلة اللي تعرف انها بتبتسم دلوقتي رغم إنك مش شايفها.

تتر رأفت الهجان اللي ممكن يطلعك جري عالسلم علشان تدور هو فين فين فين؟!

رحلات ثانوي والجامعة وصوت كاسيت الأتوبيس المخروش، اللي ولا فارق مع السقف والتنطيط على إيقاع مراسيل مراسيل ودباديبو والجلابية الطوبي وشوقنا..

العيال كبرت، مدرسة المشاغيين، المتزوجون، ربا وسكينة، سيدتي الجميلة، سك على بناتك اللي وجودهم وانت بتقلب في التلفزيون -في أي وقت -مالوش غير معنى واحد.

أقف واتفرج حتى لو لسه مخلصهم حالاً على قناة تانية.

ريحة اللافندر والخمس خمسات والأولد سبايس اللي دايماً موجودة في  
خلفية ذكرياتنا عن أبهاتنا.

علبة الرابسو والسافو وإزازه النستابون المرتبطين باختراعات الطفولة  
لإحلال سائل بلالين الصابون بعد ما يخلص اللي في العلبة.

ياااااااااااه على كل الحاجات الصغيرة اللي دايماً كان ليها علاقة وسبب  
مباشر في لحظات السعادة.

كل تفصيلة من دول، وكل لحظة سعادة من دول - كان دايماً فيه حد واقف  
وراها. دايماً كان فيه حد بيخلق ويصنع كل اللحظات دي، علشان يسبب  
لعمرنا خلفية. موسيقية ساعات، ولونية ساعات، وصوتية ساعات تانية وحتى  
ريحة وملمس في أوقات تالته!!

المهم إن النتيجة دايماً إن ذكرياتنا بقالها طول الوقت بعد ثاني وتالت يرن  
في دماغنا، ويلسع روحنا، وينكش مشاعرنا أول المؤثر ده ما يعدي ولا حد  
يدوس عليه.

آه وربنا زي مابؤلكوا كده.

بالكوا ! لزمين ولايد الناس اللي كانوا ورا تجسيم ذكرياتنا دول يتشكروا  
بالأوي. آه بجد زي مابؤلكوا كده. لازم نشد على إيديهم وناخداهم حزن  
مطارات كمان، إنهم إدوا أوقاتنا وذكرياتنا صوت وطعم وريحة.

شكراً لكل الناس الجدعان والحلوين اللي عملوا في أيامنا عمايل حلوة.

شكراً عمرو دياب، شكراً فريد شوقي، شكراً عبد الوهاب، شكراً عادل  
إمام، شكراً يوسف شاهين، شكراً محمود مختار، شكراً قسمة  
والشبراويشي، شكراً عمر أفندي، شكراً نجيب الريحاني، شكراً داوود عبد  
السيد، شكراً عمر خيرت، شكراً مجدي يعقوب، شكراً فاتن حمامة.

ياللا دشنوا هاشتاج # شكراً لكل الناس اللي موجودين في خلفية أيامكم  
الحلوة وكانوا سبب في تجسيم وتشكيل ذكرياتكم.

اشكروهم وافتكروا اللطافة والبهجة اللي أضافوها لحياتنا.

بجد زي مابؤلكوا كده.

## عاملة النظافة

قالك يا سيدي: إنه في بلاد البن والمهرجانات، كان فيه بنوتة لطيفة.. حظها من التعليم مكانش قد كده، ومستواها الاجتماعي راخر مكانش قد كده، قوم إيه اضطرت تشتغل عاملة نظافة !!

كناسة يا ولداه في الشوارع، كل يوم تسحب المقشة والجاروف والصندوق، وعلى الله تطلع عالشارع والا المنطقة اللي شغالة فيها.. تكنس وتطوق وتعبي في زبالة في الصندوق، وأهي ماشية.

بس البت الشهادة لله روحها حلوة.. مبتسمة على طول وبشوشة، ولإنهم في الناحية الثانية من العالم، مايشروطش إن علشان شغلانتك بسيطة إنك تبقى كل عيشتك مضروبة بالنار، فالبنت كانت عادي ليها صحاب وعندها عدم المؤاخذة بوي فريند، لأ وبتحوش كمان علشان تخش الجامعة ولما يسألوها كان نفسك تبقى إيه؟ تقولهم: عارضة أزياء!

وبطبيعة الحال متواصلة مع السوشيال ميديا، بس هيا مش فيسبوكاوية أوي، كانت غاوية أنستجرام الشابة!!

أي والنبى زي ما بؤلكوا كده، كناسة وغاوية أنستجرام -والنبى تعوض علينا عوض الصابرين- القصد، الشابة مقضياها.

سلفيات وبوز بطة وبوز وزه. ده غير حلم الموديل اللي بيلعب في دماغها، قوم كل يوم تعمل حركة جديدة، يوم تربط منديل ملون على رقبته وتتصور، ويوم تشبك وردة في الكاب بتاع اليونيفورم وتتصور، ويوم تحط فيونكة في المكنسة، ويوم تمسك شنطة لوي فيتون -مضروبة- على اليونيفورم البرتقاني بتاع الشغل ويوم تلزق قلوب وفراشات على صندوق الزبالة.

كل ده وهات يا تصوير وتغريق للأكونت على أنستجرام.

والناس عاجباهم الكناسة المتفائلة اللي بتحط فول ميكب وتتصور بشكل جديد كل يوم مع المكنسة والجاروف والصندوق واليونيفورم البرتقاني.

بقى عندها فلورز كثير، نص مليون يا مؤمن !! وخلال 3 شهور بقت من مشاهير أنستجرام في الولاية كلها.



هوب السوشيال ميديا تلعب لعبتها، وهوب الزهر يلعب وتوصل أخبار المزة  
لأكبر دار أزياء في البرازيل.

والباقي معروف طبعًا.

سندريلا صحيت الصبح لاقث روحها متجوزة الأمير، وصاحبتنا صحيت لقت  
روحها الصبح موديل مشهورة، لأ وكمان جيالها عروض تشتغل موديل في  
باريس رأسًا.

والنبي زي مابؤلكوا كده.

الحكاية خلتنى أفكر في حكاية مثل سمعناه كثير ولا عمرناش طبقناه.

مثل بيقولك: إن ماعملتش اللي بتحبه حب اللي بتعمله.

حب شغلتك الغلسة يمكن تكون سكة توصلك للشغل اللي نفسك تشتغله.

حب مديرك الغتيت، يمكن لو حبيته تصاحبه وغلاسته تتحول لمجرد سماجة  
بسيطة تقدر تتعاطى معاها.. حب زميلك الغلاوي الأصفراوي، يمكن لما تحبه  
تعرف سر نفسنته، أو على الأقل يمكن تأمن شره.

حب مشاوير الشوننج مع المدام والزيارات العائلية السخيفة وأخدان الزبالة  
معاك وانت نازل.. أهو إن مالقتش فيها فايده ماتبقاش عملتها وانت متكدر!

انزل نص ساعة بدري واعمل حسابك على نص ساعة ترجعها متأخر و stuck  
في الزحمة بأه براحتك وقولها عامل حسابي وانت مطلعها لسانك.

بس ابقى دخله بسرعة إلا مش هتعرف تبرر موقفك، الصراحة وانت  
لوحذك ومطلع لسانك في نص الشارع.. وابقى قابلني لما حد يصدق إنك  
مطلع لسانك للزحمة !!

المهم إنك تعرف تهندل الظروف الوحشة.

ما هو زي مابؤلكوا كده.

هتعانده مع السيئ هيبقى أسوأ، هتتعاطى معاه هترتاح، والسيئ إن ما بقاش  
حسن أهو هيبقى أقل سوء.

# عن المأیطة والمتأیطین

المأیطة.. والمأیطة تعبير شبه مندثر، مقصود بیه مجموعة ممارسات بمارسها البشر علی بعضهم بغرض عکننة الآخر وتطلیع البلاء علی جتته. آه والنعمة زي ما بؤلکوا کده.

ينتشر الممأیطون علی السوشیال میدیا انتشار النار فی الهشیم والبوکیمون فی وسط البلد.

الکائن المئیاط یتمیز عادة بجهل مدقع، اللی هو الأی کیو بتاعه یقترب من أی کیو مفتاح علبة البلویف.

الکائن المئیاط برضو راشق بقرونه فی أی مصیبة، تطیق عملي لمقولة (أرملة وجایة فی أی مصلحة) مع ضحكة رقیعة.

المأیطة فی حد ذاتها کفعل، هی مزیج بین السداغة والتدخل فی شئون الغیر مع لمحة سماجة وحة حقد وحسد غیر مخفیین. کل ده بیخرج فی صورة نقد لأدائک وتصرفاتک.

آه والنبي حاجة نیلة أوی زي ما بؤلکوا کده.

خد مثلاً تبقي عامل الواجب مع حد من زمایلک واللا صحابک فی جواز واللا خلفه، وإذ فجأة تلاقی الکائن المئیاط طالع یمأیطک فی صورة کلام من نوعیة:

ممممم إنتوا صحاب أینعم، بس لازمته إیه کل ده؟ کتیر کده یا عم کان کفاية مبروک وخلص؟! هو کان جابلك إیه فی فرحک؟ ده معزمش حد أصلاً! وهکذا..

یفصل یمارس النوع ده من المأیطة علی حاجة مالوش فیها، ولا خسر ولا کسب فیها ولا تفرق معاه ولا مع اللی خلفوه بأی شکل من الأشکال - لحد ما یوصلک لمرحلة إنک لا تبقي طایقه ولا طایق صاحبک ولا طایق نفسک ولا طایق مناخیرک علی وشک.

حاجة لعنة والنبي زي ما بؤلکوا کده.

مرة حزب ما أو كيان ما، واحد من أعضاءه-اللي أداؤه مكانش على هوى الكيان- مات الله يرحمه، قوم نزلوا بيان ينعوه يقولوا فيه ما معناه..

أهو مات الله يرحموا بأه عاللي عمله، أصله كان وكان وكان بس مات بأه، الله يرحمه، ياما عمل وسوى بس مات بأه، الله يرحمه، حاجة كده : سامي ده كان روعي روعي روعي بس كان حرامي وإيده طويلة.

وربنا زي مابؤلكوا كده. المأيطه وصلت حتى للأموات اللي ماسلموش من الممايطين.

الكائن ده كمان يعز يعرف نواقصك وغلطاتك، ومايوجهاكش بيها ولا يعرفك إنه عرفها. يشيلهاك بأه لوقت عوزه. يلبدك بيها في الدرة وهوب يطلعلك.. آه والنبى زي مابقولك كده.

يوم تنسى وتروح الشغل بدقن طويلة مثلاً، مديرك لو من النوع المئياط مش هيقولك إنه أخذ باله.

بس وانت مروح هيقولك : إبقى نام بدري علشان تلحق تصحى تحلق دقنك! ثاني يوم لما تروح هيقولك كويس إنك حلقت دقنك، شوية وبديك شغل عمله، ويقولك بس بسرعة علشان تلحق تروح وتحلق دقنك، وابقى ابعت الإيميل بس اوعى تبعته من غير ما تحلق دقنك.

وهكذا تستمر المأيطه حسب طولة بال واحد فيكم يا هوا يزهدق يا انت تقطع شرايينك.

الكائنات دي وجودهم في الحياة جحيم حقيقي، واختبار دائم لقدرتك عالصبر. وطولة البال. وبلغ الغضب.

المصيبة إنك لا بتبقى عارف تواجههم ولا تخلص منهم. لإن البعدا عليهم سماجة تكفي حي بحاله.

اهرب من محيطهم بأي شكل. خد ديلك في سنانك واجري وارحم أعصابك ومرارتك واحتفظ بتوازنك النفسي خارج محيطهم.

اجري بجد، شمع الفتلة واهرب.. وربنا زي مابؤلك كده.

## فاطمة

فاطمة !! بس هو ماينفعلش نقول اسمها كده من غير ألقاب، هي صاحبة السمو الملكي الأميرة فاطمة إسماعيل. وإسماعيل ده مش أي إسماعيل، ده الخديوي إسماعيل بجلالة قدره. الراجل اللي اتسودت في حقه عشرات المجلدات، ما بين عالم رافعا لسابع سما، وغيرهم خاسفين به سابع أرض.

بس أبو السباع مش موضوعنا. خلونا في بطة.

الأميرة فاطمة، واللي منكم غاوي جوجلة. لو دخل على جوجل وكتب الأميرة فاطمة إسماعيل، هتظهرله أكثر من صورة لسموها. السمة الغالبة في أكثر الصور دي إنها فاتنة بمقاييس هذا العصر.

فساتين فيكتورية غاية في الأناقة والفخامة والفخفة. قطعة الفساتين اللي كانت بتتفصل بأربع أتواب قماش كاملة. تطريز ودانتلات وحرير وحاجة آخر أبهة.

ممتلئة القوام قليلاً علامة العز والفخفة في العصر ده، وبعد كده تقريباً مش هتشوف تفاصيل كتير لصاحبة الصورة من كم المجوهرات اللي لابساها. القلادة بس اللي لابساها ألباسها ألباسها من الكتف للكتف. والتاج اللي لابساها أكبر من محيط راسها شخصياً، غير البروش اللي مغطي مساحة الصدر كلها تقريباً.

بنت الخديوي إسماعيل يا خونا يا خونا لأ وפטومة كمان كانت دلوعة أبوها، وأقرب بناته لقلبه، لدرجة إن مجموعة فاطمة إسماعيل مسجلة كأنفس مجموعة جواهر امتلكتها امرأة في العالم !!

آه والنعمة زي ما بقولكوا كده.. عقبالنا وعقبال السامعين جميعاً.

من نوادر البرنسيصة فاطمة برضو إن المقريري لما زار القاهرة زارها وقت فرحها هي واخوها على ولاد عمهم.

قعد الراجل يوصف ويسهب في فستانها وكوشتها وجواهرها أربع صفحات كاملين.

اللي يشوف ويسمع كده يقولك بس يا معلم. ولاد الذينا اللي كانوا ناهبينها ومصين خيرها ومستعبدين أهلها بس الحقيقة غير كده.

البرنسيسة فاطمة إسماعيل خيرها يمكن يكون على غالبية اللي بيسمعونا  
دلوقتي!!

آه والله زي مابقولكوا كده. اشترخوا مني بس.

الست دي يا سيدي يعود ليها الفضل الأكبر في إنشاء الجامعة المصرية!  
آه والنبي.. أصلها يا سيدي كانت غاوية تعليم وتعز العلم زي عنيا.. وابوها  
متعلم بره ورباهم عالنمط الأوربي وسمحهم بالاطلاع.

قوم الصبية تقول ازاي بلد أجمل من أوروبا وأرقى منها زي مصر المحروسة  
مايكونش فيها جامعة.

قوم هوب تتبرع بأرض من ممتلكاتها وتوقفها لإنشاء الجامعة الأهلية  
المصرية!

يتحمس مثقفو مصر للفكرة ويبدءوا في عمل الاكتتاب العام لإنشاء الجامعة  
وفعلًا يبدأ الاكتتاب وتبدأ عملية البناء. هوب فلوس الاكتتاب تخلص والمباني  
لسه في نصها.

يجروا على الست فاطمة. تسكت! لأ فشر! تجيب الشكومية وتطلع  
مجموعة من أنفس مجوهراتها، وتعرضها للمزايدة في أكبر صالات باريس  
علشان تجيب أكبر مبلغ ممكن، وفعلًا تمن المجوهرات ييجيب تكلفة بناء  
الجامعة وأكثر ويتم افتتاح الجامعة في حفل ضخم.

بس التقاليد تمنع صاحبة الفضل الكبير في إنشاء الجامعة من الحضور،  
فيقوم وفد من كبار أمناء الجامعة يروحوا لقصرها ويقفوا تحت شباكها يهتفوا  
بفضلها.

ويتم تشييد تمثال نصفي للست الجدعة في مدخل البهو الرئيسي للجامعة  
الأهلية اللي بقت حاليًا.. جامعة القاهرة.

آه والنبي زي مابقولكوا كده.

مش دايمًا الغني بيطلع الشرير بتاع الفيلم في الآخر.. القاعدة أصلًا إن  
الغني هو اللي بيساهم في تنمية مجتمعه وخلق فرص ازدهاره مش مص دمه  
وإفقاره.

وتوتة توتة تخلص حكاية الأميرة فاطمة الجدعة.

الجدعة بزيادة زي مابؤلكوا كده.

## حكاية فيلم فاطمة

كان يا ما كان فيه ست اسمها نور الهدى محمد سلطان.  
أبوها هو محمد باشا سلطان رئيس أول مجلس نواب في تاريخ مصر وقائم  
مقام الحضرة الخديوية على الصعيد.

وكان واحد من مؤيدي ثورة عرابي في الأول ولما لقي الدنيا داخله على  
عك وعلى ألوان غامقة.. خلع وركن جنب الخديوي.

المهم نور الهدى دي تبقى هي هدى شعراوي.

أيون هدى شعراوي محررة المرأة المصرية.

والست اللي ناضلت علشان تعليم البنت وخلع الحجاب.. ومساواة الرجال  
مع المرأة إلى آخر كل الكلام الجميل الحلو اللي ممكن تسمعه أو تقرأه في  
الكتب.

المهم هدى شعراوي جوزها كان علي باشا شعراوي عين أعيان المنيا وواحد  
من أقطاب الوفد المصري.

المهم يا سيدي.

هدى كان عندها ولد اسمه محمد.

حاجة كده ماقولكش.

تعليم إيه.

شياكة إيه.

فلوس إيه.

المهم محمد ده طب وقع في حب مطربة اسمها فاطمة سري.

وبعد مداولات وحركات غزل من النوع القديم.. قدر يتجوزها بس عرفي.

لحد كده والحدوتة مالناش فيها.

المهم الست فاطمة سري بقت حامل.. وهوب أخونا محمد عمل من بنها  
وخلع.

الست فاطمة خلفت بنت وبقت الحدوتة مالهاش ملامح.

وجوزها محمد ابن علي باشا شعراوي عامل مش واخذ باله.  
قامت عملت إيه؟

نشرت قصته مسلسلة في الجرايد.

بالأسامي يا حاج.. والدنيا ولعت.

والبلد كلها بتتكلم عن محمد شعراوي ابن هدى شعراوي اللي اتجوز مطربة  
وليه بنت ومش عايز يعترف بيها.

وهوب الحدوتة انتشرت.

قوم الست هدي شعراوي داعية تحرير المرأة تعمل موقف نص كم  
الصراحة، تضغط على ابنها إنه ميعترفش بالبنت ويقطع الإقرار اللي كتبه  
على نفسه بأن فاطمة سري مراته واللي في بطنها يبقى ثمرة جوازهم.

ما هو مش معقول حفيد محمد باشا سلطان وابن علي باشا شعراوي يتجوز  
مطربة؟

الله وتحرير المرأة يا ست هدى؟

بلاش، المساواة يا ماما؟

إنسى يا معلم.

وكلفت المحامي أحمد بك الهلباوي إنه يرفع قضية على فاطمة سري.

كمان!!

وكان محامي فاطمة سري هو فكري بك أباطة.

وكانت خناقة في المحاكم.

الحدوتة بدأت في منتصف العشرينات.

وقعدت في المحاكم قول ثلاث أربع سنين.

والجرايد أكلت عيش بالحلاوة على حس القضية دي.

وهدى شعراوي كل يوم تقفش أكثر على فاطمة سري.

لحد ما حكمت المحكمة بإن ليلي هي بنت محمد علي شعراوي.

وفي يوم تسليم البنت لابوها.

هدى شعراوي قتلت آخر حنة نور في صورة داعية تحرير المرأة.

اشترطت إن الأم مش هتشوف بنتها أبدًا.

ووافقت الأم علشان بنتها تعيش عيشة كويسة.  
ولحد ما ماتت الأم في التمانينات مكانتش شافت بنتها.  
وهما اللي قالولنا كده ومش عارفين ده حصل بجد ولا لأ.  
وبعدين جه مصطفى أمين وكتب الحدوتة في فيلم عنوانه «فاطمة» للسيدة  
أم كلثوم.  
وكان في الأربعينات.  
ولما الفيلم اتعرض صحى الجرح القديم.  
بس الناس نسيت فاطمة سري.  
ونسيت اللي عملته هدى شعراوي.  
ما هو على رأي عمنا نجيب محفوظ..  
آفة حارتنا النسيان.. هيبويه زي ما بؤلك كده.





أقل مسلسل يا ولدي ما بيخيطيش عتبه أقل من 500 نفر، وده المسلسل الملموم اللي عالقد. حاجة كده النفر فيها بتا ومناول. مش الـ wow يعني.

الـ 500 نفر دول بـ 500 عيلة، وشوف العيلة كام نفر وكام حنك مفتوح.

يالا مش مشكلة يشوفولهم صنعة تانية. اللي يتشرد يتشرد واللي يسرح بفوطة صفرا في الإشارات يسرح، واللي يثبت حضرتك في الشارع وياخد اللي في جيبك مش مشكلة هيرزقوا.

زي ما بؤلك كده. أمال لما ينقطع عيشهم هيعملوا إيه؟ هيسموا عليك اظن؟ وبما إن مافيش إنتاج، يبقى مافيش إعلانات. أو فيه استيراد لمسلسلات أجنبي سواء خليجي ولا سوري ولا لبناني ولا مكسيكي ولا تركي ولا من بلاد تركب الأفيال.

وتمن المسلسلات بدل ما يدخل جيب شركة الإنتاج، والموظف والعامل المصري يروح للمنتج الأجنبي.

الدعاية والإعلانات بأه بدل ما تتباع على حس المنتج المصري تتوزع على حس المنتج الأجنبي برضو.

أهو الحمد لله نبقى خسرنا الجلد والسقط.

انبي ياخويا يا حلو انت يا عنترى يا بتاع المقاطعة ماخدتش بالك أبدا من كلمة (إنتاج) مسلسل!

كلمة إنتاج دي ماخرمتش وذن الأبعد؟ إنتاج يعني منتج، يعني صناعة، يعني بضاعة مصرية الصنع.

عملية إنتاج كاملة شغلت صناع وصناعية.

بضاعة مصرية مطلوبة من المحيط للخليج، بنتجها بقرش ونبيعها بقرشين. دخل ليك وليا وللبلد.

بضاعة تفرحك -المفروض- لأنها منتج من منتجات بلدك، ومنتج مطلوب ومضمون التسويق وناجح !!

تكره تشوف إنتاج بلدك ناجح ومكسر الدنيا وبيتباع وبيتدفع فيه عملة صعبة وسهلة؟!

تكره تشوف مجال شغال فيه ولاد بلدك وبيقبضوا ويفتحوا بيوت.. وبالتالي بينعكس ده على شغلك وتجارتك وصناعتك انت كمان؟!

ده احنا بنتنشق يا جدع على منتج ينجح ويتسوق ويجيب إعلانات ويعمل  
ضجة ويسوق على حسه منتجين ثلاثة كمان!!  
انت بجد ولا بتهزر؟! انت ابن مين يا ض!

# قرميدان أو قررة ميدان

شوف يا عزيزي.. شوفي يا عزيزتي.  
تاريخ مصر كلها ممكن نعرفه من شوارعها.  
من تاريخ ميادينها.  
حاجة كده لما أقولك اسم شارع طبيعي تعرفي منه جزء من تاريخ مصر.  
بالك انت بقى بالميادين.  
وانت قاعد كده بتتفرج على فيلم «جعلوني مجرمًا» أكيد هتسمع إن البطل  
كان في قرميدان.  
وأفلام تانية هتسمع فيه اسم قرميدان.  
اللي هو إيه بقى قرميدان؟  
تعالى وانا أقولك حكاية قرميدان بالتفصيل.  
شوف يا سيدي، لما صلاح الدين بنى القلعة وكان فيه مركز حكم مصر، كان  
قصاده ميدان جميل.. مش جميل أوووي يعني.  
كان واسع وبراح.. كان اسمه الرميطة.  
ولما السلطان حسن بنى الجامع بتاعه شكل الميدان بقى متحدد وواضح.  
المهم يا سيدي.  
الميدان ده كان اسمه الرميطة زي ما قولنا.  
وبعدين بقى اسمه «قررة ميدان» وقررة يعني اسود بالتركية، وميدان يعني  
ميدان مش محتاجة مفهومية.  
المهم قررة ميدان يعني الميدان الأسود.  
يا ساتر ليه السواد ده بقى؟  
لأن في زمن المماليك السلطان لما كان يغضب على مملوك كان بيتقتل  
في الميدان ده.  
والميدان ده شخصيًا شاف إعدام ناس كثير.

منهم على سبيل المثال مش الحصر، السيد محمد كريم قائد وزعيم المقاومة المصرية في الإسكندرية ضد الغزو الفرنسي.

الراجل ده اتعدم في قلب الميدان وسط الناس علشان يكون عبرة للمصريين.

بس على مين موته أذكى روح الثورة في المصريين.

المهم الميدان فضل موجود وكل يوم بتزيد أهميته.

لأنه الميدان اللي بيخرج منه المحمل بتاع كسوة الكعبة.

وهو الميدان اللي بتحصل فيه مسابقات الخيل ونطاح الكباش ومناقرة الديوك.

وهو الميدان اللي بتحصل فيه خناقات الممالك على السلطة.

وهو الميدان اللي اتبنى فيه أول سجن عمومي في مصر.

وهو سجن مصر أو سجن قرميدان.

والسجن بدأ إنشائه في سنة 1898 وانتهى الإنشاء في سنة 1900.

وقراميدان ده شاف كثير، شاف مجرمين وقتالين قتلة، وشاف كتاب وسياسيين.

يعني مثلاً دخله محمد التابعي أمير الصحافة بتهمة قذف وسب مأمور مركز السنبلوين.

وقعد في الحبس أربع شهور في قرميدان.

ودخله كاتبتنا عباس محمود العقاد وغيره من الكتاب.

وقرميدان كسجن انتهى كرمز يوم ما قرر السادات هدمه وطلع مكانه جنيينة ومركز شباب، بس للأمانة الميدان على مدى تاريخه شاف توسعات كثير.

يعني مثلاً فيه مبرة مصطفى كامل اللي بتضم رفات الزعيم مصطفى كامل والزعيم محمد فريد.

والمؤرخ المحسوب على الحزب الوطني ومن أنصار مصطفى كامل، المؤرخ عبد الرحمن الرافي.

والميدان فيه الإدارة الصحية لحي الخليفة كمان وطبعًا قسم الخليفة، الميدان كان مليون حياة وتفاصيل.

لكن من أول عهد إسماعيل باشا خديوي مصر.

الميدان أهميته قلت لأن ميدان عابدين بقى هو الأهم.  
لأن مركز الحكم بقى قريب منه.  
ومع الوقت اختفى اسم ميدان الرميطة.  
وقرة ميدان.  
وبقى اسمه ميدان القلعة.  
وفقد أهميته مع زحف الزحمة وعربيات الميكروباص والتوك توك.  
وكإننا مصممين نهدر تاريخنا.  
ده ميدان الرميطة.. ده كل اللي زاره زمان كتب فيه كلام ولا اللي بيكتب عن  
ميدان الطرف الأغر.  
بس هنقول إيه.  
أدي مصر، وادي ناسها.  
وادي تاريخها اللي بنضيعه بمنتهى الاستخفاف.  
آه والله يا أخي زي ما بؤلك كده.

# كوبري أبو العلا

مصر دي غريبة يا أخي.

النيل يفصل ما بين الزمالك وأبو العلا.

شارع القصر العيني يفصل بين حي المنيرة وحي جاردن سيتي.

كل حاجة واضحة، متقسمة، معروفة.

القصد، كان زمان كده فيه أفلام عربي فيها مشاهد كباري وقطارات وجو جميل كده.

وكان كوبري أبو العلا أشهر كوبري بتتصور عليه مشاهد سينما.

الكوبري ده مبقاش موجود على أرض الواقع للأمانة يعني.

ناس بتقول متكوم خردة الصدا بياكل فيه.

وناس تقولك اتباع خردة لمصانع الحديد والصلب.

ما بين موجود، وما بين اتباع فيه قصة عن الكوبري ده لازم تتقال.

بصوا بقى.

أول حاجة الكوبري ده مش من تصميم إيفل المهندس الفرنسي المشهور اللي صمم برج إيفل في باريس.

إيفل صمم حاجات تانية في مصر زي كوبري نجع حمادي القديم.

الكوبري المعلق اللي في جنينة الحيوانات اللي في الجيزة.

لكن كوبري أبو العلا بالتحديد مش من تصميم إيفل.

الكوبري من تصميم شركة فرنساوية اسمها «فيف ليل».

الشركة دي كانت متخصصة في الإنشاءات الحديدية، وقدمت عرض

للحكومة المصرية ضمن شركات تانية لتصميم وتنفيذ كوبري أبو العلا.

المهم بدأ إنشاء الكوبري في عام 1908.. وتم افتتاحه في سنة 1912.

والجزء المتحرك منه كان من تنفيذ شركة أمريكية.

الكوبري كان تحفة معمارية تليق بجمال مصر أيامها.

ولما قررت الحكومة المصرية فك الكوبري وعمل كوبري أكبر وأوسع.  
بس للأمانة أيامها قالوا هيختاروا مكان جميل كده ويركبوا الكوبري تاني،  
علشان يبقى مرسم.. ما تعرف.

مكان ثقافي.. ما تفهم.

بس اللي انا عارفاه وفاهماه إن الكوبري اختفى من على النيل، ومحدث  
عارف له طريق جره.

يا عالم كوبري بتصميم فريد وشكل معماري مميز يترمي على الأرض.

المهم، كوبري أبو العلا افتتح في زمن الخديوي عباس حلمي الثاني.  
وفضل شغال بكفاءة وكان ملتقى العشاق والحببية، ومعلم من معالم  
القاهرة لحد ما راح في الوبا.

بس يا سيدي افكر والفكرة أمانة، إن في مدينة ليون الفرنسية موجود  
الأرشييف الهندسي اللي من ضمنه تصميمات شركة «فيف ليل»، اللي  
صممت الكوبري.

هناك في ليون موجود في حدود 300 لوحة هندسية لكوبري  
أبو العلا.. لوحات هندسية بحجم متر في متر، بتوثق لمراحل تصميم وتنفيذ  
الكوبري.

غير لوحات تانية لكباري مصرية نفذتها نفس الشركة.

يا جماعة اللوحات دي كنز.

لو أخذنا منها نسخ وركبنا الكوبري تاني وحولناه لمتحف هبقى عملنا حاجة  
مفيدة للبلد دي.

وقدمنا هدية للأجيال الجايه.

بس الصراحة انا مش واثقة.

مش واثقة إن فيه حد مهتم بتراث البلد.

ولا حد فارق معاه كوبري أبو العلا ولا كوبري مهمشة حتى احنا عايشين في  
زمن بناكل فيه تراثنا ونبيعه خرده كمان.

زمن مش عارفين فيه نحافظ على الحاجات اللي سابها جدودنا.

ولا عارفين نعمل حاجة كويسة نسيبها للي جاين ورانا.



القصد من كلامي.. إنه كان عندنا كوبري جميل وتحفة لو في أي بلد ثاني كانوا عملوا عليه فرح.

كان عندنا كوبري تصميمه فريد وراح بس نقول إيه. ربنا قادر يرجع الغايب والبلد دي فيها اللي أكيد في يوم هيفتكر كوبري أبوالعلا، وهيجب له حقه. آه والله زي ما بؤلك كده.

## ماتخصنيش

في ليلة رمضانية لطيفة كنت قاعدة كده بتسلى في الحاجات اللي بالكوا فيها، إشي حبة مكسرات على كام حته كنافه، أربع خمس سبع عشر قطايفات مايضروش، يعني حاجات صُغنة كده علشان الدايت مايبوظش.

القصد ماطولش عليكم.. قولوا طولتي.. إلا واتفاجئلكوا بمشهد يوقف الكنافه بالمانجة في الزور.

يااللهول، الواد المبدع اللي اسمه محمد ممدوح، عفاً البت المبدعة دينا الشربيني على كتفه اليمين، والواد الرضيع المبدع راخر في إيده الشمال، وهوب رماهم على باب أوضة مراد وقاله الجملة اللي بالدراما بتاعة الشهر كله:

الحاجات دي تخصك ماتخصنيش.

يا قوة الله.

عظمة على عظمة على عظمة يا كل المبدعين. كاتب ومخرج ومصور وإنتاج وممثل ومزيكا وإضاءة واكسسوار وحتى عامل البوفيه. أبدعتوا ومتعتوا وأبهرتوا الصراحة.

بس بعيد عن المسلسل العظيم، واصطف العمل العظيم اللي محتاج تسويد صفحات وصفحات في تحليله ونقده، وبعيد عن حالة النيرفانا العامة اللي اتسبب فيها (جراند أوتيل ) لكل اللي شافه وحضره.. لكن المشهد ده بالأخص -وبغض النظر عن الزروطة اللي اتسببت فيها الكنافه بالمانجا- وقفني قصاده كتير أوي. أخذني لحتت أبعد. أخذني للتطبيق العملي للموقف.

تخيل لو قررت في لحظة ما إنك ترجع كل حاجة لصحابها.

تصحى الصبح، وانت نازل تفوت على جارك اللي فوق منك. صباح الخير وتروح ساحب مكنسة بالكهربا ورازع متورها في ودنه نص ساعة متواصل. ومن تحت باطك تطلعله أربع عيال يجروا ويدبذبوا فوق دماغه وتقوله : اقعد بالعافية.. الحاجات دي تخصك ماتخصنيش.

وانت نازل تخط عاللي جنب منك. صباح الخير، كيس الزبالة اللي جنب بيتي ده يخصك ما يخصنيش.

تنزل الشارع، تجيب بلدوزر يشيل العربية اللي سادة باب الجراج. ويحطها نايمة على سيفها وتكتب نوت ظريف لصاحبها على الإزاز : الركنة المتخلفة تخصك ماتخصنيش.

تمشي بالعربية تدخل في طريقك، تلاقي واحد جاي عكس الاتجاه وانت لسه في أول الشارع. بمنتهى الهدوء تقوله : دخولك في الممنوع، رخصك، مايخصنيش، ارجع بقفاك الشارع كله.

تروح الشغل، تقابل زميلك الاصفراوي تاخذ نفسنته وكلامه اللي في ضهرك وأسافينه وسواده وحقده ترميه على مكتبه وتقوله : البلاوي دي تخصك ماتخصنيش.

زميلك الثاني يبجي يرمي همه وقلة حيلته وعجزه وخيبة أمله وفشله على كتافك ! هوب تشيلهم وفي كيسه سمرا كده علشان مايتنظروش وتديهمله وهو نازل وتقوله : الطاقة السلبية دي تخصك ماتخصنيش.

وهكذا.. كل واحد يشيل شيلته يا جماعة، هنفصل مخدوعين في (ورد) لحد إمتى؟؟

كلنا عندنا نموذج (ورد) ده كثير أوي في حياتنا. العالم اللي بيستغلونا لآخر قطرة. العالم اللي بيمتصوا أرواحنا وطاقتنا. البشر اللي تديهم صباغك ياكلوك كلك مش ذراعك وبس. الناس دي عاوزة مننا إيه يا منى؟؟!

رجعوا لكل واحد بلاويه. ماتشيلوش أتب حد فوق ضهوركم. ضهورنا مليانة ومعيبة، وشيلة كل واحد مكفياه وفايضة وجياله الكافية.

ماتسمحوش لحد باستغلالكم تحت مسميات العشم والكسوف والمعلش والعيب والمايصحش.

الناس دي ماتعرفش العيب، والعيب بجد هو اللي بيعملوه فينا. استغلالك ده يخصك مايخصنيش.

## ميدان عابدين

مصر فيها شوارع بأسماء ناس محدش يعرفهم.  
وميادين مهمة محدش فكر يسأل : مين ده؟  
عندك مثلاً ميدان عابدين سابقاً «الجمهورية حالياً».  
مين عابدين ده يا عالم؟  
مين عابدين اللي اسمه اتحط على أهم ميدان فيكي يا بلد في زمن  
الخدوية والسلطنة والمملكة والجمهورية كمان؟  
مين عابدين ده يا اخوانا؟  
الحكاية بدأت سنة 1872 لما قرر الخديوي إسماعيل إنه يبني قصر يليق بيه  
كخديوي لمصر.  
قصر كده محترم وشيك وواسع ويبعد عن قلعة صلاح الدين.  
واختار حته كده حلوة قريبة من بركة الفراعين.  
وكان على ضفاف البركة قصر صغير بناه الأمير عابدين اللي كان أحد قادة  
الألوية السلطانية العثمانية.  
أهو عابدين ده بقى هو اللي اسمه ارتبط بالقصر.  
المهم عمنا الخديوي إسماعيل اشتغل على القصر اللي طلع حاجة فخيمة  
كده.  
بس مع الوقت واستمرار البناء ارتبط اسم القصر الجديد باسم مالك القصر  
القديم، اللي هو مين؟ أيوووه عابدين.  
المهم القصر خلص والدنيا بقت حلاوة والميدان اللي قدام القصر بقى أهم  
ميدان فيكي يا بلد.  
الميدان ده شهد أحداث مهمة يا اخوانا.  
يعني مثلاً، الميدان ده شاف أول مظاهرة عسكرية ضد سلطة الخديوي.  
يوم ما راح أحمد عرابي ومعاه زمايله الضباط وقدم عريضة للخديوي فيها  
عدد من مطالب الضباط المصريين.

وللأمانة التاريخية يعني.

الصورة الشهيرة اللي بنشوف عرابي راكب فيها حصانه والخدوي واقف على الأرض.

فيه ناس قالت محصلتش وناس قالت حصلت.

بس أحمد شفيق باشا صاحب مذكرات «مذكراتي في نصف قرن» وهو واحد من رجالات الخديوي، قال إنها حصلت وإن الخديوي لما شاف عرابي كابس عليه بحصانه ورافع سيفه أمره ينزل من على الحصان ويغمد سيفه لأنه في الحضرة الخديوية.

وعرابي نفسه أكد الكلام ده في مذكراته.

المهم دي كانت أول مظاهرة يشوفها ميدان عابدين، وبعدها بكام سنة الميدان شاف مظاهرة عسكرية، بس المرة دي من قوات الاحتلال الإنجليزي.

وكانت المظاهرة اللي اتعرفت في التاريخ بحادث 4 فبراير 1942 لما أجبرت قوات الاحتلال الملك فاروق إنه يعزل الحكومة الحالية ويجب النحاس باشا رئيس للحكومة.

وهو بردو ميدان عابدين اللي شاف الدبابات وهي بتحاصره يوم 23 يوليو 1952.

لما قامت الحركة «المباركة».

اللي بقت بعد كده ثورة يوليو «المجيدة».

المهم الميدان ده فضل مهم في تاريخنا السياسي والدليل إن معظم خطابات ناصر المهمة على مدار تاريخه اتقالت في ميدان عابدين.

وهو الميدان اللي الجماهير جريت عليه بعد خطاب التنحي بتطالب عبد الناصر بالبقاء، وقيادة مصر في حرب التحرير.

الميدان كان كتلة من النشاط.

كتلة من التاريخ الحي.

بس مع نقل مقر الحكم من قصر عابدين لقصر القبة، الدنيا اتغيرت.. والميدان حالته اتدهورت.

ما هو ده الطبيعي الميدان مبقاش مهم.

ولا حد مهم بيعدى من عنده ليه، نهتم بيه؟

ليه نخلى بالننا منه؟

ليه نهتم بالتاريخ اللي حضره وكان شاهد عليه؟

علشان كده الميدان مبقاش واسع، بقى أضيق من علبة السمونة.

والورش بقت بتحاصره من كل النواحي.

وبعد ما كان من أجمل ميادين مصر اتحول لواحد من أضيق ميادين مصر.

وكأننا يا أخي مصممين إننا كل يوم ننسى التاريخ ونضيعه.

وكأن لسان حالنا بيقول : الله جاب، الله خد، الله عليه العوض.

# هنا القاهرة

مين ما تفتح إذاعة البرنامج العام لازم هتسمع عبارة «هنا القاهرة». عبارة مشهورة.. عبارة مهمة تحسسك مين ما تروح إن مصر معاك وانت معاها.

بس العبارة البسيطة دي، السهلة في النطق، العميقة في التعبير، ورا منها قصة طويلة ومهمة، قصة تستحق إننا نحكيها ببساطة. شوف يا سيدي، يوم 31 مايو 1934، وبالتحديد الساعة خمسة ونص العصر كده، بدأ أول بث للإذاعة المصرية. وطلع صوت حلو كده بيقول «هنا راديو الإذاعة المصرية الملكية اللاسلكية.. هنا القاهرة».

وعلى ثاني يوم بقت عبارة هنا القاهرة على كل لسان، وتم اعتماد العبارة دي في الإذاعة، وبقت حاجة كده زي التريد مارك. المهم اللي قال العبارة دي هو المذيع الشاب أيامها أحمد سالم. وأحمد سالم من مواليد 1910، ودرس الهندسة في بريطانيا، وأول واحد ساق طائرة من لندن للقاهرة مباشرة.

وأول مدير كمان للقسم العربي للإذاعة المصرية. الراجل ده حدوته لوحدها يتعمل فيلم ممكن، مسلسل جايز. المهم أحمد سالم كان بردو أول مدير لاستديو مصر. وصاحب فكرة فيلم «سلامة في خير» لعننا نجيب الريحاني. وكان صاحب فكرة إنتاج أول فيلم لأم كلثوم. وأول واحد يطالب بدبلجة الأفلام الأجنبية علشان يحافظ على اللغة المصرية.

الصراحة الراجل كان مجتهد بشكل غريب. مثل أفلام، وأخرج أفلام، وأنتج أفلام.

كان كتلة من النشاط والحيوية على الصعيد العملي، وعلى الصعيد النسائي برده.

اتجوز أسمهان ومديحة يسري وتحية كاريوكا.  
وهو اللي اكتشف كاميليا وقدمها للسينما المصرية.  
كان حدوته باقولكم.

المهم مات أحمد سالم في نهاية الأربعينات بعد ما شغل الدنيا بحدوته  
محاولة انتحاره، ومحاولة قتله لأسمهان بالضرب بالنار.  
وكانت ليلة وادخل فيها القصر الملكي، وكانت قصة واللي ساعد على  
قفلها موت أسمهان شخصياً في حادثة عربية.  
وبموت أحمد سالم انتهت أسطوره، آه ناس كثير متعرفوش، ولا تفتكر  
شكله إلا لو افتكرت فيلم «الماضي المجهول» للست ليلي مراد.  
بس مش دي القضية.

اللي فضل لنا من أحمد سالم عبارة «هنا القاهرة».  
لحد ما حصل العدوان الثلاثي على مصر.

يومها الطائرات الإنجليزية ضربت محطة الإرسال الإذاعي في أبو زعبل.  
وبقت مصر من غير محطة بث.

قامت إذاعة دمشق في نفس توقيت بداية بث إذاعة مصر، عملت حركة  
بتقول إننا واحد ومصيرنا واحد.  
يومها خرج المذيع السوري وهو يقول من قلبه : هنا إذاعة دمشق.. هنا  
القاهرة.

وانتهى العدوان الثلاثي على مفيش، وانتهت محاولة لوي دراع مصر.

بس للأمانة «هنا القاهرة» مخلصتش ولا انتهت.

لما تقعد كده مع نفسك وتسرح هو ليه القاهرة مدينة الألف مئذنة.  
مدينة الحرافيش والأبواب المفتوحة.

مدينة الزحمة والناس المستعجلة.

قادرة تصمد قصاد كل اللي بيحصل لها ويبجري حواليتها.

الصراحة الإجابة الوحيدة الممكنة هي : ناسها.



وعلى رأي عمنا يوسف شاهين لما قال «القاهرة منورة بأهلها».  
آه يا أخي القاهرة دي حدوتة مش من ألف سنة، لا دي حدوتة ملايين الناس  
اللي عدوا عليها، وعشقوها وعاشوا فيها واستحملوها زي ما استحملتهم.  
آه يا أخي زي ما بؤلك كده.

